

中華民國廿五年三月

這是一本最好的書



明末漢奸列傳

附叛臣傳

二六七十一二

國民政府軍事委員會印行

明末漢奸列傳

附
臣
傳
叛

上海图书馆藏书



A541 212 0022 9465B

明末漢奸列傳序


(原名貳臣傳)

清乾隆四十一年十二月。詔於國史內增立貳臣傳。並諭及「錢謙益反側貪鄙。尤宜據事直書。以示傳信。」又四十三年二月諭云。「錢謙益素行不端。及明祚既移。率先歸命。……進退無據。若與洪承疇等同列貳臣傳。不示差等。又何以昭彰瘴。錢謙益應列入乙編。俾斧鉞凜然。合於春秋之義焉。」嗚呼。一部喪節醜史。且分等級而嚴義例。爲漢奸者。讀此當如冷水澆背矣。顧亭林云。「明之亡。亡於士大夫之無恥。」今觀此書。卽其明證。滿清入關。利用以漢制漢。手段最爲毒辣。時承明季魏璫亂後。廉恥道喪。朝野茶然。漢人每多墜其彀中。其間尤以巨奸洪承疇最爲賣力。傾滅祖國。皆其一手造成。至於錢謙益。在晚明負三朝物望。率先迎降。一時

士類。影響殊大。竊歎此輩漢奸。有大功於清室。而其結果。祇博得貳臣頭銜。並詆爲「不齒於人類。可鄙可恥」。本傳見錢氏遺臭千秋。懸爲炯鑑。清酋不掩飾之。不迴護之。反從而吐棄之。醜詆之。嗚呼。大義昭諸天壤。公道具在人心。無可誣也。且不如是。則殉國赴難如史可法。周遇吉輩。失其輝光矣。所關顧不重哉。曩余提倡「新生活運動」。嘗舉管子禮義廉恥之說。以告國人。誠以禮義廉恥乃我民族固有之美德。數千年來。浸淫灌漬。深入人心。故我民族所表現者。卽在富貴不能淫。貧賤不能移。威武不能屈。賴有此美德。爲民族精神生命所寄託。邇者國難嚴重。而士夫氣節。日益銷沈。非僅若洪錢輩。偏於環境。希圖苟免。而借寇自重。賣國求榮。興高彩烈。甘爲虎俵。晚明無恥之遺風。至此而有每况愈下之歎。孟子曰。「城郭不完。兵甲不多。非國之災也。田野不辟。貨財不聚。非國之害也。上無禮。下無

學賊民興。喪無日矣。」誠爲確論。此書所載明臣降清者。計一百二十人。都爲十二卷。既可爲史料參考之資。尤足以發人深省。惟此書原名貳臣傳。其稱貳臣。在滿清則然。自我族視之。前史所謂奸叛而已。因改名爲「明末漢奸列傳」。並將卷末所附之逆臣傳改爲「叛臣傳」。蓋因其初時叛明。已喪臣節。不關後此之逆抗滿清也。庶於名實更能符合云。

中華民國二十五年一月蔣中正序。



明末漢奸列傳 序

明末漢奸列傳

(原名貳臣傳)

卷一

劉良臣 子洪澤附

孫定遼

孔有德

王鰲永

馬得功

郝効忠

王正志

徐一范

徐勇

卷二

李永芳

孟喬芳

張存仁

祖可法

劉武元

尙可喜

明末漢奸列傳

目錄

卷三

洪承疇

劉芳名

李國英

卷四

張勇

祝世昌

鮑承先

王世選

鄧長春

祖澤潤 弟祖澤溥附

祖澤洪

耿仲明

全節

卷五

祖大壽

吳汝玠

王宏祚

李化熙

衛周允

宋權

任溶

卷六

徐起元

張煊

胡茂楨

孔希貴

高第

李鑑

曹溶

田確

賈漢復

馬寧

張天祿
弟天福附

常進功

卷七

盧光祖

高進庫

霍達

吳六奇

明末漢奸列傳

目錄

明末漢奸列傳 目錄

陳世凱

馬光遠

沈志祥

左夢庚

趙之龍

劉良左

孫得功

許定國

謝陞

卷八

金之俊

胡世安

田維嘉

沈維炳

黃圖安

高斗光

房可壯

劉漢儒

王永吉

王鐸
子無黨附

梁雲構

劉應賓

苗胙土

卷九

張鳳祥

吳偉業

夏成德

吳惟華

陳之遴

劉正宗

李若琳

謝啓光

孫之獬

馮銓

卷十

李魯生

王國寶

魯國男

周亮工

錢謙益

魏瑄

潘士良

李猶龍

王之綱

任珍

唐通

董學禮

卷十一

陳名夏

白廣恩

南一魁

孫可望

白文選

黨崇雅

梁湖標

衛周祚

戴明說

劉昌

柳寅東

卷十二

陳之龍

駱養性

張若麟

方大猷

高爾儼

張縉彥

龔鼎孳

薛所蘊

李元鼎

葉初春

張忻
子張子端附

劉餘祐

孫承澤

傅景星

熊文舉

明末漢奸列傳 目錄

明末漢奸列傳卷一

劉良臣列傳

劉良臣直隸人。明遊擊。守大凌河。本朝天聰五年。隨總兵祖大壽等來降。八年。敘投誠功。授三等輕車都尉。隸漢軍鑲黃旗。順治元年。授三等參領。二年。遷山西甯武關副將。三年。擢甘肅總兵。加都督同知。四年二月。疏言甘肅軍餉向例。本折各半。折色仰給蘭州。今州庫空虛。須赴西安關領。計鎮標歲支折色銀十六萬二百餘兩。現餉久缺。甘肅至西安幾三千里。往返數月。非早給不能應用。又向例銀七錢三。搭放更多腳費。請敕部議免搭制錢。將餉銀早發。再鎮屬自河西達嘉峪。邊長二千餘里。兼之海番松番西番等衆納貢。番回所至盤踞。分布未周。查經制合鎮官軍二萬六百五十。近又增西協兵千名。分駐城堡。臣自莊浪涼州至甘州相視地勢。見有官兵駐守。不合機宜者。如莊

屬阿霸等。涼屬鎮番等營。昔衝今緩。應移防衝要。不必加兵增餉防守。皆得實用。下部議行。五年。甘肅逆回米喇仰作亂。良臣被執死之。八年。特贈右都督。雍正八年入祀忠祠。子澤洪明副將。順治二年隨其伯父良佐投誠。五年。授二等輕車都尉世職。九年。襲其父所遺三等輕車都尉。併爲二等男爵。康熙三十四年卒。子俊德襲。

孫定遼列傳

孫定遼遼陽人。明副將。守大凌河。本朝天聰五年。隨總兵祖大壽等降。賜銀幣鞍馬橐韃器用諸物。尋授副都統。隸廂紅旂漢軍。七年。大軍克松山。詔大凌河諸降將有兄弟妻子在松山錦州者。俱給完聚。定遼初降時。其從役二人私逃。人謂定遼遺歸明。上不問。至是論及之。定遼疏言。臣奉諭。始知十二年來負此大罪。荷恩不問。今松山錦州既克。正臣心可白之日。逃去二人。未曾在臣家。如他處察獲。亦可嚴鞫實情。上慰答之。順治元年。隨征山西。取太原府。尋隨豫親王多鐸征江南。取揚州江陰。三年五月。敍功予

騎都尉世職。七月。授湖廣提督。初。流賊張獻忠裨將王光恩降明爲鄖陽總兵。大兵定湖北。光恩投誠。卽以原官留鎮。至是以鄖襄道李之綱劾其結連土賊陳蛟。恣行貪暴事。逮問。其弟光泰遂叛。自稱明鎮武伯。偕弟昌科黨掠襄陽。四年五月。殺荆南道甘文奎。守道劉開文。襄陽知府楊攢。推官李實發。襄陽知縣潘朝佐。副將楊文富。參將漆向友。都司袁捷。刼倉庫。縱獄囚。返踞鄖陽。殺知府董有聲。同知劉璇。張有芳。推官孫楊聲。鄖陽縣知縣趙承禎。竹山知縣童士勤。保康知縣薛溥。典史雷之縉。勢益猖獗。結陝西叛鎮賀珍。武大定等爲援。定遼在武昌聞變。率兵援鄖陽。遇賊安陽口。力戰。賊追至河灣。定遂且濟且戰。中流矢。馬蹶。沒於河。遊擊李顯功趨援不及。並爲賊害。總督羅繡錦巡按曹叶卜先後疏聞。自文奎至顯功十七人。贈廢有差。定遼贈左都督。賜祭葬如例。晉世職三等輕車都尉。以其兄之子登高襲。雍正三年。定遼及文奎等入祀昭忠祠。

孔有德列傳

孔有德遼東人。初與耿仲明爲明總兵。毛文龍部校。文龍善遇之。及文龍爲督師袁崇煥所殺。副將陳繼代領部衆。有德謂不足其事。偕仲明走登州。巡撫孫元化官遼久。謂遼人可用。奏授步兵左營參將。大兵圍大凌河急。元化令騎八百赴援。行數日。兵乏食。肆掠村堡。有德繩以法。兵益譁。小校李應元。參將李九成之子也。九成爲元化齎金市馬。耗其金。懼誅。遇應元於吳橋。欲倡叛。有德與合謀。還掠陵縣臨邑商河齊東德平青城新城。遂趨登州圍之。約仲明及都司陳光福內應。城破。以元化素有恩。勿殺。釋之。去收遼人三千餘。會旅順副將陳有時。廣陸島副將毛承祿亦叛。明來合。兵勢益壯。衆推有德爲王。有德曰。今方起事。何敢遽膺王號。衆強之。乃自稱都元帥。鑄印登壇。署官屬。九成爲副元帥。仲明有時承祿光福爲總兵官。應成爲副將。四出攻掠。明以保定天津昌平諸鎮兵會勦。逾年弗能制。議用遼人之在甯遠者。使總兵祖大弼吳襄督之圍登州。九成有時出戰死。有德慮不支。遣部將來我朝納款。集戰艦突圍出。泛海過旅順口。明總兵黃龍以水師截擊。應元死於陣。承祿光福被擒。朝鮮兵復邀之於鴨綠江。天聰

七年四月。命諸貝勒統兵駐岸受降。明兵及朝鮮兵不及近。有德偕仲明携人衆輜重來歸。給田宅於遼陽。六月。召赴盛京。上帥諸貝勒出盛德門十里。至渾河岸。行抱見禮。親酌金卮勞之。賜敕印授都元帥。尋隨貝勒岳託征明旅順。破其城。黃龍自刎死。有德收遼人數百自屬。及還有德墜馬傷手。留遼陽諭慰之曰。都元帥遼道從戎。良亦勞苦。行間一切事宜。實獲朕心。至於贊襄招撫。尤大有裨益。不謂勞頓之身。又遭銜蹶之失。適聞痊可。大慰朕懷。又傳諭曰。卿所携紅衣大砲。已運至通遠堡矣。卽付卿令軍士時時演習。八年正月。上御殿命與八貝勒同列第一班行禮。遣官爲營第宅。有德疏辭曰。臣自歸附以來。蒙恩賜賚服物田宅。已極周渥。今更勞睿慮。爲臣治宇。臣心實切不安。惟願皇上勉圖進取。俾中原底定。民庶康寧。斯時以華屋賜臣。臣乃受之。無愧也。奉旨。進取之事。難以預料。惟仰賴上天之垂祐耳。若得如所言。天下底定。更有酬庸之典。今爲營第宅。聊示優異。其勿辭。三月。詔定有德軍營纛旂之制。以白鑲皂。別於滿洲及舊滿軍。號天祐兵。四月。因有德於朝臣往來遼陽者。悉躬迎款宴。諭止之。並令禮部凡

有德遣使詣盛京。給館餼。八月從上征明。由大同入邊。擊敗敵騎於代州城西。俘斬甚衆。九年。有德以新附人民日衆。偕仲明輸糧助餉。上以歸附人民。糧已足用。卻之。崇德元年四月。封恭順王。十二月。獲大礮及輜重。從上征朝鮮。敗其援兵。二年。隨武英郡王阿濟格攻克慶島。賜蟒服銀幣。先是旅順之役。諸貝勒疏言。有德仲明所屬將士。當投誠時。爭佔官廩。及富家宅。藉稱戚屬。多取俘獲人戶。上以求歸未久。置勿問。至是復有言其部衆違法妄行者。諭令申嚴約束。毋蹈故轍。三年。上征明錦州。有德偕仲明及智順王尙可喜。都統石廷柱。馬光遠等。以神威將軍礮攻克錦州城西臺戚家石家諸堡。又招降大福堡。賜所俘獲。四年。從征松山。砲擊毀城堞。明守將金國鳳乘夜葺拒益力。有德議鑿地道攻之。明總兵祖大壽自錦州遣蒙古兵三百入城。多方防禦。不能鑿。我兵遂還。六年。率兵更番圍錦州。破明兵於杏山。七年。賜服物及降戶。時漢軍始分八旗。有德請以衆部隸漢軍。於是隸正紅旂。八年。從大軍取明中後所前屯衛。順治元年四月。隨諸王貝勒入山海關。擊敗流賊李自成。追勦至望都。十月。上御皇極門宴賚之。尋

以豫親王多鐸爲定國大將軍。有德率兵從。二年。破白成於潼關。遂定西安。移師下揚州。江甯。分克江陰縣。乃班師。賚貂裘蟒服良馬黃金百兩。白金萬兩。命還鎮遼陽。操兵馬。俟調遣。三年。授平南大將軍。征湖南。並諭仲明可喜受節制。初。自成棄西安走襄陽。武昌。竄死九宮山。其黨李錦高必正郝搖旂王進才蘭養成牛有勇袁宗第劉體純等衆數十萬。走長沙常德。爲明巡撫何騰蛟招降。請於桂王朱由榔。授總兵。與舊將黃朝宣楊國棟李茂功黃晉興蕭曠姚有性張光壁劉承允董英曹志建分據湖南。由榔以武岡爲奉天府。自桂林徙居之。有德至岳州。進兵長沙。擊走進才。殲其衆。下湘潭。敗朝宣兵。克衡州。斬朝宣。及其四子。取祁陽。進克寶慶。斬茂功。晉興。及步騎萬餘。遂薄武岡。由榔與騰蛟走桂林。承允英降。光壁集沅州萬餘衆拒戰。副都統藍拜等破之。取沅州。分兵克靖州。斬曠有性。五年。克辰州。湖南諸郡邑底定。進平廣西全州。並招降興安灌陽銅仁苗峒二百餘。奉詔班師。宴勞。賚黑狐紫貂冠服彩帛鞍馬黃金二百兩。白金五千兩。六年三月。賜金冊金甲。改封定南王。命統兵征廣西。携家駐衡州。先是有德自湖

南班師。南昌總兵金聲桓。廣東提督李成棟相繼叛。湖南郡邑復爲錦搖旂進才宗第等侵據。上命鄭親王濟爾哈朗。順承郡王勒克德渾。統兵討之。恢復長沙衡州寶慶諸郡。而馬進忠猶據武岡。進忠者。明季流賊十三家之一。自稱混十萬。明將左良玉招降之。良玉死。歸由榔爲總兵。至是與其黨曹志建鄭恩愛劉祿胡光榮林國瑞黃順祖向文明等。寇擾靖州永州郴州。窺寶慶。十月。有德至衡州。遣副將董英何進勝斬思愛於燕子窩。自督兵永州擊走賊衆數萬。俘斬過半。七年正月。攻武岡。陣擒祿光榮等。進忠負創遠竄。武岡靖州俱復。志建踞龍虎關。有德移兵永州。分布攻圍。大破之。擒國瑞順祖於興寧。文明率衆五萬降。捷聞。傳旨嘉獎。十二月。有德拔桂林。由榔先遁。擒捉其王侯官屬四百餘。桂林平樂二府底定。八年正月。有德奏移薊屬駐桂林。尋遣總兵馬蛟麟等進克郴州梧州二府。象州馬平雒容柳城融縣懷遠蒼梧藤縣容縣岑溪懷集北流諸縣悉平。復遣總兵線國安馬雄全節分三路進取。有德赴廣州廉州策應。恢闢思恩南寧慶遠諸郡。九年四月。有德疏言。臣荷先帝節錄微勞。錫以王爵。恭遇聖主當陽。

正四海永清之日。南粵東西八閩。尙未全歸版圖。臣謬辱廷推。駐防閩海。同時有固辭粵西之役者。蓋因其地最荒僻。民少山多。百蠻雜處。諸孽環集。底定難驟期也。臣自念受恩至渥。必遠關巖疆。始敢伸首邱夙願。故毅然以粵西爲請。受命以來。道過湖南。伏莽猶蔓延六郡。拮据一載。咸與掃除。乃進征粵西。仰藉威靈。所向克捷。賊黨或竄或降。雖土司猺獠狼獾。古稱叛順靡常者。亦漸次招徠。受我戎索。粵西業已底定。臣生長北方。與南荒煙瘴不習。每解衣自視。刀箭癍痕。宛如刻劃。風雨之夕。骨痛痰湧。一昏幾絕。臣年邁子幼。乞聖恩垂鑒。卽敕能臣受代。俾臣得早覲天顏。優游綠野。疏入。奉旨。覽王奏。悉知功苦。但南疆未盡寧謐。還須少留。以俟大康。先是有德以黔賊孫可望附桂王。窺伺楚粵。請敕勦撫將軍續順公沈永忠撥重兵駐防沅州。以扼楚粵門戶。復令線國安全節馬雄分守南寧慶遠梧州。未幾桂王將李定國白文選陷沅州。靖州武岡。永忠自寶慶告急。有德遣兵赴援。至全州。永忠已棄寶慶。退湘潭。七月。定國由間道逼桂林。時城中守兵無多。賊晝夜環攻。有德登城禦。爲矢中額。仍指揮擊賊。及聞城北山嶺已

爲賊踞。令家衆舉火焚室。曰。城亡與亡。大義也。遂自縊。事聞。上震悼。謚武壯。大兵復桂林。女四貞以櫬歸京師。賜祭葬。立碑墓道。給四貞白金萬兩。竝視郡主食俸。復諭禮部。曰。定南武壯王孔有德航海來歸。屢建功績。迨朕平定天下。有德勦巨寇。靖南服。開闢廣西。勤勞茂著。不意桂林之役。衆寡不敵。精忠自矢。竟以身殉。義烈允彰。應立祠致祭。於是部議立祠。春秋致祭。以其妻白氏李氏陪祀。皆殉節桂林者。一子名廷訓。當桂林陷時。爲定國掠去。十六年。大兵定雲南。隨征總兵李茹春。舊爲有德護衛。訪知廷訓於十五年十二月。爲定國所殺。乃收其骸骨。乞歸葬。奉旨。定南王子久陷滇中。尙冀大兵克取。來京有日。據奏。慘遭逆害。深可憫惻。下部議卹。特予祭葬。

王鰲永列傳

王鰲永。山東臨淄人。明天啓五年進士。累官鄖陽巡撫。崇禎時。張獻忠犯興安。鰲永防江陵。大學士楊嗣昌督師。好自用。每失機宜。鰲永嘗規之。不聽。遂奏罷鰲永。鰲永上書

於朝曰。嗣昌用兵一年。蕩平未奉。此非謀慮不長。正由躁心太甚。天下事總挈大綱。則易獨用。萬日則難。况賊情瞬息更變。今舉數千里征伐。機宜盡出嗣昌一人。文牒往來。動踰旬月。坐失事機。無怪乎經年不戰也。臣愚以爲陛下之任嗣昌。不必令其與諸將同功罪。但責其提衡諸將之功罪。嗣昌馭諸將。不必人人授以機宜。但覈其機宜之當否。則嗣昌心有餘閒。自能辦賊。疏入。不報。後嗣昌敗。授鰲永戶部右侍郎。時有主事蔣臣請行鈔法。歲造三千萬貫。每貫價一兩。歲可得銀三千萬兩。鰲永贊行之。特設內寶鈔局。未幾。復除通州巡撫。流賊李自成陷京師。鰲永被持索。輸銀乃釋。本朝順治元年五月。投誠。六月。睿親王令以戶部侍郎兼工部侍郎銜。招撫山東河南。鰲永請以井陘道方大猷。員外郎張愼言。主事胡之彬。潘臣等偕往。疏言。重兵屯集京畿。籌餉維艱。自畿南山東河南要地。有八宜。各移兵駐鎮。俟秋爽。大兵進勦。闖賊就近調度。可北控潼關。南扼武關。得旨允行。鰲永至德州。同都統覺羅巴哈納。石廷柱等。擊走自成餘黨。尋赴濟南。遣官分路招撫。疏言。東省士民愿歸附。特以盜賊充斥。無由達。請簡巡撫司道。

各官以慰僉望。又薦明大學士謝陞。並得旨如所請。尋命方大猷爲山東巡撫。巴哈納等移師征山西。鰲永同大猷及登萊巡撫陳錦。沂州總兵夏成德。膠州副將柯永盛等。綏輯山東郡縣。勦餘賊。八月疏報濟南東昌泰安兗州青州諸屬邑俱歸順。復遣官由廣平大名招降彰德衛輝懷慶開封歸德五府。齎明德王朱由弼衡王朱由檄降表以聞。是時明福王朱由崧據江南。以劉澤清爲東平伯。鎮廬州。澤清嘗任山東防海總兵。其舊部將楊盛踞登州萊州。自稱前鋒恢勦。副總兵肆焚掠。鰲永請敕大兵進勦。上命副都統和託李率泰討之。師未至。鰲永先赴青州備芻餉。會土賊張輿僞稱總鎮大元帥踞高密作亂。永盛率青州駐防兵往勦。有趙應元者。自成裨將也。敗竄長清縣。窺青州。兵少。十月率衆僞降。旣入城。遂肆掠。蜂集鰲永官廨縛之。鰲永罵賊不屈。遂遇害。和託等至。斬應元。事聞。得旨。王鰲永招撫著勞。盡節死難。宜予旌卹。於是贈戶部尙書。賜祭葬如例。授其子樛騎都尉世職。隸廂藍旂漢軍。後以襲次滿停襲。乾隆十五年。特予恩騎尉。世襲罔替。以鰲永四世孫作亮襲。

馬得功列傳

馬得功遼東人。明總兵。本朝順治二年。豫親王多鐸下江南。明福王朱由崧遁蕪湖。護軍統領圖賴邀其去路。得功同總兵田雄縛福王及其妃來獻。王令以原銜從征。尋授鎮江總兵。隸漢軍鑲黃旗。時江寧初定。明瑞昌王朱誼泐潛據城外花山龍潭一帶。糾衆散搭。三年九月。與其經略韋爾韜總兵楊三貫王朗生謝宏之姜雲甫等謀犯江甯。事洩。遁鎮江。得功追獲誼泐於五巷。爾韜等均就擒。斬之。十一月。以濫收刼賊姚翼庭入伍。降一級調用。四年五月。用學士洪承疇奏請得功署副將。赴閩防禦。八月。隨浙閩總督張存仁勦建寧。邵武山賊。復松溪政和建陽崇安光澤等縣。駐防松溪。十一月。明魯王朱以海巡撫劉中藻陷慶元縣。得功同副將李榮援勦。復其城。六年正月。復永春縣。擒魯王總師兵部顏昌儒提督鄭瑛。總兵鄭岳等。平三百餘寨。進取虎豹關。復德化縣。平建寧府。五月。授右路總兵。加都督僉事。十二月。復南安縣。擒魯王將陳已。斬之。陳

奇竄入海。時有逆首林忠。結寨於雙坑等處。奇帥海賊援之。七年五月。得功擊斬奇。忠遁。九月。海賊鄭丹國據興化仙游惠安等處。得功擒丹國。並其黨趙子章。俘斬無算。八年。巡撫張學聖乘海賊鄭成功他出。令得功取廈門賊巢。賊奔回。復奪廈門。乘勢圍漳州。破海澄。得功敗退。守泉州。九年。同都統金礪解漳州圍。尋以得功前克廈門。貪取財物致敗。命拿交刑部鞠實。坐失守汛地罪。援赦免。十一年三月。敘前功。賜一品頂帶。八月。出鎮泉州。得功自陳功册三十餘次。且與田雄同投誠。今雄已授一等子爵。懇求世襲。下部議。授一等子爵。加都督同知。十三年二月。擢福建提督。七月。林忠復據永春德化尤溪大田等處。巡撫宜永貴令得功赴山進剿。閱十餘日。甫抵賊寨。聞海賊乘虛破閩安鎮。圍省城甚急。得功星馳。與城內兵夾攻。圍解。時賊已分兵陷連江縣。得功乘勝進剿。敗。分圍羅源之賊。復連江。賊退。據閩安。十四年。同浙閩總督李率泰等敗克之。十五年四月。成功統賊衆近泉州登岸。得功整兵衝殺賊遁。乘犯湖北。六月。得功疏言。賊出沒無常。今連艘北犯。勢必近寇溫台。遠及浙西。巢穴在閩。定屬空虛。宜上擊白沙。下

略沔州。分其北逞之勢。七月。克白沙。以捷聞。十六年二月。賊將黃昌統大艦百餘來犯洛陽內港。據長橋。得功奪橋。敗其衆。賊於廈門集砲臺拒敵。復敗之。賊黨黃色卿率衆據湄州犯峯尼。得功擒之。十七年。以病乞代。上慰留之。十八年三月。晉爵三等侯。勦平泉州諸賊林順沈彩王步等。六月。土寇揚意嘯聚同安。要截行旅。密營兵改裝匿械。斬意。七月。逆賊余思始張普等連海賊犯南安。調參將王承印撲勦。至彭溪。斬僞先鋒李鵬。降張普等。康熙元年。遷濱海居民於內地。擊敗阻遷海賊。二年。大兵進勦廈門。待功攻克烏沙。追賊出大洋。南風陡發。賊乘上流來戰。得功奮勇衝殺。歿於陣。總督李率泰以聞。得旨優卹。賜葬地。四年。恩賜一等侯。諡襄武。雍正七年。入祀昭忠祠。子三。奇襲爵。別有傳。

郝効忠列傳

郝効忠遼東人。明副將。隸左良玉部下。本朝順治二年。英親王阿濟格追流賊李自成

至九江。劾忠隨左夢庚迎降。王令署原官。與同降總兵惠登相入山搜勦。招撫僞都督王復遠萬餘人。隨大軍進取湖南。復武寧縣。尋隨總督佟養和鎮武昌。英親王班師隨入京。隸漢軍正白旗。五年。充湖南右路總兵。加都督僉事。尋敍投誠功。命授三等輕車都尉世職。七年。孫可望滇黔賊衆肆。劾忠遺參將馬如松擊敗之於托口。擒僞總兵李應元等。八年。可望等陷沅州。劾忠遣守備吳進功等堵勦。復親率兵進克黎平屯四鄉所。可望窺我兵少。突來犯。劾忠力戰。馬蹶被執。不屈。遂遇害。事聞。詔贈都督同知。雍正七年。命入祀昭忠祠。子爾德襲世職。

王正志列傳

王正志直隸靜海人。明崇禎元年進士。累官戶部左侍郎。本朝順治元年。大兵定京師。授原官。二年五月。改兵部右侍郎。巡視延綏疏言。榆鎮幅幘寥廓。素爲賊窟。較他鎮傷殘更甚。聞標兵二千餘已無存。請急撥餉招募。部議於西安庫支銀二萬。爲募兵糧餉。

十二月疏言。蠲膚施米脂二縣本年錢糧。詔如所請。三年正月。四川降賊賀珍復叛。應逆賊孫守法出棧道。陝西總督孟喬芳檄榆林總兵三挺。帥本鎮兵撲勦。正志疏言。延安土賊劉文炳。現聚衆千餘。窺伺鎮兵一出。恐賊乘隙。請先令挺殲文炳。然後往勦。得旨。土寇盤踞。自當速勦。聽相機便宜行事。九月。疏奏。綏德州安塞米脂清澗洛川各縣。冰雹蝗蝻爲災。籲恩蠲卹。得旨。免本年額賦之半。十一月。疏言。延綏鎮東西千二百餘里。南北千餘里。舊設東西中三協。分統營堡。各有專責。自順治二年。議裁中協。查中路自雙山至清平。共堡十。舊時保寧清平皆參將。今俱設守備與守堡各官。竝無副參。遇警。統馭無人。且各堡與套人止隔一邊牆。刻須嚴防。請仍設中協副將。駐波羅堡。另募兵千名。卽擇地方將領熟鍊者任之。以資保障。下部議行。六年二月。大同總兵姜瓖叛。正志遣參將王永強赴河防堵。永強密通賊。陷延安榆林等處。執正志。不屈。禁之。尋被賊絞死。並其子王麟。巡撫王爾性以聞。八年二月。特贈都察院右都御史。賜祭葬如例。

徐一范列傳

徐一范江南高淳人。明崇禎二年進士。官南京吏部郎中。本朝順治元年投誠。授禮部郎中。五年九月。授大同左衛兵備道。將之任。聞總兵姜瓖據城叛。兼程進趨馬邑。欲與從子馬邑縣知縣明弼謀討賊。至則賊黨環匝。一范以大義諭居民。賊怒。挺刃交加。至死。罵不絕口。七年六月。宣大總督佟養董疏言。姜逆倡亂雲鎮時。一范殉難可憐。請賜卹典。以慰忠魂。疏下所司。贈光祿寺少卿。廕一子入監讀書。八月。賜祭一壇。乾隆二十九年。入祀昭忠祠。

徐勇列傳

徐勇遼東人。初爲明巡撫何騰蛟裨將。後隸寧南侯左良玉部下官總兵。本朝順治二年。英親王阿濟格追流賊李自成。下九江。勇隨左夢庚迎降。王令署九江總兵。旋調鎮

黃州。時土賊黃拐子李聚馬等聚掠九江。自成餘黨踞黃州東山四十八寨。陰結商城固始諸賊煽亂。勇授策副將徐啓仁合九江總兵余世忠擊九江土賊。遂率兵勦白雲寨。賊首王光淑拒戰。勇令諸將東西夾擊。而自簡精銳。由中路進勦光淑。下馬擒之。其黨易道三率衆降。移師勦斗方寨。擒賊首周從助。降其衆。並招降劉婆等九十五寨。三年正月。叛將鄭廉齋明唐王朱聿鍵及騰蛟書招勇。勇執斬以聞。五月。僞總兵耿應衢周文江寇黃安麻城。勇率兵援。至塔子山。擊敗之。追擒文江。復與總兵祖可法張應祥會勦。降鄒墩大佛等三十二寨。應衢授首。命勇以署總兵鎮長沙。五年正月。叛鎮金聲桓據南昌。使約勇應援。勇斬之。五月。加都督僉事銜。實授長沙總兵。十月。安仁耒陽賊犯攸縣。勇遣參將李如龍擊之。擒僞總兵謝如香等。斬級三千餘。自成餘黨一隻虎降於騰蛟。糾衆窺長沙。勇沿江列砲。擊沉賊舟。稍退。復來犯。勇方督戰。中流矢仆。復甦。裹戰創愈奮。我兵以砲擊賊。斃其渠三人。日暮收兵。令將士銜枚守城。賊潛薄城下。甫樹梯砲。矢齊發。乃卻走。賊復掘濠穿城丈餘。幾墮。勇令增築水城。守禦益固。別鑿地道。掩

殺賊千餘。造懸樓十餘。飛矢以斷賊往來。密遣兵駕輕舟布列江濱。賊遂驚潰。會騰蛟亦遣將分襲永州寶慶衡州諸郡。勇疏言。長沙東西受敵。臣以兵三千。當賊數萬。卽嬰城固守。尙虞不足。請速益兵數千。以資攻戰。旣而一隻虎復集衆寇長沙。都統佟圖賴率兵赴援。一隻虎遁去。六年正月。勇遣人迎鄭親王濟爾哈朗軍赴長沙會勦。擒騰蛟於湘潭。五月。加都督同知銜。調良常總兵駐辰州。復疏言。辰常界連黔粵苗瑤雜處。賊寇出沒不常。前賴親王奮揚威武。騰蛟就擒。而一隻虎尙漏網。今親王旣奏班師。都統佟圖賴兵亦北調。賊黨牛萬才馬進忠王進才等猖獗無忌。蓋賊畏禁旅而不畏南兵。請救發八旂兵勦賊湖南。疏下所司議行。八年五月。敕功授一等輕車都尉。兼一雲騎尉。九年六月。流賊張獻忠餘黨孫可望附明桂王。遣黨掠沅州靜州武岡寶慶。突陷桂林。定南王孔有德死之。粵騷動。九月。桂王由與荊州僞侯張光翠總兵張景春窺辰州。屯荔溪。距城四十里。勇督將士渡江戰。約曰。成敗利鈍。在此一舉。倘有不測。勿復渡此江。於是參將張鵬遊擊吳光鼎等奮勇殺賊陣斬景春及其衆數百。生擒其將王忠

閻之美姜祚昌吳起順馬佩曹連期等。捷聞。諭曰。爾屢奏拒斬賊使。多有擒獲。司道府縣將領各官。誓死固守。忠壯可嘉。昨覽奏。以孤軍迎擊賊寇。殲戮無算。生擒僞官及賊衆甚多。獲僞印。僞劄。並器械馬匹。朕心嘉悅。已諭部從優議敘。爾宜益奮忠勇。誅渠殲黨。保固疆圉。以膺殊恩。十月。加左都督銜。晉爵二等男。賜冠服弓矢鞍馬。是時敬謹親王尼堪奉詔。率禁旅勦可望。未至。可望黨分踞寶慶武岡沅州四出攻掠。勇以兵三千守辰州。聲援絕。餉且匱。可望屢遣書誘降。勇輒斬其使。十一月。桂王將軍白文選賊衆五萬來犯。勇方督戰北門城樓。文選列象陣。突陷東門。勇率數騎巷戰。中創墮馬。復手刃數人。遂遇害。旣死。猶握刀不釋。或斷其手以去。妻曹氏。子祚泰及親屬遇害者三十九人。十一年八月。經略大學士洪承疇疏陳其事。得旨。徐勇屢著戰功。忠節殉難。闔門受害。深可憫惻。下所司議優卹。贈太子太保。晉爵二等男。賜祭葬。諡忠節。建祠江夏。以其兄之子自貴。襲爵。入籍武昌衛。乾隆三十二年。上念國初以來。綠旂官弁。致身疆場。折衝闔外者甚多。命核實其列以聞。於世職襲次滿時。照入旂之例。賞給恩騎尉。世襲。

明末漢奸列傳 卷一

罔替。徐勇與焉。

明末漢奸列傳卷二

李永芳列傳

李永芳遼東鐵嶺人。明萬歷四十一年。官遊擊。守撫順所。時葉赫貝勒錦台什布楊石遣人懇於明曰。哈達輝發烏拉三團。滿洲已盡取之。今復侵我。其意卽次侵明矣。明于是令遊擊馬時南周大岐率練習火器者千人爲葉赫守東西城。且遣使詣我朝言毋相侵。當修好罷兵。太祖高皇帝以書與明曰。昔葉赫哈達烏拉輝發科爾沁錫伯卦勒察珠舍哩訥殷九姓之國。於癸巳歲。合兵侵我。我是以興師禦之。天獻其辜。我師大捷。斬葉赫貝勒布齊。擒烏拉貝勒布占泰。仍遣之歸國。丁酉歲。刑馬歃血以盟。通婚媾。無忘舊好。詎意葉赫淪棄前盟。將已字之女。悔而不予。至布占泰。吾所恩育者也。反以德爲仇。故伐之而殲其兵。取其國。今布占泰逃奔葉赫。此吾所以征討葉赫也。與明國何

嫌何怨。而乃欲相侵耶。既作書。遂親往撫順所。永芳出城三里外。迎導入教場。太祖以書予之。乃返。未幾。明總兵張承廕立牌于我屯田界內之柴河三岔。撫按不容刈穫。巡撫李維翰又執我使臣剛古里吉納等。脅償越界採獲受戮之人。四月。本朝天命三年。是爲明萬歷四十六年。太祖書七大恨告天。始興師征明。以書諭永芳曰。爾明發兵疆外。禦助葉赫。我乃興師而來。汝撫順所一遊擊耳。縱戰亦必不勝。今諭汝降者。汝降。則我兵卽日深入。汝不降。是汝誤我深入之期也。汝素多才智。識時務人也。我國廣攬人。人稍堪驅策者。猶將舉而用之。結爲婚媾。况如汝者。有不更加優寵。與我一等大臣並列耶。汝降。俾汝職守如故。恩養汝。汝若戰。則我之矢豈能識汝也。必衆矢交集而死。旣無力制勝。死何益哉。且汝出城降。則我兵不入城。汝之士卒皆得安全。若我兵入城。則男婦老幼。必致驚潰。亦大不利于汝矣。勿謂朕虛聲恐喝而不信也。汝思區區一城。吾不能下。何用師爲。失此弗圖。悔無及也。其城中大小官吏兵民等。獻城來降時。保其父母妻子。以及親族。俱無離散。豈不甚善。降不降。汝熟計之。毋不忍一時之忿。違朕言。致

債事失機也。永芳奉諭。知大兵至。冠帶立城南門上。令軍士備守具。不移時。大兵樹雲梯登城。守陴者驚潰。永芳遂乘騎出降。我管旂大臣阿登引之謁。命收降城中人。及東州瑪哈丹二城。臺堡塞五百餘。守備王命印不降。就戮。張承廕自廣寧同遼陽副將顧廷相海州參將蒲世芳遊擊梁汝貴等。率兵萬赴援。皆歿于陣。上命毀撫順城。編降民千戶遷之興京。仍如明制。設大小官屬。授永芳爲副總兵。轄降衆。以上第七子貝勒阿巴泰女妻之。是年七月。從上征明。招清河副將鄒儲賢降。儲賢不從。同參將張旂率兵萬人戰死。城遂拔。四年。上統師取明鐵嶺城。六年。取瀋陽遼陽。永芳俱從征有功。擢總兵官。明巡撫王化貞及邊將累遣諜來誘。永芳執其人。并書以聞。上嘉獎。賜敕免死三次。天聰元年。因明將毛文龍結朝鮮。踞海島。命貝勒阿敏濟爾哈朗內大臣楊古利納禾泰等與永芳率師征朝鮮。諭以朝鮮理宜聲討。然非必欲取之。凡事相機度義而行。于是先攻克朝鮮義州。分兵征鐵山。擊走毛文龍。進克朝鮮定州安州。俘斬無算。師次平壤城。其官民皆遁。遂渡大同江。朝鮮王李倬遣使齎書來迎。諸貝勒得書。歷數其不

恭之罪。討以遣親信大臣謝罪誓盟。卽班師。師次黃州。李倬遣人馳告。卽有親信大臣來盟。貝勒阿敏仍欲進攻。永芳言于諸貝勒曰。我等奉上命秉義而行。前與朝鮮書已言若遣親信大臣謝罪誓盟。班師今若背前言不義。盍暫駐于此待之。諸貝勒皆是其言。獨阿敏怒叱永芳曰。爾蠻奴何得多言。我豈不能殺爾耶。遂進次平山。李貝所遣親信大臣及其弟原昌君李覺至。阿敏謂諸貝勒曰。吾常慕明朝皇帝。及朝鮮王所居城郭宮殿。無因得見。今旣近朝鮮國都。豈可不至而歸。當前往爲久居計耳。貝勒岳托濟爾哈朗阿濟格杜度皆以爲不可。卒如永芳前議。遣副將劉興祚等往盟而還。八年五月。分別諸臣功次。以永芳歸誠最先。予三等子爵。世襲罔替。是年卒。子九人。隸正藍旗漢軍。均授官。次子率泰官至大學士總督。第三子阿剛泰官至總兵。第五子巴顏襲世爵。官至副統。別有傳。

子孟喬芳列傳

孟喬芳永平人。明副將。罷職家居。本朝天聰四年。大兵克永平。喬芳降。詣御營朝見。上以金卮酌酒賜之。令以原官領降兵。隨諸貝勒駐永平。遣人往陽和偵探。明總兵祖大壽亦遣人至。喬芳所偵我兵多寡。喬芳縛以獻。尋隨大軍歸遼陽。隸漢軍管佐領事。五年。授刑部承政。予二等輕車都尉世職。崇德三年。更定官制。改刑部左參政。四年。兼正紅鑲紅兩旗漢軍副都統。七年。隨大軍圍明錦州。同都統金礦等克塔山城。是年分漢軍八旗。喬芳改鑲紅旗副都統。後遂爲漢軍鑲紅旗人。八年。有以貝勒羅洛渾家人奪金事訴者。喬芳置弗理。坐贍狗。降世職一等。十月。隨大兵征明。攻前屯衛中後所二城。竝克之。敘功加一雲騎尉。順治元年。從大軍入關。二年四月。授陝西總督。長安妖民胡守龍等造僞印作亂。喬芳遣副將陳德擒斬之。閏六月。疏言。秦省沿明陋習。各官蒞政。俱有鋪設繁費。累百姓。請嚴禁。詔如所請。時流賊張獻忠尙據四川。喬芳請於興安駐重兵。漢中增設巡撫。以扼其衝。疏下部議行。三年。寧夏兵變。殺巡撫焦安民。喬芳授計總兵劉芳名。斬首德王元馬德。別遣副將任璽。陳德王平等。勦賊賀珍。劉二虎。胡向宸。

於興安。挫賊衆。追斬向宸。敗孫守法於椒溝。平尺峯青嘴諸寨。復遣副將張勇劉友元擒賊賀宏器於安家川。五年四月。流賊一朵雲馬上飛等犯西鄉縣。喬芳遣任璽會漢羌總兵馳剿。斬僞監軍許不惑。及賊衆千餘。生擒一朵雲馬上飛。尋河西逆回米喇印。丁國棟作亂。渡河而東。連陷郡邑。薄鞏昌。喬芳率兵駐秦州。遣副將馬寧援鞏昌。令副將趙光瑞軍與賊大戰於廣武坡。逐北七十里。遂解鞏昌圍。時賊據內官營。及岷洮河三州。衆數萬。喬芳遣軍三路進。張勇敗賊於馬韓山。光瑞敗賊於梅川。擒僞將丁光射等。直抵內官營。岷洮河三州皆復。逆回退踞蘭州。喬芳與侍郎額色督兵攻下之。喇印國棟皆受撫。逾兩月。復踞甘州。叛。甘肅巡撫張文衛。西寧道林維造。參議張鵬翼。總兵劉良臣。副將毛鎰。潘雲鵬等。俱遇害。喬芳自蘭州渡河。馳赴甘州。與提督傅喀禪。協領羅畢大。總兵齊陞等。四面合攻不下。深溝堅壘以困之。賊食盡援絕。乃宵遁。喬芳遣兵馳剿。斬喇印于水泉。國棟復與纏頭賊王倫泰等踞肅州。出掠武威。張掖。酒泉地。喬芳遣張勇馬寧等攻破肅州。擒倫泰。國棟誅之。六年八月。大同叛鎮姜瓖黨虞允韓昭宣。

等糾衆三十萬陷蒲州。及臨晉猗氏等縣。喬芳同額色奉命赴山西會勦。自潼關渡趨蒲州。殲賊略盡。遂進兵臨晉猗氏。斬僞帥白璋。擒僞監軍道衛登方。復遣協領根特參領都敏副將狄應魁趙光瑞等分勦敗賊。斬虞允韓昭官。猗氏解州榮河等城俱後。乃還。十二月。興安賊何可亭踞箭峪階峪。出入剽掠。喬芳遣任璽勦平之。七年。遣趙光瑞等勦賊於合水縣。斬賊渠劉宏才。擒其僞軍師苗惠民。八年。遣遊擊陳明順敗賊何柴山於商州雒南縣。時賊渠孫守全糾川湖諸孽。踞柴陽山寨。喬芳先令遊擊仰九明偵防。復遣光瑞往會興安鎮兵合勦。擒斬僞將軍翹興寧趙定國謝天奇等。掃其巢。九年八月。入覲。加太子太保。詔馳驛還西安。先是敍平回賊功。加兵部尙書銜。晉世職爲一等輕車都尉。至是兩遇恩詔。晉三等男。十年二月。命兼督四川兵馬錢糧。疏請以重兵鎮守保寧漢中。分步兵五千。興屯廣元昭化之間。俾兵食有賴。又請於陝西四鎮分步兵二千。給帑備牛。種墾荒田。下部議行。五月。疏言。大軍進取全蜀。宜隨在留兵駐防。以樹干城而謀生聚。至進征之兵。請每名給馬三四。件丁一。携甲仗以利攸往。得旨。悉心

籌畫。具見爲國忠誠。深可嘉悅。十月。西寧孫家寨回民謀不軌。喬芳遣狄應魁馳勦。擒賊渠祁敖牙固子等。餘黨悉平。十一月。引疾乞休。詔以原官加少保。馳驛回京。十一月。遣內大臣奠茶酒。加贈太保。賜其家白金千兩。第宅一區。予賜祭葬如例。諡忠毅。雍正十年。詔入賢良祠。子熊弼襲世職。

張存仁列傳

張存仁遼陽人。明寧遠副將。守大凌河。本朝天聰五年。隨總兵祖大壽等來降。召見仍授副將。崇應元年。擢都察院承政。尋授一等男世職。三年。更定官制。改都察院右參政。四年。分漢軍四旗。存仁隸漢軍鑲藍旗。五年正月。疏請屯兵廣寧。扼寧遠錦州門戶。先是大壽降。請歸錦州爲內應。縱之去。旣而我師次錦州。大壽仍拒戰。四月。存仁疏言。臣覩今日情勢。圍困錦州。實爲上策。但略一易。以得利。圍城難以見功。必積日持久。截彼偵探。禁我逃亡。自有可乘之機。兵以全城爲上。蓋貴得人得地。不貴空城也。我師厭境。

彼必棄錦歸寧。再急。必棄寧歸關。今祖大壽背恩失信。人皆以爲無顏再降。臣知其本無定見。一當危急。束身歸命矣。况彼所恃者蒙古耳。今蒙古多慕聖化來歸。彼必疑而防之。防之嚴則思離。離則思變。伏願以屯糧爲務。布諭蒙古。多爲間謀。再以所擒土人縱之招撫。未有不相率來降歸者。此攻心之策。得人得地之術也。十二月又言。兵事有時有形有勢。三者變化無定。而用之在人。松山杏山塔山乃錦州之羽翼。寧遠之咽喉也。取其一城。則羽翼削而咽喉塞矣。六年。大軍屢敗明兵於松山杏山間。存仁復疏請相機度勢。速行攻取。悉採納之。七年。疏言。今松錦旣破。明督臣洪承疇就擒。鎮臣祖大壽歸降。凡明之將帥。孰不惶懼。惟總兵吳三桂尙在觀望。宜頒御劄於寧遠城中。詳示逆者必殺。順者必生。有不動其心者乎。上旋頒諭三桂及守寧遠諸將。存仁亦遵旨遣三桂書。言明氣運已衰。救錦圍而松杏受困。守一城而三城俱失。重臣大帥就俘投誠。將軍係祖氏甥。欲逃罪而責無可諉。欲明心而踪有可疑。大廈將傾。一木難支。縱苟延歲月。迨智竭力窮。終蹈舅氏故轍。何若未困先降。勳名俱重。幸速爲裁審。是年編漢軍

四旂爲八旂。授存仁鑲藍旂副都統。八年。隨鄭親王濟爾哈朗取前屯衛中後所二城。敘功加雲騎尉。順治元年。大軍定京師。命同都統葉臣招撫山西。攻太原。拔其城。又隨豫親王多鐸征河南江南。二年六月。大軍下浙江。存仁隨至杭州。遂管浙江總督事。城中居民逃避幾空。存仁集紳士慰諭撫綏。民復其所。七月。疏言。近有因薙髮思反。順爲逆者。若俟形迹顯著。必勞大兵勦捕。莫若速遣提學開科取士。免積逋。減額賦。則讀書者可希仕進。而逆志自消。力農者不苦追呼。而亂萌自戢。得旨。開科以取士。薄斂以勸農。誠安民急務。歸順各省。準照恩詔事例。一體遵行。十一月。授浙江福建總督。是時明魯王朱以海稱監國於紹興。令方國安鎮嚴州。福王閣部馬士英率兵依之。屢窺杭州。嘗擁兵渡錢塘紅。距城十里立五營。存仁同總兵官田雄等進擊。斬五百餘級。後士英偕國安復來犯。存仁同副都統濟寧哈等奮擊敗之。溺江死者無算。又昌化賊聚議。杭逆推姚志倬爲首。結國安據城爲患。二年。存仁遣副將張悉等進勦。志倬敗走。昌化復平。會端重親王博洛統師進征。明魯王遁。國安士英就擒。伏誅。浙閩漸以底定。十一月。

存仁疏言。錢塘要地。宜設水師五千。以備海寇。周霍芝據福州鎮東街。遣副將滿進忠等攻下其城。賊黨岑文高犯浦城。遣副將李繡等擊敗之。復遣副將馬成龍等據處州。大敗賊衆。復景寧雲和龍泉三縣。尋疏言。請解任。存仁蒞浙後。屢以疾乞休。至是得旨。俞允。五年二月。因代者未至。遣將收復連城順昌將樂三縣。擒斬魯王侍郎趙士晚。總兵黃鍾靈等。六年。起授直隸山東河南總督。有掄園巨寇爲害大名諸邑。存仁平之。七年。詔督撫按臣。考核守令文藝。存仁躬蒞各郡。其居官廉幹者。有一二語通曉。卽注上考。其餘文雖佳。亦抑之。監司請其故。存仁曰。文有僞。實難欺。專以文藝爲短長。恐反亂吏心耳。是年至九年。三遇恩詔。晉一等子。兼一雲騎尉。未幾卒。贈太子太保。廕一子入監。以其孫珽襲爵。賜祭塋如例。謚忠勤。入祀直隸山東河南浙江福建名宦祠。

祖可法列傳

祖可法遼東人。總兵祖大壽養子。初爲明副將。崇禎三年。隨大壽攻復灤川。四年。隨大

壽築城大凌河。未訖工。太宗文皇帝繞師圍之。城中食盡。大壽欲降。令可法宣親子遣遊擊韓陳送我軍爲質。與貝勒濟爾哈明兵託等相見。諸貝勒詢以死守空城何意。可法曰。恐屠戮降民。是以人皆畏縮。上於貧困者賑給衣食。富饒者秋毫無擾。寬化愛民之德。遠近聞之。然我國之人猶不信。諸貝勒盟畢。仍令入城。明日。隨大壽暨副將劉天祿張存仁祖澤潤祖澤洪韓大勳等率衆來降。命大壽仍還錦州。可法偕諸降將隨諸貝勒赴盛京。諸貝勒更番日給供饌。五日一大宴。以客禮優待之。是爲本朝五年十一月也。明年五月。從征明歸化城。敍錄大凌河降將。予爵一等男。與存仁並爲都察院承政。大勳爲戶部承政。三年。大勳爲其家人首告盜其庫貯金銀等物。下法司鞫實。論死。上命追贓入官。革職免死。可法同存仁疏言。大凌河官員困阨已極。蒙上矜全撫養。賜以宅舍田園。豐且足矣。妻妾奴僕。衆且多矣。輕裘肥馬。榮且貴矣。乃大勳縱情聲色。妄費不貲。致盜用庫銀。上念恩養日久。所費巨萬。今所盜爲數甚微。未忍遽誅。然恐開新入爲盜之門也。敕速正典刑。以警將來。並諭戶部速立文簿。分晰舊管。新收。開除。現在。

四柱之數。年終再令公明官員稽察。庶倉庫無侵尅弊。疏入。命部如所奏行。大勳仍免死。是年七月。更定官制。可法回存仁。並改都察院右參政。六年。上以睿親王多爾袞。肅親王豪格。貝勒阿巴泰等圍錦州。離城遠駐。縱敵出運糧草。下部議罪。降罰有差。命停其辦事。不令入朝。可法同存仁疏言。上勇智天錫。算無遺策。兵戈所指。卽見成功。前者諸王貝勒大臣領兵疎略。退步安營。使敵得暇。大失機宜。今俱已知罪。愧悔交集。臣等伏思明關外各城。下在旦夕。正我軍奮力之時。諸王貝勒大臣旣蒙恩宥。自必黽勉立功。以贖前愆。况大勳在邇。宜與大小臣工朝夕議論。以期有成。不當隔越弗見。望上開改過之仁。容覲天顏。俾得力圖報効。疏入。上從之。七年。四月。遵旨遣明總兵吳三桂書云。茲者松山錦州已下。天運人心。悉歸新主。有識者宜熟爲審處。及早投誠。則分茅裂土。超出尋常。毋至勢窮力竭。搖尾乞憐也。六月。分設漢軍八旗。授可法正黃旗副都統。後遂爲正黃旗人。初上屢遣書與明議和。可法疏言。講和之策。利於彼而不利於我。彼惜名之君在上。懼殺之臣在下。口雖和而心則否。倘乘此時募訓練。修防禦。多出金帛。

收攬蒙古。十數年間。牢不可破之勢成矣。我業已與和。無征伐之事。將壯士怠其勇。猛士逸其志。誰復以甲冑爲樂事。方今鐵騎如雲。加以蒙古之衆。取天下有餘力。或慮明地廣民衆。未能一旦帖服。不知戡定中國。如理亂絲。未得頭緒。尺寸難分。急切割斷。竟成棄物。旣得頭緒。則千尋億丈。可經可緯。卷舒自由。明之百姓甚苦。貪吏最酷。誠弔民伐罪。我軍行不驚擾。慎擇寬廉長吏撫綏之。則人心莫不向順。至進取之計。譬之去人一手一足。而其人猶生。若斷喉刺心。則其人立斃。明雖大國。勢已極弱。我今直搗燕京。斷其通津糧運。西山煤路。彼勢將立困。不能如大凌河之持久。此刺心之著也。先取山海關。則關外諸城可唾手而得。此斷喉之著也。至是復同寺統李國翰疏言。錦州松山杏山塔山。一時俱爲我有。明人心搖動。燕京震駭。惟當應天時。順人事。直取燕京。挫阨山海。上曰。爾等建議直取燕京。朕以爲不可取。燕京如伐大樹。須先從兩旁斫削。今不取關外四城。豈能卽克山海耶。若取燕京。必俟彼精兵已盡。國勢日衰。然後可圖也。八年。隨鄭親親王濟爾哈朗征明中後所前屯衛。克其城。敘功加一雲騎尉。順治元年四

月。隨睿親王入山海關。擊走流賊李自成。五月。同張存仁疏于王。謂吏兵二部。務在得人。宜以通達治理者。暫設事務。山東山西。乃財賦所出。急宜招撫。從之。八月。命以右都督充河南衛輝總兵。至削平原武新鄉二關土賊時。李自成黨賊二萬餘。劫掠濟原。懷慶總兵金王和戰沒。可法赴援。力戰。賊乃退。二年。晉左懷督。充鎮守湖廣總兵。駐武昌。三年。以疾解任還京。遇恩詔。晉爵三等子。十三年卒。賜祭葬如例。諡順禧。子永烈襲爵。官至都統。

劉武元列傳

劉武元遼東人。明遊擊。守大凌河。本朝天聰五年。隨總兵祖大壽出降。命至盛京瞻養之。崇德六年。授刑部參政。七年。分漢軍八旅。武元隸鑲紅旂漢軍。順治元年。改任參領。予三等輕車都尉世職。二年。授天津兵備道。三年。擢南贛巡撫。四年。武元遣副將劉伯祿徐啓仁等公勦瑞金石城興國龍安上饒等縣土賊。擒斬僞都督葉南之。僞軍門劉

志諭劉飛等。翦平骨蓮花丁田鈞刀嘴諸寨。五年正月。江西總兵金聲桓副將王得仁據南昌叛。黨糾犯贛州。武元率諸將守城。閱三月。糧盡。鼓勵士卒奮戰。得仁中創遁。聲桓聞大軍已復九江。謀退保南昌。武元出奇受襲其後。敗之大湖港。斬獲無算。時廣東總兵李成棟亦叛。自惠州陷南雄。以廣東郡邑附明桂王朱由榔。結洞蠻土賊。號百萬。於十月朔犯贛州。武元授計諸將。乘賊方鑿壕。分兵東西南三門出戰。大破賊。成棟以數騎走。事聞。得旨嘉獎。加銜右都御史。兼兵部侍郎。賜紫貂冠服甲冑佩刀鞍馬。六年。征南大將軍譚泰既克南昌。遣副都統覺善等會武元遣成棟。克信豐。成棟宵遁。墮河死。武元分遣副將徐啓仁參將鮑虎遊擊左雲龍等剿成棟餘黨于瑞金雩都崇義等縣。進征梅嶺。破賊木城五。擒僞總兵劉治國。七年。平南王尙可喜奉命由南安進征廣東。武元遣副將粟養志以兵會。克復南雄韶州二府。先是金聲桓倡叛。士賊彭順慶踞寧都。僞稱軍門。窺伺郡邑。及武元遣將往撫。順慶負固不下。至是遣副將高進庫遊擊楊繼洪起元等攻克寧都。斬順慶流賊羅榮。自明季倡亂。楚粵間號閻王總。至是復聚。

衆數萬。踞大庾縣之雲山。結寨二十餘。僞稱五軍都督。刼掠上饒。崇義。南康。信豐。龍南。諸境。武元遣副將楊遇明。劉伯祿。賈熊。董大用等分布伏兵。截其去路。爲合兵搗賊巢。斬榮及僞官百餘。其脅從省就撫。敕功加太子太保。兵部尙書。三遇恩詔。晉世職爲一等輕車都尉。加一雲騎尉。十年以疾乞罷。者再。諭獎其撫贛多年。勞績茂著。命還京調治。十一年卒。贈少保。廕一子入監。賜祭墓如例。諡明靖。長子渡。襲世職。康熙三年。渡疏述父武元於賊犯贛州時。率衆禦戰。保全危城。未邀優敘。詔下部議。予騎都尉。合規襲之職。爲二等界。仍以渡襲。後官至副都統。次子誥。康熙十三年。于桂林殉節。詳忠義傳。

尙可喜列傳

尙可喜。遼東人。父學禮。明東江遊擊。戰沒于樓子山。崇禎初。可喜爲廣鹿島副將。值皮島兵亂。總兵黃龍不能制。可喜率兵入皮島。斬亂者。龍鎮島如故。及龍以旅順之戰死。沈世魁代部校。土庭瑞。袁安邦等搆可喜。誣以罪。世魁檄可喜赴皮島。舟發廣鹿。風大

作不克進。世魁檄愈急。可喜心疑。偵得其情。嘆曰。吾家世捐軀報國。媚嫉者反欲擠之死地耶。遂還據廣鹿。遣部校盧可用金玉奎赴我朝納款。時天聰七年一月也。上遣使齎貂皮賚之。八年正月。可喜舉兵略定長山石城二邑。攜刃副將二。合衆數千戶。攜軍器輜重航海求歸。命安輯於海城。贈給糗糧牲畜。並以我兵征旅順時所獲可喜親黨二十七人與之。四月。韶至盛京。賜敕印授總兵軍營纛旂。以皂廂白。號天助兵。尋從征明。由宣化入邊。至代州。俘獲甚衆。崇德元年四月。封至順王。十二月。從征朝鮮。明年。朝遼降。可喜乘其戰艦。取明皮島。斬世魁。賚蟒服金銀帶幣。有家僮許其私得人戶金帛牲畜。法司以奏。諭曰。此豈王自得。必散于衆兵耳。其勿訊。三年。從征明錦州。屢攻臺堡。更番駐牧。遇敵輒敗之。七年。錦州下。賜所俘及降戶。可喜奏請以部衆歸隸漢軍。於是隸鑲藍旂。八年。隨鄭親王濟爾哈朗征明。取中後所前屯衛。順治元年。四月。隨睿親王多爾袞入山海關。擊敗流賊李自成。追至望都。斬賊將谷可成等。十月。上卸皇極門宴賚之。尋隨英親王阿濟格討流賊。出邊趨綏德。二年二月。英親王駐師米脂時。自成兄

子錦踞延安。可喜議令諸軍分攻克延安城。錦竄遁。會豫親王多鐸已破潼關。定西安。可喜奉詔與英親王追剿自成。分兵攻克隕陽。荊州。襄陽諸郡。降賊將王光恩。苗時化等。復與英親王合兵下九江。聞自成竄死九宮山。乃班師。賜朝服良馬。還鎮海城。三年二月。同恭順王孔有德。懷順王耿仲明。征湖南。自成之竄死也。李錦與其黨郝搖旗。王進才等擁衆數十萬。走長沙。常德。降于明桂王朱由榔。分據湖南郡邑。可喜至岳州。擊走搖旗于道州。有德。仲明分克衡州。擊敗錦。至長沙。擊敗進才。復攻取桂陽。寶慶。武岡諸郡邑。湖南底定。五年九月。凱旋。賚黑狐紫貂冠服彩帛鞍馬。黃金二百兩。白銀二千兩。六年五月。改封平南王。錫金冊金印。統將士征廣東。携家駐守。時廣東尙附由榔。可喜至南雄。破兵城。斬守將楊伋等三十餘員。兵數千。七年正月。克韶州府。及清遠縣。桂王總兵吳六奇等迎降。二月。師次廣州。守者于城外密布礮台。城西樹木城。濬河三道。通海路。泥淖。我兵不能攻擊。深壕築壘困之。值暑雨鬱蒸。弓矢解膠。久相持。招降其紅旂水師總兵橋標相及等千餘。增造戰船。別募水師二千。以供調遣。桂王總兵杜永和。

國公除邦傳柏爲寶等糾衆萬餘迎戰。敗之。再復招降其總兵郝尙久黃應傑于潮州。惠州分遣將士守其地。十月。江西諸路兵赴調者踵至。可喜令軍士舍騎徒行步。淖冒矢石奮戰。毀木城。據城西樓堞。以礮擊城西北隅。城圯。軍士畢登。斬守將范承恩及兵民萬餘。追剿餘衆。至海濱溺死者無算。奏捷。得旨嘉獎。八年。遺總兵許爾顯徐成功攻克肇慶。羅定高州雷州時。流賊張獻忠遣黨孫可望李定國降由榔。自貴州雲南侵廣西。九年。桂林梧州南寧年樂潯州橫州俱爲定國所陷。東犯化州吳川。可喜遣兵赴援。同提督線國安統兵全進。以次恢復。十一年。定國以萬餘衆擾高州雷州廣州。薄肇慶。可喜統兵至三水縣。聞定國圍新會。結營山巔。設伏沿江要隘。自率精銳。合靖南將軍珠瑪喇所部禁旅涉險進攻。定國弗能抵。引衆遁。伏兵邀擊之。斬殺過半。復遣副都統畢力克圖等追剿。至橫州。所過郡邑悉復。十三年。賜敕記功。歲增藩俸千兩。是時粵地皆隸版圖。而土賊間作。且遙結海賊鄭成功爲海濱郡邑患。十七年。僞將軍鄧耀入占海康。可喜發兵剿之。耀遁走交趾。僞寨長蕭國隆旣降。復叛。糾其黨洪彪周祥勞泰

陳期新等分據恩平開平陽春陽汀之山寨。劫掠廣州肇慶。可喜遣兵剿平山寨。擒斬彪祥秦期新。及賊衆千餘。國隆窮蹙投木死。有周玉者。番禺蛇戶也。黨甚衆。其繪船數百。三帆八棹。衝浪若飛。玉糾之習水戰。助海寇。可喜募從征。暑玉爲遊擊。十八年。議遷沿海居民于內地。俾避寇擾。大吏令盡徹繪船泊港汊。遷其孥於城邑。玉遂糾黨爲亂。自稱恢粵將軍。以林輔邦爲軍師。所至焚掠。殘破順德縣。可喜發兵剿之。斬級二千餘。擒玉及輔邦。餘黨譚琳高黃明初等。竄據東涌海島。可喜檄水師進剿。琳高就擒。亂乃定。康熙三年。碣石總兵蘇利叛。可喜統兵征討。戰于海豐。陣斬之。殲賊衆數千。復碣石衛城。敘功。復加歲俸千兩。四年三月。諭曰。近聞廣東人民爲王屬下兵丁擾害。失其生理。此皆將領不體王意。或倚爲王親戚。以小民易欺。唯圖利己。恣行不法之故。自今務嚴加約束。以副委任。十年。疏稿有疾。請令長子之信代理軍事。詔如所請。十二年三月。疏請以兩佐領甲兵。及藩屬孤寡老幼自隨。歸老遼東海城。奉旨覽奏。具見恭謹。能知大體。朕心深爲喜悅。疏下戶兵二部議令。率諸子藩屬十五佐領悉移歸。十一月。逆藩

吳三桂反。詔曰。撤藩仍留鎮。三桂以逆書誘叛。可喜執其使。以逆書呈奏。十三年三月。逆藩耿精忠據福建反。廣西將軍孫延齡亦叛。踞桂林。可喜獲延齡檄。有二藩並變之語。上疏言。臣與耿精忠爲婚姻。今精忠反。不能不踧踖于中。惟捐驅矢志。竭力保固嶺南。以表臣始終之誠。又言。吳三桂遣賊兵二萬屯黃沙河。若與孫延齡兵聯合。勢益猖獗。請就近移師同臣剿賊。諭曰。王累朝舊勳。性篤忠貞。朕心久已洞悉。覽奏。披瀝悃忱。深爲可嘉。其益殫心進剿。以副倚任。命大軍之駐江西者分遣會剿。四月。潮州總兵劉進忠叛。附精忠。可喜令次子都統之孝討之。疏言。臣衆子中惟之孝堪繼臣職。至軍機事宜。雖衰老。尙能指揮調度。不致有悞封疆。十月。諭曰。王爲國抒忠。厥功茂著。當茲軍興之際。提督撫鎮以下。俱聽王節制。文武官員聽選補。奏聞。一切調遣兵馬。及招撫事宜。亦聽王酌行。十四年正月。封可喜平南親王。之孝授平南大將軍。是時簡親王喇布統師江西。因三桂精忠結連爲寇。未能以重兵達粵。粵東之連州惠州博羅河源長寧龍門增城從化土賊蠢動。可喜發兵征剿。屢報捷。劉進忠求援於海賊鄭錦。錦遣賊萬

餘助之。勢猖獗。叛鎮祖澤。清踞高州。引廣西賊衆。連陷雷州及德慶。開建電白諸邑。可喜連章告急。詔趣簡親王遣兵速進。十五年正月。復言臣病日劇。臣子之孝。出兵潮州。恐省城或有不測。請遣威望大臣駐鎮。疏入。諭曰。王實心爲國。計慮周詳。朕與王情同父子。誼若手足。覽疏未竟。朕心惻然。但王駐鎮日久。措置咸宜。軍民依賴。若必遣大臣。恐事未週知。王可於諸子中擇方略素諳者。遣赴潮州理軍務。大將軍尙之孝回省侍王左右。扞衛封守。王其加意調獲。以慰朕念。諭未及至。粵三桂驅賊逼肇慶。誘之信從逆。可喜臥疾弗能制。憤甚。自縊。左右解之。甦。遂不起。十月卒。十六年。之信歸順。迎大軍入粵。襲父爵。之孝還京。敕部議可喜卹典。謚敬。二十年五月。諭廷臣曰。尙可喜當閩城皆叛。矢志不移。臨歿。猶披服太宗文皇帝所賜朝衣。言死後必塋於海城。魂魄有知。仍事先帝。其忠誠之心。始終無二。令尙之孝往迎骸骨。俟至都門。卽以奏聞。九月。櫬至丁字沽。內大臣學士侍衛各一員往奠。諭曰。王素篤忠貞。人盡如王。天下安得有事。朕又念王至老懷誠。克殫忠盡。殊傷悼之。賜白金八千兩。塋海城。立碑墓道。之信尋論罪除。

爵。家屬俱歸旂。詔以可喜昔年海城田宅賜其第七子之隆。設佐領二。以其一爲可喜守墓。之隆官至館侍衛內大臣。之信之孝各有傳。

明末漢奸列傳卷三

洪承疇列傳

洪承疇福建南安人。明萬歷四十四年進士。天啓時任浙江提學道。遷布政使參議。又遷陝西督糧參政。崇禎二年。流賊王佐掛掠宜川城堡。承疇勦之。俘斬二百餘人。遁去。三年。授廷綏巡撫。王佐掛既降復叛。承疇誅之。尋與總兵杜文煥敗流賊張獻忠于清澗縣。四年。擢陝西三邊總督。五年。同總兵曹文詔賀虎臣等勦賊慶陽平涼。擊斬賊渠何天飛等。降其將白廣恩。文詔復蹙賊耀州。錐子山賊黨。殺獨行狼等以降。承疇戮四百人。餘皆散遣。七年。監督河南山陝川湖軍務。加太子太保。兵尙書。時賊聚陝西。至二十餘萬。高迎祥最強。自稱闖王。李自成屬焉。蹂躪鞏昌。臨洮及隴州。承疇檄總兵賀人龍左光先合擊破之。賊衆竄陷靈寶。汜水。滎陽。八年。承疇出潼關討賊。次信陽。諸將畢

會賊見河南兵盛。復分路奔還陝西。張獻忠亦掠鳳翔。與高迎祥合。副將文萬年柳國鎮戰死。文詔請行。承疇謂曰。非將軍不能滅此賊。吾兵已分。無可策應。將由涇陽趨淳化爲後勁。文詔乃自寧州進鎮寧羌。副將曹變蛟敗賊于澱頭鎮。乘勝逐北不及顧。文詔遇賊伏。轉戰數里。聲援絕。自刎死。承疇方追賊涇陽三原間。不至淳化。賊勢益熾。時有言承疇統轄太廣。勢難兼顧者。乃以盧象昇總理江北河南山陝川湖軍務。督理關外兵。而承疇專督關內兵。值高迎祥掠武功扶風以西。李自成掠富平三原以東。承疇率兵躡自成。太敗之。渭南臨潼。別遣將擊。迎祥亦敗蹙東走。尋爲巡撫孫傳廷擒送京師磔死。賊黨推自成爲闖王。十年。自成陷甯羌。入七盤關。分三路寇掠。承疇令總兵曹變蛟等赴援。由洮河轉戰。自成敗竄西羌界。十一年。自成謀犯蜀。承疇檄總兵馬科左光先等扼之。乃東遁。曹變蛟設伏漳關之南原。大破賊。自成遁高雄。兵部尙書楊嗣昌劾承疇縱賊。往來秦蜀。逾久無功。削宮保尙書。十二年。授薊遼總督。是年冬。我朝兵征明錦州。及甯遠。總兵金國鳳拒戰于甯遠城北山岡。偕其二子俱沒于陣。承疇疏言。國

鳳前守松山兵不滿三千。卒保孤城。以事權專。號令一而人心肅也。迨擢任大將。兵近萬人。反致殞命。非其才力短。由營伍紛紜。人心不一也。自今設連營節制之法。凡遇警。守城及出戰。惟總兵官號令是聽。庶心齊軍肅矣。十三年。總兵祖大壽以錦州圍困告急。承疇出山海關。駐寧遠。疏請調宣府大同諸鎮兵。俟俱集。合關內外兵十五萬。又必芻糧足支一歲。乃可戰可守。十四年三月。宣府總兵楊國柱。大同總兵王樸。密雲總兵唐通。各率兵至。與玉田總兵曹變蛟。薊州總兵白廣恩。前屯衛總兵王廷臣。山海總兵馬科。寧遠總兵吳三桂。凡八大將。合兵十三萬。馬四萬。朝議以兵多餉難。令職方郎中張若麒趣戰。乃進次松山。八月。楊國柱戰死。以山西總兵李輔明代之。曹變蛟營扎峯山。大軍列七營于松山城北。屢出兵。戰輒敗卻。既而伺我大兵歸營。復來犯。望見太宗文皇帝張黃蓋。親督大兵布陣。皆披靡退遁。大兵遵上方略。度明兵乘夜出犯。分路堵截。奮擊遂窮迫。悉殲殪之。曹變蛟率步騎犯鑲黃旂汛地者一。犯正黃旂汛地者四。復夜突御營。連敗卻。身中創。奔還松山。王樸吳三貴唐通馬科白廣恩李輔明相繼走。大

兵由杏山西邊及高橋發伏衝洩。自海濱至桑阿爾齊堡。又爲分駐大兵掩殺。總兵僅以身免。張若麒匿漁船遁。承疇先後喪士卒五萬三千七百餘人。太宗文皇帝以敕諭承疇及所屬將士曰。朕率師至此。料爾援兵聞之。定行逃遁。遂豫遣兵圍守杏山。使不得入。自塔山南至于海。北至于寧遠山東之連山。一切去路。俱遣兵邀截。又分各路截守。爾兵逃竄。爲我兵斬殺者。積屍遍野。投海溺水。不可勝數。今爾錦州松山救援兵已絕。朕思及此。乃天意佑我也。爾等宜自爲計。如以爲我軍止圍松錦。其餘六城。未必卽困。殊不知時勢至此。不惟六城不保。卽南北兩京。明亦何能復有耶。朕昔征朝鮮時。圍其王于南灘山。朕詔諭云。爾降必生全之。及朝鮮王降。朕踐前言。仍令主其國。後圍大凌河。祖總兵來降。亦不殺之。爾等所素聞也。朕以誠信待人。必不以虛言相誑。爾等可自思之。九月。承疇謀突圍出。悉出城中步騎。夜犯鑲黃旗驍騎營。正白鑲白兩旗漢軍營。敗還。傷斃千人。十二月。聞關內援兵三千赴援。將至。復出兵六千。夜犯正紅旗護軍營。正黃旗蒙古營。爲矢礮所殪者四百二十人。從杏山遁。伏發。截殺者五百七十餘。

人敗退城下。因門閉不得入。投降者三千餘人。關內赴援兵。竟駐甯遠。終不進。承疇欲戰。則力不支。欲守。則糧已竭。欲遁。不敢成隊而出。與曹變蛟王庭臣巡撫邱民仰兵備道。張斗姚恭王之楨等坐困城中。越一月。副將夏成德遣人赴大軍通款。以其子舒爲質。相約內應。大兵夜樹梯登城。破。斬曹變蛟王庭臣邱民仰等。生擒洪承疇。送盛京贍養之。祖大壽知承疇就擒。因率錦州諸將以城降。明訛傳承疇已死。予祭十六壇。建祠都城外。與邱民仰並列。莊烈帝將親臨奠。俄聞承疇降。乃止。本朝崇德七年四月。都察院承政張存仁上言。臣觀洪承疇欣欣自得。僥倖得生。是仰慕真主。思効用于我國者。宜速令薙髮。酌加任用。五月。召見崇政殿。承疇跪門外。奏曰。臣將兵由松山援錦州。曾經數載。冒犯軍威。聖駕一至。衆兵敗沒。臣坐守松山。糗糧罄絕。人皆相食。城破被擒。自分應死。蒙皇上矜憐。不殺。而恩養之。今令朝見。臣自知罪重。不敢入。上曰。彼時與我軍交戰。各爲其主。朕豈介意。朕之擊敗十三萬兵。得松錦諸城。皆天也。天道好生。善養人者。斯合天道。朕故恩沾及爾。爾但念朕撫育之恩。盡心圖報可耳。尋命隸鑲黃旗漢軍。

順治元年四月。睿親王多爾袞征明。承疇從師。次遼河。聞流賊李自成已陷京師。洪承疇自陳進兵策曰。我軍之強。天下無敵。宜先布號令。示此行特掃除亂逆。不屠人民。不禁廬舍。不掠財物。其開門歸降。及爲內應立大功者。破絡封賞。法立令行。此要務也。向見流賊遇弱則攻。遇強則走。今聞我軍至。必遁而西。宜從薊州密雲疾行而前。賊若走。則以精騎追之。若仍據京城以拒我。則破之更易。至入關路隘。我兵皆不便履險。恐賊伏精兵邀我。宜改騎爲步。從高峴之。俾步前馬後。比入邊。則步卒皆馬兵也。抵京之日。連營城外以斷西路。諸援兵。則賊可一戰而殲矣。五月。大軍擊走流賊。定京師。承疇奉旨。仍以太子太保兵部尙書。兼都察院右副都御史原銜。入內院佐理機務。遂爲祕書院大學士。二年。閏六月。豫親王多鐸定江南。明福王朱由崧就擒。上命承疇往駐江寧。鑄給招撫南方總督軍務大學士印。賜敕便宜行事。承疇旣至。疏列降順之明南京翰林科道卿寺部屬等一百四十九人。請令赴部錄用。是時明唐王朱聿鍵自號隆武。據福建。其大學士黃道周引閩兵出浙江。閩化明御史金聲家居休寧。受聿鍵部院職。募

鄉兵十餘萬屯績溪。明魯王朱以海據紹興。高安王朱常淇據徽州。蘄水王朱銜輶次子常災冒族兄樊山王。舊稱結寨英山潛山間。又有朱由樞冒稱金華王。據饒州。朱誼石冒稱樂安王。朱誼泐冒稱瑞昌王。分據溧陽興化金壇鄉村。聯結江南北黨。與謀犯江寧。承疇檄提督張天祿總兵卜從善胡茂積等分路進征。擒金聲于績溪。擒黃道周于婺源。先後解至江寧。諭降不從。斬之。明故官荆本徹李守庫徐君美據崇明。承疇檄總兵李成棟征之。斬守庫。擒君美。降其城下。本徹竄入海。三年正月。承疇查知江寧人有叛應朱誼石朱誼泐者。于距城五十里之西溝池。捕斬萬德華等五十餘人。又閉城搜捕五十隊人。鞠實郭世彥尤吾等三十一人。誅之。未幾。朱誼石朱誼泐合衆二萬來犯。火攻神策門。我兵先分出朝陽太平二門堵截。乃啓神策門衝擊。大敗之。追至攝山。擒斬無算。尋檄總兵馬得功卜從善等勦潛山司空寨。斬守寨頭目石應壁等。生擒朱常災。搜婺源。嚴杭山。擒朱常淇。及其監軍道江于東。職方司許文玠等。復擒朱誼泐及其經略韋爾韜總兵楊貫夏含章等于句容丹徒。擒朱由樞及其族人朱常游朱常涓。

朱常泚于饒州鄱陽湖擒朱誼泐之弟朱誼貴。及瑞昌王下軍師趙正于宿松縣之涇池。並請旨斬之。明給事中陳之龍家居華亭。潛太湖潰衆遙附朱以濟。承疇遣參領索布圖往捕之。龍投水死。四年四月。駐防江寧總管巴山張大猷奏柘林遊擊陳可擒賊謝克文。獲明魯王封承疇國公。及其總兵王斌卿致承疇與巡撫王國寶書。有伏爲內應。殺巴張二將。則江南不足定語。上獎巴山等嚴察亂萌。面諭慰承疇國寶曰。朕益知賊計真同兒戲。因卿等皆我朝得力大臣。故反間以圖陰陷。朕豈墮此小人之計耶。十月。巴山等以察獲遊僧亟可。金臘等五人。攜有謀叛蹤跡。牒承疇鞫訊。承疇疏言亟可乃故明尙書韓日纘之子。出家多年。已酉春。自廣東來江寧。刷印藏經。值大兵平江。南。久住未回。今以廣東路遠。向臣請牌回里。臣因韓日纘是臣會試房師。遂給印牌。及城門盤驗。經笥中有福王答阮大鍼書稿字。失避忌。又有變紀一書。干預時事。其不行焚毀。自取愆尤。與隨從之僧徒金臘等四人無涉。臣與亟可世誼。應避嫌不敢定擬。謹將書帖牌文封送內院。得旨。下部察議。以承疇狗情。予給印牌。應革職。上以承疇奉使

江南勞績可嘉宥之。承疇以江南湖海諸寇俱削平。又聞其父已卒于閩。請解任守制。乃調官大總督馬國柱爲江南江西河南總督。命承疇俟假滿仍回內院任事。五年四月。至京。六年。充太宗文皇帝實錄總裁官。充會試正考官。遇恩詔加少傅。兼太子太傅。八年。閏二月。命管都察院左都御史事。尋甄別諸御史分爲六等。擬差用魏瑄等二十二人。內陞陳昌言等二人。外轉張煊等十一人。又王世功等十七人外調降用。革任有差。五月。張煊疏劾吏部尙書陳名夏植黨行私諸款。有囑承疇庇其門生李嵩陽留任。御史及太僕少卿黃徽元因承疇姻戚。驟陞正卿等語。並劾承疇不請旨私送其母回閩。又屢與名夏及尙書陳之遴聚集火神廟屏左右密議逃叛。下王貝勒大臣集質。名夏辯釋。承疇以送母回閩未奏。明白引罪。至火神廟會議數次。則皆御史因甄別商酌。應差用及陞調革降者也。吏部尙書譚泰坐煊誣陷逃叛。絞死。未幾譚泰以他罪伏法。上鑒煊由譚泰黨庇名夏。寃死。優予贈廕。革名夏任。詳見名夏傳。承疇復自引罪。得旨。聚議不必懸揣。送母回閩未奏。爲親甘罪。其情由可原。仍留任以責後効。九年五月。丁

母憂。命入直如故。私居持服。賜其母祭。九月。欽天監奏太白星與日爭光。流星入紫微宮。時大臣議請駕往邊外迎達賴喇嘛。承疇同大學士陳之遴疏言。日者人君之象。太白敢與爭光。紫微宮者人君之位。流星敢突入。上天垂象。誠宜警惕。且今年南方苦旱。北方苦潦。歲飢盜起。處處入告。非聖躬遠幸之時。達賴喇嘛自遠方至。則遣一大臣接迎。已足見交代之意。亦可服蒙古之心。何勞聖躬親往。疏入。得諭曰。卿等諫朕勿往迎喇嘛。此言甚是。朕即停止。嗣後國家一切機務。詳明敷陳。毋有隱諱。十年正月。調宏文院大學士。五月。調國史院大學士。時桂王朱由榔居于安隆。流賊遺黨一隻虎郝搖旂。孫可望。李定國等。俱假封號。以招集散亡。聯結粵桂。踞黔滇。掠楚粵。上命承疇。經略湖廣。廣東。廣西。雲南。貴州。特晉太保。兼太子太師。兵部尙書。都察院右副都御史。諭之曰。湖南兩廣。雖漸底定。滇黔阻遠。尙未歸誠。朕將以文德綏懷。不欲動兵黷武。而遠人未喻朕心。時復蠢動。必得夙望重臣。曉暢民情。練達治理者。相機撫勸。方可綏甯。朕徧察廷臣。惟爾允當斯任。前招撫江南。已有成效。茲命綏靜南方。聽要地駐劄。俟滇黔既

定後。卽命還朝。以慰朕眷想。承疇奏言。臣年逾六十。理宜退休。乃荷特授經略之任。伏乞頒諭吏戶兵三部。仰承聖意。俾臣得竭力展布。勦撫中機。上卽命內院以特假便宜條款。詳列敕書傳示內外。遵行。並允承疇奏薦。以原任大學士李率泰爲兩廣總督。與平南王尙可喜靖南王耿繼茂駐守廣東。改撥土賊未靖之江西省屬承疇。鑄給經略湖廣江西雲南貴州內院大學士印。十一月。承疇疏言。湖廣有孫可望抗拒于南。郝搖旂一隻虎等肆毒于北。彼或由澧州而犯常德。或截岳州以犯湘潭。則我腹背受敵。廣西有定國耽耽思逞。距桂林二百里。惟附郭之臨桂縣與靈川興安二縣及全州未爲所踞。我兵若由桂林進勦。而彼自靖沅乘虛潛襲。則我首尾難顧。宜防守嚴密。乃可隨機援勦。上命甯南大將軍辰泰率八旂兵往湖廣。與承疇商駐要地。又詔繼茂移鎮桂林。以聯聲援。十三年二月。上諭兵部曰。前以湖廣寇氛未靖。殃及生民。曾有旨增遣滿洲兵。携家口駐武昌。因其沿途水陸。居民及驛遞。必至騷擾。所駐之地。必須撥給房屋田土。恐其爲民累。更有不可勝言者。近五省經略輔臣洪承疇在彼時。練操兵卒。軍威

殊壯。招徠撫輯。民情安悅。無須增置携家口兵。前所遣兵當更換。六月。可望遣其黨劉文秀。盧明臣。馮雙禮等。分犯常德辰州武昌。承疇與大將軍辰泰遣兵邀擊。大敗之。明臣墮水死。雙禮中劍遁。文秀竄貴州。八月。詔頒賞承疇及所統將領有差。十二月。承疇以寶慶府震電徹夜。具疏自劾。上慰諭之。十三年二月。諭曰。昔者賊渠孫可望等猖狂犯順。夜襲常德。爾同大將軍辰泰遣發官兵水陸勦之。大獲全勝。良由籌畫有素。調度合宜。用能張撻伐之偉略。杜窺伺之狡謀。已頒懋賞。仍賜特諭。示朕嘉悅之意。是年考滿。晉太傅。仍兼太子太師。廕一子入監。十四年十月。孫可望率所屬官百餘。兵數千。自貴州赴長沙納款。上命承疇同甯南大將軍貝子洛託相機收取貴州。十三年二月。疏言。貴州地勢情形。及三路進取雲南機宜。已與洛託會師常德。由辰州沅州進征。檄偏沅巡撫袁廓宇招降。靖州並苗兵鎮遠西二十里山口堵禦。沿途擒斬收降甚衆。四月。抵貴陽。城中文武官俱先遁。承疇疏言。自常德辰沅至鎮遠貴陽。重關重嶺。石徑尖斜。大雨將至半月。泥濘三尺。滿洲兵謂從來出征。未有如此之難。馬匹疲斃。未有如此之

甚。然皆不顧艱難。奮勇當先。漢軍綠旂兵緊隨而進。不五十日。勦逆撫順。貴州全省底定。皆皇上德威遐暢之所致也。上命信郡王多尼爲安遠太將軍。率師之貴州。與四川貴州兵會期進攻雲南。六月。承疇疏言。臣前有三路進取全局一疏。冀不致兵衆擁集。爭糧乏食。及至貴州。見各府州縣衛所。僅留空城。同有數百數千石米穀。八旂兵陸續經過。二三日輒罄盡。惟省倉存米七千餘石。稻穀四千餘石。足供一月食用。臣所從兵。皆分布鎮遠偏橋興隆清平平越等處。各自買米。并尋野菜和米充饑。投誠官兵。暫駐三四日。卽改發天柱。會同黔陽等縣及沅州以就糧。貴州山深地冷。收穫皆在九月。臣遣官勸諭軍民土司苗民。預納本年秋糧之半。接濟滿州兵月米。令四川一路兵駐于遵義烏江休息。有舊日運糧處。廣西一路駐獨山州。兵亦可就近購糧。又聞信郡王大兵自六月初旬自荊州進發。所需口糧。尤多數倍。臣已檄催沅州糧米速運鎮遠積貯。令隨征各官分路採買。令常德道府各官製備布口袋二萬餘。并櫻奪木架繩索解送鎮遠。又于天柱思南石阡思州平越各府州縣衛所。及土司苗人募夫役。給工食。逐站

遞運。至平越及新添衛所。可不誤師期矣。九月。改內院爲殿閣。授承疇武英殿大學士。是月。承疇奉詔赴平越會議。信郡王由中路過關嶺鐵索橋。抵雲南省。計一千餘里。解餉銀三月。攜糧十五日。逆礮漢軍攜糧五十五日。平西王吳三桂由遵義過七星關。抵雲南省城。計一千五百餘里。先中路兵十日起行。征南將軍單布秦因南甯有賊。屯踞離遠。難以兼顧。議由貴州廣西邊界平浪永順壩威透山。出安隆所黃草壩羅平州。抵雲南省城。計千八百餘里。先四川兵十五日起行。既定議。承疇還貴陽。遵旨。同大將軍洛託駐守。遣經略右標提督張勇等隨信郡王進征。擊走由榔鞏昌王白文選于盤江。十六年正月初三日。三路兵並薄雲南省城。由榔與李定國白文選等竄永昌。餘衆以城降。承疇疏言。臣前料理湖南廣西。幸皇上俯鑒愚忱。有請俱允。俾得地方支持。今雲南新關。係臣經略管轄之內。必親往相度。乃能區處得宜。故不待詔諭。卽日就道貴州。有一大將軍洛託彈壓。巡撫趙廷臣綏輯。可無他慮。惟雲南尤爲險遠。土司種類最多。治之非易。故前元朝用親王坐鎮明朝以國公流英世守。乞敕議政王貝勒大臣爲久

長計。留兵駐鎮。俾邊疆永賴安甯。閏三月又疏言。臣自黔赴滇。經過白水支水曲靖馬龍楊林等處。于三月二十六日抵雲南省城。信郡王先于二月初二日令貝子尙書領兵同平西王吳三桂征南將軍卓布泰等追勦。至永昌騰越。及南甸土司李定國流天波等擁由榔奔緬甸。其國公賀尤義伯李成爵李如碧廖奐。將軍祁自貴馬得鳴等。收集潰兵。分遁沅江順甯雲龍爛滄龍江諸處邊外。雲南迤西及迤東。在在可虞。窺犯。民間遭兵火殘毀。饑餓載道。死無虛日。在永昌一帶。更爲慘烈。週圍數百餘里。杳無人烟。追勦大兵。因無糧不能久駐。而省城糧米。以湖南官斗市糴。每石需銀十三兩有奇。是以令駐宜良富民羅次姚安賓州臨安新興徵江陸京等處就糧。臣知皇上明鑒萬里。自有宸斷碩。俾邊臣得以遵奉。疏入。上已命吳三桂駐鎮雲南。又諭戶兵二部曰。雲貴新入版圖。百姓皆朕赤子。念十餘年來。逆寇李定國等。踞南服。民多在水火之中。困于誅求。生計日匱。疾痛莫告。今天兵所至。羣黎歸命。歡若更生。但聞兩省地方。生理未復。室廬殘毀。田畝荒蕪。俯仰無資。衣食難窘。朕每念及。不勝惻憫。至南征大兵。閱歷

險阻長驅深入。糧餉恐有時不繼。今特發內帑銀三十萬兩。爾部卽遣官刻期齎往。經略軍前。以十五萬兩賑濟兩省窮民。其一十五萬兩令經略臣收貯。現今三路大兵。如有需餉甚急者。宜行接濟。八月。承疇繼言。兵部密咨大兵。宜速進緬國。以靖根株。令臣相機布置。臣受任經略。目擊凋敝景象。及土司降卒觀望情節。不可謀迫。須先安內。乃可勦外。李定國等竄孟浪等處。山川皆極險遠。兼瘴氣爲害。必霜降後方消。明年二月。青草將生。瘴卽復起。計自出兵駐兵回兵。僅閱四月。恐亦未能窮追遠勦。况屢聞李定國等勾連土司。覬由景東沅江復入廣西。各土司私授劄印。歃血爲盟。伺隙起釁。若一聞大兵西進。勢必共思狂逞。避實就虛。大兵相隔已遠。不能回顧。而留駐省城之兵。亦未及堵禦。致定國等縱逸。所關匪細。臣審度時勢。權量輕重。謂今年秋冬。宜暫停進兵。俾雲南迤西殘黎稍藉秋收。以延殘喘。盡力春耕。以圖生聚。而數萬大兵。又得養銳蓄威。居中制外。俾定國等不能窺動靜。以潛逃。土司不能伺釁隙。以狂逞。絕殘兵之勾連。斷降兵之反側。則飢飽勞逸。勝算皆在于我。料定國等潛藏邊界。無居無食。瘴癘受病。

內變易生。機有可竣。是時兵餉芻糧。輾備土司苗蠻。漸服殘兵。降卒已安。并調撥兵將。次第齊集。責成防禦。然後進勦。庶爲一勞永逸。固內勦外長計。疏下議政王貝勒大臣會議。如所請。暫停進兵。十月以日疾乞解任。得旨還京。十八年聖祖仁皇帝御極。承疇乞休。允致仕。命察敍招撫功經略。其予三等輕車都尉世職。准襲四次。康熙四年二月卒。賜祭葬如例。諡文襄。子士銘由順治十二年進士。官至太常寺少卿兼襲世職。

劉芳名列傳

劉芳名寧夏人。明柳溝總兵。本朝順治元年率屬投誠。命仍原官。隸正白旗漢軍。二年調寧夏。賜白金冠服。時秦地初定。土寇尙多。悍卒復乘釁謀亂。芳名既抵任。彈壓勦禦。訓練撫綏。總督孟喬芳奏獎之。時降將武大定叛固原。賀珍叛漢中。大軍攻勦。賊竄遁。芳名俱在事有功。三年寧夏兵變。戕巡撫焦安民。芳名方赴鞏昌勦賊。聞警馳回。知營官王元馬德倡亂。狼狽負隅。乃計遣德攝篆花馬池。以分其勢。偵元將逸出鎮城。與逆

寇洪大誥合。先設伏河畔。元至。伏發。賊死拒。都司樊朝臣守備姜九成等夾攻。元敗奔。副將馬寧等追剿之。大誥遁。芳名飭部將搜斬大誥。是時德尙署東協副將。聞王元旣擒。河西道袁噩赴任。過花馬池。德方患痔。未迎謁。噩曰。噩善醫他病。皆應手愈。惟心病難療耳。德聞之。益懼。四年三月。芳名偕河東道馬之先出師惠安。德乘間糾黨。劫本營軍資。遁入山。合賊渠賀宏器等自紅古城出口。襲陷安定。螺山賊王一林殺參將張紀往附。橫行寧固平慶間。七月。芳名率鎮兵抵亂麻川。挫賊鋒。俘馘無算。復追襲于預望城。斬一林。德僅以四騎走。翌日。及于河兔坪。陣縛德寸磔之。餘黨盡殲。十月。詔予投誠各官世職。授芳名三等輕車都尉。十二月。擢四川提督。命佩定西將軍印。尋奏旨以都統祖澤潤代。芳名以右都督仍鎮寧夏。五年。香山賊李彥糾亡命四出劫掠。芳名以兵抵賊巢。據濠環攻。礮矢如雨。賊窮蹙。其黨張域等執彩獻軍門。誅之。初。馬德之就擒。河兔坪也。芳名副將劉登樓預有功。登樓居榆林之寧塞。狡猾多力。旣誅德。益自負其能。六年。附大同叛。鎮姜壤與延安營叛將王永強爲亂。僞稱大明招撫總督。殺靖邊道。

夏時芳。易冠服。長驅西犯。花馬池興武各營堡。望風從逆。直逼寧州。時定邊屯蒙古札。穆素叛逃賀蘭山。窺伺寧境。芳名方堅壁以待。聞靈州告急。檄調各協營將士授機宜。分兵進勦。大敗賊兵。斬賊首劉永昌等。登樓竄走定邊。潛結札穆素叛屬寇寧夏西境。復糾餘賊再犯河東。陷鐵柱惠安漢伯諸堡。靈州復告警。會都統李國翰奉詔率禁旅至討蒲城。及直川諸賊。巡撫李鑑守鎮城。以禦札穆素。芳名引兵東渡。疾趨榆林。大敗賊子官團莊。登樓退據漢伯。我軍絕其水道。攻圍十二日。克之。斬登樓。從賊皆就撫。榆林平。當諸將環攻漢伯時。芳名獨據東南要衝。近賊壘。矢石頻下。有勸之者曰。當移數武避賊鋒。芳名厲色叱之曰。死則死耳。有何懼爲。且士卒多傷。而我避鋒鏑乎。由是軍士感激。敵愾益厲。先是登樓叛逆。據延安。致書芳名。芳名以爲汚己也。切齒裂眦。不與賊俱生。封逆書示撫臣。鑑囑代奏。鑑與督臣喬芳先後疏敘芳名功。以聞。並得旨嘉獎。遇恩詔。晉二等輕車都尉。九年。敘戰功。予世襲五次。十二年。遵旨陳奏鎮兵事宜。以寧夏孤懸河外。延袤千里。額兵屢經調發。兵力單虛。請自後征調。缺額卽令招補。備守

禦。又請以減等罪人僉發沿邊資生聚。竝下部議行。十六年。調隨征江南右路總兵率甯夏三營將士移駐江寧。加左都督銜。時海寇鄭成功犯崇明。芳名同提督梁化鳳擊之。奪賊舟。斬獲甚多。十七年八月。疏言。臣奉命勦賊。方期滅此朝食。不意水土未服。受病難瘳。不敢妄請休息。惟所攜甯夏軍士。臣訓練有年。心膂相寄。今至南方。半爲痢瘡。傷損。皆水土蒸濕所致。及臣未填溝壑。敢乞定限更調。得旨。覽奏。知卿抱病江南。征防重寄。正資料理。仍加意調攝。以副委任。所請飭部議奏。九年卒于軍。贈太子太保。賜祭。塋如例。諡忠肅。所屬將士仍還甯夏本鎮。子體仁襲世職。

李國英列傳

李國英遼東人。明總兵。隸左良玉部下。本朝順治二年。隨左夢庚來降。隸正紅旂漢軍。三年。隨肅親王豪格征四川。滅流賊張獻忠。授成都總兵。五年正月。擢四川巡撫。獻忠之滅也。餘黨孫可望劉文秀王命臣等竄踞川南。思復逞亂萌。舊將譚文譚洪譚詣楊

展劉惟明等分據川東。又與流賊李自成遣黨邢十萬馬超劉二虎郝搖旂袁宗第李來亨等聲援。二月。洪犯保寧。國英敗之。命臣據順慶。謀襲保寧。國英分兵三路。水陸並進。直抵順慶。大敗賊衆。復其城。擒僞參將李大德朱朝國等。而十萬超亦爲保寧肘腋。患國英借總兵惠應詔進勦。陣擒僞總兵胡敬。及叛逃知縣饒心知。復乘夜進襲。抵曠盧二壩。破賊巢。進取潼川。賊棄城遁。追至綿州。擒僞監紀呂濟民。僞參謀石君球。尋招惟明展及僞遊擊靳能安。綿州達州咸定。六年。遣副將陳敦勦賊安縣。擒僞副將解應甲。僞參將楊飛雄。又遣參將曹光開復攻彰明縣。遇僞總兵黃甫。射之。墜巖下。賊衆兵竄。我兵分四路疾進。夜奪關山關。黃甫棄關走。遂進克石泉縣。叛逃知縣謝光祖陰結大定。授僞職。據寨抗拒。國英遣兵攻破賊寨。擒謝光祖斬之。七年。糾僞總兵馬壽等犯川北。國英檄副將曹純忠劉漢臣伏兵邀擊。斬僞總兵老鐵匠。僞副將黃鶴子。九年。可望文秀犯保寧。賊衆橫列十五里。勢熾甚。國英督兵擣賊中堅。別由間道擊其後。殲賊數萬。溺死者無算。先是敍投誠功。予國英二等輕車都尉世職。十一年三月。甄別督

撫。晉銜兵部尙書。四月。僞總督魏勇犯順慶。國英遣副將霍光先擊破之。斬獲甚衆。時成都復爲賊陷。重慶夔州嘉定俱附賊。十二年。國英疏言。國家師武無敵。而小醜稽誅。此封疆之臣畏難避苦。利害功罪之念存于中耳。今湖南兩廣俱有重兵。平西王吳三桂及都統李國翰之師屯漢中。宜敕進保寧。網羅諸路。先取成都嘉定。資其肥饒。且屯且守。次取重慶。以扼咽喉。然後乘流東下。掃清夔關。通荆襄之氣脉。徼滇黔之門戶。卽爲收服滇黔本計。至于內外司兵司餉之臣。必齊心一力。應如指臂。尤成功之要也。疏入。部議令三桂等相機進取。十三年。考滿。加太子太保。廕一子入監。十四年。詔以國英久仕巖疆。才猷夙著。擢陝西四川總督。十五年二月。三桂等自漢中進征取重慶。遂趨貴州。時文洪詣二虎等據忠州萬縣。七月。合犯重慶。總兵陳廷俊嚴自明擊之。力戰五日。賊遁。十一月。文復合十三家賊逼重慶。國英在保寧聞警趨援。師次合江。詣殺文納。款餘賊潰遁。國英入城招撫。洪亦降。僞候郝承裔。僞伯陳達相繼率衆來歸。譚文餘黨。猶據涪忠二州。國英檄總兵王明德進勦。擒僞總兵譚益陳貴榮高鶴鳴關起鵬。僞參

謀高鳳鳴。陣斬僞監軍道王文錄、張耀。僞副將林起等。十七年，承裔據雅州府，復叛國英。統兵至嘉定，會提督諸臣，分兵三路進剿。奪竹箐關，賊燒屋遁。國英發兵截擊，承裔敗逃黎州。追擒于山，箐十八年。川陝各設總督，改國英專轄四川。康熙元年，明石泉王朱奉鎗煽惑土夷，攻敘州等府。國英遣兵勦擒。又疏言蜀中逋誅巨寇，俱環伺于夔東。請暫駐重慶，以圖進剿。俟賊平，還駐成都。時搖旂來亨、二虎宗第等竄踞山寨，爲四川湖廣陝西錯壤州邑患。議者欲合三省會剿。國英疏言：賊巢橫踞險要，大兵進攻，未能聯合一路。宜以荊州宜昌兵勦遠安興山，巴東歸州之賊，以興安隕陽兵勦房縣竹山之賊，其夔州遠始巫山大甯大昌之賊，專以四川兵勦之。惟豫會師期，使賊三路受敵。則彼此不暇兼顧。俟一路平後，就近會師並進，賊可盡滅矣。上允所請。命西安將軍富喀禪副都統都敏領兵會剿。國英先招撫客僞鎮將，以散其黨。旣會三省師期同進，又分兵大昌大甯截遏奔逸。二年，國英同富喀禪等督兵進巫山，趨陳家坡，攻二虎賊巢。二虎繫妻妾奔入天池寨，自縊死。搖旂宗第夜遁。國英遣總兵梁加琦佐領巴達世追

至黃草坪。破賊四營。生擒搖旂宗第。及僞部院洪育鰲等。又遣總兵李良禎。追擒明東安王朱盛蕘于小夾寨。僞岐候賀珍子。僞富平侯道甯。率所屬降。四年。疏言。全川底定。宜因地設防。酌議增減官兵。增設城守。副將一。遊擊八。都司一。守備十七。裁留通省兵四萬五千名。以馬二步一。戰守各半。定額。從之。又疏報建昌番猓跳梁。檄總兵王明德。深入賊巢。平十九寨。五年卒。得旨。李國英久任岩疆。積勞病殞。深可憫惻。下部議卹。賜祭。葬如例。謚勤襄。七年。追敕巫山勦賊功。晉爵一等男。以其子爛襄。爛卒。子陞永襄。永陞嘗任南陽總兵。以婪取陋規。發軍台効力。雍正六年。上追念國英擒勦逆寇。勞績懋著。特召其子孫引見。以永陞從弟永安爲參將。並召永陞還。授參政。洊擢工部尙書。十年。國英入祀賢良祠。

明末漢奸列傳卷四

張勇列傳

張勇陝西咸寧人。明副將。本朝順治三年英親王阿濟格進剿流賊李自成。勇由淮安率衆赴九江投誠。授遊擊。隸陝西總督孟喬芳標下。時自成餘黨賀珍武大定賀宏器李明義等。分踞漢中興安固原。窺犯西安。勇同副將任珍馬寧等屢擊敗賊衆。四年寧夏叛將馬德結賀宏器陷安定。勇與總兵劉芳名率兵赴援。擊走之。德爲馬寧所擒。勇進征固原。連拔賊寨。宏器明義皆就擒伏誅。五年四月。逆回米喇印丁國棟踞蘭州作亂。糾衆千餘。陷臨洮。勇同副將陳萬略率兵夾擊。敗賊。收復臨洮城。躡擊至岷州。敗之。宮堡又敗之。馬韓山賊竄入二崖洞。盡殲之。五月。擒明延長王朱識鏗於馬家坪。喬芳偕侍郎額色督師。攻拔蘭州。勇會師合剿。遂渡河而西。八月抵甘州。逆回據城拒。勇率

兵迎擊。屢敗之。六年正月。總兵南一魁奪西門入。勇自西南隅搜剿至東門。逆回勢窮。夜遁。躡跡至北山城。殲賊甚衆。斬喇印于水泉。國棟竄肅州。五月。勇率兵赴肅州。率兵壕外。伺賊出牧。四面截殺。斬級數百。生擒百餘人。十二月。與副將馬寧督兵樹雲梯登城。奮剿殄賊黨殆盡。國棟等就擒伏誅。肅州城復。特授勇甘肅總兵。十年。喬芳疏陳勇率兵投誠以來戰功。下部議敘。予三等輕車都尉世職。時明桂王朱由榔據滇黔。孫可望李定國等屢犯湖南。命大學士洪承疇經略軍務。勇請移兵自効。得旨。張勇久歷巖疆。勞績茂著。今奏請効力繁劇。忠勤可嘉。着卽來京。以俟簡用。尋陝西總督金礦以甘肅重地。番部雜處。勇整飭有方。請仍留鎮。會承疇疏言。勇智勇兼備。部下兵精馬足。請移之湖南。授爲經略右操總兵。上允承疇請。仍召見。加右都督銜。賜冠服甲冑弓矢。勇以家口衆。乞賜宅京城。子雲翥以廕得陝西衛指揮。請改隸京衛。並得旨。俞允。頻行命內大臣索尼等傳諭曰。當今良將如張勇者甚少。軍務不可懸度。宜相機而行。切勿自負才勇。輕視敵人。十五年三月。隨承疇征貴州。七月。桂王都督羅大順夜焚新添衛城。

勇率兵馳剿。大順遁入十萬谿。勇與南一魁等冒矢石克攻險寨。斬獲無算。十二月。隨信郡王多尼進征雲南。至盤江。守者焚鐵索橋逸去。勇乘夜造橋。黎明渡全軍。擊敗桂王將白文選於七星關。十六年。晉左都督。十七年。授總鎮。守雲南。臨沅。廣西諸處總兵。十八年。擢提督。康熙二年。諭兵部曰。雲南提督張勇。前鎮守甘肅。威名素著。屬番讐服。以提督現任職銜。伊回甘肅鎮守。三年。加太子太保。先是青海蒙古戀西。喇塔拉水草饒。乞放牧。勇以其地爲甘肅要隘。不容逼處。自往飭諭。乃罷去。因設永固營。聯築八寨。四年。蒙古復相繼徙牧。至大草灘。勇諭增設甘肅西寧駐防兵四千五百二十名。部議令總督會核。得旨。張勇所奏增兵事。若令總督會核再奏。恐致遲誤。卽照所請議行。五年。奏言蒙古徙牧近邊。臣遣使飭諭。於是羌廟官軍敗之。猶不悛改。聲言糾衆分入河州。臨洮。鞏昌。京州。西寧。請嚴防禦。從之。八年。給事中張登選劾勇兩足俱癱。宜罷斥。疏下山。陝總督莫洛察核。莫洛言勇因昔年征剿。右足中流矢傷骨。常作痛。不能行履。至一應邊疆事務。尙堪坐理。得旨。張勇年久勤勞。著有功績。仍留原任。十二年。冬。逆藩吳

三桂反。四川總兵吳之龍叛應之。十三年春，三桂以逆書招勇。勇執其使以奏，得旨嘉獎。冬，陝西提督王輔臣叛於寧羌。十四年二月，甘肅巡撫華善疏言：逆賊王輔臣今據關山，迤西岐山，迤北黃河，迤南與蜀賊連結。加以西番土回乘隙屢犯，河西危甚。其得免於淪陷者，提督張勇之力。目前情勢，非提臣不能守，非提臣不能戰，非提臣不能破賊，恢復第事權不重，未免掣肘。請賜敕便宜行事。詔授勇靖逆將軍，仍管提督事。諭部臣：凡總兵以下官員，聽勇調遣拔補。是月，王輔臣遣人將三桂僞印劄及逆書誘勇。勇斬其使奏，上嘉之。封靖逆侯。二月，勇遣西寧總兵王進寶破賊於皋蘭龍尾山，擒遊擊李廷玉。復安定縣金縣。五月，僞總兵潘瑤、僞副將曾文耀赴洮河二州。諸羌乘隙肆掠。勇率兵赴河州。文耀聞風遁。勇乃別遣土官楊朝樑攻洮州。自督兵繼其後。瑤敗竄。洮河二州平。諭曰：秦省巖疆重地，軍務方殷。張勇忠勤懋著，謀略優長，久鎮西涼，奠安疆宇。近復躬履行間，殫心籌畫，屢敗賊衆，恢復城池，必期殲滅賊衆，底定秦隴，朕甚嘉之。凡用兵籌餉一切機宜，均專責任。所屬文武各官，毋違節制，務早奏膚功，以副朕委任。

至意。尋敕部優敘。以其子雲翼爲太僕寺卿。六月。進剿鞏昌。僞副將任國治等潛引兵三千人東門。合僞總兵陳科、鄭元經等。自城中分出突犯。勇率副將劉宣聖可奮剿。截其歸路。誅斬過半。擒獲四百七十三人。先是勇奉旨。凡平定地方。掃除賊寇。惟爾是賴。今貝勒洞鄂。雖攻圍平涼。而逆賊王輔臣。嬰城死守。恐稽時日。又蜀賊已過。昌甯駝來。援平涼。爾可量留官兵守鞏昌。親自率兵至洞鄂軍前。協力進取。勇疏言。鞏昌要地。兵力難分。逆賊吳之龍。進屯單河。臣赴平涼。賊必乘虛來犯。上命廷臣集議。議令勇固守鞏昌。秦州諸處。相機行之。十二月。同振武將軍佛尼勒等。剿賊西和縣。三戰皆捷。會甯夏兵變。提督陳福遇害。勇還守鞏昌。薦天津總兵趙良棟才略過人。堪鎮甯夏。命卽授良棟爲甯夏提督。十五年三月。勇同護軍統領傑殷。敗賊於甯遠縣之馬鳩鎮。四月。敘恢復洮河二州功。晉少保。仍兼太保。是月。賊萬餘。犯通渭縣。勇聞警。自狄羌進發。至十八盤坡。遇賊。分兵兩翼而衝擊。賊潰。乘勝追剿。斬獲無算。復通渭縣。五月。進征樂門。賊據險列十一寨。以阻我師。勇度地勢。橫營山梁。復折滿州綠旂各爲攻剿。備禦二營。

分南北以擊賊。下令兵皆攜草一束。營甫立。賊齊出。勇與都統赫業各率兵分擊南北山梁諸賊。賊兩路來犯。我兵分隊衝截。鎗礮齊發。賊退走梁山。復堅守壁壘。我兵以所攜草填壕直進。連斬賊將。及賊衆千餘。之龍尋復糾衆出犯。勇勒兵衝擊。大敗賊衆。遂與佛尼勒王進寶等同剿平賊寨。之龍引衆夜走。追敗之牡丹圍。及西和縣北山。之龍僅以數騎遁。是時撫遠大將軍圖海已招降輔臣。勇復遣兵敗賊於岷州階州平涼慶陽鞏昌所屬州縣悉平。諭曰。自逆賊煽亂以來。奸徒附和。侵擾地方。張勇一聞蘭州之變。卽星馳渡河剿禦。收復城邑。舉發僞劄。緝獲奸謀。綏定邊陲。厥功甚大。及大兵攻取平涼。張勇鎮守秦鞏。復殫心籌畫。調度合宜。剿禦四川賊衆。屢奏捷音。紓朕內顧之憂。功尤懋著。於軍功議敘之外。應從優加恩。酬答勳勞於前。晉一等侯。加少傅。兼太子太師。十七年。西套厄魯特濟震和囉里爲準噶爾台吉噶爾丹所敗。假道赴青海。其衆由龍井闌入內地。勇親往驅逐。出邊。二十二年。以老病乞休。初。勇月疾殘廢。行以肩輿。經十餘年。屢疏請代。至上仍慰留之。二十二年三月。勇因蒙古番衆逼黃城故城遊牧。

率兵赴丹山防守。病劇。甘州。賜醫診視。命其子雲翼馳駢偕往。四月。卒。遺疏至。得旨。張勇韜鈴素裕。殫心盡職。久鎮巖疆。剿禦賊寇。固守地方。籌畫周詳。勞績懋著。邊防武務。倚毗方殷。奄逝忽聞。深爲軫惻。下部從優議。敕贈少師。仍兼太子太師。賜祭葬如例。諡襄壯。以子雲翼襲爵。雍正十年。入祀賢良祠。乾隆三十三年。以當初征剿吳逆時。懋建勳績。其一等侯爵。特予世襲罔替。四十七年。諭曰。朕恭閱皇祖實錄。所載掃除吳逆。底定川陝事蹟。因取張勇趙良棟王進寶三人國史列傳。詳加披覽。其功績實有不可滅者。當吳逆煽亂川陝兩省。提鎮王輔臣吳之龍等相率從賊。維時邊陲告警。張勇以雲南提督調回甘肅。授爲靖邊將軍。張勇躬履行間。殫心籌畫。攻取平涼。底定秦隴。其間收復洮河諸郡。及舉發僞劄。執斬來使諸事。居然有古名將之風。而趙良棟之授爲甯夏提督。係張勇所薦。又王進寶亦曾隸勇麾下。兩人提兵轉戰。同心効力。趙良棟首先建議。直取成都。王進寶戡定保甯。擒斬渠帥。其削平恢復之勳。亦不可泯。厥後張勇封侯。趙良棟王進寶僅得子爵。蓋緣兩人各懷私怨。互相攻訐。較之張勇之勤勞懋著。始

終無過者實遜。然兩人之功，究足以掩其過。今百年論定，睽念成勞。趙良棟、王進寶宜重加追敘。前於乾隆三十二年特降恩旨，令張勇等子孫世襲罔替。張勇本係侯爵，其元孫張承熏承襲。因曠班革去散秩大臣。在三等侍衛上行走。茲特加恩復還散秩大臣。照舊供職。進取雲南，恢復成都。趙良棟之功爲最。原封三等子。著晉封爲一等子。仍准世襲罔替。並交該督撫查明趙良棟、王進寶現應襲職子孫送部候朕酌量錄用。以示優眷。夫兵可百年不用，不可一日不備。國家承平日久，每溯前勳。爰思將帥，卽張勇、趙良棟、王進寶諸人。將材武略，獨出寇時。名炳旂常。賞延苗裔。凡在戎行者，其益勵赴桓，以副干城腹心之寄。

祝世昌列傳

祝世昌，遼陽人。先世於明初授遼陽定邊前衛世襲指揮。十數傳至世昌。任鎮江城遊擊。本朝天命六年，大軍取遼陽。世昌率屬三百餘來歸。仍援遊擊。統其衆，命重築藩陽。

遼陽海告三城。事竣。擢盛京城守總兵。天聰五年。從征大淩河。六年。上親閱兵。以其訓練有方。特加優賚。尋遷禮部承政。崇德三年。疏言。俘獲敵人。婦女有籍入樂戶者。請概釋。奉旨。滿漢官會議。都統石廷柱。馬光遠等。謂世昌心護敵人。與奸細無異。應論死籍沒。命從寬流徙西北邊境。順治二年。召還。隸漢軍。廂紅旗。四年。授山西巡撫。時因賊踞山作亂。攻掠孟縣。五臺。永寧。靜樂。交城諸邑。世昌連遣將分剿。屢奏捷。五年十二月。大同總兵姜瓖叛。世昌疏言。前以山賊竊發。省城將弁分遣進剿。猝聞姜瓖悖叛。急調回防守。今附近大同城堡已爲賊據。朔州。苛風。繼陷。代州被困垂破。臣檄諸將偵禦。因所鎮俱步兵。更發營騎六百。繼陷。相賊勢猖狂。未易控制。乞命大軍從居庸進發。急剿大同。更選將分兵。從紫荆直抵代州。與臣會商機宜。南北夾攻。庶叛賊授首。六年正月疏。報賊黨姚舉。襲據寧亦萬練。盤踞偏關。劉遷攻陷繁峙。靜樂及交城。東關省城四面受敵。急請大兵會剿。詔敬謹親王尼堪統師會勦。既至太原。遂進圍寧武。逾月未下。移剿大同。賊黨乘機奪據保德。陷交城。石樓。永利。世昌復疏言。自寧武軍圍撤。賊漸逼省城。

雖有蒙古兵防守。強弱各半。賊不知懼。若待殲除。姜賊後移師分剿。恐益滋蔓。且山西一省歲賦供應軍需。實賴省城迤南汾州平陽潞安諸屬撥運。若一處被危。全省撥動。惟偏關甯武早得一日。則河西賊聞風斂跡。請救發滿洲兵數百守省城。如省城南有警。卽分遣撲剿。別撥兵駐代州。循次取偏關甯武。賊數畏滿洲兵如神。臣是以激切上請。詔下兵部議行。九月。曲沃廢官李建泰謀反。世昌得其手書以聞。奉敕嚴緝。會大軍攻大同。姜瓖爲其將楊震威斬首來獻。異親王滿達海謙。郡王瓦克達等先後攻討諸路。賊黨漸滅。建泰亦伏誅。十二月。世昌疏言。自姜瓖悖叛。羣寇蜂起。左布政使孫茂蘭。右布政使林德馨。按察使張儒秀等。與臣協商勦撫。運給軍根。雁平道許可用。河東道王無黨。苛嵐道樓希吳等。竭力禦寇。保全危城。副將范永宗。參將易自道。羅映壇。遊擊李好賢。白璧等。率兵攻戰。所至立功。各分別事蹟具奏。並下所司議敘。七年卒。詔贈兵部右侍郎。賜祭葬如例。謚僖靖。入祀山西名宦祠。

鮑承先列傳

鮑承先山西應州人。明萬曆間積官至參將。泰昌元年。隋總兵賀世賢李秉誠守瀋陽城。遷開原東路統領新勇營副將。城守如故。經略熊廷弼疏請獎勵諸將。承先預焉。加都督僉事銜。我太祖高皇帝征明瀋陽。由懿路蒲河進。承先偕世賢乘誠出城分汛駐守。見我兵至。不戰而退。追斬百餘級。俘數千人。承先遁入城。明年。大兵征瀋陽遼陽。承先退守廣寧。天命七年正月。師渡遼河。克西平堡。承先隨總兵劉渠等自廣寧赴援。渠戰死。承先敗奔。全軍盡殫。巡撫王化貞棄廣寧入關。遊擊孫得功等迎大軍入廣甯城。承先竄匿數日。隨衆來降。仍授副將。天聰三年十月。上統師征明。由龍井關入邊。承先隨鄭親王濟爾哈朗略馬蘭峪。明兵屢敗。承先以書招降其守將。進薄燕京。復招降收馬廠太監。獲其馬羸大駝。我軍自王城關擊敗明兵於德勝門外。明甯遠巡撫袁崇煥領兵二萬。屯廣渠門外。設伏隘口。二貝勒豪格兵趨右偏。奮進克捷。翌日。上命我軍勿

進攻。召承先及副將高鴻中授以密計。乃於陣獲兩太監。繫所就近。並坐假作耳語云。今日撤兵。乃上計也。頃者上軍騎同敵營二人來見。語良久乃去。意袁巡撫有密約。此事可就矣。時兩太監佯臥竊聽。旋縱之歸。果以告明帝。遂執崇煥磔之。四年。承先隨大軍克永平。正月。招降遷安紳士知縣朱堅台。遊擊卜文煥以城降。遂取灤州。承先奉命同副將白爾格等率廂黃廂藍兩旂兵駐守遷安。創立台堡五。未幾明兵來犯。我兵固守力戰。乃卻之。明總兵祖大壽等集兵六萬攻灤州。貝勒阿敏令承先率駐守遷安兵偕降衆移駐永平。及灤州失守。阿敏棄永平。率諸將出冷口東還瀋陽。上命鞠訊阿敏與諸將棄城奔還罪。以駐鎮遷安兩旂將領曾回守城池。擊退敵兵。論釋承先白格等。明年。從征大凌河。招降翟堡。八年五月。上征明督大同總兵張宗衡。總兵曾文詔等。遣鮑鞞齎書請和。鮑鞞者承先次子也。初。承先降。明人執鞞置應州獄。至是出之。使來。由山徑哈里莊遇土謝經圖濟農兵。奪其騎。斫鞞及僕從俱死。鞞復甦。莊民留養數日。有馮國璽者送鞞至。十貝勒代善營令與承先相見。遂送鞞國珍至御營。上問鞞來使之

由遣國珍齎書回。以韜劄甚留之。九年正月。承先疏言。臣竊見元帥孔有德。總兵耿仲明。爲其屬員。請勅。上許其自行。給劄。夫上下之分。自有定禮。今待以諸候之爵。降寵極矣。乃不識國體。不諳書史。要請無已。甚失人臣禮。古者帝王開國。首重名器。若任情濫予。名器一棄。賢者退。小人進矣。倘欲加意招徠。遠人可至。諭吏部分別輕重。奏請給劄。使恩出上裁。使其果能立功報効。然後請旨給劄。則無功之黨不行。百世之規自定。疏入。諭曰。元帥率衆航海遠來投誠。厥功非小。朕前旨已發。豈可食言。夫任賢勿貳。載在虞書。朕惟誠待下。自無收回成命之理。鮑承先臨陣敗走。隨衆乞降。今尙置諸功臣之列。給敕恩養。豈遠來歸順各官。反謂無功而棄之乎。朕此言亦非責鮑承先也。彼既竭誠以入告。朕亦開誠以宣示之耳。八月。大軍征察哈爾凱旋。獲元傳國璽。承先奏請命工部製造寶函。誡吉躬率諸臣郊迎入宮。以昭符瑞。仍以得璽之由。書敕鈐印。頒行滿漢蒙古。伸知天命有歸。上是之。承先尋同文館諸臣甯完我。范文程隨大貝勒代善。內外諸貝勒六部八旗衆文臣。請上尊號。上以土宇尙未一統。諭辭再三。仍固請允議。改

天聰十年爲崇德元年。先是承先以甯完我薦入直文館。至是改文館爲內三院。授承先祕書院大學士。三年。更定官制。改吏部右參政。四年。上命以郡王禮祭貝勒岳託。吏部誤傳岳託子襲封郡王。承先應罰鍰。得旨寬免。是年定漢軍旂制。承先隸正紅旂。五年。隨鄭親王濟爾哈朗等圍明錦州。令防守袁塔。因明兵阻我耕種。射傷我農人。承先坐退避不救。論死。上宥之。尋以病解任。順治元年。世祖章皇帝定鼎燕京。賜銀幣鞍馬。二年卒。遣大學士范文程視含斂。賜祭葬如例。子敬襲世職。遇恩詔。晉封至三等爵。初授河北總兵。康熙四年。隨陝西提督王一正勦流賊郝搖旂。以縱賊不追。降四級回旂。後復爲大同總兵。至鑿儀衛鑾儀使。

王世選列傳

王世選陝西榆林人。明副將。本朝天聰五年正月。太軍克明遵化。留兵守。世選隨明總兵宋惟賢來襲。至城西波羅灣。我軍出戰。惟賢陷陣死。世選敗還。及我軍攻明副總兵。

金日觀于馬蘭城總理馬世龍王世選來援縱入城圍之二月世選來襲授總兵七年賞緞疋隸漢軍正紅旂八年五月我軍將入明邊令世選同哨探前鋒副都統圖魯什率兵先行六月上親率貝勒阿巴泰豪格及世選等入上方堡由宣化府攻略朔州崇德九年隨征朝鮮又圍明錦州松山世選俱在事有功授三等子爵四年追議前攻松山時不力將紅衣礮子剩回世選同副將孟喬芳俱革職得旨寬免漢軍初分兩旂至是分四旗每旂設都統一副都統二參領四佐領十人以世選爲正紅廂紅兩旂都統順治二年世選隨大兵追李自成至潼關又隨南征破揚州松江杭州嘉興湖州五年隨英親王阿濟格討叛鎮姜瓖復汾州七年以功加三等子爵年老乞休從之十八年卒賜祭葬如例子之鼎龔官至四川提督自有傳。

鄧長春列傳

鄧長春遼陽人明前屯衛副將守大凌河本朝天聰五年隨總兵祖大壽來降賜金幣

鞍馬。崇德元年授三等男。三年授戶部承政。尋裁承政漢員。改本部右參政。七年分漢軍爲八旗。長春隸廂黃旗。給人戶爲世管佐領。八年鄭親王濟爾哈朗征明寧遠長春。任參領攻克前屯衛中後所。敘功晉二等男。順治元年更定官制。名參政曰侍郎。長春仍在戶部。奏請給京員俸薪。得旨。俸薪爲養廉重典。自不可緩。命會同兵部詳列規例以進。裁定施行。是年十月。坐復免泰安州錢糧。不白本部尙書。用印信革侍郎專任參領。降世職爲一等輕車都尉。二年隨豫親王多鐸破流賊李自成於潼關。定河南。平江南。進取杭州。遇嘉興敵兵乘勢來犯。長春奮擊敗之。我兵先後取揚州江陰崑山常熟等城。長春皆督兵礮擊有功。論敘加一雲騎尉。八年從征浙江。與副都統吳汝珍等爲前部擊敗舟山海賊。三遇恩詔。累晉一等男。十年以老病休致。康熙十五年卒。子志琳襲爵。

祖澤潤列傳

祖澤潤遼東人。大壽長子。明錦州副將。本朝天聰五年。隨大壽來降。隸漢軍正黃旗。崇德元年。授三等子。任兵部右參政。尋擢本旗都統。隨鄭親王濟爾哈朗攻克中後所前屯衛二城。敍功晉二等子。順治元年。同都統葉臣招撫山西軍旅。賜銀五百兩。五年。坐誣訐英親王阿濟格勒索屋價事革職。並削世爵。尋隨征大同叛鎮騎壤。攻克渾源州朔州左衛大同太谷縣五城。八年。敍功授騎都尉。澤潤訴前革職屬枉。詔復原爵。兩遇恩詔。晉一等子。兼一雲騎尉。十二年。隨經略洪承疇招撫湖南駐長沙。十六年卒于軍。十七年。賜祭葬如例。子植松襲世爵。潤弟澤溥。明左都督。本朝順治元年投誠。授一等侍衛。十八年。授山西總督。尋調山東。時棲霞縣土賊于七糾黨據鋁齒山出掠。詔靖東將軍濟席哈往勦。破其寨。斬馘無算。于七竄入海。濟席哈班師。而崑崙招虎兩山賊之附于七者。猶阻險不下。康熙元年。澤溥率副將劉進寶勦平之。二年。疏言甯海州之黃島蓬萊縣之海洋等島。游氛未靖。請暫移居民內地免輸丁糧。下部議行。會原任浙江按察使宋琬及姪紹祖等。爲族人宋一柄挾仇誣告。通于七謀叛。事下澤溥。尋奏。琬等

謀叛無確據。不便強擬。事下部議。以澤溥不能審取確供。請議處。命再鞫。澤溥執奏如前。經部兩議上。照謀叛後置極典。一情有可疑。杖流甯古塔。得旨。叛逆重罪。理應詳審。如實。卽應正法。如虛。卽應免罪。爾部將無確據之事。懸揣兩議。俱屬不合。宋琬并著免罪。澤溥亦免議處。四年。以疾解任。六年。復授福建總督。七年。疏言。向例各府推官赴省承審欽件。今銷官裁汰。和府有地方專責。不便輕離職守。同知通判事簡。請各輪班赴省承審。部議從之。八年。乞休。允之。十八年卒。

祖澤洪列傳

祖澤洪遼東人。大壽從子。明錦州副將。隨大壽修大淩河城。本朝天聰五年出降。後隸漢軍。廂黃旂。崇德元年正月。命爲吏部承政。六月。大淩河歸附。各官照原銜授世職。授澤洪一等男。尋恩詔加一雲騎尉。三年。定部院官制。設滿州承政一。左右參政二。澤洪爲吏部左參政。先是大壽之降也。請歸錦州爲內應。從之。去後竟負約。六年。大軍圍錦

州。令澤洪書招之。七年。授漢軍鑲黃旗副都統。八年。隨貝勒阿巴泰征明。至渾河疊橋。以濟。明總督范志完拒戰。澤洪同參政張大猷擊敗之。順治元年。詔改參政爲侍郎。澤洪仍任吏部尋偕都統葉臣等追斬流賊李自成僞將陳永福。克太原。二年。偕都統李國翰等赴西安。敗流賊餘黨守法。及叛鎮買珍。兵入搜商州餘賊。敗其酋一隻虎。四年。以不稱職。解侍郎任。六年。隨大軍勦叛鎮姜壤于大同。復渾源州左衛。澤州汾州太谷縣三城。八年。敍功晉爵三等子。兩遇恩詔。遞加至一等子爵。兼授弘文院學士。十三年。以病解都統及學士任。康熙四十年卒。賜祭葬如例。子良棟襲卒。弟良璧襲。官至福州將軍。自有傳。

耿仲明列傳

耿仲明遼東人。初與孔有德同爲明總兵毛文龍部校。後隨有德走登州。巡撫孫元化並用爲參將。及有德反。吳橋。其黨李梅者通洋事覺。皮島總兵黃龍繫之獄。仲明弟仲

格爲龍部下都司。謀作亂。龍捕斬之。疏請正仲明主使罪。時有德還攻登州。仲明遂糾將士之舊籍遼東者爲內應。城陷。有德自稱總兵。招致島中副將陳有將。毛承祿等分遣副將尙可喜。金聲桓。撫定諸島。時天津有裨將孫應龍者。大言于衆曰。仲明兄弟與我善。我能令其縛有德來。巡撫鄭宗周予以兵二千。從海道往。仲明聞之。亟僞爲有德首以給之。應龍舟師抵木城延之入。猝縛斬之。殲其衆。得巨艦以禦黃龍兵。後有德卽出攻萊州。敗還。明兵合圍登州。仲明隨有德攜人衆輜重來歸。本朝天聰七年四月。命給田宅于遼陽。輯部衆。召見宴勞。授仲明總兵官。恩賚優禮。同有德。尋隨貝勒岳託征明旅順。多斬獲。八年二月。有德劾仲明侵漁所部財物。致告訐者衆。仲明旋入奏引啓。翼日召有德諭曰。耿總兵謂訐彼之人。不可留于部下。欲改隸元師。以圖和好。甚爲合禮。其善撫之。復召諭仲明曰。爾以訐告之人。改隸元師。其黨尙有留部下者。遣諸王貝勒攻錦州甯遠。仲明皆率兵從。與有功。七年八月。奏請令部衆隸八旗漢軍。於是隸正黃旗。九月。部下參領石明雄。訐仲明匿所獲松山塔山人戶。私收叛逃。伏誅之。馮有時

骸骨致祭及殺斃無辜諸款狀鞫實罰白金千兩八年九月隨鄭親王濟爾哈朗征明取中後所前屯衛。十一月部下參領宋國輔潘孝及明雄合謀害仲明仲明以聞。下法司鞫實。斬國輔等。籍財產給仲明。順治元年四月。隨睿親王多爾袞入山海關。擊敗流賊李自成。追勦至望都。十月。上御皇極門宴賚之。尋隨豫親王多譯由河南征陝西。二年。破自成于潼關。進取西安。移師征江南。凱旋。賚貂裘蟒服良馬。黃金百兩。白金萬兩。還鎮遼陽。三年。同有德征湖南。既至長沙。分兵擊敗明桂王總兵楊國棟于中皮灘。合攻衡州祁陽及武岡皆克之。擒其總兵郭肇基。五年。振旅還京。賚黑狐紫貂冠服彩帛鞍馬。黃金二百兩。白金五千兩。六年五月。賜金冊金印。封靖南王。命同平南王尙可喜率兵三萬征廣西。攜家以隨。仲明既行。其部下副都統陳紹宗。參領劉養正。佐領張起鳳。魏國賢。收留隱匿逃人。事覺。論仲明日。陳紹宗。劉養正。張起鳳。魏國賢。雖有航海來歸之功。今隱匿逃人。是犯不赦之條矣。曩遣王南征。以爲腹心可寄。必利益國家。何乃縱屬誘掠。實出意外。其攜去隨征者甚衆。卽嚴察械歸。毋隱。仲明奉諭。旋察出三百餘。

人械歸。上疏引罪。法司議仲明應削王爵。罰白金五千兩。命從寬免削爵。仲明未及聞命。十一月次吉安自縊死。七年禮部議遣官致祭。睿親王謂其弄命。終不當予祭。王爵亦不當襲。八年。上親政。乃以其子繼王茂襲王爵。別有傳。

全節列傳

全節廣寧人。明參將。隸孔有德部下。本朝天聰七年。隨有德自登州航海來歸。授參領。尋擢副將。順治六年。封有德爲定南王。統兵征廣西。節隨征克桂林。授右翼總兵官。時流賊張獻忠餘黨孫可望李定國降附明桂王朱由榔。踞黔粵間。節率所部攻剿。克慶遠。駐守其地。招降宜山河池思恩荔浦等縣。九年七月。可望掠湖南。陷沅州武岡。進犯寶慶。有德遣將率桂林兵赴援。檄節由慶遠移駐梧州。旋聞定國將犯廣西。復檄節移兵平樂。會同提督線國安總兵馬雄禦擊。節方趨柳州。定國已襲陷桂林城。有德死之。柳州副絡鄭元勳等叛降敵。謀襲節。間道走梧州。與線國安馬雄合。定國以衆來犯。我

兵戰失利。節負重傷。潰圍出。乘舟至肇慶。請兵於平南州。尙可喜。可喜遣水師助之。乃還定梧州。藤縣潯州。十年正月。攻復平樂。馮雄守梧州。節與線國安合兵。擊敗桂王。兵部陳經猷。將軍王應龍。遂復桂林。其衛國公胡一清。義甯伯龍韜。總兵揚威等。率衆數萬屯陽朔。永福間。一再來犯。皆擊之潰遁。敍功加都督銜。子爵三等子。移駐武宣。剿平餘黨于象州。擒其總兵掌文。有羅天舜。復移駐荔浦。招撫富川縣之山岡。猺獞。時猺獞爲明裔朱盛濃及豐城候李茂先。總兵龔瑞等所餌。合謀抗拒大兵。盛濃茂先據黔楚交錯之山險爲寨。與可望定國聯絡聲援。剽掠郡邑。節同線國安遣兵進剿。連破其寨。陣擒盛濃及其弟盛添。諸猺獞俱望風歸順。十五年。線國安奉詔進征貴州。奏請以節移駐柳州。十六年。督兵進剿至融縣。斬級無算。陣擒李茂先。追擊龔瑞于懷遠。瑞窮蹙乞降。康熙元年。改右翼總兵爲左江鎮總兵。卽以節任之。七年七月卒。贈太子少保。賜祭葬如例。先是桂王城陷時。節妻溫氏及妾婢數人並自縊。子成忠。年甫十一。被掠去。及大兵定貴州。經略洪承疇訪得之。投誠總兵趙三才營。攜以歸節。至是龔三等子爵。

明末漢奸列傳 卷四

明末漢奸列傳卷五

祖大壽列傳

祖大壽遼東人。明泰昌元年。官靖東營遊擊。熊廷弼經略遼東。奏獎忠勤諸將。大壽預焉。天啓二年。爲廣甯巡撫王化貞中軍遊擊。我太祖高皇帝克西平堡。化貞令大壽同遊擊孫得功爲前鋒赴援。被我敗却。走平陽。樓堡總兵劉渠。祁秉忠。副將劉徵。參將黑雲鶴等。皆歿於陣。得功乞降。化貞棄廣甯遁。大壽走覺華島。大學士孫承宗督師薊遼。以大壽佐參將金冠守覺華島。尋令鳩築甯遠城。大壽謂是城終不能守。築僅十一月。疎薄不中程。孫承宗欲以此爲關外重鎮。用參政道袁崇煥議定。高廣規制。令副將滿桂參將高見賀謙與大壽分督改築。始竣事。六年。我朝兵圍甯遠穴地攻城。大壽與袁崇煥嬰我力守。令門卒發西洋巨礮。傷數百人。我軍別趨覺華島。斬金冠。殪士卒萬餘。

七年五月。大壽同總兵馬尤桂世祿等拒我軍於甯遠城外。敗卻。入城會溥暑。我軍還。崇禎元年。以崇煥督師薊遼。擢大壽前鋒總兵。卦征遼。前鋒將軍印。駐錦州。二年。我太宗文皇帝統師。由喀喇沁之青城。分入龍井關大安口。遂克遵化。薄京師。大壽隨崇煥由山海關薊州入衛。莊烈帝召對慰勞之。列營城東南拒戰。時有因邊關失守。京師受困。歸咎於崇煥殺皮島師毛文龍。且誣其引敵脅和。將爲城下之盟者。會我朝設間。縱所獲太監還。以袁巡撫私有成約告。遂再召對。縛崇煥下獄。大壽在旁股慄懼及。既出。又聞滿桂總統甯遠。將卒不肯受節制。卽引所部兵掠山海而東。桂與總兵孫祖壽營永定門外。爲我軍所破。並戰死。大壽初嘗坐法當斬。承宗愛其才。密令崇煥救解。遂貫之。大壽以故德二人。至是承宗復督師。遣人慰撫。且以崇煥獄中手書招之。大壽乃斂兵聽令。三年正月。大兵克永平。下還安瀾州。各留師鎮守。承宗檄大壽率兵入關規復。大壽遣諜入永平。窺我兵多寡。事覺。斬于市。四月。大壽同總兵馬世龍陽肇副將祖大樂祖可法張洪謨劉天祿等襲瀾州。以巨礮擊毀城樓。我兵在城中及永平遵化遷安。

者皆不能守。棄城出關而歸。大壽仍鎮錦州。明年七月。督關外八城兵。役築城大凌河。未訖工。太宗統師圍其城。諭從征貝勒大臣曰。攻城恐士卒被傷。不若掘濠以困之。彼兵若出。我則與戰。外援若至。我則迎擊。駕臨城南山岡。諭永平陣。獲明將麻登雲。黑雲龍曰。善射精兵。盡在此城。他處無有也。於是週列營掘壕。盡克近城臺堡。殲其出城樵。獲及偵者。諭大壽以書曰。曩者朕心實欲講和。聞爾等修築錦州城。我因以書付爾。使人寄爾言。爾若不罷錦州城工。我卽舉兵矣。嗣獲爾偵卒。我仍欲講和。釋而遣歸。爾竟不報。我兵至燕京。諄意致書。欲圖和好。爾國君臣。惟以宋朝之事爲監。亦無一言復我。朕今厭兵革。願太平。更以書來。惟將軍裁之。越數日。復諭以書曰。自古兩國構兵。不外戰與和二者。今和議旣絕。朕是以親率大兵深入。幸遇將軍於此。倘得傾心從我。戰爭之事。我自任之。運籌決勝。惟望將軍指示。蓋休戚與共。富貴同享。朕之素願。今聞城內士卒馬匹。死斃殆盡。甚爲可憐惜。惟將軍熟思而獲斷之。勿惑衆言。時明兵二千。自松山赴援。又錦州副將二參將遊擊十。率兵六千至。爲我兵擊敗遁去。太宗度大壽必期。

外援來攻我師。親率侍衛故伏。別遣營中廝卒執旂幟離城十里。馳騁揚塵。聲礮不絕。大壽果率衆出城。奪西南隅一臺。樹梯將登。遇廂紅廂藍兩旂。及蒙古諸營兵齊進奮擊。又望見上率侍衛及護軍自山騰躍下。始知墮計。急收衆入城。已爲我兵陣斬臺下者十七人。中鎗死者百餘人。自是閉城不敢出。旣而永平監軍太僕寺卿張春。遵化總兵吳襄。副將張吉甫。滿庫王之敬等。合步騎四萬赴援。距城十五里。太宗親督師。破其營陣。斬吉甫庫之敬。殲其兵無算。吳襄與副將祖邦樂。金國臣參將祖邦林。遊擊祖寬。蒙古將桑噶爾塞等。俱竄走逃遁。副將張宏謨。楊華。徵薛大湖。參將姜新。遊擊黃順。千總姜桂等。皆就擒。大壽在城中聞鎗礮聲。謂仍是設計誘之。不遣一人出。城中糧絕薪盡。殺人爲食。折骸而爨。太宗命陣獲各官。致書大壽招之降。以姜桂齎往。大壽偕衆官出城見姜桂。謂曰。我甯死於此城。不降也。越二日。太宗復予大壽及副將何可剛。張存仁。竇承武諭曰。姜桂還言爾等恐我殺降。故招之不從。夫我國用兵。宜誅者誅。宜宥者宥。旣寬宥者。悉加恩養加等。豈未之聞也。我非不能取。不能久駐。但思山海關以東。智

厄之士。盡在此城。若殺爾等。於我何益。何如與衆將軍共成大業。故以肝膈之言屢屢相勸。意者爾等不願與我共事。故出此支飾之言耶。倘實欲共事。可遣人來共從盟誓。旣盟之後。復食其言。不畏天地乎。幸勿遲疑。先是八月丁未。大兵圍城。至是十月乙丑。幾又十月矣。所獲小凌河至松山一路牲畜甚多。又攻降魚子嶂臺。所遺糧糗充積。足供圍城步騎一月之需。壕壘修築甚堅。大壽謀突圍出。則防守嚴密。一人不能逸。援兵自外至者。又皆敗遁。計無所出。太宗復遣陣獲參將姜新往招之。大壽率衆官出城與揖見。乃令遊擊韓棟隨姜新詣御營朝見。韓棟以軍容整暇。嚴密防衛。還白大壽。大壽令其從子祖澤洪以書繫矢射出城。復以其養子祖可法送大軍爲質。邀副將石廷柱過壕。親告以心腹語。廷柱過壕與語。大壽曰。人生豈有不死之理。但爲國爲家爲身三者並重。今旣不能盡忠報國。惟惜身命耳。若身雖獲全。妻子不能相見。生亦何益。上果能不回軍進圖大事。當設策先取錦州。錦州得。庶可保吾妻子。上復遣同巴克什遠海往諭曰。我旣招降爾等。復攻錦州。恐我兵過勞。爾等降後。錦州或以力攻。或以計取。任

爾等爲之。不然。爾等坐守城中。我惟有駐兵圍困而已。明日大壽令其中軍施大勇來代奏言。降志已決。欲令一人潛入錦州偵視。倘被詰出虛實。奈何。或親率兵詐作逃走之狀。何如。悉惟上裁。是時城中各官皆同謀歸降。獨何可剛不從。大壽令二人掖出城外。投於大軍前。遂遣副將四。遊擊二。齎誓書。列大壽及副將劉天祿。張存仁。祖澤潤。祖澤洪。祖可法。曹恭誠。韓大勳。孫定遼。裴國珍。陳邦選。李雲。鄧長春。劉毓英。竇承武。參將吳良輔。高光輝。劉士英。盛忠祖。澤遠。胡宏先。遊擊祖邦武。施大勇。夏得勝。李三忠。劉良臣。張可範。蕭永詐。韓棟。段學孔。張濂。吳奉臣。方一元。涂應乾。成變武。方獻可。劉武元。楊名世三十餘人。各言率衆歸降後。若違心背盟。則殃及其身。死於刀箭之下。太宗率諸貝勒蒞盟。命巴克什庫爾禪能什問大壽曰。旣經盟誓天地。當用何策以取錦州。大壽曰。我卽親至商議。太宗復遣二臣諭曰。盟誓雖中。民心未定。今晚且勿來。大壽曰。事已定。更何疑。遂親詣御營。是爲本朝天聰五年十月戊辰也。上命諸貝勒迎之二里外。時初更將盡。列炬以俟。上出幄。大壽欲跪。上止之。行抱見禮。旣入幄。命坐于左。設饌以金。

勇酌酒。親授飲。大壽曰。願借上酒奉獻。遂酌酒跪獻。飲畢。與語良久。以御用黑狐帽貂裘。及金飾鞋帶等物賜之。諭曰。因在戎行。携物無多。不能以嘉物相贈。大壽曰。蒙上優待如此。雖至愚。豈木石耶。遂辭入城。明日上用大壽策。命貝勒等率八旂諸將。及兵四千人。俱作漢裝。大壽率所屬兵三百五十人。以二更起行。趨錦州。礮聲不絕。爲大凌河城中人突圍奔還狀。會大霧。人覲面不相識。軍皆失隊伍。各收兵而還。十一月庚午朔。諭諸貝勒曰。朕思與其留大壽於我國。不如縱入錦州。令其獻城爲我效力。卽被叛而不來。亦非我意料不及而誤遣也。彼一身耳。叛亦聽之。若不縱之。使往倫明國。別命人據守錦州。則事難圖矣。今縱還大壽一人。而携其子姪及諸將士以歸。厚加恩養。再圖進取。庶幾有益。乃遣人傳諭詢大壽曰。今令爾至錦州。以何計入城。旣入城。又以何策成事。大壽對曰。我但云昨夜潰出逃避入山。今徒步而來歸。則錦州軍民俱我所屬。未有不信者。如聞礮。則知我已入城。再聞礮。則事已成。上可以兵來矣。遂以其從子澤遠及廝卒二十餘自隨。旣渡小凌河。去騎徒行。遇錦州探卒。偕入城。越三日。遣人至大凌

河。詰其所屬諸將曰。錦州兵甚衆。將從容圖之。爾諸將家屬已潛使人贍養。後會有期。倘有衷言。卽遣人來。無防也。於是上將旋師。賜勅大壽。令毋忘前約。大壽復遣人齎奏至。言期約之事。常識於心。因衆意懷疑。難以驟舉。望皇上矜恤。歸順士卒。善加撫養。衆心旣服。大事易成。至我子姪。尤望恩盼。上命毀大凌河城。携大壽從子澤洪等及諸將以還。優賚田宅。服物器用。降兵萬餘。咸分隸安業。大壽初還錦州。自言突圍出。明巡撫邱禾嘉信之。旋知其已納款。以疏聞。莊烈帝但羈縻大壽。勿罪也。惟以蒙古將桑噶爾塞等赴援。不力戰敗。先遁。密令大壽殲之事洩。桑噶爾塞率衆蒙古環甲三晝夜。欲執大壽來歸本朝。大壽慰之曰。我視爾如兄弟。爾安得若此。桑噶爾塞曰。聞欲盡殺我等。圖自救耳。大壽曰。殺我自必及爾。殺爾自必及我。與之盟誓。而定敕使至。自京師召之者三。大壽語錦州將士曰。我雖竭力爲國。其如不信我何。終弗往。越二年。上遣都統阿山等略錦州。賜之書。不報。明年。豫親王多鐸等征錦州。大貝勒步騎出城五里立營。令松山城守副將劉成功等以兵三千迎戰。至大凌河西。與我前鋒軍遇。未接戰。豫親王

率兵自山而下。軍容甚整。塵起蔽天。明兵發。辨我軍多寡。大驚奔潰。我軍分路追擊。擒遊擊曹得功。及守備三人。殲其兵五百。獲馬及甲冑無算。大壽竄入城。崇德元年。上授大凌河降將世職。澤潤三年。子澤洪可法。一等男。皆任參政。二年。以蒙古輸誠。朝鮮底定。廓清皮島諸捷音。勅示大壽。使密陳征明之策。大壽又不報。三年。移駐中後所。邀阻征山海關。大兵互有殺傷。上親臨以勅諭之曰。數載相別。朕謂將軍猶在錦州。欲一晤而旋。不意將軍乃駐此地。出城一見。是所願也。至去留之意。惟將軍是聽。朕終不相強。若曩則釋之。今乃誘而留之。何以取信於天下乎。將軍雖屢與我軍相角。爲將之道。固所宣然。朕絕不以此介意。毋因此而見疑。尋命移師攻其兵之列營城外者。至大壽已收兵入城矣。乃遣俘獲人齎勅再行言。曩者大凌河釋汝。朕之諸臣。每謂朕昧于知人。今將軍宜出城相見。若懷疑懼。則朕與將軍可各將親信一二人於中途面語。蓋朕之欲相見者。一以解朕昧於知人之嘲。再則使將軍子姪及大凌河各官皆謂將軍之能踐言也。大壽終不敢出。我軍攻克旁近諸堡。大俘獲而還。四年二月。上統師圍松山。分

兵攻連山塔山杏山。守杏山城者。大壽從子澤遠也。大令壽部將三人率兵九百援之。將入城。我前鋒軍躡擊。俘百人。斬五十人。伏獲一百四十。先是睿親王多爾袞等征明入長城。薄京師。趨山東。明人大驚。調大壽兵入援之。使者數至。大壽甫行。聞我軍圍松山。仍還守甯遠。上命大學士常福等齎勅至錦州。明陳利害。諭大壽妻。令其審時度勢。導大壽來降。毋執迷以及于禍。大壽於甯遠選壯士良馬約六百餘。令副將楊震祖克勇徐永昌等率之。越錦州經烏忻河口。爲我分駐。兵擊敗。震就擒。上聞睿親王等凱旋。乃班師。大壽復還鎮錦州。五年。鄭親王濟爾哈朗率兵屯昌義州。有杏山城西五里駐牧之蒙古蘇班岱等願來歸。王以兵迎之。大壽偵我兵寡。令遊擊戴明引兵七百。與駐守松山杏山之總兵吳三桂。調用習兵七千邀我軍。我軍分隊衝擊。大敗其衆。斬副將二參將一獲。其後六年。鄭親王等復圍錦州。大壽令蒙古兵守城郭。蒙古台吉諾木齊等謀歸我。使齎降書者縋而下。約獻東關。已有期。大壽覺。欲擒衆蒙古。日暮整兵至城郭。諾木齊等迎戰。聲聞城外。我軍薄城下。蒙古縋繩援以登。合擊。大壽退守內

城其都司守備以下十餘員。及戶口六千餘俱來降。八月。明總督洪成疇聞大壽危困。率兵十三萬赴援。上統師進擊。屢敗之。杏山塔山及高橋諸要隘。留王貝勒等圍洪成疇於松山城。七年二月。城破。擒洪成疇。及大壽弟總兵大樂。遊擊大名大成等。並降之。大壽方困守錦州。一年。外援盡絕。糧竭食人。戰守計窮。松山城破。大懼。使人詣鄭親王軍言。得見祖大樂卽降。鄭親王令使者見之。大壽復使人請盟。鄭親王怒曰。我圍困此城。且夕可取。有何顧慮。乃與爾盟誓乎。將攻之。大壽乃遣澤遠及其中軍葛勳引罪。明日。率衆詣軍營叩首獻城。事聞。諭凡大壽族屬部衆概勿殺。召大壽及諸降將賜宴。大壽跪奏曰。臣昔困於大凌河。計窮乞降。蒙恩遣還錦州。取妻子兄弟皆來。臣不惟負恩。且屢與大軍對敵。今以食盡來歸。應萬死。上諭之曰。爾之背我。一爲爾主。一爲妻子宗族耳。得爾不加誅。懷之已久。此後竭力事朕則善矣。命分降衆隸漢軍八旗。大壽遂隸正黃旗。仍官總兵。賜賚優渥。降將顧用極奏曰。大壽不得已而降。其心變易不常。恐效凌河故轍。都察院參政張存仁亦言。大壽悔盟負約。勢窮來歸。卽欲生之。待以不殺。足

矣。宜勿任用。上以明總兵吳三桂等未附。卒厚遇之。十月。大壽奉命致書召三桂來降。三桂大壽甥也。答書不從。是時貝勒阿巴泰等征明。以明兵固守山海關外五城。別由黃崖口入薊州。越京師。略山東郡邑。八年正月。大壽奏言。臣先執謬。自辱其身。深愧歸降之晚。伏觀皇上寬仁神武。一統之業。朝夕可定。以臣目擊機會。先取山海關五城。最爲上策。明文武官之能否。城之虛實。兵之強弱。臣所洞悉。宜乘此時攻取中後所。收吳三桂家屬。彼必爲之心動。其餘中右所中前所前屯衛一鼓可平也。破山海關更易於破甯遠。山海軍士皆四方烏合之衆。不諳陣戰。絕其咽喉。撤其藩籬。海運不通。長城不守。彼京師難保。三桂安能固守甯遠也。是年六月。大軍之征明山東者始凱旋。十月。鄭親王率兵攻中後所前屯衛。中前所取之。明年。世祖章皇帝定鼎京師。凡大壽子姪皆授顯爵。順治十三年。大壽病卒。命祭葬。視一品大臣例。以從子澤潤爲長子。屢敘軍功。遇恩詔。晉爵一等子。加一雲騎尉。官至都統。次子澤溥。官福建總督。第三子澤洪。官副都統。俱別有傳。

吳汝玠列傳

吳汝玠遼陽人。明錦州遊擊。本朝崇德七年三月。大軍取明錦州。汝玠來歸。授佐領。隸鑲紅旗漢軍。十一月。隨貝勒阿巴泰等征明。由黃崖口長城入越京師。趨山東。敗明總兵張登科、柯文薦等。八年。隨鄭親王濟爾哈朗取明前屯衛中後所二城。有功。尋授參領。順治元年。隨都統葉臣等征山西。時流賊李自成已遁入西安。賊黨陳永福據太原。抗我師。汝玠攻克其城。復隨英親王阿濟格征陝西。進剿流賊。至湖廣。敗賊將馬進忠于武昌。二年。擢鑲紅旂漢軍副都統。二年。敍功子雲騎尉世職。復隨肅親王豪格敗叛鎮賀珍、武大定等于秦階二州。五年。改授禮部侍郎。六年。命以副都統駐防杭州。時明魯王朱以海及其臣阮進、張自振等踞舟山。八月。汝玠同總督陳錦、都統劉之源、提督田雄等分兵進剿。由定關出海。汝玠同前隊舟師揚帆先發。遇于橫洋。奮勇進擊官軍。並追敗之。擒阮進。乘勝抵舟山。汝玠率衆先登岸。大兵繼之。薄城堞。鑿地道。垣堞

摧陷海中。名振勢蹙。縱火自焚。遂擁魯王遁。九年。海賊鄭成功遣其黨犯漳州。汝玠奉詔率師至福建。賊聞風毀橋。列陣拒戰。汝玠與平南將軍金礪擊敗之。復遣步兵追擊。破賊三千于海岸。漳州圍解。成功復驅衆數萬。結營海澄縣東。汝玠同礪分兵進剿。三戰三捷。斬獲無算。成功遁走。十三年。甯海大將軍伊爾德統師赴浙江。剿舟山餘孽。令汝玠及總兵張杰分兵自溫台出海會剿。過黎陽口遇賊艦三百餘。力戰大敗之。又擊之于崇門洋。獲戰船四。生擒其將丁宏業。論功並遇恩詔。晉世職爲二等輕車都尉。十四年十二月。以老病致仕。康熙十一年卒。賜祭葬如例。子國鼎先卒。以其孫洪襲世職。官至甘肅提督。

王宏祚列傳

王宏祚雲南永昌人。明舉人。官戶部郎中。督餉大同。本朝順治元年投誠。授岢嵐兵備道。宣大總督吳孳昌以宏祚籌畫軍餉協力。奏留大同二年。總督李鑑荐其堪任臺省。

改授戶部郎中。時中原甫定。圖籍散佚。部臣以宏祚諳習掌故。奏令編訂賦役全書。三年。加太僕寺少卿銜。六年。遷太僕寺卿。仍兼戶部郎中。十年。擢戶部右侍郎。是時雲南貴州未隸版圖。而海南辰州爲孫可望侵踞。宏祚請于江南江西湖廣豐稔之地。採糴米穀。厚儲糧餉。爲恢復辰州進圖黔滇計。又言。明白洪武時。以沐英鎮滇。世襲黔國公。迄今沐英任久。爲滇省人民士司所信服。其僚屬有閒處江甯者。宜令往滇省招彼爲內應。貴州有九股黑苗。自都勻黎平蔓延廣西慶遠湖南靜州。近來爲孫可望蹂躪。亟宜加意撫綏。俾傳諭諸士司歸化。至其冠服異制。當仍其舊。使勿驟更易。上以所奏有資撫勦。令經略大學士洪成疇酌行。十一年。給事中郭一鶚劾宏祚修賦役全書。逾久未成。總理錢法。巧增鑄爐于官大。戰征餉銀。朦混浮消。宏祚疏辯。一鶚復劾其巧言飾非。詔部臣察議。部臣以一鶚所劾各款不實。惟各省造冊遲延。致稽成書。宏祚不舉劾。論罰俸。尋轉宏祚左侍郎。十二年。疏言。有司私派累民。請嚴飭禁。又將領借名冒餉。勅督撫嚴覈。補其虛額。汰其老弱。革其侵尅。俱下部議行。十三年。戶部援恩詔赦免員外。

郎朱世德虧缺河西務稅銀。部臣坐瞻徇。降革有差。宏祚降三級留任。十五年。賦役全書成。錄宏祚編輯勞。還所降級。是歲考滿。加一級。廕一子入監。尋戶部尙書。加太子少保。命同大學士巴哈納等較計律例。十六年。諭獎勤勞奉職諸臣。晉太子太保。先是宏祚父母遠在雲南。音問阻給。至是太兵平雲南。宏祚聞其父母俱病歿。疏請回籍守制。得旨。覽卿奏。具悉至情。但部務殷繁。正資料理。著在任守制。不必回籍。踰月。復諭以卽出供職。十八年。聖祖仁皇帝御極。宏祚乞假歸葬。詔允所請。旋諭吏部曰。前以宏祚情詞懇切。特准暫歸。今思部務殷繁。宏祚才具敏練。急需總理。著事竣卽還朝。康熙三年六月。補刑部尙書。十一月。復任戶部尙書。六年。充會試正考官。於是年七月。輔政大臣鰲拜構陷戶部尙書蘇納海罪。引其黨瑪爾賽代之。與宏祚理部務輒齟齬。大學士班布爾善亦鰲拜黨也。與瑪爾賽素相比。七年四月。戶部有失察書役假印盜庫銀事。吏部議戶部諸臣處分。援恩詔免班布爾善。獨票擬宏祚革職。遂罷任。八年。上察知鰲拜瑪爾賽班布爾善等罪狀。起宏祚爲兵部尙書。九年。以老乞休。詔致仕乘驛歸里。食原

官俸。十一年。宏祚具疏辭俸。諭曰。卿任官著有勞績。引年乞休。特賜祿俸。以資頤養。不必固辭。十三年卒。賜祭墓如例。謚端簡。

李化熙列傳

李化熙。山東長山人。明崇禎七年進士。選河州府推官。丁憂服闋。補河間府推官。累遷天津兵備道。擢四川巡撫。方就道。改調陝西總督。會孫傳庭敗歿於潼關。余應桂往代。以逗遛奪職。乃擢化熙兵部右侍郎。總督三邊。時西安已失。化熙不能行。既而命率總兵高傑援山西。未至。而蒲州平陽相繼陷。及李自成陷京師。化熙率所部就食于家。本朝順治元年八月。化熙遣遊擊吳仲上疏歸誠。并題明所部兵馬數目。及地方土寇情形。詔入朝。而天津總督駱養性亦荐其才。乞賜徵用。九月。授工部右侍郎。十月。化熙疏荐明副都御史竇毓祥。太僕少卿劉巖。戶部侍郎來之普。給事韓源等。得旨。著吏部確校才品。酌量起用。二年四月。轉左。四年四月。兼兵部侍郎。六年十月。加右都御史銜。八

年八月。晉太子太保。九年十月。擢形部尙書。十年四月。條奏慎刑五事。一恤刑之道。宜速查會典。每年秋審外。五年又一大審。謂之恤刑。在京刑部會三法司審錄。在外遣刑部大理寺官分行直省會巡按御史審錄。其矜疑遺釋之數。恆倍于熱審。前經臣部題請。奉旨以順治八年爲始。五年一遣。現在直省刑獄難保無冤。如必待順治十二年再遣。轉恐不得同沾泣罪解網之恩。請自今年始。卽遣廉幹官員分行直省。照例矜恤。一死刑之等宜別。查律載死刑分立決監候二等。斬立決者。以待謀反大逆強盜等。其餘斬絞俱監候。今在外所擬死刑。先下臣部核奏。巡按御史再行親審。始奏處決。而在內死刑。一概立決。是內外兩法也。臣愚以爲一切死刑。宜悉遵律列。分別兩等。以昭畫一。一秋決之規。宜復查會典。每歲行刑。必于霜降後。所以順天時重人命也。仍復監候之例。則獄中積死刑暫多。照舊審錄。于每歲霜降後具題請旨。將現監重囚。命九卿科道官會同審錄。情真罪當者。具奏處決。其可矜疑及詞不服者。另請詳審。庶無竄濫。一熱審之令。宜著查會典。小滿後三法司會審。現監罪囚答罪釋放。徒流以下減等。重囚可

矜疑者奏請定奪。蓋以夏暑恐獄囚非辜病死。故急爲決遣。或令出獄聽候。臣謂宜著之會典。歲一舉行。一罪人逃兩次者絞例。人命至重。此輩法固難宥。情猶可矜。請再寬一次。經三次。立付絞刑。疏入下部議行。惟卹刑仍遵前旨。五月疏言。舊例臣部專管覆奏科抄。及御前發審重事。卽在內五城各衙門。必重犯。始送部。在外道府州縣小事。無須徑達。乃今科抄歲不下千餘件。俱須核擬題奏。及奉諭旨後。又有滿漢各衙門應行咨文。及登記檔案等事。是一事而更端再四。至下三法司者。較此又多一番關會。招內或未明。復駁查不已。徒成遲滯。近復以投旂人逃後。專聽臣部歸結。其中拿解窩隱居半。再如御狀通狀。滿洲本牌應行詳審。及各衙門未經奉旨事件。徑送臣部。頭緒不清。時日易滯。竊以爲旂下重事。旣悉歸臣部審理。其小事在內宜責成五城御史。在外宜責督撫按。至拏解逃人更繁。尤須有專董官。大理寺事簡。請勅令料理。他如土賊應歸兵部。田土戶口應歸戶部。庶臣部得循分盡職。一清積案。部議均如所請。尋大理寺卿魏瑄奏拿解逃人事。大理寺無番兵捕役。難以專董。復下部議。增設督捕侍郎。詳魏瑄

傳。化熙以母老乞終養。允之。并合馳驛還里。康熙八年卒。賜祭葬如例。

衛周允列傳

衛周允山西曲沃人。明崇禎七年進士。初任浙江金華府推官。行取授四川道監察御史。本朝順治元年五月。大兵定燕京。授周允原官。巡按真定順德廣平大名四府。九月。疏荐明吏部尙書傅永淳湖廣巡撫王夢尹等。均下部錄用。時畿南州縣正官多缺。周允請於現任教職佐貳。及原任知縣中選補。又請急推巡撫。以資彈壓。選道府以重地方。得旨。畿南重地。巡撫豈宜久待。速推舉用。道府州縣。需官甚多。照缺悉與選補。又奉旨。察敍三關總兵郝之潤功。周允以之潤原明真定副將。因流賊勢盛。走倒馬關。非有三關責。亦無總兵銜。李自成竄出固關。非由倒馬關。而之潤自以恢復岩關敍功。所敍人皆非地方所識。所加銜又皆由已立名。且肆掠不法。無功可敍。奏入。下部知之。十二月疏言。臣巡各處地畝荒蕪。百姓流亡。十居六七。若照舊額責征。是令現在之丁。代逃

亡者重出懇熟之地。爲荒蕪者包賠也。臣以爲欲清荒田。法在丈量。欲清丁糧。法在編審。徹底清查。錢糧自有實數。官吏無矇蔽。百姓免代賠矣。又言。順德府屬刑臺南和鉅鹿三縣。連遭兵火災荒。請照恩詔蠲免例。全免三縣錢糧。從之。二年五月。山西孟縣土寇崖思亨韓嗣昌等倡亂。勢延直隸平山縣。周允檄井陘道邱龍華發兵勦捕。並請勅山西巡撫督兵會剿。六月。疏荐明通政司參議劉尙信。副使成仲龍申爲憲。郎中閻禧等。閏六月。疏言。內邱邯鄲兩縣。荒蕪實甚。請照涉河唐山例。全蠲免元年錢糧。七月。疏言。真定滹沱河泛逼南關。廣平漳澄二河壞城垣。順德府城深州城內邱隆平邯鄲武強各縣城俱衝塌。鉅鹿永年任縣曲周甯晉唐山各縣田俱沒。請恩蠲租賦。九月。疏言。畿輔守城兵因賊已平。盡裁汰。今荒旱水澇。賊盜漸生。請酌復。又言。去冬州縣因辦兵差。派民供草豆。卽抵應完錢糧。至今未消算。又據詳辦草豆數已多于應解銀數。宜畫一。以免浮增。有司陞遷不常。誰肯實心任事。宜議定規則。以免凌躐。真定駐兵六千。未必俱實。每名實給銀三分。餬口不足。請裁虛報。加給現在諸兵。疏入。俱議行。十月。差滿

回京。掌河南百事。三年。遷大理寺寺承。五年大月。遷本寺少卿。十一月。丁母憂歸。九年。服闋。補原官。十年二月。擢工部右侍郎。四月。調兵部右侍郎。七月。應詔陳時事五款。一。各省郡鎮將弁恣肆。甚有縱兵嚇詐貽害者。請勅各督撫嚴明紀律。有寇賊竊發。不卽暫兵擒剿。反擾掠堡塞者。參究。一招撫原爲止殺。安置豈宜養癰。直省有未撫寇黨。照秦督孟喬芳安置張登李雲例。不得假以官銜。致生事端。一隱匿逃人。例當分明。如自盛京隨來者曰東人。自順治元年至今投充者曰旂下人。本自有辨。匿旂人與匿東人。當有別。又逃人隱匿出京與在京。紳士誤犯。與平民犯者。均當有別。一武職原不許涉詞訟。近來奸人誣良爲盜。武弁濫准鎖拏。有司無可如何。宜禁止。一驛傳積弊日深。馬有額設。民甚多賠貼。牛並無額設。每兵差經過。用車若干。官吏出票濫抓。分肥牛瘦牛。上車下車名色索費。民廢耕種。實滋賠累。無從控訴。宜禁革。俱下部議行。十月。因議總兵任珍罪。徇黨附利。議革職。特旨量予罰俸。十一年八月。因議雲騎尉呂獻忠僅予一案。援敕具奏。上以兵部堂司官顯有受賄情弊。下諸王大臣議。分別降革。周允降三級。

調外用。未補官。以疾歸。十七年卒。康熙十二年入祀鄉賢祠。

宋權列傳

宋權河南商邱人。明天啓五年進士。官順天巡撫。駐密雲。受事甫三日。流賊李自成陷京師。本朝順治元年五月。權斬賊將黃錠等。籍所部投誠。命巡撫如故。首獻治平三策。一議崇禎廟號。以彰至德。念舊主御宇十有七年。民窮寇起。卒致篡弑之禍。幸聖主殲賊復仇。祭奠以禮。凡有血氣。莫不感泣。倘勅下廷臣。議定廟號。以光萬世。則天下咸頌大聖人之仁至義盡。四海可傳檄而定。一盡裁加派弊政。以蘇民生。明朝以軍需浩繁。有加派之徵。有司假公濟私。明徵之外。有暗徵。公派之外。有私派。民困已極。今請照萬歷初年賦役全書爲正額。其餘各項加增。悉予蠲免。則百姓熙然樂業。一廣樂賢才。以佐上理。臣所知者。如薊遼總督王永吉。原任監軍道方大猷。原任蘇州道楊毓揖。及原任南京禮部尙書朱繼祚。原任戶部侍郎葉廷桂等。均濟時舟楫。惟皇上召而用之。更

請勅廷臣各舉所知。廣收得人之效。奉旨崇禎廟號。蠲免賦稅。俱已有旨。加徵弊政。速宜停止。所舉各官。該部詳察徵用。仍傳諭廷臣各舉所知。以副求賢圖治之意。逾數月。奏荐寶坻進士杜立德等十一人。又請勅禁外任文武官擅離職守。出入京師。時權仍駐密雲。撫治二十餘州縣。兼理軍務。旋以遵化當衝要。命移駐焉。前後擊降流賊餘黨數千人。豐潤被賊掠。權悉力擒治。因賊渠未獲。自請罷斥。溫旨慰留之。部民有以祖軍民壯兩害共訴者。權疏言。明制祖傳軍籍。隸在營路。選取民壯。隸在州縣。身故則勾子孫。子孫絕則勾宗族。宗族絕則勾戚屬。流離逃竄。亂由此階。請特沛恩綸。除滋弊政。又有私雕順天巡撫印信。僞爲糾舉。啓文投部者。事覺。逮治。權疏言。用舍者君人之權。黜陟者銓樞之政。薦劾者撫按之職。請飭各省撫按。除商確細事。准用咨文外。凡有關用舍大典。必具疏請。不須以咨文從事。則百弊俱清。疏上。並如所請。著爲令。畿輔旣平。詔撥近京荒田。及明朝貴戚內監等莊田。畫爲旂地。凡民田錯雜者。另給官田互易。權疏言。農民甫得易授之田。廬舍無依。耕種未備。請特恩蠲租三年。與民休息。又言薊州地

處荒殘。前奉恩詔。以大軍經過。蠲租一半。小民輸納猶艱。請照霸州一體全蠲。密雲當兵燹之餘。流亡未集。請將荒地逃丁。派徵錢糧。悉利豁除。查現在貧民將寶坻縣貯倉粟谷分別賑濟。已荒地畝。仍招徠開墾。俟熟起科。又言農事旣興。屯政宜講。計三協屯田。舊額十八萬餘畝。今請戰兵外。每守兵給田十畝。作五月兵種。再酌餘月應額之糧。給以半種。俱下部議行。會奉詔優恤綠旂陣亡兵。每名給家屬銀三十兩。權以總計三協。費帑金數萬。此莫大恩施。但恐委之營員。或有混冒侵欺之弊。乞特遣部臣蒞視。散給俾各沾實惠。三年擢國史院大學士。四年充會試主考官。五年以母喪請終制。得旨。內院機務繁重。著照舊入直。私居持服。六年五月。充纂脩太宗文皇帝實錄總裁官。二月。再充會試主考官。九月。乞假葬親。允之。十月。恩詔加太子太保。七年。還朝。值議御史巡方事。權力止停差。奏罷諸巡方御史。八年。條陳廢員宜起。巡按宜復。一疏給事中陳調元。王廷諫等。以起用廢員。已奉明旨。權不言于聖旨。未行之先。而言于既行之後。巡按之差。在當日權以爲不必行。在今日權何又以此爲請。且追劾其母喪未除。入闈主

試。連疏劾之。下吏部部議。權老病。宜罷歸。遂奉詔致仕。九年。卒于家。禮臣奏。權被劾。致仕。應減祭葬之半。上以權無大過。且入關之初。誅流賊黨羽。率衆首先投誠。功不可泯。特贈少保。兼太子太保。賜祭葬如例。謚文康。長子忻。廕中書舍人。次子犖。別有傳。

任濬列傳

任濬。山東益都人。明崇禎四年。進士。累官兵部右侍郎。兼右僉都御史。流賊李自成陷京師。濬被執不屈。賊釋之。本朝順治八年。以兵部右侍郎劉餘佑荐。授戶部右侍郎。督理錢法。二年。乞假省親。八年。丁憂服闋。補原官。尋授倉場侍郎。加右都御史。駕幸通州。賜貂裘等物。十一年。刑科給事中陳忠靖劾濬不能禁革陋規。有負簡任。濬回奏。部議免罪。遷刑部尙書。十年。正月。疏言。律多不備。例出隨時。添註殊欠折衷。又八旂事多用靠例。如律殺人者抵。而例有王墳跪首減免之條。給主埋葬。而例有賠人之條。盜賊未獲贖。而例有追產賠主之條。律有五刑。而例自大辟以下。皆主鞭一百。如此類。頗多律

例不符。滿漢互異。乞皇上勅滿漢堂官專領其事。慎選司員。一一商確。疑難者請旨裁定。靠例可更者。一準于律。不可更者。卽載入律條著爲令。又大辟有立決監候兩等。按律所言。決不待時。謂不待秋決。非謂招成不待覆奏卽處決也。查會典。凡在外絞斬凌遲監候者。依期俱差官處決。如有決不待時重囚。許議具奏。卽差官前去審決。蓋恐立決尙有疑情。可臨時三覆。詳慎人命。嗣後凡奏旨依擬立決。在內者三法司仍會審覆奏行刑。在外者宜復差官審決例。庶無冤濫。下部議行。二月。以年老致仕。十三年。卒。賜祭葬如例。

明末漢奸列傳

卷五

明末漢奸列傳卷六

徐起元列傳

徐起元江南合肥人。明舉人。累官隕陽府知府。崇禎時流賊張獻忠自陝來湖南。隕陽危急。起元與按察使高斗樞招降賊渠王光恩。戰頻捷。賊不敢犯。後李自成陷襄陽。分遣賊黨路應標等數萬寇鄖陽。環攻三年。賴起元善守。光恩善戰。湖南北十四郡皆陷。隕獨存。事聞。莊烈帝擢起元右僉都御史。撫治鄖陽。自成恨隕不下。復遣應標等增兵急攻。起元夜襲賊營。斬應標。圍解。本朝順治二年二月。英親王阿濟格追勦流賊於陝西。將至湖南。起元遣光恩戮襄陽賊衆。復均州。光化。穀城。南漳。備舟濟。大兵投誠。以王光恩署總兵官。起元仍以原官視事。疏言英親王體皇上好生之心。凡賊黨歸順者。俱寬宥安置。但此輩虎狼成性。難保無虞。查承天。荊州。襄陽。宜城。鄖州。荊門。俱有降賊居

州城中。今一隻虎李過賊數萬。盤踞當陽遷安。其心叵測。倘大兵遠離。賊乘間蠱惑降衆。患有不測。請將新降之衆。分散四方。聽各撫節。毋令養癰。上報可。六月起元駐襄陽。遣參將劉世安屯南漳。副將王光泰屯宜城。遏賊前鋒。十二月賊黨劉體純犯襄陽。起元同光恩鏖戰三日。殺傷甚多。賊不支遁。三年入京。陛見。授都察院右副都御史。五年。遷左都御史。六年。加太子太保。八年。甄別部院大臣。上以起元不稱風憲之職。著調用。十年二月。以原銜管大理寺卿事。四月。得旨。徐起元堅守襄陽。投誠有功。年老可念。著以原官致仕。馳驛歸里。仍廕一子入監讀書。十六年卒。賜祭葬如例。謚僖靖。

張煊列傳

張煊山西介休人。明崇禎元年進士。由知縣累官河南道御史。大學士陳演之戚。廖於義爲御史考實授。屬煊爲之道地不從。尋會推閣臣。演誣其徇私。下獄遣戍。尋赦歸里。本朝順治元年。以侍郎劉餘佑薦。授煊河南道御史。丁母憂歸。三年服闋。補浙江道御

史仍掌河南道事。六年疏言有司朘削百姓。督撫徇縱。不以告。寃無由伸。宮官據所聞劾奏。乃其職守。乞付廷臣公議。勿遽下獄對理。諭曰。嗣後言官論人善惡。雖有不實。不得逕送刑部。如係挾仇誣陷。仍令革職下部治罪。八年閏二月。疏言文武兩途。全才難得。近以武職改任督撫。恐政體民瘼。未必曉暢。請還本職。以全器使。又貪官被贓款成招。多坐吏役。或遇赦輒復原官。請將援免之人。應降者調補閒曹。應革職者勒令休致。下部議行。時煊掌計冊。劾御史李道昌。王士驥。金元正。匡蘭。兆李。允。崑等。巡方乖謬。會大學士洪承疇管都察院事。議道昌降級。士驥等均革職。并列煊應外轉。五月煊劾吏部尙書陳名夏十罪。兩不法。疏曰。冢臣陳名夏。以故明修撰。驟陟尙書。不思報國。乃諂事故睿親王。及王事敗。卸過於同事甯古里。夫甯古里一啓心郎。名夏乃尙書。甯古里革任。名夏乃得脫然無罪。罪一。名夏父爲縣民所殺。蒙恩賜銀歸葬。名夏急於操權。貪緣奪情。置父喪於不問。藁葬淺土。卹典空懸。名教不齒。罪二。李元鼎以薦舉賊人被黜。名夏特疏起用。委過于聽從誤用之柳寅東。欺君罔上。罪三。名夏擬大僕寺卿。舍傅景

星三年俸滿之左通政。而越陞黃徽允一年俸淺之少卿。徽允爲洪承疇姻親。任意迎合。罪四。董某以謫降三司首領之小官。倏陞參議。陳之遴以七品編修。驟至宗伯。私庇同鄉同姓。罪五。段國璋于二年投誠。甫授光祿署丞。突推三品之太常寺卿。王邦桂初授光祿少卿。歷俸八年。僅轉四品之右通政。紊亂銓序。罪六。江南督學御史李嵩陽。兩經科臣魏裔介糾參。物議沸騰。名夏以鍾愛門生。私囑洪承疇曲意保全。把持計典。罪七。奉旨處分。表率不職之憲臣。卓洛等盡革任。而徐起元與名夏同鄉同年。僅議調用。若借曰守鄖有功。則卓洛等誰無汗馬勞績。罪八。御史吳達廷。糾邪黨之馮銓。名夏噤不一語。及銓臥病。名夏屢往候安。革職侍郎孫之獬。爲盜所殺。名夏素與厚。力請優卹。不顧人品公論。至嚴旨駁正。罪九。名夏利人厚資。與富商牛射斗結姻。歲索數千金。屈體市井。貽羞縉紳。罪十。太常少卿龔鼎孳被參。丁憂後援赦免議。名夏忽于選司說于補官之時。批降二級用。專擅威福。不法一。御史崔士俊四年大計。拾遺涉虛。援赦免議。名夏忽批降外府推官用。不法二。又名夏與洪承疇陳之遴於火神廟屏左右密議。不

知何事。疏入。詔王大臣鞠議。吏部尙書公譚泰袒名夏。援事在赦前。免名夏及承疇之遴罪。而以煊所言多不實。且先爲言官不言。乃于外轉後挾私誣讎。論絞死。九年正月上諭內院曰。朕觀往籍。自古欺君誤國之權臣。有正法顯戮者。亦有逭刑倖生者。其生也雖生猶死。摘奸發伏之言官。有吐氣伸志者。亦有蒙冤就死者。其死也雖死猶生。總之真假是非。未有日久而不別白者也。原任吏部尙書譚泰。剛愎成性。狂悖妄行。當朕親政之初。把持六部。干預萬幾。彼時陳名夏亦任本部尙書。去年五月內。張煊憤不顧身。列款參奏陳名夏。承疇。其時朕狩于外。一切政事。暫委之異親王滿達海。王集諸王大臣逐件審實。將名夏承疇羈之別所。以事關重大。馳使奏聞。譚泰聞之。艷然不悅。遂萌翻案之心。及朕回京。敕諸王大臣等質審廷議。譚泰咆哮攘臂。力庇黨人。務欲殺張煊以塞言路。諸王大臣。憚彼兇鋒。有隨聲附和者。亦有俛首無言者。內亦有左袒者。入奏之時。朕見罪款甚多。不甚驚訝。譚泰挺身至殿前。誑言告詞全虛。又係赦前。誣陷忠臣於死。罪應反坐。譚泰忌左袒者之異己。蔽不以聞。朕以爲衆議僉同。遂允其奏。而

孰意譚泰之欺罔至此也。自欺罔得售。因而造罪多端。諸王大臣。俱以爲朕親信譚泰。朕慮延遲日久。則國事漸非。而干連者衆。遂執譚泰。數其罪款。於昨年八月十七日致法訖。因思張煊當日告款甚多。驟寘重典。疑有冤枉之處。故將名夏承疇。復發鄭親王同承澤親王。及內院刑部大臣。再爲審理。承疇招對俱實。獨名夏厲聲強辯。閃爍其詞。及詰問辭窮。乃哭訴投誠之功。朕始知名夏爲輾轉狡詐之小人也。名夏罪實難逭。但朕有前旨。凡譚泰干連之人。一概赦免。今將名夏革任。同漢軍閒散官隨朝。洪承疇火神廟聚議。事雖可疑。實難懸擬。送母歸原籍。雖不奏私遣。然爲親甘罪。情尙可原。姑赦其罪。仍留原任。以責成效。朕念張煊含冤受死。著厚加卹典。其子以父官官之。仍加二級。卹典敕部議奏。庶足以慰忠死而闢言路。著將譚泰罪狀。并張煊啓狀。詳爲刊示。暴之天下。以明朕之無偏私也。二月議贈煊太常寺卿。賜祭葬。錄其子基遠。如所贈官。歷官禮部侍郎。十一年。名夏爲大學士寧完我劾奏奸狀。鞫實。以絞死。

胡茂禎列傳

胡茂禎陝西榆林人。明總兵。福王時大學士史可法督師。以茂禎爲中軍。本朝順治元年。豫親王多鐸南征。胡茂禎來歸。二年授鳳陽總兵。三年調甯國總兵。四年調徽州總兵。五年正月。叛鎮金聲桓黨潘永禧陳九思汪老五汪伯昇等。結寨大山。蹂躪徽州諸縣。茂禎勦土賊于榆村西溪南吳村西坑等處。皆有斬獲。三月賊陷祁門黟縣。茂禎趨救。賊已入休甯。茂禎遣參將孫喜策遊擊趙亮楊鳴鳳分門攻擊。自督兵復其城。事聞。命戴罪立功。復分兵夾擊黟縣賊。敗走永禧。退回饒州。四月賊攻婺源。茂禎合戶部侍郎放童兵。水陸堵禦。九月追斬九思于譚口青石。焚其新舊營。十月敗賊祁門。擒歙縣巨寇吳國禎。十二月分兵四路。追剿伯昇老五。破其木關。擒老五。餘賊潰。江南總督馬國柱奏茂禎智勇兼優。調度有方。請敘功。下部議。加部督僉事。十年。經略大學士洪承疇疏言茂禎營內兵丁。多係山陝關遼慣戰士卒。令自選馬步兵八百。處湖廣軍前。詔

如所請。十二年三月。加都督同知。充經略後標總兵官。時明桂王將李定國遁南甯。而盧明臣馮雙禮等復自辰州趨趣溪龍灣頭。逼常德。茂禎偕提督李本深總兵楊遇明張鵬程。敗之于河澗山口。明臣墮水死。雙禮遁。十月。加太子少保。尋調貴州總兵。十六年。承疇以茂禎病入奏。部議休致。得旨。鎮臣職守。關係甚大。胡茂禎雖稱有病。今已痊可。亦未可知。仍著察明議奏。旋經督撫奏患病屬實。回籍調理。康熙元年八月。上念茂禎素有才幹。令兵部查用。九月。授甯夏總兵。加右都督僉事。三年。擢湖廣提督。以年老休致。十八年卒。賜祭葬如例。

孔希貴列傳

孔希貴。奉天開原人。明總兵。本朝順治元年四月。大兵定燕京。希貴迎降。十月。授薊州總兵。隨豫親王多金。剿河南。二年三月。河南平。留希貴鎮歸德府。剿柵營砦賊。首金高。招降明副將李聯元。李希樂等九人。明總兵劉化馬馮甲秦大鵬俱南遁。九月。同總兵

祖可法高第等合疏。請留漕米充軍食。從之。十二月。奉旨赴總漕軍前聽用。漕運總督王文奎檄防剿通泰二州如皋縣土賊于錫凡。劉南陽劉一雄等盤踞岔河。希貴追剿至洋莊。大破之。斬錫凡。南陽擒一雄。殲其衆。南江賊首張爾明聞風遁。餘黨悉平。三年七月。調河南懷慶總兵。加都督同治。四年正月。山東范縣土賊孔五掠大名屬之南樂。敕希貴速援。至則賊遁。希貴率遊擊孔國養等進擊賊巢。破之。陣斬孔五。七年十二月。胡家場賊首范次吾肆焚掠。希貴奉河南巡撫吳景道檄剿之。長垣縣呂律屯。偵賊欲逸入太行。追斬千餘。擒沈干劬等。隨合中軍趙世泰兵。破梁家寨賊窟。俘獲無算。八年正月。追殺馬賊於山西澤州。獲賊首秦明宇。俱下部議敘功。十年。以老病致仕。尋卒。

高第列傳

高第。陝西榆林人。入籍河南商邱。明山海關總兵。本朝順治元年四月。投誠。授原官。敕守關門。七月。以擅誅悍卒趙文才等。奉旨訓飭。第乞治罪。宥之。十月。隨豫親王多鐸。勦

流賊李自成於河南有功。二年三月。豫親王奏改開歸總兵駐河南府。時中州寇尙蟻聚。第與隨征侍郎李延齡。以計降土寨賊首李際。及自成餘黨劉忠井武岡許昌允尙。遵禮張其倫等。營寨千七百餘。以次撫定。得旨嘉獎。加右都督。尋斬偃師賊裴時茂。永甯賊段竹。嵩縣賊李茂華等。加左都督。十一月移駐襄陽。三年二月。諭曰。爾留守中州。肅清巨寇。地方甯謐。忠勇可嘉。賜一品冠服。四年。山東土賊李化鯨據曹縣。逼河南。歸德奸民有應之者。第聞馳往捕。疾渡河。直抵曹縣。焚其郭。大兵集。化鯨就擒。斬之。五年。江西叛鎮金聲桓遣人以密書通。第執其人及書以獻。上獎其忠誠。晉太子少保。是年大同總兵姜瓖叛。逆黨蔓延。第以兵防河。無南渡者。八年二月。授二等輕車都尉世職。七月陝西土寇何柴山。由商州轉掠洛陽。出歿秦豫間。第會陝西兵夾剿。殲其衆。十年以病乞休。允之。康熙十年卒。賜祭葬如例。子供弼襲世職。

李鑑列傳

李鑑四川安縣人。明崇禎元年進士。累官宣化巡撫。本朝順治元年五月投誠。授原官。鑑與署總兵王應暉等。捕斬流寇李自成之僞將軍黃應。選僞防禦使李元桂等十五人。並疏言闖賊署置僞官。其罪俱在不赦之條。原其情則有輕重之別。請殲渠宥脅。以昭皇仁。安反側。詔令加意招徠防守。六月。又言宣化一鎮。兵多而員冗。如本鎮原額經制官軍七萬六千七百有奇。按冊則有名。用之戰守則無實。皆由前朝法紀廢弛。弁兵虛冒。無核實之法也。今索餉者紛紛。保無侵蝕之奸。應請早定經制。裁冗員以節浮費。下所司議行。二年正月。以赤城道朱壽鑿貪酷不法。劾之。先是壽鑿知鑑將劾已。遣其子囑素識之旗人綽書泰往求英親王阿濟格王。與鑑印札。令勿治壽鑿罪。及王出師。至宣府。復召鑑諭之曰。壽鑿忠良。宜釋免。鑑曰。此重犯若擅行釋之。王亦不便。時綽書泰在側。叱之曰。爾何不懼王也。鑑艱然去。王復遣綽書泰與總兵劉芳名強之。不可。事聞。壽鑿綽書泰俱伏誅。上以鑑秉公執法。爲國忘私。錫黃金五十兩。白金千兩。鞍馬裘幣。並以壽鑿家產給之。鑑奏辭欽賞。以佐軍需。優旨嘉獎。不允其請。二月。守備霍然許。

鑑受賄事。下法司勘問。擬斬。議上。得旨。李鑑曾著大功。免死。追贓罰俸。六月。鑑上疏自訟。命刑部會同內院覆勘。得自免。罰俸。尋擢宣大總督。命駐大同。鑑復具疏懇辭。不許。是時山西土賊乘閒竊發。妖婦崔氏倡爲善友會。自稱都掌教。偏關寧武岢嵐諸屬村莊。多爲煽惑。墨草嘴賊渠白干侯運庫。朔州賊渠武大寬等。分路響應。所在殺掠。鑑令副將侯大節。率兵奮擊。擒斬大寬。朔州賊黨解散。會灰營賊餘孽數百。入善友教。與蔣家峪賊渠邢四等聯聲援。遂攻破八角堡梨樹窳等城。據守許林堡。副將尤可望率兵追擊不利。鑑檄大節乘勝截擊。令參將柳同春蔡調羹。都司薛敏恩。岢嵐道于重熙等。分兵協剿。陣斬崔氏。及賊黨邱道等。擒白干邢四斬之。焚其巢窟。餘孽盡殲。六月。孟縣土賊呂斗等踞寨拒捕。旋經巡撫馬國桂討平之。鑑以晉省經制已定。而各官猶多劄委。未實授。軍民旣已坐玩。且所在土寇猖獗。皆由將領非人。因與按察使張毓泰詳議。疏請敕部核委。署各官功績。接次補授。當易急行。另推官之應裁者。其軍器武備。亦按冊核存。以儲軍用。疏入。下部知之。閏六月。岢嵐縣土賊高九英者。曾爲甯武總兵高勳

所撫。至是復叛。鑑與撫臣分檄官弁擒斬之。殪其黨百餘人。初鑑令守備霍然糴售倉米。及戶部咨詰。鑑以爲由霍然呈請。然訟寃。鑑乃上疏引咎。部議鑑與然有隙。故欲陷之。應褫職。詔改降一級。仍以巡撫用。五年補甯夏巡撫。七年。恩詔加右副都御史。八月卒。贈兵部右侍郎。賜祭葬如例。

曹溶列傳

曹溶浙江嘉興人。明崇禎十年進士。官御史。巡視西城。嘗劾大學士張四知溺職。不報。本朝順治元年五月投誠。仍原官。疏陳六事。一請定官制。使事有責成。不相推諉。又上下情宜浹洽。庶人思效用。一請定屯田鹽法規制。俾俸餉有所給取。一請禁兵丁放馬。踐食田禾。一請有司巡緝土賊。擒爲首者誅之。餘皆勸諭向善。則不煩兵力而賊寇自靖。一請發帑金於近畿麥熟處平糶。以裕倉儲。備賑恤。一京師採煤西山。近因盜賊梗路。兩月不至。請設兵循檄。使無劫掠之虞。得旨。所陳六事。深切事務。所司卽行。六月。授

順天學政。疏言。舊例。選拔貢生。彙入府諸生通考。今畿輔當兵燹之後。諸生或艱於遠涉。宜偏歷各府。舉行歲考。補給廩額。卽於廩生中拔其尤者。府學貢二人。州縣學貢一人。順天府學首善士多。請貢六人。並令官給路費。詣廷試。分別選用。至各省士子有遊學京師者。宜令附順天府學考試。其入學補廩充貢。俱於正額外另議名數。又言。褒揚節義。有關風教。當闢賊煽惑時。誓節殉義者不少。宜敕學政詳訪請旌。其隱逸之士。有深通古今。明於治術。熟諳韜略。周知地利者。許特疏薦舉。以備徵用。又請以遼東十五學。改附永平府。分設教官。如各州縣學例。尋疏薦明進士王崇簡等五人。請旌殉節明大學士范景文。尙書倪元璐等二十八人。孝子徐基等七人。義士王良翰等五人。及節婦十餘人。皆下部議行。二年冬。試竣。回御史任。三年二月。充會試監考官。奏請嚴防懷挾。傳遞移號。換卷諸積弊。寬免字畫粗率格式參差之貼例。膽錄務期端楷。對讀宜令詳審。得旨。所奏會場事宜。簡明切當。下禮部卽行。三月。遷大僕寺少卿。先是。恩詔錄七品以上京官子弟各一人。由附生充監生。由廩生增生充貢生。溶任學政時。所舉充貢

監有曾於明季襲世職及中武舉者。至是事覺。坐失察降二級調用。尋復以選拔貢生逾額革職回籍。十年詔三品以上大臣各舉所知。大學士范文程等因以上親政前部議降革原奏。次第奏覽。於是溶降調給事中林起鳳劉鴻儒並荷恩諭曰。三人降革皆非品行玷缺者比。令來京錄用。各復原官。十一年授太常寺少卿。尋遷左通政。十二年正月。疏言通政之官。職在納言。請嗣後凡遇挾私違例章疏。卽於駁還。仍行劾奏。至遠近災荒。民生吏治宜許通政司諸臣就章疏所列。隨事建言。無忝敷奏之任。言開創時隨處駐兵。乃一時權宜。今當歸併於盜賊出沒。陷阻不測之地。則兵不患少。其閒散無事之兵。遇缺勿補。遇調卽遣。則餉不虛糜。且當裁併提鎮。改增副將。以專統轄而重責成。及言諸司職掌。未有成書。請以近年奉旨遵行者。參以前朝會典。編爲簡明則例。以蒞官守。並下部議行。三月擢左副都御史。疏請時御便殿。召大臣入對。以辨其才識品行。並賜筆札。令面舉所知。可杜瞻徇欺矇之弊。又言明代中葉以後。議論盛而實事衰。至今積習未改。欲使羣臣鼓任事之心。言官作敢言之氣。在斷自宸衷。遇諸臣章疏。切

中利弊者。卽飭力行。有辨言亂政。挾私撓法者。卽摘發示戒。無概下部議。以致稽延。上並皆嘉納之。擢戶部右侍郎。九月。詔吏部都察院。會奏侍郎寺卿等官。才優經濟者。改外用。溶預焉。遂授廣東布政使。十三年。遇京察。戶部以溶曾任侍郎。已改布政使。牒吏部同都察院核議。溶舉動輕浮。應以浮躁例降一級。仍外用。因降山西陽和道。康熙三年。山西巡撫白如梅遣溶慶賀萬壽聖節。至京。溶援朝覲官得條陳利病例。疏言大同屯地。舊例每頃徵銀不及一兩。至兵丁墾沿邊荒地。向不徵銀。名曰贍軍地。後因餉不敷。每頃每月扣餉銀二錢。兵已貧乏。近因兵額裁減。所遺之地。分撥現在之兵。有每兵三四頃。坐扣月餉者。爲累滋甚。請嗣後限每兵二頃。如屯田徵銀之數。按月扣餉。地少則力可任耕。租輕則兵仍足食。又請沿邊設礮軍。礮每五人。每人與近荒地一頃。免其徵諭。使擊柝巡邏。兼供修葺邊牆之役。下所司議行。尋以裁缺歸里。十七年。詔舉博學鴻詞。大學士李蔚。杜立德。馮溥。合疏薦溶。以丁憂未赴。十九年。學士徐元文薦溶。佐修明史。部議俟服滿。牒送史館。二十四年卒。

田雄列傳

田雄，古隸宣化人。明總兵。本朝順治二年，豫親王多鐸統兵征江南。明福王朱由崧遁走蕪湖，護軍統領圖賴等以兵斷其去路。雄與明總兵馬得功、縛福王來獻。豫親王令以原銜隨大軍浙江，尋授杭州總兵。時明魯王朱以海稱監國於紹興，福王大學士馬士革、總兵方國安等往依之，擁兵嚴州，屢渡錢塘江，窺杭州。雄與總督張存仁、副都統珠瑪喇等禦勦，先後奏捷。三年，擢浙江提督，賜冠帶鞍馬。六年，江西贛州推官蘇進泰遣使謁雄，爲叛鎮李成致逆書，雄執其使以奏，得旨褒獎，加左都督銜。八年，追敘投誠功，授爵等子。先是大將軍定浙江，明魯王竄入海，繼復與其臣阮進、張名振等據舟山。至是，雄同都統金礪進戰，艦乘潮出海，擒阮進於橫洋，至舟山，掘陷其城，名振擁魯王遁。十一年，奉旨移駐定海。十二年，阮進餘黨阮思陳、六御等大踞舟山，命甯海大將軍伊爾德統師征勦。雄晝夜督治戰艦，攻具，留參將徐信傳、長春、游擊劉登瀛等扼

要隘。通聲援。而自率精銳。會大軍誓師登舟。由定海大洋進烈港。思等連接迎戰。雄與伊爾德磨兵並進。以砲毀數船。思等習風濤。左右衝突。雄恐兵志未定。稍卻必爲所乘。因揚帆據上游。攻其巨艦。副將常進功等。從右奮擊。思衆大潰。投海死者大半。轉戰至日夕。乃振旅還。翌日。復統水師出洋。雄見思衆益熾。與伊爾德計。以橫洋金塘爲舟山要路。今爲所據。宜分兵急擊破之。則舟山可達。於是張水師爲兩翼直薄之。四面夾攻。殲其衆無算。獲其船。思赴水死。捷聞。加少傅。兼太子太傅。賜冠服甲冑。雄鎮海疆久。以舟山不難於復而難於守。請調兵駐防。增戰艦。設水師。分汎偵勦。上以所奏悉合機宜。下所司議行。十五年。奏請歸隸旗籍。以弟豹代已久。待許之。於是隸漢軍鑲黃旂。時海賊鄭成功擾海濱。一圍象山。再犯台州。復陷遂安平陽諸邑。兵部劾雄失守城池罪。得旨寬免。令立功自贖。十六年四月。海賊將犯太平。雄遣兵迎戰。生擒百餘人。賊望風遁。五月。賊復傾巢犯甯波。雄出城督戰。陣斬五百餘級。賊退出定關。造木城爲久踞計。雄分兵三路進勦。賊衆潰竄入海。十八年。晉三等侯。雄疏辭。兼請解提督任。得旨。卿擒福

王投誠。隨大兵攻戰。攻績茂著。且鎮守海疆有年。故特授侯爵。用示眷酬。宜祇遵成命。益殫忠猷。以副倚任。勿遜辭。康熙二年卒。贈太傅。賜祭葬如例。諡毅勇。以從子象坤襲爵。乾隆十五年定世襲侯。號曰順義。

賈漢復列傳

賈漢復山西曲沃人。明副將本朝順治二年豫親王多鐸南征。漢復詣軍門降。隨入都隸。正藍旗漢軍。十年補佐領。十二年遷都察院理事官。管京畿道。十三年七月。擢工部右侍郎。八月奉命往興京陵視工。十四年改兵部左侍郎。巡撫河南。十五年三月。壇殿工成。授職雲騎尉。六月。疏言河南驛通數省。差分兩路。自河決後。由山東者皆遶道豫中。加以湖南軍差絡繹。馬斃役逃。今黃河已歸故道。請更正驛路行差。於勘合火牌。註明經由某省。則兩河不致偏累。下部議行。十一月。疏報墾官民自首地。共七萬二千五百餘頃。每歲增正供四十萬八千餘兩。上以其實心任事。下部優敘。加兵部尙書銜。十

二月。左都御史魏裔介請定衛所丁田。歸併州縣。下各省督撫議。漢復疏言河南省宣武陳州潁州歸德睢陽彰德懷慶河南宏農南陽信陽汝州各衛羣牧。嵩縣潁上林縣唐縣鄧州汝寧各所。旣無漕船押運。又無邊境修防。且地畝錢糧不多。閒坐落江南直隸。隔屬徵追不便。應裁併附近州縣。衛所官役亦全裁。部議從之。十六年正月。大兵進取滇黔。部撥河南庫銀四十萬兩。半充湖廣兵餉。半交轉運。漢復未半年已全解。議敍加太子太保。八月。海賊鄭成功陷江南鎮江瓜州等處。警連河南歸德汝南。漢復檄總兵張應祥赴宛南援。剿敗餘黨竄光州商城。勾土賊楊玉環等劫獄。散劄惑衆。漢復遣參將苗成龍。蘇養元等平之。十二月。經絡大學士洪承疇請增雲南綠旂官。兵部議調河南南汝鎮遊擊守備。各兵二千五百赴滇。漢復疏言南汝標兵二千八百餘分防均襄新鄧兵千六百。僅存千二百餘。不足抽調。墾留本鎮資捍禦。從之。十七年二月。疏言懷慶距山西星軺驛有兩路。一由黑石嶺程六十。一遶宛子城程八十。明時以鄭藩墓在嶺前。故紆道宛子城至萬善驛。今請裁歸黑石嶺。以省冗費。下部議行。七月刑科給

事中姚啓聖列款劾漢復貪污。部議解任。敕總河朱之錫察究。中有墾荒緣坐令民包賠一款屬實。應降調。援赦免。先是漢復曾餽內監銀。十八年事覺。部議復援赦降抵。仍罰銀百兩。特旨革雲騎尉世職。留京候補。康熙元年二月補授陝西巡撫。八月疏言舊例兵丁。月外加給米三斗。後總督孟喬芳議裁。尋以興安鎮標白土紫陽各營。歲荒兵苦。仍給加米。折銀四錢自買。其時漁渡舊縣並漢中協路。尙有興屯本色可支。故未議及。今屯兵已撤。屯糧全無。請照興鎮等營加月米三斗。如所請行。三年九月。疏言陝西驛遞有先衝而今屬首衝者。有先首衝而今爲極衝者。有次衝而今屬簡僻者。卽盡裁僻驛站銀。已不足補衝驛之數。而近日秋道渭源蘭州金縣鎮安等處。尤極衝。請增站銀三千二百餘兩。及夫馬工料銀七千餘兩。得旨允行。先是順治十三年。河流東徙。韓城逼河壩。有沙灘淤泥。開墾陞賦。後河流西徙。復衝沒。至是漢復奏免其賦。七年。詔漢復回京另用。未及補官卒。賜祭葬如例。

馬寧列傳

馬寧甘肅寧夏人。明參將。本朝順治二年。英親王阿濟格征陝西。甯率衆投誠。隸漢軍。正白旂。委署鳳翔中協副將。三年。隨甯夏總兵劉芳名剿賊秦鞏。會叛將王元馬德殺巡撫焦安民爲亂。甯隨芳名馳歸。擒斬元。德糾賊渠賀宏器等陷安定。四年四月。擊斬德於河免坪。獲宏器於固原之北山。又赴盩厔黑水峪。剿賊渠賀珍等。擒斬千餘。十一月。斬逆賊洪大誥於半箇城。五年正月。調陝西兵征四川。至洛陽。噪歸。甯率兵追至伏羌。誅首逆撫定餘衆。三月。甘肅逆回米喇印。丁國棟。殺巡撫張文衡。及臨洮蘭岷洮河諸回皆叛。應連陷郡邑。圍鞏昌。總督孟喬芳遣甯往援。大破之。鞏昌圍解。與副將劉友元進攻臨洮。賊衆潰。洮岷河三州皆復。五月。進平蘭州。賊西竄。躡斬米喇印於水泉古城窰。國棟奔肅州。嬰城守。六年三月。喬芳移師討大同叛鎮姜瓖。以滅賊委甯。十一月。破其城。擒國棟。河西平。敍功加都督同知。先是宜君賊劉宏才據北山。寇略西安諸州縣。八年。甯剿平之。九年三月。剿郃陽流賊。擒其渠雷學鎮梁鎮虎等。尋擢四川右路總兵。駐保甯。十一年。以軍政卓異。賜鞍馬弓箭。十五年。隨定西將軍李國翰克復重慶。進

取遵義。復由水西天生橋進兵。征明桂王朱由榔。十六年。由榔遁入緬甸。加甯右都督。領兵進剿。十七年。改授援剿雲南前鎮總兵。駐大理府。十八年正月。移駐孟卯。十一月。吳三桂分兵入緬。甯偕副都統石廷柱總兵沈應時祁三昇馬寶高啓隆馬惟興等。由姚關至木邦。時由榔將白文選屯錫箔。潛遣其黨馮國恩來木邦。糾集土兵。戒軍驟至。斬國恩。文選竄茶山。甯等馳追至猛養。及之。文選降。衆萬餘。康熙元年。敕功加左都督。三年。剿旣降復叛之水西宣慰司安坤。四年。剿烏撤宜良甯州喬甸迤東鎖里孟撤等。各山城箐峒。皆捷。逆酋祿昌賢等以次擒斬。餘黨悉平。十一年。遷湖廣提督。十二年。調山東提督。十三年。隨順郡王勒爾錦征逆藩吳三桂。加太子太保。十八年。敕甯還京。十九年卒。賜祭葬如例。

張天祿列傳

弟天福附

張天祿。陝西榆林人。明末與弟天福。以義勇從軍。積功至總兵官。福王時。大學士史可

法督師爲瓜州前鋒。本朝順治二年五月。豫親王多鐸下江南。福王就擒。天祿及天福率所部三千餘人隨忻城伯趙之龍迎降。豫親王令以原官隨征。後隸漢軍正黃旂。時明僉都御史金聲家居休寧。受唐王朱聿鍵右都御史兼兵部侍郎職。糾鄉勇十餘萬據徽州。具勒博洛遣都統葉臣往剿天祿。從。十月偕總兵卜從善李仲興劉澤泳等。由旌德縣進。連破十餘寨。至績溪縣。生擒聲。及中軍吳國禎副將成有功守備萬全等。諭降。不從。斬於軍。徽州平。十二月。明唐學王大士黃道周率兵犯徽州。天祿擊斬其將程嗣聖等十餘人。擒總兵李堯光等。三年正月。大敗道周兵於婺源。擒道周。諭降。不從。斬之分兵從祁門江灣街口黃源四路。追剿餘黨。至浙江開化縣。降其城。二月。加都督同知。授徽寧池太總兵官。五月。賜一品冠服。初天祿之定徽州也。營於城外兩山。禁將卒毋入城滋擾。至次年霖雨連月。城中父老敦請天祿入。天祿曰。三軍力在泥途。何忍獨安。終不下山。徽民至爲感泣。巡撫劉應賓奏其事。得旨嘉獎。十二月。明嵩安王朱常淇擁衆數千。擾婺源之小坑。天祿率副將許漢鼎等剿之。抵巖坑。擒常淇及監軍江於東。

等。四年四月。授江南提督。五年三月。敍投誠功。授三等輕車都尉。八年五月。晉三等子爵。九年十月。海賊圍漳州。天祿奉命赴閩援剿。沿途搜剿土賊甚衆。抵延平。擒賊首黃雲紀。陳天鐸等。殲其衆。下部議。敍會都統金礪。已解漳州圍。天祿留駐延平。剿各山賊。十一年。明魯王定西侯張名振由浙江犯崇明。天祿馳還松江。調將出洋撲剿。正月。奪稗沙老營。追至高家嘴。名振遁入浙。尋乘潮突犯吳淞溪淘港。傷兵焚船。天祿坐是降三級。戴罪剿賊。十二年。江南總督馬明佩以溪淘港告警時。多失砲械。及舟師三百餘。天祿匿不報。疏劾之。而閩浙總督佟泰亦奏自洋逃回兵。稱天祿與名振通書。詔并下刑部訊。通書無據。以隱匿罪革提督。降子爵爲三等輕車都尉。十六年卒。子其龍襲。卒無嗣。停襲。天福初爲明總兵。順治二年。與兄同降。以原官隨征崑山。嘉定民不薙髮。據縣叛。天福同總兵李成棟平之。五年四月。授陝西漢羌總兵官。八月。敍投誠各功。授一等男爵。時明山陰王朱鼎濟聚兵據毛壩關。以單一涵爲元帥。六年二月。天福自漢中入山攻之。擒鼎濟及監軍王守基。參將張文秀。遊擊單昌祉。李之運等八十三人。斬馘

殆盡。一涵投崖死。得旨察敘。三月延安參將王永祥叛。陷延安榆林及同官臨漳等縣。花馬池軍民聞風謀變。天福同平西王吳三桂都統李國翰從間道擊之。大俘獲。五月。同提督李思忠破蒲城。斬賊將二。僞官三。殲賊衆五千。復如安。三桂將分兵追剿。綏德榆林。以延鄜爲扼要地。留天福鎮守。七月。賊犯安塞。天福遣將擊敗之。斬首三百餘。招降叛將藍基等。九年三月。北山賊黨劉宏才。因我兵四出。乘間犯同官。圍陳爐鄉。天福先遣官兵由捷徑疾趨富平。隨親馳至流吳鎮。賊聞風南遁。追及之。賊入十列營。拒。天福分兩路衝殺。大敗之。斬千餘。生擒賊將魏加隆。張敖等二百七十人。下部議敘。尋以病回旂。授散秩大臣。子其烈襲世職。十七年五月。復授本旂都統。康熙六年四月卒。賜祭葬如例。

常進功列傳

常進功。遼東甯遠衛人。明副將。本朝順治二年。豫親王多鐸兵下江南。進功投誠。給副

劄。尋隨貝勒博洛征浙江。分剿富陽於潛。及中頭堰天竺山白石尖迷山嶺康嶺等處。均在事有功。五年。授定海左營遊擊。十一年。遷杭州城守副將。十二年。兼攝提督參將事。十四年。擢浙江水師總兵。賜甲冑弓矢裘帽。十六年。調福建水師總兵。征海寇鄭成功。直抵衛前。賊遁。追破其衆於定關。康熙元年。敘功授騎都尉。兼一雲騎尉世職。命隸漢隊正黃旂。三年。遷廣東水師提督。六年。以賊鯨入甲子港口。不親剿革職。十四年。復授浙江水師提督。時海寇犯溫州。進功回總兵朱萬化。自定海閒出洋剿禦。破賊於沈家門等處。十六年。賊據舟山。進功復出定海偵剿。大破賊於螺頭門椗齒粵朱家尖等處。斬殺無算。諭部議敘。十八年。以年老休致。二十五年卒。孫履謙襲世職。

明末漢奸列傳 卷六

明末漢奸列傳卷七

盧光祖列傳

盧光祖遼東海州人。明總兵。本朝順治二年。隨左夢庚來降。隸漢軍鑲藍旗。三年正月。隨肅親王豪格勦流賊張獻忠于四川。斬之。師旋。光祖署夔州總兵。明桂王朱由榔經略朱天麟。總督樊一蘅等。結連川中諸賊犯順慶。光祖敗之。通花三壩。是時搖黃賊渠袁韜據列南溪。李鶴子余大海據合州。馬超刑十萬據遂甯蓬溪。甘良臣據廣安岳池。天麟部將王命臣陷順慶。降將李開藻密約命臣攻保甯。以爲內應。光祖偵知之。斬開藻。同總兵柏永馥馬化豹左勳。分三路取順慶。復其城。五年四月。加都督僉事。實授夔州總兵。五月。遣參將呂英傑同永甯副將蕭鳳祚等破賊黨李登甲于來蘇寨。斬僞將梁士義等。七月。賊楊秉允等踞渠縣李毅城。光祖由小斌山進。偕化貂及副將趙萬邦

分勦賊敗退。閉關拒守。求救于賊黨劉惟明。光祖繞渡三匯河。敗惟明援兵。秉允聞之。遁。光祖追至龍泉關大斬獲。秉允走匿川東。六年十二月。賊渠陳三台投誠。其黨廿一爵朱德洪據隣水天竺二縣。光祖同巡撫李國英遣將領任魁知縣王文彩往撫。被殺。光祖會永甯敘州西路兵及布政使吳之茂等合勦。戰七晝夜。斬一爵德洪。降峒寨十餘。隣水天竺平。八年敘功。授一等輕車都尉。九年。孫可望陷敘州。將軍李國翰調重兵來勦。光祖行至停溪。猝遇賊。戰一晝夜。寡不敵衆。遂敗。上宥其罪。令圖功自贖。十年。改授川北總兵。以順慶要地。預遣副將霍光先往防。十一年。賊將魏勇來率衆來犯。光祖擊敗之。十三年卒。上以光祖久鎮岩疆。盡瘁殞身。命祭與二壇。再加祭二壇。造墳安葬。子奇襲職騎都尉。兼一雲騎尉。

高進庫列傳

高進庫陝西宜川人。明副將。本朝順治二年。預親王多鐸兵下江南。進庫投誠。給參將

劄尋授江甯副將大學士洪承疇檄同副將馮君瑞楊武烈等以兵三千赴江西援勦。三年正月江西總兵金聲桓以明唐王朱聿鍵大學士楊麟總督萬元吉據吉安遣將李士元攻之不克。進庫兵至檄往勦。生擒其前鋒邱龍等四人。敗遁入城。翌日悉衆出拒。進庫等擊擒其將張應魁等斬二百餘人。遂克吉安。十月移兵克贛州。進攻南安。望風潰。進庫等以援勦年餘。兵力勞苦。江西土賊漸平。請還江甯休息。疇以聞。詔可。四年三月南贛總兵柯永盛巡撫劉武元先後奏言南贛要衝。應設兩協防守。進庫及湖廣援勦副將徐起仁諳地利。兵精足用。請留起仁爲右協。駐南安。進庫爲左協。駐贛。詔如所請。五年金聲桓叛。起仁附逆。陷南康饒州九江。與其黨王得仁謀趨江南。懼贛兵蹙。其後遂圍贛。進庫力戰堅守。城克全。會廣東提督李成棟叛。附金聲桓。糾衆犯贛。進庫出禦。破賊營數十。斬首萬餘。成棟退走信豐。六年正月我軍圍信豐。賊遁。追擊之。成棟馬蹶墮水死。時聲桓亦伏誅。江西平。加都督僉事。賜蟒衣一襲。七年賊渠彭順慶據寧都。進庫同副將劉伯祿參將鮑虎等大破之。擒順慶。八年調赴廣東勦賊渠李明忠于

高州。斬賊二千餘。明忠遁。餘黨悉降。九年。擢廣東高雷總兵。康熙四年。以老病乞休。尋卒。

霍達列傳

霍達陝西武功人。明崇禎四年進士。官御史。累遷江蘇巡撫。本朝順治四年。以浙江總督張存仁荐。授山東道監察御史。巡視西城。五年。巡按福建。八年。授浙江嘉湖道。十年。遷太僕寺少卿。十一年。轉太常寺少卿。尋遷大理寺少卿。十二年正月。奏請以帝鑿圖說貞觀政要大學衍義講書。令講官日講一二章。上嘉納之。三月。遷大理寺卿。四月。授兵部督捕右侍郎。十五年。擢兵部尙書。廕一子入監讀書。十六年。加太子太保。十七年。二月。調工部尙書。七月。兼管都察院左都御史事。十月。奏言外官內陞之例。原酌其才品。今不論才品。不揆荐舉。但以品級相對爲準。甚至五品堂官缺出。適當外官內陞。卽以一年之僉事充之。未免冒濫。請嗣後凡司道有荐剡。功績經三四任者。方許內陞。每

歲不得過兩人。又言吏部爲用人行政之本。必有畫一規制。如各部司官降級留任者。概難陞轉。又無開復。何日方可湔洗。宜確議開復定例。俾得更新自效。戶部入不敷出。日事補苴。不可不講經久之方。至外省州縣。易知由單細字。模糊不識。官吏卽冒徵混派。應速改正。使愚民俱曉。禮部磨勘試卷。年餘方結。難免揣擬奔競。應定限以清弊竇。兵部鑾儀衛官。以效尉諸人充之。無值緝汗馬功。濫膺爵賞。諸將功臣之後。殉難之廕。虛駐外委銜者。酌量議用。刑部諸事。廢弛推諉。久蒙皇上洞鑒。特設科員查核。然積玩難返。應更振作。工部貴精釐剔。督撫請留制造者。多未開銷。而再請。部查又多耽擱。此估計開銷二事。宜命一科臣綜司蘆政。十年未楚。糾參整飭。宜責部臣。臨清磚料。與京廠燒造無異。乃磚價不及京廠之半。致窰戶逃亡。宜議增之。六科與六部相表裏。職在糾察。如條奏及部覆有不妥者。許各科臣指實駁正。庶事有責成。又言吏治四事。一聞山東武定卽墨諸處。革職官交代不清。同聚一縣。積至六七員。蠶食該地。深爲民害。直隸等省。似此者亦不少。請敕各撫按速結。如隱縱。事發連坐。一州縣官署印。每營謀多

費。取償地方。至錢糧從來徵多解少。且多支衙役工食。以圖加二加三之扣。嗣後凡署印官徵解存支。當計任內日期。造冊報部察核。如有解不及額。支存過額者。追補治罪。一丁憂官。撫按一面委署。一面題取銓補。如遲緩。科道指參。一流寓游民。當勒令回籍。若已開荒納糧。仍聽安插。惟凶徒霸佔民產。或勒人取贖。或轉賣厚價。宜嚴察驅逐。以靖民害。又言陝西西安府各屬。額外多派累。咸寧長安兩縣尤甚。私派名色。不下三十餘項。每縣歲派二萬餘金。百畝之家。一充里役。身家立盡。積弊急宜滌除。諸疏俱下部議行。十八年卒。賜祭葬如例。

吳六奇列傳

吳六奇廣東豐順人。明亡。附桂王朱由榔爲總兵。以舟師踞南澳。本朝順治七年。平南王尙可喜等自南雄下韶州。六奇與碣石總兵蘇利迎降。六奇故貧時乞食他郡。習山川險夷。至是請爲大軍嚮道。招徠旁邑。自効。十一年五月。潮州總兵郝尙久據城叛。寇

大埔程鄉鎮平。時靖南王耿繼茂勸桂王將李定國于肇慶。靖南將軍喀喀木自江甯奉命征粵東。未至。六奇奮力守禦。十月隨大軍圍攻潮州。以雲梯攻克城。尙久投井死。逆黨悉平。十一年三月。可喜繼茂並奏言饒平地接漳潮。海寇出沒。六奇率先投順。招撫有方。其所團練鄉勇皆勁旅。糧糗器械畢裕。自郝逆倡亂。六奇親赴軍前。奮勇殺賊。請給銜以示激勵。詔授六奇協鎮潮州總兵。統兵一千。駐饒平。是時海寇鄭成功狡稱受撫。掠泉漳潮惠諸郡。四月。賊黨李增等分道寇饒平。大埔土賊江龍劉道璋爲內應。六奇遣遊擊曾蘭細率師禦之。多斬馘。賊遁。六月。諭曰。總兵吳六奇。先經投誠。後調集木部舟師。累著勞績。所授職不足償功。再加超擢。乃以六奇爲左都督。詔防禦鄰境盜賊。十二月。成功率衆來犯。六奇期蘇利水師援勦不至。戰失利。揭陽澄海普甯三城皆陷。十三年二月。六奇率所部兵攻揭陽。斫賊水營。賊溺斃者三千餘。盡獲旂甲。仰射城上。賊渠黃廷中二矢墮城遁入舟。六奇潛以巨艦載火器塞潮溝。賊欲縱火截我師。會火器發。賊大潰。奪舟二十以遁。敗之新墟。澄海普甯亦復。十五年二月。成功復犯南澳。

六奇夜截之鮑浦。有斬獲。復隨靖南王耿繼茂拒郤之。生擒賊將蘇興黃亮等斬于軍。十七年。敕捐造戰船及禦賊功。加太子太保。康熙三年六月。考滿晉少傅。加太子太傅。四年四月。游擊邱義。許六奇。匿桂王子爲贅壻。又與故明崇禎帝子通問湖廣。又私開礦銀于燕子山等事。靖南王耿繼茂以所許皆誣入奏。義伏法。五月。六奇病卒。先是總兵蘇利旣降復叛。踞碣石。大軍會勦滅之。六奇疏言碣石旣平。無須設鎮。且臣乃潮人。不可久守潮土。乞調任他省。事下兩藩及督提等議。未決而六奇卒。至是平南王尙可喜。疏言六奇所屬汛地。最爲衝險。所部之兵。俱投誠時隨帶。頻年恢勦招徠。築建城堡。捐造戰船。不遺餘力。今旣物故。其子啓豐。乃將士宿所推服。請量加職銜。准令統率。部議總兵無世襲之例。應請上裁。得旨。吳六奇蘇利同時投誠。利尙抗拒。久駐島中。六奇卽率屬建堡築城。駐防年久。六奇所屬官兵。卽令伊子吳啓豐管轄。不爲例。尋贈六奇少師兼太子太師。賜祭葬如例。諡順恪。啓豐及弟啓爵皆官至總兵。啓爵在瓊州征生黎有功。

陳世凱列傳

陳世凱湖北恩施人。初附明桂王爲忠州副兵。本朝順治十六年。川陝總督李國英率兵駐重慶。世凱來降。授副將銜。康熙十年。流賊李自成遣黨劉一虎。郝搖旂。袁宗第等。據楚蜀間山寨。合賊數萬。犯巫山縣。世凱城守卻之。尋隨國英同西安將軍富喀禪進勦。賊平。敘功。加總兵銜。十一年。實授杭州副將。十三年三月。逆藩耿精忠叛。浙江總督李芝芳統師駐衢州。令世凱赴金華援勦。甫渡江。聞賊犯龍游。卽遣兵馳擊。以通衢州餉道。駐守金華。賊犯武義。亦遣兵擊之。七月。僞總兵閻標由永康武義來犯。世凱同副都統沃申迎擊。發大砲二。敗賊衆。八月。同總兵李榮擊賊于湯溪。追至後大堡。賊踞兩山拒敵。卽先分兵拒戰。其後親攻其前。擒僞監軍道徐福龍等。九月。僞都督陳重由東陽來犯。世凱同都瑪哈達往勦。擊敗于山口村。復敗山河岸。追至鄭店。破賊壘。十月。僞都督葉鍾由浦江來犯。世凱督同副都統石調聲等。敗賊于丑都漕。又敗僞總兵蔣魁。

于蔣家邨。敗僞都督陳遙于張澤村。僞總兵周彪犯義烏。世凱敗之于八里店。進拔荷葉口賊寨。生擒僞都司凌汝經等。時溫州處州並爲賊踞。之芳屢奏世凱戰功。詔授溫州總兵。加都督僉事銜。十一月。僞都督徐尙朝合賊數萬逼金華。世凱迎擊于城南十二里莊。乘賊甫集。大呼先進。斬僞前鋒葉應龍。徐有功。賊大潰。追奔十餘里。殲戮過半。尙朝復與僞總兵馮公輔踞積道山。立木城。壘石寨。屯賊五萬餘。爲計窺伺。世凱乘大霧進師。破賊木城。分兵三路。攻擊斬馘萬餘。尙朝等棄寨遁。時大將軍康親王傑書由杭州進軍駐金華。令世凱同瑪哈達李榮恢復處州。十四年正月。世凱復永康。進攻縉雲。尙朝等領衆拒戰。我師分擊敗之。復其城。僞總兵沙有祥踞處州。賊衆越桃花嶺結營固守。世凱同瑪哈達李榮三路進攻。賊潰走。奪嶺進至東坡。祥等聞風棄遁。遂復處州。三月。尙朝與僞總兵連登雲由溫州分兩路犯處州。世凱同瑪哈達等迎擊于陳潭頭。斬僞參將郭美才等。擒僞參將陳亮等。五月。擊賊于十八都。敗之。進抵石塘。僞參將鄭文登拒戰。我兵分路馳擊。斬馘八百餘。復移師松陽之石佛鎮。擊敗僞總兵陳得功。

等賊敗走遂率師從貝子傅喇塔進攻溫州十五年二月僞都督曾養性同叛鎮祖宏勳糾合閩賊及平陽瑞安賊衆四萬餘來犯我軍世凱同提督段應舉奮擊擒僞副將何賓僞參將盧公義等五月傅喇塔奉詔由處州進征福建世凱率兵從過三角嶺養性屯衆賊于得勝山下之古溪拒險以扼我師世凱同副都統吉勒塔布等攻破賊營又以砲擊破江山賊艘道乃通八月副都統穆赫林勦登雲于石塘城堅拒未能下世凱同沃申等由旁徑襲擊連破其營二十八擒僞官四十九復營和縣又招撫松陽縣等僞官二百餘僞總兵馮公輔等皆來降泰順縣亦復九月精忠降于康親王招養性宏勳歸福建世凱還鎮溫州十六年三月敍功加左都督給雲騎尉世職九月招降海賊鄭錦之僞副將林麟詹大樞等十二月招降僞都督陳彬等十九年四月分遣官兵敗海賊于南鎮雙頭洞十一月署浙江陸道提督降僞將軍劉天福等二十二年六月復敍功晉世凱騎都尉十二月入覲賜鞍馬貂裘朝服諭曰自吳逆煽惑以來爾提兵征勦戮力用命掃蕩逆氛建立功績朕甚嘉之爲將之道務在輯兵愛民使兵民相安

則地方受福。爾亦可永保勳名。朕每見功大者易生驕傲。以致文武不和。地方多事。爾其以此爲戒。二十三年正月。擢浙江提督。二十五年四月。疏言兵之所習。惟戈矛鎗戟。所尙惟技石超躍。好勇鬪狠之心。日月漸積。罔識大義。故遇敵退避。不知報國。或觸犯法網。不顧辱親。如叛逆耿精忠等。皆由不知忠孝故也。請飭直省將軍提督。率所屬營伍。照文職例。講讀上諭十六條。俾荷戈將士。咸知忠孝綱常。永無匪行。得旨。陳世凱身爲武職。乃能洞悉理義。詳切敷陳。深爲可嘉。自古武職名臣。皆讀書明理。經通翰略。經史。斯能保守功名。克全臣節。嗣後武職官員。遇閒暇。俱應覽觀書籍。于忠孝大義。講究明晰。其各交相勸勉。以副職任。世凱又撰擬十六條宣解。援引經史。所載有關營伍。可爲法戒者。依類附注。爲書三卷。奏入。詔予頒行。世凱又言舟山爲浙江門戶。向以形似稱司。第舟在水。則搖曳不甯。遇風則傾欹莫靜。海外重地名此。似非所宜。請御書新名。勒碑作鎮。得旨。俞允。改名定海山。又奏春秋丁祭文廟。應令武職一體行禮。下九卿議行。二十八年十一月。入覲。命回任。以疾作。未行。十二月卒。得旨。陳世凱効力行間。茂著

勞績。簡任提督。居官素優。忽聞溘逝。深爲軫念。下部議敘。遣令侍衛內大臣佟國維待衛馬武奠茶酒。賜祭葬如例。謚襄敏。子天培襲世職。三十二年。天培請効力。兵部引見。議以都司錄用。得旨。陳世凱向在行間。勞績茂著。其子陳天培著以遊擊用。任至浙江提督。其騎都督世職。世凱之孫恩遠再襲。後循例停襲。乾隆三十一年。特予恩騎尉世職同替。

馬光遠列傳

馬光遠順天大興人。明建昌參將。本朝天聰四年。大兵克永平。光遠率所部投誠。授副都統。隸漢軍鑲黃旗。賜冠服鞍馬。五年。上親征明。圍大凌河。光遠從。招降城南守臺百總一。男婦五十餘人。卽令光遠撫之。七年。詔于八旗滿洲佐領。分出漢人千五百八十戶。每十丁授綿甲一。以光遠統轄。授一等子爵。九年。甄別漢軍。以各堡生聚多寡爲黜陟。計丁減原額三之一者。奪職爲民。光遠疏言。各堡逃亡。多寡不同。而管堡各官。功次

不等。既邀國恩。予世職。概罷爲民。衆情驚懼。臣聞雷霆之後。必有雨露。懇聖主大施格外之恩。免削世職。仍令戴罪視事。庶國法人情。兩得其宜。上從之。崇德元年。從征朝鮮。克平壤。江華島。二年。分漢軍爲左右翼。授光遠都統。轄右翼。三年。上征明錦州。光遠同左翼都統石廷柱。運火器先行。尋與恭順王孔有德。以礮攻克臺五。復與廷柱攻克李雲屯。行土屯諸處。獲人畜一千計。我軍攻錦州。城旁一臺。敵兵拒守。光遠率參領郎紹貞等圍之。光遠離汎地。敵乘間遁。及覺。守不追擊。有旨詰問。光遠復以我兵不能抵敵。致辨。部議應又世職解任。詔從寬罰鍰。是年。上復親征明。光遠率兵從。以革翼兵攻克松山西南隅臺。降其將楊文顯。時城中尙堅守不下。上登松山南岡。相度城垣形勢。命光遠以本旂兵。同懷順王耿仲明攻城南門。迤東。毀其堞。會日暮。旋營。翌日。議穴城南地道。遇錦州蒙古兵三百來援。我兵不能進。遂罷攻城議。師旋。追論攻松山時。光遠等詭言礮子已盡。今猶剩回。抗誤軍機。疲敝士馬。法不容貸。詔集漢官于篤恭殿。大學士范文程等。宣諭數光遠等罪。令在家閑住。光遠所轄參將李世昌。鑄礮子鎔鍊未淨。不

堪用下所司鞫訊。復得光遠狗庇不舉狀。光遠坐論死。罰贖。上念光遠罪由無知。特加寬宥。六月。分漢軍兩旂爲四旂。仍起光遠爲都統。轄兩黃旂。順治四年。以老病乞休。從之。康熙二年卒。賜祭葬如例。諡誠順。從子思文襲職。

沈志祥列傳

沈志祥。遼東人。皮島總兵沈世魁從子。官副將。本朝崇德二年。命武英郡王阿濟格等征皮島。世魁戰死。志祥收潰衆。走石城島。欲得世魁勅印。監軍者弗予。乃自稱總兵。明發兵勦之。志祥遣部將邱朝佐。金光裕。賚疏詣盛京納款。旋挈家及部衆四千餘。由黃百島至安山城。三年四月。遣學士瑚球等宴賚之。令于鐵嶺撫順。自擇駐所。志祥願駐撫順。遂給車騎。俾移衆安輯。七月。召見崇政殿。授總兵。錫賚優渥。四年。封續順公。六年。率所部隨大軍圍錦州。七年。凱旋。賜貂裘及降戶。志祥請令部衆隸八旂漢軍。于是隸正白旂。順治元年四月。隨大軍入山海關。擊敗流賊李自成。追勦至望都。十月上御

皇極門宴賚凱旋諸王大臣。志祥與焉。三年。詔以孔有德爲平南大將軍。征湖南。志祥率兵從。五年。湖南底定。振旅還。賜黃金百兩。白金二千兩。尋卒。無子。猶子永忠襲公爵。別有傳。

左夢庚列傳

左夢庚山東臨清人。父良玉。明平賊將軍。後封甯南伯。卽以平賊將軍印授夢庚。流賊陷京師。福王立于南京。良玉晉候爵。有自稱莊烈帝太子南來者。福王下之獄。良玉假辦明太子。清君側爲名。將以兵入南京。至九江病死。諸將推夢庚爲帥。總督袁繼威勦之。夢庚佯旋師。至池州待朝旨。而潛自彭澤下。連陷建德。安慶。福王命總兵黃得功破之。銅陵。夢庚退保九江。本朝順治二年閏六月。英親王阿濟格追勦流賊。李自成至九江。夢庚率衆迎降。及班師。夢庚入京。陛見。賜宴午門內。隸漢軍。正黃旗。十月。疏言。臣進京。祇帶總兵盧光祖。李國英二員。其餘如總兵張應祥。徐恩盛。郝効忠。金聲。桓常。登。徐

勇吳學禮張應元徐育賢俱奉英親王調發江西湖廣兩處防勦。誠恐諸將在外。踪跡未定。室家未安。訛惑之事不可不籌。得旨張應祥等官兵著該地方官安插妥當。十三年。夢庚爲其父請卹。部議以良玉死在夢庚未殺誠先。旣未効順。又非死事封疆。例不准行。從之。五年。追敘投誠功。授一等子爵。六年。隨英親王征大同。叛鎮姜瓖攻左衛。克之。尋擢本旂漢軍都統。十一年卒。賜祭葬。諡莊敏。從孫元蔭襲。

趙之龍列傳

趙之龍安徽虹縣人。七世祖彝。明永樂中以功封忻城伯。數傳至其父世新。泰昌元年卒。之龍襲職。崇禎時流賊四起。莊烈帝命之龍守南京。李自成陷京師。福王立于南京。大學士馬士英挾擁戴功。內約之龍。及勳臣朱國弼劉孔昭。并鎮臣劉澤清。劉良佐等。擅朝政。尙書張慎言以薦舊大學士吳姓。鄭三俊爲之龍等所嫉。一日朝罷。之龍等羣詣于廷。指慎言及姓爲奸黨。叱咤徹殿陛。伏地痛哭。謂慎言舉用文臣。不及武臣。置爭。

不已。又疏劾慎言。極詆三俊。且謂慎言迎立時阻難。懷二心。乞寢牲陛見命。議慎言欺奸罪。慎言遂乞休。本朝順治二年。豫親王多鐸兵下江南。福王就擒。之龍率明魏國公徐九爵。保國公張國弼。降平候張拱。召臨淮候李祖述。懷甯候孫維。城靈璧候湯國祚。安遠候柳祚昌。永昌候徐宏爵。定遠候鄧文圃。項城伯常應俊。大興伯鄒存義。甯晉伯劉允極。南和伯方一元。東甯伯焦夢熊。安城伯張國才。洛中伯黃九鼎。成安伯郭祚永。駙馬齊贊元。大學士王鐸。尙書錢謙益。侍郎朱之臣。梁雲構。李紱。翰林程正揆。張居。給事中林有本。陸郎生。王之晉。徐方來。莊則敬。及都督提督副將。并城內官民迎降。之龍將出降。八戶部封庫。郎中王成治憤擊之。之龍逃免。三年六月。之龍及九爵等疏繳明鐵券。五年八月。敘投誠功。援之龍三等男爵。隸漢軍鑲黃旂。尋以老病致仕。十一年正月卒。孫承馥襲職。

劉良佐傳

黎良佐直隸人。明纜兵崇禎十年流賊羅汝才等自鄖陽東下。敗官兵于宿松。合其黨搖天動等衆二十餘萬。分屯拍城之練譚石井等處。良佐同總兵牟文綏擊敗之。桂車河連敗賊于廬州六安。十五年同鳳陽總兵黃得功大敗流賊張獻忠于潛山。李自成陷京師。莊烈帝殉難。南京兵部尙書史可法欲迎立潞王朱常滂。良佐同鳳陽總督馬士英總兵劉澤清黃得功高傑送福王朱由崧至儀徵立之。議分江北爲四鎮。良佐分廣昌伯專轄鳳壽。駐臨淮。經理陳杞一路。而澤清得功傑爭欲駐陽州。傑先至大殺掠。澤清亦大掠淮上。甯淮亦不納良佐。可法往解。乃皆聽命。傑欲趨河南。窺取中原。調良佐赴徐州。爲傑聲援。後諸軍缺餉。又聞我大兵不日南下。乃合良佐同得功扼潁壽。本朝順治二年。豫親王多鐸下江南。福王就擒。良佐率兵十萬降。以原官隨征丹陽金壇江陰等縣。江南平。入京。陞見。隸漢軍。廂黃旂。五年敍投誠功。授二等子爵。隨征南大將軍譚泰。勦叛鎮金聲桓王得仁于江西。平之。詔回京授散秩大臣。十八年正月。援江南。江安提督。加總管銜。九月。疏言臣現行事宜。有與敕書不符者二。其一。甄別將領。如將

領賊否。毫不與聞。何爲甄別。請將所屬武官賢否。容臣年終舉劾。其一。教習水師。沿江一帶水師。俱係操江巡撫提調督臣統轄。原與臣無涉。而敕書開載甚詳。應否教習。請旨裁奪。又廬鳳淮揚四府。旣屬駐瓜洲之都督楊捷管轄。應將臣敕書內廬鳳淮揚字樣刪去。疏下部議。以江南提督三員。應歸併一員。裁江甯鴨廬二缺。時直隸山東山西河南雲南。奉旨設立提督。議卽以良佐調任直隸。去總管銜。改左都督。從之。康熙五年。因病休致。七年卒。賜祭葬如例。子澤涵襲子爵。

孫得功傳

孫得功。遼東人。初爲明廣甯巡撫王化貞中軍遊擊。天啓元年。瀋陽遼陽失守。化貞率兵十餘萬。駐廣甯。明年正月。我太祖高皇帝統師圍西平堡。化貞令得功同總兵劉渠等赴援。未至而西平已潰。副將羅一貴死焉。渠與總兵祁秉忠。副將劉徵。參將黑雲鶴。遊擊李茂春。張明光。迎戰于平陽。橋堡皆歿于陣。化貞素任得功爲心腹。而得功以輸

款本朝。還言兵已薄城。城中大亂。化貞從廣甯跟踏走大凌河。得功遂偕守備黃進。千總郎結貞。陸國志。石天桂等。出城三里。至罕昌岡。備乘輿設鼓樂。執旂張益。迎上入駐。巡撫署。士庶夾道俯伏。歡呼萬歲。時天命七年正月二十四日也。鎮靜堡參將劉世勳。大清堡遊擊閻印。大凌河遊擊何世延。西興堡備禦朱世勳。石屯衛備禦黃宗魯。錦州都司陳尙智。鎮撫堡都司金勵。劉式肇。李維龍。王有功。平漢守堡闕雲龍。鐵場守堡俞鴻漸。錦安寺守堡鄭登。圍山守堡崔盡忠。鎮甯守堡李詩鎮。遠守堡徐鎮靜。鎮安守堡鄭維翰。鎮甯守堡臧圖祚。鎮邊守堡周元勳。大康守堡王國泰等。各率所屬兵民歸順。廣林遊擊羅萬言。先匿山中。至是亦來降。仍原官。賞賚有差。得功以遊擊轄降衆。移駐義州。天聰八年五月。追敘得功倡廣甯將士獻城。嗣守義州。獲明諜。捕斬竊掠之蒙古十七人。予一等男世爵。是年以年老乞休。尋卒。長子有光襲爵。任參領。隸正白旂漢軍。隨征明錦州及中後所。前屯衛。率所部發礮破敵。順治五年。勦山西海賊及大同叛鎮姜瓖。並有功。洵晉三等子。次子思克。官至提督副將軍。有傳。

許定國列傳

許定國河南太康人。明末由伍行官山東遊擊。以平白蓮教功。遷副將。崇禎時。禦流寇。掃地王等于太康有功。遷山西總兵官。時李自成圍開封久。監軍御史王爨趣定國晉軍。刻期渡河。次心水。一夕潰。被逮論死。尋復授援勦河南總兵官。福王時。定國以兵駐睢州。本朝順治元年十二月。豫親王多鐸兵至孟津。定國及王寨賊首李際遇。多擁衆四五萬。請降。聞肅親王豪格勦撫山東。上書欲携孥來歸。請我兵渡河。肅親王諭之曰。爾果降。速遣爾子來。定國遂以明年正月遣其子詣軍門降。會明總兵高傑。謀由河南開封取中原。至歸德。聞定國遣子事。乃招定國往。會不起。傑邀巡撫越其杰。巡按陳潛夫。就定國于睢州。定國不得已郊迎。其杰勸傑勿入城。傑輕定國不聽。旣入。定國飲傑酒。侑以妓。傑酣爲定國刻行期。并微及遣子事。定國益無離睢意。傑固趣之。定國遂于。是夜伏兵殺傑。具疏投誠。並請大軍渡河。靖傑餘黨。得旨。許定國計殺高傑。歸順有功。

征南大兵不日卽至。著傳諭知之。三月。豫親王奏令定國隨南征。留其妻子居曹縣。諭河道總督楊方輿安置定國家屬資糧。七月。定國妻邢氏困病。乞歸河南舊土。方輿代奏。得旨。許定國家屬著暫居曹縣。俟該鎮陞見後奏奪。十月。江南平。豫親王班師。定國隨入京。隸漢軍廂白旂。三年三月卒。五年八月。追敘投誠功。授一等子爵。以其子爾安襲。十二年。詔大小官直言時政。爾安爲睿親王多爾袞訟功。請修其墳墓。語在睿親王傳。鄭親王濟爾哈朗以爾安妄頌睿王元勳。比擬周公。結黨煽惑。應論死。特旨從寬。流徙甯古塔。爾安所襲世爵。准定國他子承襲。于是爾安弟爾吉襲。

謝陞列傳

謝陞山東德州人。明萬曆三十五年進士。歷知三河。遵化。雄清。四縣。內除禮部主事。天啓時。遷吏部文選司郎中。崇禎初。選大常寺少卿。常求巡撫于吏部尙書王永光。會當推薊鎮。引疾以避。及推大僕卿。忽報病痊。御史毛羽健劾陞與永光朋比。宜並罪。永光

召對文華殿。力詆羽健。請究主使者。以大學士韓爌言。乃不究羽健。而陞罪釋不問。洊遷至南京吏部尙書。尋廷推都察院左都御史。以御史路振飛疏陳其醜狀。不果用。七年。詔內閣九卿。各舉堪勝吏部尙書者。時溫體仁柄政。與陞及南京都御史唐世濟善。□□卿人大理卿朱太啓並舉二人。果用陞爲吏部尙書。而世濟掌都察院。八年。給事中許譽卿。以鳳陽皇陵被焚。劾溫體仁誤國。體仁怨之。陞希體仁意。欲出譽卿官。南京大學士文震孟以譽卿資深。當擢京卿。語侵陞。陞慍。適山東布政司勞永嘉賄營登萊巡撫列之舉首。爲給事中何楷御史張纘曾所劾。陞疑出譽卿及震孟意。遂劾譽卿營求京缺。不欲內遷。並及震孟。體仁擬旨削譽卿籍。震孟並罷去。唐世濟薦用巡按霍維華。陞不糾駁。御史李夢辰劾之。給事中王士錄。至指陞及溫體仁。楊嗣昌。薛國觀爲四凶。十三年。晉太子少保。改禮部尙書兼東閣大學士。又加少保。加太子太保。改吏部尙書兼建極殿。十五年。我太宗文皇帝克錦州。及松山塔山杏山等城。明御史朱壽圖疏劾監軍松山。先衆竄逃之兵部郎中張若騏罪狀。謂恃鄉人謝陞爲內援。陞奸險小人。

應與若騏駢斬。初。兵部尙書傅宗龍出任陝西總督。代之者陳新甲。告以上慮關外各城難守。欲息兵議和。宗龍與陞語及之。後陞因召對邊事。遂述宗龍言。且曰。倘肯議和。和亦可恃。及出。語給事中方士亮。倪仁禎。朱徵等曰。人主以不用聰明爲高。令上太用聰明。致天下盡壞。又曰。此事諸君不必言。上祈籤奉先殿。意已決。于是士亮仁禎與給事中廖國遴等。交章劾陞。誹謗君父。洩禁中語。大不敬。無人臣禮。至是壽圖疏入。若騏駢論擊獄。陞亦罷歸。本朝順治元年正月。大兵入京師。頒詔招撫山東。六月。陞偕在籍明御史趙繼鼎。盧世淮等。遣人齎降表赴闕。其詞曰。闖賊李自成肆逆逞暴。神人同憤。臣等空切不共之仇。愧無回天之功。惟皇帝陛下智勇兼錫。威靈遐暢。篤夙昔之舊好。沛拯救之新綸。浩蕩仁恩。有逾再造。先是四月二十七日。臣等鼓勵闔州士民。礫僞州士民。徽文。僞防禦閻杰。誓衆登陴。激發遠邇。共誅闖賊。所置僞官賊將郭陞。喪膽西遁。謹掃境土。以待天庥。彼時德藩被執。適慶藩宗室。曾爲明朝香河令。名師欽者。避闖過境。爲僞州牧所禁。臣等暫奉爲號召之資。倘蒙階下興滅繼絕。不泯明祀。將皇仁益暢于

中外大義卓越乎千古矣。是臣等所私心冀幸而未敢必者也。敬附歸順之私而并及之。疏上。得旨下吏部察敘。時招撫侍郎王鰲永亦具疏薦陞。尋召朱師欽以知州用。趙繼鼎盧世漑授御史。命陞以建極殿大學士原銜。管吏部尙書事。八月陞至。諭曰。前以銓除爲國家要務。是以欲用卿爲吏部尙書。今思內院職任較重。宜卽與諸大學士共理機務。賜銀幣貂裘諸物。十二月。與大學士馮銓洪承疇等。並賜金二十兩。銀一千兩。及金玉諸器皿。時有自稱明崇禎帝太子。至嘉定伯周奎家者。奎疏聞。下內院集明隊及太監辨視。皆莫識。惟太監楊玉常進指揮李時印等數人。證以爲真。陞與銓承疇及吏部侍郎沈惟炳給事中朱徵等。請下法司詳勘。得劉姓假冒狀。與楊玉等數人並棄市。二年正月。陞以疾劇乞假。命太醫診視。三月卒。贈太傅。廕一子。賜祭葬如例。諡清義。

明末漢奸列傳卷八

金之俊列傳

金之俊。江南吳江人。明萬曆四十七年進士。官至兵部右侍郎。流賊李自成陷京師。之俊不能死。被拷索。本朝順治元年。大兵定京師。之俊降。仍原官。疏請先下蠲租之詔於畿甸。以慰民望。又言土寇率衆歸誠者。宜赦罪勿論。其縛渠來獻者。宜分別敘功。就撫之衆。宜編置牌甲。令各安故業。無恆產者。宜設法區畫。請頒諭各鎮道府遵行。尋奏薦故明薊遼總督丁魁楚。陝西總督丁啓睿。陝西巡撫線國安。副都御史房可壯。吏部員外郎左懋泰。河東守道郝綱等。並才堪錄用。又劾通州道鄭輝。優游養寇。勦撫無聞。三關鎮臣郝之潤。借名誅僞。縱兵肆掠。俱宜罷斥。並請趣畿南北按臣及監司以下官。速補赴任。禁止滿洲官役。額外需索驛遞夫馬。疏入。悉採納之。二年五月。以京師米價日

增。疏言西北糧食。取給東南。自闖賊亂後。南粟不達京師。至北地。米價昂貴。今大兵直取江南。計蘇松常鎮及杭嘉湖七郡漕運。必抵南庾。須急令漕督星馳淮上。巡漕御史疾趨瓜揚。經理運務。俟金陵底定。酌留之餘。悉轉太倉。南粟既來。米價自減。詔速議行。六月條陳漕政八事。一。衛所旂軍既裁。宜別設運官漕卒。一。明季舊艘殘毀。宜改用投順兵船。一。南漕抵濟。宜別造剝船。轉運津通。一。加耗應照明初舊例。餘悉蠲除。一。征收宜責正印。勿委佐貳。一。漕道宜駐濟甯。專司剝運。各省糧道。至濟交卸。卽押回空。其足額與否。聽漕道驗報。一。漕米除蠲餉外。視舊額盈餘若干。悉爲改折。隨漕征解。一。漕運官軍。除交兌外。仍支給坐行二糧。疏下所司知之。七月調吏部右侍郎。三年。疏請酌改銓選進士之制。謂故明舊例。二甲選部屬知州。三甲選中行評博推官知縣。不論名次。內外互選。于政體人情均未協。請以二甲前十五名選部屬。後二十名與三甲前十名。選中行評博。十一名至二十名選知州。二十一至三十名選推官。餘選知縣。得旨允行。五年。擢工部尙書。六年請假歸葬。許之。以礮局失火。之後坐分賠。特予寬貰。令罰俸。

三月。旋以恩詔加太子太保。七年。假滿還朝。八年。遷兵部尙書。晉少保兼太子太保。十年正月。調都察院左都御史。會與大學士陳名夏等。議革職總兵任珍罪。之俊坐黨。附論死。奉旨從寬。削加銜罰俸一年五月。疏言審擬盜犯。不宜概行藉沒。致累無辜。請依正律。又言直省提學。例以僉事道分遺視事。若畿輔爲首善之區。江南爲人才之會。請以翰林官簡用。均報可。尋遷吏部尙書。十一月。授國史院大學士。十二月。充會試主考官。初。之俊引疾乞休。不允。十三年二月。諭曰。君臣之義。終始相維。爾等今後毋以引年請歸爲念。受朕殊恩。豈忍違朕。朕亦何忍使爾告歸。若決於引退。卽忍於忘君矣。之俊奏曰。臣蒙皇上隆恩。但懼不能報効。何忍遽違恩眷。越日上復諭諸大臣曰。昨歲之俊病甚。朕遣人圖其容。念彼已老。倘不起。不復相見。故乘其任時。命工繪像。蓋不勝眷戀如此。諸臣亦有衰老者。豈不有歸田休養之念。但經朕簡用之人。欲皓首相依。不忍離也。之俊泣奏曰。諸臣中無才者。莫過于臣。受皇上深恩。而負重罪者。亦莫過于臣。舛誤滋多。惟恐廢職。非忍于離天顏也。十五年九月。改內三院爲殿閣銜。以之俊爲中和殿

大學士兼吏部尙書。十二月。同校定律例。十六年二月。詔立明莊烈帝碑。命之俊撰文以進。是月。加太保兼太子太師。五月。以大學士李蔚。于兵部請武進士劉斐等俸祿一疏。票擬任意。之俊看詳。疎忽。有旨切責。部議降二級留任。罰俸一年。旋加恩寬免。八月。請假期葬歸。十七年。在籍。自陳乞罷。溫諭來京供職。未至。加太傅。十八年。改殿閣銜。仍爲內三院。授之俊祕書院大學士。康熙元年。予告致仕。之俊回籍後。屢以老衰乞休。至是始從所請。四年。應詔馳疏陳三事。一。決囚當有定候。凡監候斬絞之犯。請照例秋後行刑。一。考成尙需通融。酌免有司之實革。以責久任。分別糧里之欠。少欠多。以示勸懲。一。民間挾私叩閭。因而凌鑠官府。以紊法紀者。宜申嚴禁。疏入。報聞。之俊家居數年。有撰匿名帖榜其門者。多言其賍私曖昧事。之俊白之總督郎廷佐。窮治之。牽累不決。事聞。八年正月。諭曰。匿名帖乃奸惡之徒。造寫陷害平人者。如見其投擲拿獲。理應照律從重治罪。若因此究問。則必致株連無辜。律載收審匿名帖者。將審問之人治罪。金之俊將匿名帖送究。卽廷佐收受察拏。俱生事不合。着議處。於是廷佐鐫二級。之俊削太

傳銜。九年卒。賜祭葬如例。諡文通。

胡世安列傳

胡世安四川井研人。明崇禎元年進士。改庶吉士。累官詹事府少詹事。本朝順治元年四月。大兵定京師。世安降。授原官。尋裁詹事府。授翰林院侍讀學士。堂院事。十二月。賜鞍馬。二年。遷國史院學士。尋充修明史副總裁。五年八月。遷禮部左侍郎。十月。丁母憂。奉旨在京守制。九年三月。擢禮部尙書。十二月。侍宴中和殿。賜貂皮朝衣一襲。十年。以覆審總兵任珍罪。徇黨附和。部議革職。永不敘用。得旨著降三級留任。十二年二月。以病乞休。上慰留之。七月。考滿。加太子太保。廕左子。入監讀書。十三年三月。副都御史魏裔介。廣東道御史焦毓瑞。交章劾世安受大學士陳之遴囑。薦其同鄉安肅令沈令式爲知府。令式庸劣。旋爲總督李蔭祖所參。植黨營私。確有可據。命世安回奏。世安疏言保舉令式。憑學臣鹽臣薦章。非因之遴推舉。下部議以世安失于詳慎。罰俸一年。四月。

諭曰。胡世安在禮部最久。乃典禮甚多未協。有負委任。著革去太子太保。降三級。照舊辦事。十四年。充經筵講官。十五年。晉武英殿大學士。兼兵部尙書。十六年三月。詔以大學士胡世安奉職有年。勤勞素著。仍加太子太保。六月考滿。加少傅兼太子太傅。十八年正月。聖祖仁皇帝御極。仍改殿閣銜爲內三院。以世安爲祕書院大學士。十二月。以疾乞休。加少師兼太子太師致仕。康熙二年。卒。予祭葬如例。

田維嘉列傳

田維嘉直隸饒陽人。明萬歷四十四年進士。累官吏部尙書。崇禎十年。變老選例。知縣推官政優者。得入爲翰林。次科道。次部主事。給事中陳啓新。奏考選不公。莊烈帝取吏部咨訪冊閱之。罪濫徇者。貶黜給事中孫晉。李右讜。御史萬好善。葉初春等。維嘉懼。乃請先推部曹。少詹事項煜。言維嘉阿用學士張至發。優其所親任。濬。諭德黃景昉。亦言素著廉能之成勇。宋天麟。未預清華選。乃命集已授部選及候選者廷試。親定甲乙。勇

等皆改官給事中吳麟徵御史宋學洙交章劾維嘉賍汚。檢討楊士聰復劾其納周汝弼金。用爲延綏巡撫。御史蹙爲居間。乃逮訊。史蹙及維嘉家人會有兵事。獄久不結。蹙瘐死。事得寢。維嘉引疾歸里。本朝順治元年六月。維嘉遣子敬宗齎疏自陳。倡率饑陽紳士擒斬流賊李自成所置僞令。拒卻賊黨康文斗郭壯畿。開通道路。舉城歸順。得旨召維嘉赴京錄用。八月。維嘉至。命以刑部尙書管左侍郎事。九月。疏陳衰病乞歸。諭曰。田維嘉星馳趨召。具見急公。覽奏情詞懇切。准回藉調理。病痊起用。二年二月卒。子敬宗以卹廕請。禮部言維嘉未任事卽歸。不准卹廕。

沈維炳列傳

沈維炳湖廣孝感人。明萬歷四十四年進士。初任香河知縣。入爲刑科給事中。天啓元年。廷臣爭紅丸案。兵部尙書黃克纘述進藥始末。力爲首輔方從哲辨。維炳與同官薛文周劾其昵私。交昧大義。二年。遼東經略熊廷弼巡撫王化貞以廣甯失陷逮勘。登萊

道佟卜年爲廷弼所薦。有訐其謀叛者。大學士沈灌。兵部尙書張鶴鳴。欲藉以重廷弼罪。維炳疏言。灌因言官列其私跡。借廷弼爲抵彈謝過之具。廷弼承失地之罪足矣。豈必加以他辭。鶴鳴左袒化貞。角勝廷弼。致經撫兩敗。獨鶴鳴超然事外。今復欲加罪廷弼。有背公論。實與灌朋謀。三年。御史郭鞏。劾左都御史楊漣等保舉廷弼。黨邪誤國。維炳疏言。諸臣欲殺廷弼。特借名報怨。非真爲封疆起見也。漣與廷弼。本不相蒙。今牽入一案。且波及數十人。方今乃臥薪嘗膽之日。豈報怨爭鳴之日耶。四年。輔轉吏科都給事中。疏論魏忠賢所用立枷法不可行。值吏部尙書趙南星放歸。維炳論鐫秩調外。崇禎元年。復原官刑科都給事中。薛國觀刻其與兵科給事中許譽卿主盟東林。把持察典。譽卿引疾歸。維炳任職如故。洊遷吏部左侍郎。及流賊李自成至。不能卽死。受拷掠。本朝順治元年五月。睿親王多爾袞定京師。維炳投誠。令仍任原官。六月。啓言。維炳爲亡國之臣。仍舊服官。雖本章不罪其偷生。而臣義則能無愧死。且年已六十有四。兩目皆盲。視字如霧。足膝疼痛。拜跪苦難。乞賜投閒。睿親王慰留之。七月。啓言。維炳于三四

月間幽困賊營。今無家可歸。卽謝事亦不敢求去。願長依輦轂下。但素性多執。弗克周旋人情。恐怨謗日生。卽欲矜全。亦有不能。望早賜罷斥。睿親王復諭曰。前旣慰留。當盡心供職。不辭勞怨。何得疑慮。謗毀豫以私情陳請。九月疏言。自流賊毒辱搢紳後。引遜全生者甚多。雖荷新朝寬大。以示招徠。乃人情躁競。吏員冒正途。粟監冒明經。生儒冒貢監。白丁冒冠裳。遠年罪廢而匿情起用。輿論共棄。而借資求銓。總因官制未定。人希意外之榮。宜盡數察出。或姑令任事。徐觀其後。或從新改正。各還其原。卽前朝末政。亦多可議。臣爲前朝舊臣。何忍斥言明政之非。然而興朝作新。應斟酌因革。以爲百世之準。疏入。得旨。沈惟炳職掌佐銓。宜率屬釐剔。公敘清澄。使吏稱民安。作新治道。各官已用者。姑免追究。以後著嚴加察核。不許仍踵陋習。違者劾之。順治二年正月。以吏部推用御史之葉定秀。現爲明福王朱由崧光祿少卿。又推補原官之明史部員外郎左懋泰。其兄懋弟。爲明福王使臣北來。弗歸順。吏部不檢舉。下刑部審擬。維炳革職免杖。潤六月。副都御史劉漢儒。劾維炳子宣府推官沈宜。憑父勢久招物議。今巡按御史張鳴

駿薦其堪膺科道。顯係徇情。且沈宜雖曰明經。其考選之文。係人代作。又維炳曾選其二僕沈永甯。沈元貞爲典史。冒濫官常。並宜斥逐。事下刑部擬問。沈宜由貢考職。部冊可據。所指作文之人未預考。無代筆事。沈永甯沈元貞。非維炳僕。所糾諸款不實。宜復職。感年已老。旣罷。弗復用。

黃圖安列傳

黃圖安。山東堂邑人。明崇禎十年進士。由推官內陞吏部主事。遷員外郎。管餉易州。尋授易州道。本朝順治元年五月。圖安率所屬投誠。命仍原官。時沿河牟山等處。賊尙嘯聚。而河間巨盜李聯考。糾衆萬餘。犯易州界。圖安親擒賊首。餘黨悉平。二年四月。以勦撫功。擢甘肅巡撫。圖安以母老疏辭。易州民郭世明等亦赴闕懇留。得旨。黃圖安擢撫巖疆。著速赴新任。殫力料理。所請俱不允。三年二月。疏言流賊李自成荼毒中原。橫蹂三秦。望風皆靡。惟故明撫鎮將吏矢心戮力。誓死不降。如巡撫林日瑞。總兵馬曠。副將

郭大吉歐陽袞遊擊哈惟新張際都司萬恒姚世儒高登科姜宏基守備郭維疇同知藍台等或甘心自引或罵賊自刎請勅部旌獎以慰忠魂章下所司六月調甯夏巡撫八月復疏請終養諭部察議以西陲多事借端規避革職四年三月追議圖安于甘肅巡撫任內服用違制已革職永不敘用先是大學士范文程以圖安母年八十一終養乃人子至情吏部不宜遽議斥擬爲申奏值齋期未果白于鄭親王濟爾哈朗睿親王多爾袞知之責文程擅事請下法司勘訊坐削職旣而釋之九年四月文程復爲圖安請起用得旨黃圖安著以僉都御史巡撫用十一年二月復授甯夏巡撫時左都御史魏裔介請裁併各省道員命督撫議奏十三年圖安疏言甯夏係西北重鎮河西道駐鎮城內督征屯糧兵餉兼理學政所管漢唐等渠引水灌漑裕賊資民關係甚鉅河東道駐靈州東至花馬池接延安定邊西至半個城接固原慶陽北自橫城至長邊所在衝險彈壓料理極爲緊要均難議裁詔如所請十四年考滿加副都御史銜廕一子入監十六年濟南知府費一奇以貪贓爲山東巡疏程衡所劾給事中姚延啓因疏言一

奇曾任慶陽同知。甯夏巡撫黃圖安保舉匪人。貽害地方。且圖安自任巡撫。絕無勞績可紀。卽濫舉一約。已足覘其庸劣有素。請治罪。以爲朦徇者戒。下部議圖安降五級調用。尋卒。

高斗光列傳

高斗光山東嘉祥人。明萬歷四十七年進士。天啓間任直隸南和縣知縣。遷保定府知府。崇禎末以給事中沈迅保薦。擢鳳陽總督。流寇張獻忠陷倉山。犯無爲。御史詹兆恆力劾不報。後賊臨江欲渡。斗光不能禦。兆恆陳內外合防策。再劾斗光。請以史可法代。遂罷譴。舉主沈迅亦被謫。本朝順治元年。以錦衣衛百戶危列宿奏薦。授偏沅巡撫。二年御史吳達。劾大學士馮銓。語涉斗光在前朝失陷封疆事。斗光疏辯。請與達質。命速赴任。不必自求召見。尋疏陳安民弭盜事。得旨。偏沅重地。新經撫定。其間安集機宜。高斗光當俟到任後詳確入告。如此泛陳。殊爲無當。初湖北當明季時。土寇蜂起。迄明亡。

蔓延彌甚。是年順承郡王勒克德渾統師征討。屢敗賊。賊勢漸挫。既班師。賊之在湖南者復肆掠。偏沅道梗。斗光不能達。乃駐節武昌。三年奏請發大兵往勦。恭順王孔有德爲大將軍。率將士趨湖廣。斗光進駐荊州。四年。故明總兵任宣烈率家屬來降。斗光遣宣烈招撫安鄉丈田各寨。擊走僞將鄭二龍。李春輝等。扼之洞庭湖口。斬首數百。溺死無數。尋請借荆關料稅。開局鼓鑄。生息佐軍。又請復常德舊局鼓鑄。借協餉銀爲鑄本接濟之需。並得旨允行。七月。安化土賊嘯城中文武官出應調遣。乘間入城劫掠。典史孫焜集兵捕賊。賊卻走。踞山寨。斗光檄長沙鎮兵赴勦。盡殲之。先是湘鄉諸生蕭漢奇爲仇家誣訐。違制蓄髮繫獄。知縣劉越薊雪其冤釋之。因受漢奇餽謝。越薊故貪污。至是斗光以越薊于生員蓄髮事。嚇詐受財。列款糾劾。未詳。漢奇被誣狀。疏入上。以斗光但劾越薊劣蹟。不窮治生員蓄髮事。下部議。降二級調用。會斗光老病請休。總督羅繡錦亦以撫臣右手偏廢入奏。部議照所降級致仕。尋卒。

房可壯列傳

房可壯山東益都人。明萬曆三十五年進士。授御史。天啓元年三月。我太祖高展帝親統師取瀋陽遼陽。明經略袁應泰自經死。可壯疏請起用原任漕運總督李三才爲經略。下廷臣集議。通政使參議吳殿邦阻止之。四年十月。吏部尙書趙南星罷。魏忠賢欲用其私人代之。侍郎林干廷不從。時可壯掌河南道事。與干廷等會推喬允升。馮從吾。汪應蛟三人。忠賢傳旨切責。可壯及干廷等並貶黜。崇禎元年三月。起忤璫諸臣。可壯補原官。十一月。會推閣臣。次列禮部侍郎錢謙益。尙書溫體仁。託謙益主浙江鄉試。時關節受賄。諸臣黨比推舉。莊烈帝召謙益及給事中章允儒等廷訊。事詳錢謙益傳。可壯坐黨比降秩。尋洊遷副都御史。十五年五月。吏部尙書李自宣。給事中章正宸。御史張煊等會推閣臣。可壯及侍郎宋枚。大理卿張三謨預焉。是時大學士陳演以試御史廖于義。私囑都察院予實授。可壯與張煊待不可。于義糾可壯煊不公。下吏部議。坐于

義抄刊降調之罪。至是演奏會推事徇私濫舉。莊烈帝怒。御中左門召李自宣。章正宸等語其妄舉。自宣奏辦。稱可壯峻節練識。肆烈帝益怒。下刑部定讞。自宣等戍邊。可壯與宋枚張三謨削籍歸。福王朱由崧時。御史陳子龍請召用可壯。大學士姜曰廣亦薦之。行人朱統纘劾曰。廣引用東林死黨。把持朝政。曰廣乞罷歸。議遂寢。本朝順治元年六月。招撫侍郎王鰲永至山東。可壯率鄉人殺流賊所置僞益都令。奉表投誠。鰲永疏請召用。侍郎金之俊給事中郝傑亦交章荐之。三年二月。授大理寺卿。六月疏言舊制大理寺掌覆核刑部諸司問斷。當者定案。入奏請再讞。近見刑部鞠囚。有徑行請旨處決者。未足以昭慎重。宜仍歸大理覆核會奏。並請敕法司早定律令。以臻協中之治。從之。十一月。擢刑部右侍郎。五年轉左。六年遇恩詔。加右都御史銜。八年八月。加太子太保。十月。以右都御史管左副都御史事。九年三月。陞左都御史。會風霾遘諗。陳言請權古勤民。減不急之費。廣欽恤之仁。並飭督撫申戒有司。無悖旨征收已蠲錢糧。培克困民。上命實指有司困民狀。可壯因奏江南華亭知縣周世昌山東臨朐知縣董本胡苛

斂浮征。事下所司鞫實褫職。十二月。給事中杜篤祐。疏言。疊奉諭旨。申飭都察院陳奏。各官勤惰。政事修廢。無得徇情不言。並令糾駁諸臣章奏。數月以來。左都御史房可壯。不聞遵旨赴陳。惟有請復關差。及添官行商之疏。經給事中周之桂。孫作齡疏駁。及戶部覆奏。並不准行。是其苟且塞責。無以仰副聖懷。况大計及按差復命。屆期舉劾。尤宜公正。難容尸位素餐。上命可壯回奏。奏上。篤祐復劾其支飾戀職。可壯乃以衰老乞罷。詔復原官致仕。十年正月。御史吳達疏糾吏部尙書高爾寔。職任銓衡。漫無甄別。如房可壯之風紀消靡。直待科糾。始自陳引去。上以吳達不言于可壯致仕之先。切責之。五月。漢軍正藍旂佐領張榮舉首歸旂。候補副將賈漢復奢縱違制等款。詞連可壯。任左都御史時。屢詣漢復家屏人密議。下刑部質訊。以漢復素識可壯。其密議事無佐證。得旨原宥。十月卒于家。贈少保。廕一子入監。

劉漢儒列傳

劉漢儒順天大興人。明天啓二年進士。崇禎時累官至四川巡撫。流賊陷夔州。圍太平。石柱上。司秦良玉率兵援漢儒。運長慶米。濟其軍。太平圍解。中書涂原練鄉勇守梁山。擊退賊。漢儒及巡按御史黨崇雅請用原。以蜀人治蜀兵。莊烈帝不許。并罷漢儒。本朝順治元年五月起授都察院左副都御史。九月世祖章皇帝車駕將至京師。羣臣俱赴通州迎。漢儒疏言城守空虛。懼奸民竊發。請留重臣以鎮中外。派守兵以嚴出入。遠偵探以杜窺伺。下部知之。十二月賜鞍馬。時流賊自太原直犯井陘。始開城對官。仍退據固關。漢儒疏言井陘險峻崎嶇。一人當關。萬夫莫敵。且去正定近。倘賊兵長驅正定。無兵可恃。今宜飛檄官兵。視賊所向。或直搗其巢。或分截其路。賊可就擒。否則我兵南勤。賊已近在肘腋。上賊響應。首尾兼顧。鞭長不及。勿謂疥癬毋煩過慮。下所司知之。二年六閏月。疏言頃者南差不用南人。乃一時權宜計。今天下一統。何分南北。嗣後遇巡按差缺。除迴避本省外。酌量隔省。資才堪任者。列名奏請簡用。得旨各省巡按。南北一體差用。但家鄉鄰近者。雖隔省亦不得差。是月賜紗蟒衣一襲。七月疏言十三道御史原

百有二十。用以巡方糾察。我朝酌減至六十。今差務日繁。銓部竟未考滿。何以應差。請敕部速補。詔如所請行。八月。御史王守履劾漢儒係大學士馮銓黨。爲御史江禹緒營求招撫鄖陽。漢儒具疏辨。並引病求罷。得旨。劉漢儒無端被誣。著益盡心職掌。以振風紀。三年。復以病乞休。康熙四年卒。賜祭葬如例。

王永吉列傳

王永吉江南高郵人。明天啓進士。官至領遼總督。本朝順治二年。以順天巡撫宋權荐授大理寺卿。四年。奏請遣官往直省恤刑。尋擢工部右侍郎。永吉疏辭。上以永吉實非恬退。而徒尙虛名。特允所請。並諭永不錄用。以懲陋習。永吉既罷。家居數年。會有旨起用廢員。復至京。八年閏二月。吏部荐列永吉才品可任。八月起授戶部右侍郎。九月條奏三事。一。各衛所屯地分上中下三等。請撥上田給運丁。以濟運費。一。各項抵色銀。請仍令官收官解。其本色物料動支折價採買。如額足酌加以甦民累。一。洲田丈量。重爲

民害請以蘆課并入各州縣考成五年一次丈量皆見採擇明年七月條奏沿河事宜。略曰。黃水自邳宿。下至清河口。淮泗之水。聚于洪澤湖。亦出清河口。淮黃交會。黃強淮弱。勢不敵。淮泗逼而南趨四百餘里。出瓜洲儀徵。方能達江一線運河。收束甚緊。卽有大小開河宣洩而海口不開。下流壅滯。所以河堤潰決。修築歲費金錢。九載以來。八年昏墊。海口之當開。固不容少緩者也。第海口之在興化泰州鹽城境內者。輒爲附近居民填塞。乞敕河漕重臣。遴委才能。親往相度。開濬疏通。復其故道。淮泗水消。則黃河勢減矣。是時直隸河北諸省。皆患水災。江以南復旱。屢詔所司議蠲賑。而湖川閩廣各鎮戰守官兵急需本折糧餉。永吉以來年兵馬之餉。飢民冬春之苦。並當預籌。請召見廷臣。各抒足糧救荒之策。以俟聖斷。奉旨王永吉必有良策。著詳具以聞。永吉因旨各省老弱病廢。罪革占冒之兵當清。而若病弱斃缺額之馬亦當清。十汰其二。以百萬之餉計之。歲可省二十萬。卽以裁省之項。酌定直省災傷分數。詔諭蠲賑。自寬然有餘。則兵清而餉亦裕。賦減而民更安矣。上嘉納之。會畿輔姦民。有借投充旂下以橫行翫法者。

永吉奏請敕禁諸王大臣濫收漢人投旅。以息諸弊。十年二月。擢兵部尙書。十一年二月。同刑部尙書覺羅巴哈納等。分賑直隸八府。三月。轉都察院左都御史。奏言鄭成功盤踞漳泉惠潮之間。悖逆顯著。乞諭督撫諸臣製器械練兵。不可因成功已經受撫。心生懈怠。更不可顯露張皇。以致疑畏反側。又奏請以江甯總兵移駐鎮江。蘇州提督移駐鎮江。蘇州提督。移駐吳淞瀏河。上皆從之。四月。授祕書院大學士。八月罷。先是永吉在兵部時。鞫德州襁生呂煌窩逃行賄事。審結稽遲。出入未當。至是下諸王大臣詰問。永吉厲聲爭辯。尋以鑄級罰俸議上。得旨。王永吉破格超擢。簡任機密。當竭力爲國以圖報稱。昨諸王大臣會議呂煌一案。詰問情由。輒張威忿怒。全無小心敬慎之意。豈非欲效陳名夏故態耶。負恩殊甚。加重懲姑。從寬革去大學士。降一級調用。九月。補總督倉場戶部左侍郎。奏定隕連官盜買侵蝕漕糧。追還未清。計分科罪之例。十二年二月。仍授國史院大學士。上以銓政重大。必清直練達。乃稱厥職。特加永吉太子太保。以大學士管吏部尙書事。十四年四月。奏言入夏以來。亢陽不雨。皇上竭誠祈禱。恭祀闕丘。

甘霖旋霑。真千載僅見之盛事。然誠敬格天不在升中告虔之日。卽欽差大臣清理刑獄一事。已通帝座而協休徵矣。今直隸各省。俗未還醇。訟獄繁熾。承問者怵于功令。恐蹈徇情之罰。又且急于定讞。附以深文。未必準合律情。况當耕耘力作時。關檄勾提。恐妨農業。乞下直省督撫巡按。文到之日。速行清理獄囚。如有殊常冤枉。奏請上裁。其贖徒以下保釋甯家。庶洋澤宏敷。不崇朝內遍四海矣。奉勅下所司議行。十月。以地震具疏引罪。得旨。朕困地震。深自惕勵。兼命諸臣共加修省。王永吉身爲大學士。卽宜實力修省。反虛飾認非。此似徒博虛名。何如盡心實事耶。十五年四月。以其姪樹德通私科場關節事發。降五級調用。九月。補太常寺少卿。十月。遷都察院左副都御史。十六年二月卒。上諭部臣曰。王永吉前因好勝沽名。故降級示抑。使省改自新。不意遽嬰疾奄逝。朕甚悼焉。念其服官有年。勤勞素著。宜加曠典。以昭優恤。著贈少保兼太子太保吏部尙書。照一品例給予祭葬。立碑。蔭一子。遣官護喪歸里。賜諡文通。

王鐸列傳

王鐸河南孟津人。明天啓二年進士。改庶吉士。授編修。洊陞少詹事。充經筵講官。崇禎十一年春。進講中庸。唯天下至聖章。旁及時事。有白骨如林語。莊烈帝切責其敷衍支吾。不能發揮精義。鐸惶懼。俯伏案前待罪。明年。大學士張至發奏東宮出閣時。設侍班四人。講讀六人。校書二人。皆以翰林及詹事坊局官兼任。時廷議舉諭德黃道周。至發屏之。而鐸爲侍班。尋乞假歸里。十七年三月。擢禮部尙書。未赴。流賊李自成陷京師。明福王朱由崧立于江寧。鐸與詹事姜曰廣。並授東閣大學士。道遠未至。大學士馬士英入輔政。出史可法督師揚州。嗾其黨朱統鐸劾曰廣。去之。鐸至。遂爲次輔。是年十二月。刑部尙書解學龍。治從賊獄。仿唐制六等定罪。庶吉士周鍾曾爲賊草勸進表。又上書勸賊早定江南。與率先從逆之光時亨。僅列二等。擬緩決。士英傳旨令再議。學龍謀之。鐸欲緩周鍾。光時亨死。尙士英注籍上之。且請停刑。鐸卽擬諭旨。褒以詳慎。平允。士英

聞之大怒。削學龍籍。而置鐸不問。本朝順治二年五月。豫親王多鐸克揚州。將渡江。明福王走蕪湖。留鐸守江寧。鐸同禮部尙書錢謙益等文武數百員。出城迎豫親王。奉表降。尋至京。候用。三年正月。命授禮部尙書。管宏文院學士。充明史副總裁。六月。賜朝疏。四年。充殿試讀卷官。六年正月。授禮部左侍郎。充太宗文皇帝實錄副總裁。十月。遇恩。詔加太子太保。八年。晉少保。是年三月。疏言。帝王御世。莫不重道尊師。今上親政伊始。百度維新。請幸學釋奠。並命祭酒司業諸臣。于彝倫堂進講。先期敕工部修葺聖廟。仍照例咨調衍聖公及四姓博士赴京陪祀。以襄盛典。得旨。釋奠大典。允宜舉行。其令擇吉具儀以進。葺文廟如所請行。五月。御史張煊。疏劾史部尙書挾名夏私庇南人。以鐸資深不得陞尙書。反陞資淺右侍郎陳之遴爲證。名夏謂之遴陞任。由尙書譚泰侍郎李率泰等。徧徇九卿。莫有言鐸居官優者。乃推陞之遴。得辦釋。九年三月。授鐸禮部尙書。而鐸先以二月間祭告西嶽江瀆事竣。乞假歸里。卒於家。事聞。贈太保。賜祭葬如例。謚文安。廕孫之鳳中書舍人。長子無黨。初仕明爲揮指。問知入本朝。官山西河東道。姜

瓌叛時。巡撫祝世昌奏其禦賊有功。尋遷濟東道。次子無名。順治三年進士。官至太常寺少卿。

梁雲構列傳

梁雲構。河南蘭陽人。明崇禎元年進士。歷官簽都御史。福王時授兵部侍郎。本朝順治二年。豫親士多鐸兵下江南。雲構隨忻城伯趙之龍等迎降。十月。大學士洪承疇薦雲構堪大任。詔交部擬用。三年四月起授通政司參議。五年八月。遷大理寺卿。九月。擢戶部左侍郎。六年十月卒。賜祭葬如例。諡康僖。入祀鄉賢祠。七年二月。特賜右都御史。廕一子入監讀書。

劉應賓列傳

劉應賓。山東沂水人。明進士。官吏部郎中。流賊李自成陷京師。應賓子珙。與高珍。高鏐。

等乘亂聚衆。聞於朝。大兵將至。珙南投明。總兵劉澤清。後被殺。應賓亦在逃。明福王授以通政使。本朝順治二年五月。大兵下江南。應賓投誠。七月。擢官廬池太巡撫。時明簽都御史金聲據徽州。應賓同總兵卜從善。張天祿等破擒之。三年三月。以太平涇陽土賊殺官劫印。應賓近駐甯國失防。招撫大學士洪承疇疏劾以聞。上以應賓有整理殘疆勞。免究。四月。疏言太平府姑溪橋米稅。金溪柱山商稅。安慶府江上鹽稅。皆創于明崇禎末年。商民滋累。宜革。部議從之。又言甯國太平二府界連。土賊甚多。廣德州北通高溧。南通徽甯。此剿彼逸。日滋延蔓。令遣總兵張應慶。邱越。兵備道高峻鳳。副將馬希珍等。分路招降賊首鄭壁等二百餘名。解散賊衆數萬。不服者誅之。賊漸平。十月。疏奏青陽。石埭。土賊王印伯。高逃之。結衆謀亂。遣知府馬宏長。推官彭清典。分兵緝捕。斬之。及賊黨曹一楊等。又奏江西彭澤。鄱陽等處城。了悟和尚等肆行劫掠。檄池州參將折桂往剿。俘獲甚衆。俱報聞。尋洪承疇復劾應賓衰頹不職。不能爲地方與利除害。濫給武職劄付。致奸人藉作護符。假公肆擾。下部議革職。尋卒。

苗胙土列傳

苗胙土。山西澤州人。明天啓三年進士。授戶部主事。洊陞郎中。外轉陝西關南參議道。崇禎九年四月。擢僉都御史。撫治隕陽。時流賊出沒楚豫。張獻忠自均州。馬守應自新野。蝎子塊自唐縣。合衆二十餘萬。劫掠鄖襄。總兵秦翼明兵少不能遏。胙土遣使招降。爲賊所給。兵部尙書楊詞昌劾諸革職。遣戍懷慶。尋回籍。本朝順治二年三月。以山西巡撫馬國柱荐。授南贛巡撫。胙土將之任。疏言臣所轄者江西之南安贛州二府。福建之汀州一時。廣東之韶州南雄二府。及惠潮二府內之和平。龍川。興甯。程鄉。平遠。五縣。湖廣之郴州。今閩楚尙弄兵。東粵未向化。以一巡撫率十餘有司。翻翻江上。以就未附之地。殊難濟事。若暫用委署。不足服人。請敕部臣于所屬地方。不論已附未附。悉遴選道府廳縣。及將領守巡各員。給憑前來。投一府則一府官蒞任。收一縣則一縣官蒞任。于地方及候選官皆便。疏入。得旨南贛撫屬大小官員。速遴補星馳前去。三年七月。疏

言南瑞等十一府。條順條叛。頑民以嘯劫爲常。而南贛截閩廣聯絡之衝。遏湖南入閩之路。三省所必爭。勢所犄角。况新造之區。舊兵星散難聚。錢糧空乏難徵。臣以一大臣提不經戰之士兵。嘗試其間。誠爲凜慄。請敕撥戰兵數千。其守南贛時。總督洪承疇遣江甯總兵柯永盛領兵。與江西總兵金聲桓會剿賊寇。胙土因疏言江西各府。叛服靡常。總以贛州爲觀望。贛州不定。則江右之亂萌未歇。今諸路十餘營。環列城外。已四閱月。豈真無隙可乘。由兵將分標。號令匪一。士卒無統。因之旂鼓不振。今鎮臣金聲桓。柯永盛智勇兼備。部下士馬精雄。若以一師守南昌。一師至贛州。令諸營將領悉聽節制。庶號令明。而蕩平可奏。疏下部議。令聲桓仍駐南昌。調永盛南贛總兵。鎮守地方。是年九月胙土卒。

明末漢奸列傳 卷八

明末漢奸列傳卷九

張鳳翔列傳

張鳳翔。山東堂邑人。明萬曆二十九年。除廣平府推官。尋擢給事中。時太僕卿南企仲。以請罷礦稅鐫級。鳳翔迎上意。劾企仲他事。企仲遂削籍。天啓間。累遷兵部侍郎。巡撫保定。以東林黨爲給事中薛國觀劾罷。崇禎初。復故官。二年。遷工部尙書。十一月。京師戒嚴。以軍械不備。下獄。四年。四月。久旱求言。言者多請緩刑。鳳翔得免死。戍邊衛。尋召還。授兵部侍郎。十七年。三月。李自成陷京師。鳳翔受拷掠。及賊西遁。乘間歸里。尋至福建。爲明唐王朱聿鍵浙直總督。本朝順治三年。大兵定福建。鳳翔投誠。授戶部右侍郎。五年。七月。調吏部左侍郎。六月。遇恩詔。加右都御史銜。八年。閏二月。擢工部尙書。是年。遇恩詔。加太子太保。九年。十二月。疏言吏部之官制考。戶部之賦役書。禮部之禮儀志。

兵部之兵制考。刑部之刑法志。工部之水部備考。都察院之憲綱臺規。宜統送內院。開局纂修。博選學識老成。才品端方之彥。準古酌今。輯成本朝會典。又疏言移風易俗。自輦轂始。邇來官員非有吉慶典禮。每一酒席費至二兩。戲一班至七兩。宴會頻仍。耗糜物力。往來絡繹。勞敝精神。非所以表率四方。宜飭令節省。疏並下所司議行。十年正月。乞休。詔乘駟回籍。十四年卒。山東巡撫耿焯。據其孫廕生元靜籲請恩卹。爲之入奏。疏中有涓濱元老。股肱大臣語。諭責焯稱許太過。仍下部議。祭葬如例。

吳偉業列傳

吳偉業。江南太倉人。明崇禎四年一甲二名進士。授編修。八年。大學士溫體仁罷。張至發柄國。極頌體仁孤執不欺。偉業疏言體仁性陰險。學無經術。狎暱小人。繼之者正宜力反所爲。乃轉盛稱其美。勢必因私踵陋。盡襲前人所爲。將公忠正直之風。何以復見。海宇禍患。何日得平。疏入。不報。尋充東宮講讀官。又遷南京國子監司業。轉左庶子。福

王時授少詹事。與大學士馬士英尙書阮大鍼不合。請假歸。本朝順治九年。兩江總督馬國柱遵旨舉地方品行著聞。及才學優長者。疏荐偉業來京。十年吏部侍郎孫承澤荐偉業學問淵深。器宇凝宏。東南人才無出其右。堪備顧問之選。十一年大學士馮銓復荐其才品足資啓沃。俱下部知之。尋詔授祕書侍講。十二年恭纂太祖太宗聖訓。以偉業充纂修官。十三年遷國子監祭酒。尋丁母憂歸。康熙十四年卒。

夏成德列傳

夏成德。廣甯人。明松山城守副將。崇禎十四年。洪承疇率兵十三萬援錦州。次松山。我太宗文皇帝親擊敗其衆。留肅親王豪格等圍之。明年二月。成德自松山城內遣其弟景海詣軍營納款。往返者四。並以子舒爲質。約大兵由成德分守界。夜間樹雲梯登城。成德率步卒內應。我軍如其約。及他守將覺。則我軍已畢登。生擒承疇。及巡撫邱民仰。總兵王廷臣。曹變蛟等。是爲本朝崇德七年。肅親王奏斬不降之邱民仰。王廷臣。曹變

蛟。而令成德趨詣盛京。上命禮部承政滿達兩漢。出城十五里宴勞之。以成德及隨降壯丁五百餘。婦女幼稚千餘。隸正白旗漢軍。自是賜宴降臣。洪承疇等。資貂裘蟒緞等物。成德並預焉。順治九年。叙投誠功。授三等子世爵。景海亦授一等輕車都尉。八年。大兵既定山東。授成德沂州總兵。時明福王朱由崧據江南。其漕運總督路振飛率兵圍降賊副將董學禮于宿遷。學禮通款我朝。成德赴援。收振飛兵。又遣遊擊劉范德等。取贛榆。明都司王有年。守備王建仁。拒戰敗死。餘衆舉城來歸。十二月。籍沂州久未歸里之大學士張四知等財產。疏請入官。得旨。地方人產。非武弁職司。夏成德何得越俎。下山東巡撫方大猷等察核。諭曰。前明紳士歸順之後。又後逃竄。所司自當奏報。卽戶產入官。意在懲前警後。非朝廷利其所有。若在未經歸順以前。止令有司察守。候其投誠。給還。不得一概籍沒。二年正月。成德疏請頒給方印。并乞敕兵部給其標下將佐條印。奉旨。夏成德已領關防。何得復請方印。營將既屬總兵統轄。舊制亦無條記。所奏俱不准行。三月。青州道韓昭宣。揭成德越境縱掠。成德亦揭昭宣攫金肥己狀。昭宣故明甯

遠兵備道。來降授官者也。河道總督楊方輿疏言。道臣鎮臣之巨揭。皆由久在明季宦途。因陋襲弊。臣竊見明季文武各官。不思奉公守法。惟知營私挾仇。以致國事敗壞。我朝定鼎之初。正宜盡滌故習。乃昭宣之心力。不盡于吏治。而近于逐羶。成德之兵威。不用以防邊。而用以勾攝。一則貪婪納賄。一則橫暴擾民。若不大伸國法。何以懲儆官邪。乞敕審究。疏入。揚方輿會同撫按勘擬。革昭宣職。成德撤回京。尋病死。子璞。襲世爵。

吳惟華列傳

吳惟華。順天人。先世本蒙古。有巴圖特睦爾者。任明。賜姓名曰吳允誠。封恭順伯。子克忠。進侯爵。七傳至惟英。崇禎十六年十二月卒。未襲。惟華其弟也。明諸生。本朝順治元年。睿親王多爾袞至京師。惟華縋城投順。自稱應襲恭順。候請招撫山西。自効。許之。時江南未平。糧道阻絕。惟華以明總兵朱國弼駐淮揚。統理漕務。請王作書遣國弼部將張國光。諭令來歸。俾通漕運。以給兵食。睿親王從其請。國弼得書。遂納降。惟華旣之招

撫任。宣示恩威。代州繁峙。崞縣。悉歸其誠。從流賊受僞官者。多據城拚命。惟華欲率兵進取。恐力弱難決勝。於是復陳征西五策。一請發重兵出關。合力驅勦。一請命平西王吳三桂。大學士洪承疇。統旅西征。一請分兵趨蒲津。與賊相持。別遣兵由保德渡河。搗賊要隘。一請調江北諸部蒙古兵。由邊外渡河套。自延綏榆林接界入口。斷賊西奔路。一請敕將領。凡遇山林險隘。加意搜勦。以備賊埋伏。若向晚安營。分番值夜。以防劫寨。睿親王韙其議。遣都統葉臣及覺羅巴哈納等西征。令惟華悉心襄贊。別遣都統阿山。率左右翼將士。由蒲州濟河協征流寇。九月。隨大兵征太原。克之。汾州。平陽。潞安俱下。擢授總兵。鎮太原。旋有旨嘉華勒勞。令回京侯用。明年敍迎順功。封恭順侯。尋加太子太保。招撫廣東。三年五月。以廷議撤諸省招撫官。惟華還朝。四年。兼戶部右侍郎。總督漕運。六年二月。奏言防護運河。各以守汛。應以梁成球梅二閘爲界。南則漕運任之。北則山東督撫任之。詔從所請。六月。裁鳳陽巡撫。命漕臣攝其事。會廬州土賊哨聚英山。霍山爲寇。惟華遣兵合勦。獲賊黨白玉麟等三十三人。進勦貓兒潭。四柱江家峯尖嶺。

諸寨賊渠余化蟲等悉降。明年加右都御史。先是惟華得專事權。任用匪人。恣意貪績。偏聽副將畢振武。同知陳標。推官蔡國傑等。蠹剝欺公。秦州高郵患澇。漕糈無出。知州請具疏改折不可。納賄三千金。而後許之。廢官李寓庸家僕爲盜斃于獄。惟華拘治寓庸。寓庸恐重賂乃釋。凡委署州縣。及各稅務僉差。查緝稽覈。駟遞。因事受財。動輒千百。修築城工。假稱率屬捐助。苛派閭閻。復縱姦宄。侵蝕漕糧。漫無覺察。給事中李賓尹。御史魏宮。並劾其營私誤漕。下部議革職。至是巡漕御史張中元。復列款劾其貪婪不職。狀遂逮訊。九年八月。讞成論死。上念其投誠功。詔免死。削封爵。褫職。永不敘用。十五年。與原任大學士陳之遴等。交結內監吳良輔。事覺。部議應絞決。又奉詔貸死。杖戍甯古塔。籍其家。聖祖仁皇帝御極。惟華以輸工作贖罪。恩旨赦還原籍。康熙七年七月。疏請徵各州縣鎮市房稅及江南沿江洲田三十餘處。令民納價領種。上惡其害民斂財。下部論罪。應流徙。得旨免罪。令入旂。尋死。

陳之遴列傳

陳之遴。浙江海甯人。明崇禎十年進士。授編修。遷中允。本朝順治二年投誠。授祕書院侍讀學士。五年。遷禮部右侍郎。六年。恩詔加都察院右都御史。八年。擢禮部尙書。時御史張煊劾大學士陳名夏結黨營私。語涉之遴。鞫訊不實。免議。尋加太子太保。九年。授宏文院大學士。十年。鄭親王濟爾哈朗等奏之遴承審奸民李應試時。默無一言。問之。則云上果立置。應試于法則已。或免死。則我身必爲所害。是以不言。似此緘默。取容之人。恐不堪重任。詔之遴回奏。仍上疏引罪。上以之遴旣知悔過。將觀其自新。遂調任戶部尙書。會與名夏等集議革職總兵任珍罪狀。與同官兩議。得旨責問。復以支飾欺蒙論死。詔從寬削會銜二級。罰俸一年。仍供原職。十二年正月。請照律奏例。以定滿洲官員有罪。籍沒家產。降革世職之法。下所司議行。二月。復授宏文院大學士。加少保兼太子太保。疏陳營務三策。一曰修舉農功。請擇每旂才幹大臣一員。并諳練農田水利官。

三二員。將本旂地畝。招集士民。講求蓄洩。以備旱澇。算工估費。及時修築。所費雖多。一勞永逸。一曰寬恤兵力。漢兵經費甚多。而有急輒用滿洲八旂。請飭各省督撫提鎮。所轄將士。悉照滿洲兵法。訓練精強。逃亡亦照例行法。人知警畏。自能力戰固守。滿洲八旂。可以養威息力。不至久征多費。一曰節省財用。請制滿洲兵典例。凡吉凶諸事務。從儉約。毋過豐華。則日節歲省。自致豐饒。從之。十三年。上召吏部尙書王永吉等。責其輕出虧帑。司員朱世德之罪。復諭之。遴曰。朕不念爾前罪。復行簡用。且屢誠諭。曾以朕言告人乎。抑自思所行。亦曾少改乎。之遴奏曰。皇上教臣。安敢不改。特才疏學淺。罪過多端。不能仰報耳。於是左都御史魏裔介。劾奏之。遴當皇上詰問時。不自言其結黨之私。力圖洗滌。以成善類。而但云才疏學淺。不能報稱。其良心已昧。如囑禮部尙書胡世安。保薦庸劣。知縣沈令試。爲知府。旋被督臣糾劾。植黨徇私。確有所據。密勿之地。恐之遴。一日不可復居。給事中朱禎。亦劾奏之。遴係前朝被革詞臣。來投闕下。不數年超擢尙書。旋登政府。不圖報効。市權豪縱。皇上面加呵斥。凜凜天威。之遴不思閉門省罪。卽於

次日遨遊靈佑宮。逍遙恣肆。罪不容誅。乞重加處分。疏入。並敕之遴。據實回奏。且下部察議。尋議革職。永不敘用。上念之遴。既已擢用。位至大臣。不忍卽行斥革。以原官發遼陽居住。是年冬。上復念之遴。効力多年。不忍終棄。令回京入旂。十五年。之遴以賄結內監吳良輔。鞫訊得實。擬卽處斬。得旨。陳之遴受朕擢用深恩。屢有罪愆。疊經貸宥。以前犯罪。應置重典。特從寬以原官住居盛京。復不忍終棄。令還旂下。乃不知痛改前非。以圖報効。又行賄賂。交結內監。大干法紀。本當依擬正法。姑免死。着革職流徙。家產籍沒。後死徙所。

劉正宗列傳

劉正宗。山東安邱人。明崇禎元年進士。由推官行取授翰林院編修。本朝順治二年。以山東巡按李之奇奏薦。起授國史院編修。六年。遷侍講。九年。由宏文院侍讀學士。遷祕書院學士。十四年。上親試翰林。分別外轉。正宗留原職。五月。擢吏部右侍郎。仍兼祕書

院學士。疏請澄敝官職。一宜重郎署之選。令各部堂官於選授時。精覈才品。凡脂韋闕茸者毋收。若任職廉能。卽薦揚優擢。一宜專方面之員。藩臬大員。徇縱所屬守令。貪婪敗檢。不卽舉劾者。並治其罪。又言朝廷用人。必兼兩法。新進之士。宜循資以杜徼倖。殊尤之才。宜破格以勵賢能。上是其言。閏六月。命爲宏文院大學士。十一月。諭曰。吏部居六部之首。尙書員缺。宜慎加選用。大學士劉正宗清正耿介。堪充此任。特加太子太保。管吏部尙書事。十二月。以疾乞休。奉旨慰留。後辭吏部尙書職。命以兼銜回院辦事。加少保兼太子太保。十四年。考滿加少傅兼太子太傅。是年冬。乞假回籍。爲兄正衛治喪。明年還朝。改授文華殿大學士。初。正宗在吏部時。因御史楊義論部推越次事。辦執至詬詈。於是給事中周曾發。御史姜圖南。祖逮明。交章劾其銓選參差。欺蒙自逞。御史張嘉。劾其昏庸衰老。背公徇私。宜罷職。上俱命正宗回奏。仍敕部議。以事皆無據得釋。給事中朱徽。復劾正宗擅擬僉事許宸。內陞通參。不由會推。又不專疏題明。正宗以疎忽引咎。部議應罰俸。援恩詔免。十六年。上以正宗器量狹隘。終日詩文自務。大廷議論。輒

以已意爲是。雖公事有誤。亦不置念。降旨嚴飭。並諭曰。朕委任大臣。期始終相成。以愜簡放初念。故不忍加罪。時加申戒。須痛改前非。稱朕優寬容恕之意。十七年十一月。自陳乞罷。不允。六月。左都御史魏裔介。浙江道御史李振宜。先後奏劾正宗陰險欺罔諸罪。命明白回奏。正宗以衰老孤踪。不能結黨。致櫻誣劾自訟。下王貝勒九卿科道會刑部提問。正宗反覆申訴。裔介與振宜共質之。讞成。列其狀曰。正宗自陳。不以上諭切責已罪。載入疏內。裔介所劾是實。董國祚爲正宗薦舉。以降黜之員外。起授郎中。後坐賄流徙。正宗不引罪檢舉。裔介與振宜所劾是實。裔介劾正宗知李昌祚係叛案有名。票擬內陞。今訊稱姓名相同。但前此不請察究。有意朦朧是實。正宗弟正學。順治四年。投誠復叛。爲李成棟參將。七年。復投誠。裔介劾正宗暗囑巡撫耿焞題授守備。正宗回奏。祇稱正學因擒獲逆犯。敘功題授。不言從叛情事。飾非諱罪是實。裔介劾正宗與張縉彥同懷叵測之心。縉彥爲正宗作詩序。詞句詭譎。正宗聞劾。卽刪毀其序。誑云未見。其欺罔罪實。應絞奏入。奉旨劉正宗性質暴戾。器量褊淺。持論矯激偏私。罔揆于理。處

事執謬自恣。務顯所長。倖懷瑣屑。負氣乖張。惟以估名好勝爲事。弗顧國家大體。時或適意。則驕揚誇詡。偶拂其意。則忿然不平。絕無休休老臣之度。凡其劣狀。朕素知之。特以才學。故加錄用。屢行誡飭。冀其省改。乃置若罔聞。性愈恣肆。量愈偏急。卒無悛悔。罪過滋多。大負擢用深恩。本當依擬處死。念任用有年。姑從寬免。死革職。追奪誥命。籍家產一半。歸入旗下。不許回籍。明年聖祖仁皇帝御極。以世祖章皇帝遺詔內。曾及正宗罪狀。當置之重典。念其年老。特予寬免。未幾病死。

李若琳列傳

李若琳。山東新城人。明天啓二年進士。官翰林院檢討。本朝順治二年五月。投誠。授原官。七月。擢左春坊左庶子。置詹事府少詹事。薦明翰林陳其慶。韓四維。林增志。高爾儼。張元錫。陳克鞏。各授官。十月。實授少詹事。兼管國子監祭酒。疏言國子監應仿明初制。七品以上官子弟。有勤敏好學者。列入庠序。及縣學諸生。年壯學優者。令學臣考選送

監。監臣課其學業。分別奏請廷試授官。至滿洲勳臣子弟。有志向學者。並請送監肄業。奉旨允行。並諭滿洲官員子弟。及漢官子孫。有願讀清漢書者。俱送入國學。仍設滿洲司業一員。助教二員。教習清書。特裁詹事府。若琳改翰林院侍讀學士。仍管祭酒事。尋條奏太學事宜。一。學正助教等官。請于吏部候選進士舉人內。選舉一人。八旂子弟。請以品學兼優者。每旂四人充教習。如課讀有効。恣部考用。又請立滿洲八旂書院。令二廳六堂教官。分居訓迪。每月六日。赴監考試。俱下所司議行。二年正月。奏請更孔子神碑。略言文廟神位。稱至聖先師孔子。乃明嘉靖大學士張璁建議所置者。明自洪武至正德。先師諡號。皆遵元成宗舊制。曰大成至聖文宣王。今稱至聖而遺大成。于義未備。宜追復舊諡。詔下禮部議。尋議稱大成至聖先師孔子。報可。四月。遷宏文院學士。五月。詔脩明史。充副總裁官。七月。授禮部左侍郎。八月。部臣李作海等。交章劾大學士馮銓。奸貪不職。并劾若琳爲銓黨。且庸懦無行。宜黜治。睿親王多爾袞集訊不實。事遂寢。五年。遷禮部尙書。六年。恩詔加太子太保。八年。上旣親大政。命吏部具列部院大臣職名。

親加甄別。會禮部有題取資詔奉差官員。違例冒濫事。特旨嚴飭。并諭吏部曰。李若琳身仕禮臣。僉檢專權。擅與馮銓交親。朋比爲奸。着革職爲民。永不敘用。罷歸。尋死。

謝啓光列傳

謝啓光。山東章邱人。萬曆三十一年進士。累官南京兵部左侍郎。崇禎十七年。流賊李自成陷京師。分遣賊將掠山東。逼紳士資餉。啓光糾邑人殺僞令。募壯丁二千餘拒守。賊引去。本朝順治元年十月。啓光投誠。授總督倉場戶部侍郎。二年六月。疏言京通二倉積貯將罄。山東漕船雖已開幫。僅八萬七千餘石。未能供八旂數月需。幸天戈直指金陵。吳越可傳檄定。前朝漕運歲四百萬石。江南居十之八。今歲五月以前。未必盡到江甯。乞敕漕臣察核。現在未解者。責成管糧各官。催攢前來。庶倉廩可實。事下總漕巡撫酌行。八月。給事中莊憲祖疏劾啓光苛索山東漕船。貪圖影射。既專司倉場。又包攬戶部事。日向尙書案前。自稱謝侍郎。打恭容悅射利。毫不知愧。比復爲其子鑽營中式。

工爲行險。事下刑部集質。啓光辯釋。五年七月。擢戶部尙書。六年。遇恩詔。加太子太保。七年四月。給事中杜篤祐。又疏劾戶部諸臣。總司錢糧。七年以來。不一奏銷。致拖欠錢糧。幾數百萬兩。又差委司員。關關本公註擬。及差滿不加考核。輒復徇私別差。事下部察議。以啓光朦朧專擅。降二級罰俸。一年十月。疏言年七十有四。臣子世箕。恩廕。授淮安通判。今陞揚州府同知。臣止此一子。敢援獨子歸養例。乞恩許其解往來京。侍臣左右。疏下部如所請。八年閏二月。調工部尙書。是月。部院大臣。以啓光前在戶部。不奏銷錢糧。督倉場苦累。運官交兌多費。致掛欠漕糧三百餘萬石。各關濫差多人。需索加倍。及註差不循次序。任意徇私。穢聲盈沸。有玷官箴。著革職爲民。永不敘用。十年十二月。來京起用。十一年三月。御史趙加瑾。疏言啓光已經廢置。復荷特恩。合宜洗心滌慮。勵精報効。臣侍班陞殿前。見其形容枯朽。步履需人。扶掖跪拜。藉同官提挈。始起。無論其洗滌與否。就此朝露風燭之年。安望其勝任愉快。上諭吏部曰。謝啓光才猷老練。特賜召用。今來陞見。念其年力衰頹。難膺政務。准以原官太子太保。工部尙書致仕。遂其願。

仍馳駟回籍。稱朕優養老臣至意。十五年死。孫琮赴京籲請恩卹。下部議。祭葬如例。

孫之獬列傳

孫之獬。山東淄川人。明天啓二年進士。改庶吉士。授翰林院檢討。丁父憂歸。服闋。補原官。遷侍講。七年。充順天鄉試主考官。時尙書崔呈秀以諂事忠賢。其子鐸不能文。而爲之獬取中。見明史。崔呈秀傳。崇禎初。忠賢旣敗。廷臣請毀三朝要典。之獬獨詣閣痛哭力爭。遂入逆案。削籍歸。本朝順治元年五月。侍郎王鰲永招撫山東。之獬率士歸順。值土賊王偵等糾衆劫明永鎮等。之獬散家財。練鄉勇。有守城功。賊平。山東巡撫方大猷奏其事。召入京。十一月。擢禮部右侍郎。賜鞍馬。二年六月。奏進淄川縣賦冊。言明季賦稅煩重。小民舊苦加徵。臣邑如此。他邑可知。謹議應徵應減二冊。祈敕各撫按臣如式編造。使部中執有定額。民間知有定數。尋復條陳四事。一曰本朝制作維新。宜辨等威。別上下。使臣民共守。一曰明季諸臣。往來宴會。結黨營私。諸惡習宜懲。一曰宜敕學臣。

勿縱生儒挾持官府。武斷鄉曲。一曰兵燹後書籍多殘。宜搜輯遺編。以惠來者。疏入。下所司議行。時英親王阿濟格既定九江府。奉詔班師。令副都統佟岱。偕投誠總兵金聲桓駐守之。獬奏請往任招撫。奉命以兵部尙書銜。招撫江南。八月。給事中許爾梅。王守履等。劾大學馮銓。賄囑之獬。以其子源淮充招撫。標下中軍。並追論銓與之獬。及侍郎李若琳。皆魏忠賢逆黨。事下法司詰問。睿親王復集銓若琳。及科道各官面質。以行賄無據。前朝舊事。不當追論。十二月。給事中郝璧。劾之獬。前此自請招撫。疏稱忠無不竭。知無不爲。勇無不決。今江右版圖大定。曩已成之勢。爲救甯之道。且夕可以報効。而之獬弗卽宣布德意。受事七月。無一事入告。與前疏大相刺謬。其懷欺無實。與退縮不前。均難辭罪。詔之獬明白回奏。三年正月。之獬疏辯。抵任後。巡視已定郡邑。釐定賦籍。官屬。綏輯人戶。遣官黃彬等。分路招徠。曾三疏備陳情狀。未知賞遞。何以稽遲。至廣信建昌二府。負固抗拒。吉安贛州。旣降復叛。有江甯大兵。助總兵金聲桓進攻。可次第奏績。疏入。命之獬還京。先是之獬至江西。金聲桓受節制。積不能平。至是劾之獬。擅加副將。

高進庫。劉一鵬總兵銜。市恩搆毀。又言諸將不力攻贛州。因之獬議撫。故懷觀望。得旨令之獬回奏。之獬奏言前者副將高有才陣亡。聲桓欲以高進庫總兵馬。臣念攻取吉安。責任非輕。因改委總兵。繼聞劉一鵬怨望。臣念高友才以衆將不和。孤軍進戰殞命。乃亦加一鵬總兵銜。令率本營兵。偕進庫立功。以示鼓勵。以弭釁端。於是進庫以六月不拔之二城一月取之。臣身任闔寄。專擅之嫌。所不故避。尋至京。復自陳招撫南康巨寇王國棟。高挺。郭賢操等。解散賊黨數十萬。上以之獬所陳。及聲桓所劾事。敕部核議。部議之獬無功。市恩。應革職爲民。詔如議。之獬旣家居。值土賊謝遷。劫掠長山章邱諸邑。覬踞淄川。密結城中奸民丁可澤等爲內應。四年六月。遷合五百餘賊犯城。之獬率家人登城禦守。可澤啓門迎賊。之獬知賊已入城。急馳歸自縊。賊解其縊復甦。罵賊不屈。遂與孫蘭滋。蘭藹等男女七人並遇害。山東巡撫張儒秀爲請卹。下吏部核議。侍郎陳名夏金之俊。謂之獬抗賊遇害。應復原銜。循例予卹。侍郎馬光輝。啓心郎甯古哩。謂之獬旣革職爲民。不應予卹。得旨陳名夏金之俊議卹非例。不准行。之獬子伯齡。順治

三年進士。官至左通政。

馮銓列傳

馮銓。順天涿州人。萬曆四十一年進士。改庶吉士。授檢討。父盛明。官河南左布政。被劾歸。銓亦同籍。天啓四年。魏忠賢進香涿州。銓跪謁道左。泣訴父爲東林黨陷害。忠賢憐之。起故官。洊陞少詹事。充講官。副都御史楊璉。劾忠賢二十四罪。忠賢懼。求助外廷。銓具書于忠賢姪良卿。言外廷不足慮。且教之行廷杖。興大獄。銓與錦衣衛都督田爾耕。左都御史崔呈秀。給事中李魯生等。並諂事忠賢。又引其所取士。主事曹欽程爲忠賢養子。列十狗之一。銓欲害御史張愼言。周宗建。令魯生草疏。囑欽程上之。因及李應昇。黃尊素。而薦魯生及傅槐。陳九疇。李璠。李恆茂。梁夢環。而張愼言等四人並削籍。先是熊廷弼經略遼東。以廣甯失守下獄。大理丞徐大化獻策忠賢。宜並坐楊璉等納廷弼賄。殺之有名。忠賢從之。銓素與廷弼隙。于講筵出書肆所刊遼東傳。進呈曰。此廷弼所

作。希脫罪耳。遂殺廷弼。傳首九邊。御史吳裕中。廷弼姻也。銓惡之。陰使人嗾裕中劾大學士丁紹軾陷廷弼。而先報忠賢曰。裕中必爲廷弼報仇。劾疏上。杖裕中百。昇至家卒。五年八月。擢銓禮部侍郎兼東閣大學士。入贊機務。九月。晉禮部尙書。改文淵。六年正月。充三朝要典總裁官。四月。晉少保兼太子太保。戶部尙書。武英殿大學士。時太監涂文輔爲忠賢腹心。人爲之語曰。內有涂文輔。外有馮振鷺。振鷺者銓字也。要典成。榜東林黨人姓名示天下。而于崔呈秀無美辭。忠賢心銜之。會呈秀亦與銓交惡。其黨孫杰。霍維華。嗾職方郎中吳淳夫上疏力攻之。御史盧承欽復劾銓納賄居間數事。遂罷職。崇禎初。忠賢旣伏罪。給事中李遇知。于贓罰庫得銓罷官後。爲忠賢上壽詩百韻。劾銓與忠賢交結。論杖徒。贖爲民。十一年。我太宗文皇帝。遣睿親王多爾袞等。征明。克畿輔及山東六十餘城。銓率鄉人守城。又護送紅衣礮至京師。十四年。周延儒復入閣。銓與延儒同年生。其再召也。銓爲助謀。延儒德之。欲援守城及運礮功。復其冠帶。給事中張正宸上疏力爭。乃止。本朝順治元年四月。多爾袞統師入山海關。擊走流賊李自成。定

京師。承制攝政。以書徵銓卽至。優予冠服鞍馬銀幣。令以大學士原銜入內院。佐理機務。遂與大學士洪承疇。請復明初內閣票擬舊例。凡內外文武官條奏。部院覆奏本章。並下內院擬票。尋又同大學士謝陞等。議定郊社宗廟樂章。十月朔。世祖章皇帝御皇極門。受朝賀。翼日給事中孫承澤言。登極之日。朝賀諸臣。班行錯雜。禮節粗疎。皆由內院漫無主持。銓因與謝陞洪承疇乞罷諭令益殫忠猷。以襄新治。不必合同引請。二年五月。定部院官制。授銓弘文院大學士。兼禮部尙書。八月。御史吳達疏劾馮銓爲逆黨。魏忠賢乾兒。故習不移。曾向降鎮姜瓖。索銀三萬。許以封拜。因止餽金馬等物。大拂其意。平日攬權納賄。可見內院政本所關。銓乃令其子源淮擅入張宴。延學士講讀。史館及中書等官。歡飲竟日。爲結納地。其縱子往來清要。招搖納賄。又可知。請罷黜以肅政本。給事中許作梅。莊憲祖杜立德。御史王守履。羅國士。鄧孚槐等。亦交章劾銓。有索招撫侍郎江萬緒金百兩。爲子源淮賄招撫侍郎孫之獬。充標下中軍諸款。並下刑部質問御史李林光。又疏言。昨疏請仿唐制。令諫官宰相議事。蓋深憂奸相馮銓誤國。旋聞

吳達已特疏劾銓。奉旨下刑部質問。臣未見達疏。惟聞其指銓父子招搖納賄一二事。竊謂淺乎論銓也。明朝二百餘年。國祚壞于奄官。魏忠賢之手。而忠賢當日殺戮賢良。通賄謀逆。皆成于銓一人。此通國共知者。正如商之飛廉惡來。豈可再列周朝之士。且銓百萬之富。慣于夤緣。刑官有不敢問。不欲問者。倘解縛縱虎。爲患更甚。乞親御殿廷。詢問羣臣。命滿洲忠誠親信之人。偏訪通國士民商賈。婦女小兒。有一不稱銓爲奸者。請坐臣欺罔之罪。如臣言不謬。願皇上立彰大法。戮之於市。播告天下曰。有傾覆明之社稷。復亂本朝法度。如銓父子。已服厥罪。庶天下熙然向化。賢于十萬兵甲。疏入。睿親王傳集廷臣及科道各官。令刑部以所奏讞詢。再行面質。刑部言科道彈劾不實。應反坐。給事中龔鼎孳言銓實黨附魏忠賢作惡。銓亦斥鼎孳曾降流賊李自成。語詳龔鼎孳傳。睿親王因論明季諸臣黨害無辜。以致明亡。今科道各仍官蹈陋習。中戒之。寢其事。三年正月。銓疏言。臣于元年五月特召辦事內院。列同官舊臣之前。臣固辭不敢。蒙攝政王面諭。國家尊賢敬客。卿其勿讓。目下海宇漸平。制度略定。金臺駿骨。但可暫示

招徠。久假不歸。實逾涯分。况叨承寵命。賜婚滿洲。理當附籍滿洲。編民之末。迴繹尊賢敬客之諭。輾轉悚懼。特懇改列范文程。剛林後。加以新舊爲次。并當列范充裕。甯完我之後。伏乞聖鑒裁定。得旨。天下一統。滿漢自無分別。內院職掌等級。原有成規。不必再定。是年及四年。兩充會試正考官。六年充太宗文皇帝實錄總裁官。恩詔加少傅兼太子太保。八年閏二月上命吏部具列各部院堂官職名。親加甄別。諭曰。馮銓先經御史吳達疏參私得叛逆。姜壤賄賂。殊失大臣之體。便當引去。乃隱惡居官。七年以來。毫無建明。毫無爭執。着致仕去。是年。御史張煊疏劾尙書陳名夏十大罪。有依附邪黨一款。謂當吳達等糾參馮銓時。名夏時爲侍郎。徇庇私交。噤無一語。銓臥病。名夏屢爲候視。故達遣書責之。有堂堂少宰。側足小人牀褥語。給事中杜立德復疏言納賄弄權之馮銓。當時劾之者不止。吳達臺臣李森先。桑芸及科臣許作梅皆劾之。同爲銓所切齒。假稟擬于數言輕重之中。弄機權于旁引曲借之內。森先作梅一時革職。芸亦無辜降調。茲逢聖政方新。權奸旣斥。仰乞皇上矜察忠讜。明年上覽李森先劾銓原疏。諭曰。諸臣

所劾甚當。何爲以此罷斥。大學士渾文程奏曰。諸臣疏劾大臣。爲君爲國。上諭起用許作梅。李森。先原官。銓之罷也。陳名夏。陳之遴相繼入內院。之遴尋以廷鞫奸民李應試等。交結官吏。窩藏賊盜事。恐爲所害。不敢詰問。爲鄭親王濟爾哈朗等劾奏降調。代之者高爾儼。又衰病不能任事。十年三月。諭吏部曰。國家用人。使功不如使過。原任大學士馮銓。素有才學。召入內院辦事。數年以來。未見有所建明。且經物議。是以令其致任回籍。朕思馮銓原無顯過。且博洽典故。諳練政事。朕方求賢圖治。特召用以觀自新。諭到之日。卽速赴京。銓旣至。召對內院。是夕復召同大學士洪承疇。范文程。額邑赫。陳名夏。入論翰林官賢否。諭曰。朕將親考其文之優劣。可定其高下。銓奏曰。人有優於文而無能無守者。有短于文而有能有守者。南人優于文而行不符。北人短于文而行或善。今取文行兼優者用之可也。上是其言。仍授宏文院大學士。四月。九卿等會勘刑部擬斬之歸旂。原任總兵任珍。爲家婢首告怨望及醜行。滿洲官皆如刑部所擬管吏部事。陳名夏與戶部尙書陳之遴等漢官二十八人。擬任珍應勒令自盡。又回奏欺飾。下廷

臣議罪。尋議應絞。上欲從寬。銓奏對失旨。越數日。上責令回奏。且諭曰。爾馮銓曩不孚於衆論。廢置業已二載。以爾才堪辦事。不念前愆。特行起用。以期更新。自召至以來。讜論未聞。私心已露。如前日面議陳名夏等一事。爾之所對。豈實心忠良之言耶。况爾密勿大臣。今議一事如此。後來用入行政。將何依賴。銓乃上疏請罪。諭曰。上有所詢。直言無隱。臣道當然。馮銓與陳名夏素相矛盾。朕所習知。因言不合理。是以有責問之旨。今馮銓既已知罪。再觀自新。仍照舊辦事。以後諸臣有如此懷私修怨。不公平者。急宜改省。十一年正月。與大學士陳名夏。成克鞏。張端。呂宮。合疏薦舉原任少詹事王崇簡。巡按御史郝浴。給事中向玉軒。中書宋徽璧。知縣李人龍。可擢任。前明翰林楊廷鑑。吳之繩。吳偉業。方拱乾。中書陳士本。知縣黃國崎。可補用。又言編修張天植。乃順治六年一甲三名及第。例不外任。仍宜留。疏下所司知之。三位大學士甯完我。劾陳名夏結黨攬權諸罪。以既定張天植外轉。復與馮銓等保留翰林。營私巧計。莫可端倪。爲一款。語詳陳名夏傳。尋吏部言。郝浴爲平西王吳三桂劾罷。馮銓。成克鞏等。于未劾之先。扶同

薦舉及命。同奏謬以急欲効忠爲詞。行爲支飾。應革職。詔從寬降三級留任。時龔鼎孳爲左都御史。疏問任輔弼等事。上命指實覆奏。鼎孳言銓尺寸度効。罪過頗多。因密勿票擬。不得察糾。非如諸曹有實可指。上以鼎孳所言抵塞。切責之。十二年二月。銓與成克鞏等官。並以降處之後。勤慎有加。辦事無誤。詔復所降級。是月丁母憂。命入直如故。私居持服。賜其母祭葬。四月。諭獎銓翼襄政務。稱厥委任。加少師兼太子太師。會纂修太祖高皇帝。太宗文皇帝聖訓。孝經衍義。並充總裁官。十二年二月。諭曰。大學士馮銓贊勸機務。歷有歲年。朕近見其齒長力衰。難勝繁劇。應解院事。用便頤養。其加太保兼太子太師。祕書院大學士。禮部尙書致仕。念其學問充裕。可以文華資朕。着在朕左右。以備顧問。一切經史著述。編摩。皆令專任。銓復請回籍。允之。十六年二月。改內三院爲內閣。詔銓仍以原銜兼中和殿大學士。康熙十一年十二月卒。賜祭葬如例。謚遵敏。旨削敏。子源淮。由侍衛官至總兵。源濟。由順治十二年進士。官至國子監祭酒。

明末漢奸列傳 卷九

明末漢奸列傳卷十

李魯生列傳

李魯生。山東霑化人。明萬歷四十一年進士。歷知魚臺、邯鄲、祥符、儀封、四縣。推兵科。右給事中。天啓初。由大學士魏廣徵引。謁魏忠賢。列十孫兒之一。忠賢每假中旨黜陟。朝士憂之。魯生獨上言。執中者帝。用中者王。旨不從。中出而誰出。時忠賢惡經略孫承宗。魯生曰。承宗所恃者重兵。宜以缺餉爲名。汰軍以撓其權。忠賢乃矯旨。汰承宗所轄兵。省餉六十八萬。四年。蘇松巡撫周啓元劾參政道朱童豪貪虐狀。魯生希忠賢意。劾罷啓元。大學士韓爌罷去。魯生復劾之。削爌籍。五年正月。疏薦阮大鍼等十一人。復代主事曹欽程。草疏劾周宗建、黃尊素等。因令荐已轉左給事中。會內閣缺人。詔推老成幹濟者。忠賢欲用馮銓。而銓資淺。年未四十。魯生因疏言。成卽爲老。而非必老于年。幹乃

稱濟。而卽有濟于國。銓遂入閣。六年。忠賢盡毀天下書院。保定知府祝萬齡議不宜毀。魯生劾其非聖誕天。削萬齡職。七年。晉太僕少卿銜。崇禎初。忠賢伏罪。給事中汪始亨疏劾之。科臣李魯生。諂事忠賢。由座師魏廣微引進。凡廣微傾害善類。魯生悉贊成之。此投身之第一處也。二魏交懽。同謀殺人。魯生復爲廣微之籬犬。及見楊漣左光斗酷刑垂斃。廣微佯疏救。大拂闈意。魯生亦棄廣微而竄入馮銓之門。詔推閣臣。務求老成。幹濟。而魯生頌銓成。卽爲老。幹卽爲濟。此投身之又一處也。崔呈秀賄囑吳淳夫力攻罷銓。魯生飽颺飛去。又不事銓矣。崔呈秀。其死友也。魏良臣。其義兄弟也。良臣欲請託鬻青衿。魯生卽傳之學臣李藩。居間過付。賊私狼藉。行道皆知。此投身之又一處也。忠賢用事時。魯生典試湖廣。發策詬楊漣。因力詆屈原宋玉。逆案旣敗。又欲依附清流。爲漣等上疏。免賊。希圖掩飾。遂得職任如故。于國法爲不平。于鷓班爲有玷。疏上。給事中顧繼祖御史張三謨等復交發其奸。入逆案在第三等。謫山西平定州。遇流賊李自成亂。遁歸鄉里。本朝順治元年六月。偕其鄉人斬流賊所置霑化僞知縣季調鼎。赴招

撫侍郎王鰲永納款。鰲永疏薦。得旨錄用。魯生遂至京。十月。授順天府丞。二年七月。遷府尹。三年五月。以年已七十有五乞休。允之。先恩詔錄七品以上京官子弟各一人。由附生充監生。由廩生增生充貢生。至是給事中林起龍疏劾順天學政曹溶所送貢生王鎮遠係明武舉。下部察議。溶坐濫舉降調。以鎮遠由魯生任府丞時印冊考。革魯生爲民。尋死。

王國寶列傳

王國寶。山西大同人。明總兵。本朝順治元年投誠。以原官錄用。適內黃有土賊王鼎鉉。蘇自興。鄧名揚等。國寶奉大名道張之俊檄同署總兵王燦勦擒之。二年。隨豫親王多鐸定江寧。王令同侍郎李率泰招撫蘇州松江諸郡。遂奏授江甯巡撫。國寶以武夫不習文事。疏辭。得旨慰留。時明總兵曹田仰踞崇明。犯福山。國寶率中軍副將曹虎等擊敗之。浮斬甚衆。明職方主事吳易。當史可法督師揚州時爲監軍。至是竄太湖。遙受明

唐王朱聿鍵官爵國寶招之降。不從。因檄兵防勦。會松江副將杜永和擒偵卒。國寶詰之。言蘇松諸生王伯時及文震孟之子文乘。皆易黨。謀內應。國寶縛二人殺之。籍其家。上以伯時乘非陣擒者。此宜錮禁。請旨切責國寶。擅殺下所司。察議坐降。謫。四年八月。命以布政銜管江南按察司事。五年五月。仍授江寧巡撫。蘇松常三府白糧。明季僉民戶輸送。民以爲苦。至是復明初官運制。國寶言民戶一遇僉點。往往傾家。今改官運。一切皆給于官。而經費不敷。請計畝均派運費。民皆樂從。諭曰。僉點固屬累民。加派豈容輕議。下部察核官運經費。果不敷否。部言。經費未嘗不敷。惟嚴絕剋減虛冒諸弊。則用自裕。黜國寶奏不行。華亭縣有義田四萬八百餘畝。明光祿寺署丞顧正心置以膳宗族。助差徭者。國寶初撫吳。卽令有司收其米四萬三千餘石。給兵餉。及國寶降調。周伯達代爲巡撫。以改充織造匠糧入奏。戶部議令察勘義田。在明時曾否題明創置者。有無子孫。至是國寶以實覆奏。戶部尙書巴哈納謝啓光等核議。義田所以卹貧助徭。非入官之產。宜仍令顧正心子孫收穫。至兵餉匠糧。皆有正項取給。其擅用義田米。責成

國寶償還。六年。國寶疏請加派民賦佐軍需。給事中李化麟疏言。加派乃明季弊政。民窮塗起。大亂所由。我朝東征西討。興師百萬。未嘗累民間一絲一粟。今國寶據議加派。開數年未有之例。滋異日無窮之累。上復黜國寶奏不行。八年十月。巡按御史秦世禎疏劾國寶藉增造營房名。于蘇州府城按塵納稅。斂銀數萬兩。又逾額濫設胥役。婪取銀數千兩。嘉定知縣隨登雲爲拔富之術。每指富家爲盜黨。入財乃釋。以所得給中軍參將鄒錫祥納之國寶。左營遊擊楊國海。國寶甥也。市私鹽及硝磺。月饋國寶銀三百。民間因有埋金謝上好之謠。疏上。命革國寶及登雲錫祥等職。下總督馬國柱同世禎訊鞫。國寶將就逮。畏罪自經死。鞫證實。追贓入官。

魯國男列傳

魯國男。順天大興人。明平副將。本朝順治元年。英親王阿濟格進勦流賊。李自成于山西。國男詣軍門降。委署總兵官。二年正月。同大同總兵姜瓖擊敗賊黨高一功于保德。

甯武一功遁。復其城。尋隨征陝西。收復榆林延安。陝西平。入京。陛見。八月。授永平中協副將。四年。遷正定總兵。加都督僉事。五年。疏言。恆鎮爲京師咽喉。額設三營。轄大名廣平順德正定四府。今大名賊盜猖狂。深州寧普饒湯武強之間。土賊充斥。東路梗阻。正定差務益繁。兵已不敷護送。若復分勦。勢益孤弱。請于順德廣平大名三府。各增兵千名。將統領防勦本屬汛地。臣統精銳往來馳擊。庶無顧此失彼。其增設之兵。就近于保定宜大山海關等處營速撥應用。另募補足。詔如所請行。時山東曹縣爲土賊李化鯨所據。國男奉命會勦。克之。六年。姜瓖叛。從逆副將林世昌以逆書投國男。國男首其檄。得旨褒嘉。七年。山西土賊張五桂王天平等犯龍泉關。守備梁士治等禦之。賊屢逼。關危甚。國男往援。出長城嶺至石嘴。賊懼奔山。國男率遊擊吳應彩等追抵冀家莊。賊據西寨。我兵直上擊之。破寨五。斬僞將張岐劉定等。俘獲無算。下部議敘。紀錄二次。八年三月。奉總督張在仁檄。會勦山東榆圍賊渠梁敏等。至開州。搜勦何家寨苦駝村積賊。復破開州東南一帶單家寨李家莊賊巢。十月。會總兵孔希貴張大治兵。擊賊老營。適

邊水驟發。賊奔竄。斬梁敏等。十一年。刑科給事中張時成列款劾國男貪淫殘縱。詔下督撫嚴察。得實。革職。十八年。山東巡撫朱斐疏劾國男廢斥後戀居臨清。佔州田。應勒令回籍。從之。尋病死。

周亮工列傳

周亮工。河南祥符人。明崇順十三年進士。官御史。流賊李自成陷京師。亮工問道南奔。從明福王朱由崧于江甯。本朝順治二年。豫親王多鐸兵下江南。亮工詣軍門降。奏授兩淮鹽運使。三年。調揚州兵備道。四年。遷福建按察使。尋遷布政使。十年。授左副都御史。十二年。疏陳閩海用兵机宜。言浙之衢州。閩之建甯。江西之廣信。爲山賊出沒之地。與海賊聲援。廣信去衢州止百里。宜令浙閩總督兼轄。庶軍機可以無悞。至海賊以廈門爲窟穴。宜密勅廣東督撫令潮州鎮兵合剿。往襲其後。更請增設水師以防海口。疏下所司議行。又請斬鄭芝龍。停招撫鄭成功。決意進剿。疏入報聞。旣而福建巡撫佟國

器奏穫芝龍與其弟鴻達。及成功交通私書。芝龍伏誅。遷亮工戶部右侍郎。亮工任按察司時。福建武舉王國弼及貢生馬際昌穆古子蔡秋浦蔡開浦史東南等創立南社。西社。南社黨類繁衆。作奸犯科。亮工申請督撫勘明定罪。勒石南臺。列際昌及餘黨姓名。尋際昌秋浦國弼開浦四人斃于獄。是年五月。督臣佟岱抵任。際昌等親屬具牒辯寃。佟岱列亮工貪酷諸款疏劾。命亮工回奏。尋解任。赴福建聽審。會海賊從閩安入內地。焚掠南臺。進圍福州。城中騎卒僅數十。勢甚危。巡撫宜永貴從士民請。以亮工守西門城。賊乘大雨薄城。亮工手發天礮。擊殪渠帥三人。賊怖。解圍去。城賴以全。事聞。下兵部。以亮工係革職質訊之員。未准敘錄。先是亮工未就質時。按察使田起龍等據證佐定讞。謂亮工得贓四萬餘兩。應擬斬。籍沒。及亮工至。質問皆虛。巡撫劉漢祚疑推官田緝馨等受賄徇情。並逮送刑部。十六年部議亮工被劾各款。雖堅質不承。而前此田起龍等已憑證佐審實。計贓累萬。情罪重大。仍應立斬籍沒。上以前後辭證不同。再下法司詳審。十七年。法司論罪如前讞。恩詔予減等。改徙甯古塔。未行。會赦得釋。聖祖仁皇

帝御極。諭吏部曰。周亮工被劾原案。既多屬子虛。前宜永貴疏。敍亮工在閩守城。獨當射鳥樓一面。擊死賊渠三人。應否量授職銜錄用。爾部會同刑部確議具奏。康熙元年。部議復亮工僉事道職。起補山東青海防道。五年。調江南江安糧道。八年。漕運總督師顏保劾亮工縱役侵扣諸款。得旨革職逮問。論絞。九年。復遇赦得釋。十一年死。

錢謙益列傳

錢謙益。江南常熟人。明萬曆三十八年一甲三名進士。授翰林院編修。天啓元年。充浙江鄉試正考官。五年。聽勘御史崔呈秀作東林黨人同志錄。列謙益名。御史陳以瑞亦疏劾之。罷歸。崇禎元年起官。不數月。洊擢詹事禮部侍郎。會推閣臣。謙益慮禮部尙書溫體仁侍郎周延儒並推。則名出已上。謀沮之。囑其門人給事中瞿式耜言于主推者。擯體仁延儒。以成基命。及謙益等十一人列上。先是謙益主試浙江時。所取士錢千秋。首場文一朝平步上青天句。分置七義結尾。爲給事中顧其仁舉發。謙益先知。卽具疏

劾奸人金保元。徐時敏僞作關節。撞騙得賄。下刑部鞫訊。時敏保元皆遣戍。千秋逾年始至。亦論遣謙益奪俸。至是體仁追論謙益賄賣關節。不當預選。延儒亦言會推名雖公。主持者止一二人。餘皆不敢言。卽言徒取禍耳。莊烈帝御文華殿。召對延儒諸臣。謙益辭頗屈。命禮部進千秋卷閱竟。責謙益。謙益引罪。遂褫職。下法司議。以謙益自發在前。不宜坐。體仁復言獄詞出謙益手。詔下九卿科道再勘。乃坐杖論贖。千秋荷校死。十年常熟人張漢儒訐錢謙益貪肆不法。巡撫張國維。巡按路振飛。交章白其寃。乃下刑部逮訊。謙益嘗爲大監王安作碑文。爲司禮曹化淳所知。及獄急。求救于化淳。體仁聞。密奏交結狀。化淳時見信。任自請按治。刑斃漢儒。且發體仁他罪狀。體仁引疾罷。獄乃解。謙益削籍歸。十七年。流賊李自成陷京師。明臣史可法呂大器等議立君江甯。謙益陰推戴潞王常澆。與馬士英議不合。及福王由崧立。謙益懼得死罪。上疏頌士英功。士英乃引謙益爲禮部尙書。謙益復力薦闖黨。爲阮大鍼等訟寃。大鍼遂爲兵部侍郎。而憾東林。仍不時會捕獲妖僧大悲。欲引謀立潞王事。盡誅東林諸人。謙益亦預。馬士英

不欲興大獄。乃已。本朝順治二年五月。豫親王多鐸定江南。謙益迎降。尋至京候用。三年正月。命以禮部侍郎管秘書院事。充修明史副總裁。六月。以疾乞假。得旨。馳驛回籍。令巡撫巡按視其疾痊具奏。五年四月。鳳陽巡撫陳之龍。撻江陰人黃毓祺于通州法寶寺。搜出僞總督印。及悖逆詩詞。以謙益曾留黃毓祺宿其家。且許助資招兵。入奏。詔總督馬國柱逮訊。謙益至江甯訴辯。前此供職內院。邀沐恩榮。圖報不遑。况年已七十。奄奄餘息。動履藉人扶掖。豈有他念。哀籲問官乞開脫。會首告謙益從逆之盛名儒。逃匿不赴質。毓祺病死獄中。乃以謙益與毓祺素不相識。定讞。馬國柱因疏言。謙益以內院大臣歸老山林。子姪三人。新列科目。榮幸已極。必不喪心負恩。于是得釋歸。十年死于家。乾隆三十四年六月。諭曰。錢謙益本一有才無行之人。在前明時身躋膺仕。及本朝定鼎之初。率先投順。洊陟列卿。大節有虧。實不足齒于人類。朕從前序沈德潛所選國朝詩別裁集。曾明斥錢謙益等之非。黜其詩不錄。實爲千古綱常名教之大關。彼時未經見其全集。尙以爲其詩自在。聽之可也。今閱其所著初學集。有學集。荒誕悖謬。其

中詆謗本朝之處。不一而足。夫錢謙益果終爲明朝守死不變。卽以筆墨騰謗。在情理之中。而伊旣爲本朝臣僕。豈得復以從前狂吠之語。列入集中。其意不過欲借此以掩其失節之羞。尤爲可鄙可恥。錢謙益業已身死骨朽。姑免追究。但此等書籍。悖理犯義。豈可聽其留傳。必當早爲銷毀。其令各督撫將初學有學集于所屬書肆及藏書之家。諭令繳出。至于村塾鄉愚。僻處山陬荒谷。並廣爲曉諭。定限二年之內。盡行繳出。無使稍有存留。錢謙益籍隸江南。其書板必當尙存。且別省有翻刻印售者。俱令將全板一併送京。勿令留遺片簡。朕此旨爲世道人心起見。茲止欲斥棄其書。並非欲查究其事。通諭中外知之。三十五年。上觀錢謙益初學集。御題詩曰。平生談節義。兩姓事君王。進退都無據。文章那有光。真堪覆酒甕。屢見咏香囊。末路逃禪去。原爲孟八郎。四十一年十二月。詔于國史內增立二臣傳。諭及錢謙益反側貪鄙。尤宜據事直書。以示傳信。四十三年二月。諭曰。錢謙益素行不端。及明祚旣移。率先歸命。乃敢于詩文肆行詆謗。是爲進退無據。非復人類。若與洪承疇等同列貳臣傳。不示差等。又何以昭彰瘴。錢謙益

應列入乙編。俾斧鉞凜然。合于春秋之義焉。

魏瑄列傳

魏瑄。山東壽光人。明崇禎十年進士。官御史。本朝順治二年二月。以御史傅景星薦授湖廣道御史。五月。巡按甘肅。疏言甘肅西接回番。明代有市馬之利。宜卽舉行。以柔遠人。資番息。部議從之。十二月。涼州兵以索餉鼓譟。劫參議道蘇名世署。名世同副將毛鎮。獲倡亂者二十餘人。瑄疏言西陲兵卒驕悍。沿自明季。由專事姑息。致養奸滋亂。今宜嚴爲創懲。有犯無赦。得旨。倡亂兇惡。旣經擒獲。着核擬正法。兵丁沿明季囂風。肆行譁躁。深可痛恨。後有犯者。首從皆駢斬。著爲令。四年。任江甯學政。七年。還京。掌河南道事。八年二月。漕運總督吳惟華請自輸銀萬兩。復綜核各項羨餘。得九萬三千兩解京助餉。瑄疏言淮揚連年水旱。惟華輸助。並非出之橐中。皆分派屬吏。仍取自民間。輾轉追呼。狀難悉數。乞賜察究。下部議。會巡漕御史張中元發惟華貪黷狀。遂逮訊。梏惟華。

職。三月。瑄劾鄖陽撫趙兆麟。遇甄別大典。薦舉文職。多至五十餘員。僅糾劾兩典史一教官。舉薦武職亦有十一員。而糾劾者僅一老病之守備。得旨。申飭兆麟。并誠督撫諸臣。不得僅劾微員。苟且塞責。九年。擢順天府府丞。十年二月。以大學士洪承疇薦。召同戶部侍郎孫廷銓。太僕寺卿衛周祚入對。五月。遷大理寺卿。疏言刑部持天下之平。都察院執法糾正。皆主問。大理之職。在取其所問者而平反之。請舉行舊典。凡事下三法司者。刑部定擬後。卽送大理寺覆覈。若罪不合律。或請詞不明。駁回再擬。又言秋審待決之囚。卽法司鞫定之案。死者固鮮含冤。但執法不敢不嚴。原情不可不慎。請勅會審諸臣。慎之又慎。于核減外。復多緩決。以副欽恤之意。並下所司議行。先是八旂逃人。屬兵部督捕。至是部臣以樞務綦繁。議歸大理寺統之。瑄疏之。大理不設刑員。無番兵捕役。難督緝。且訟逃者。率八旂大員。而大理少卿多參領佐領兼攝。卽正卿亦僅三品。不宜董其事。于是下九卿議。增設兵部督捕侍郎。如戶部倉場侍郎例。別立專署。所屬員外郎中主事司獄等官。專理緝捕。又言逃人日多。以投充者衆。不皆戰陣所獲。本主私

縱成習。聽其他往。迨日久不還。概訟爲逃人。蒙睿鑒原宥。犯逃至再。罪止鞭百。而重懲窩逃。猶沿舊例論斬。藉人口財產給本主。與叛逆無異。非法之平。請勅議寬減。疏下九卿等議。改斬爲流。免籍沒。六月。瑄疏言窩逃之人斃于獄者。其妻子應免流徙。又言時遇熱審。窩犯亦宜一體減等。得旨。滿洲家人係戰陣所得。故窩逃之禁甚嚴。近已節次寬減。止于徒流。今逃人多至數萬。所獲不及十之一。魏瑄更于減中求減。顯見偏私市恩。下諸王大臣議處。尋議瑄巧寬逃禁。應革職論絞。詔從寬降三級調用。七年。補通政司參議。先是德州生員呂煌以窩逃事覺。囑旂員呂獻忠行賄本主。爲本主首告。煌伏罪流徙。獻忠由兵部援赦免。議上。以事屬行賄。不在赦款。詰問。革獻忠職。命諸王大臣察究原議諸臣。自尙書以下。降革有差。以瑄會鞫呂煌時。同官欲坐德州知府佟昌年失察窩逃罪。瑄倡言阻止。并議瑄前曾疏請熱審減等。巧爲呂煌寬貸。應革職流徙。奏入。如議。瑄尋死于遼陽。十七年。吏部列奏建言得罪降革流徙諸臣。上以瑄情罪尙輕。宥其家。俾歸故里。

潘士良列傳

潘士良山東濟甯人。明萬曆四十一年進士。累官刑部左侍郎。本朝順治二年。以招撫山東侍郎王鰲永薦。起補兵部右侍郎。奉命撫治鄖陽。三年二月。流賊餘黨李錦犯荊州。劉體純圍鄖州。士良馳赴襄陽。飭將弁分擊。敗之。降賊三千餘。八月。遣副將馮雄遊擊孔純仁參將王光泰等剿土賊陳蛟。敗之。米家寨。蛟乞降。散其衆。十月。疏言明襄藩世封襄陽。原有山莊并護衛儀衛各屯。今明藩已故。衛官俱撤。前項屯地宜清查以佐國用。現委同知陶天培查出各衛所成熟屯地八萬四千六百餘畝。每畝照例徵糧三升。共糧二千五百四十石零。卽以抵給道府各官廩俸人役工食之費。又疏言皇上以各府同知通判多冗員。令議裁併。屯屬鄖陽府通判二。一管糧。一捕盜。應裁管糧缺歸捕盜通判。荊州同知二。一清軍。一坐鎮施州衛。應裁坐鎮缺歸清軍同知。至襄陽府同知通判各一。南陽府同知一。通判二。俱係要用。毋庸議裁。二疏均下所司知之。十二月。

湖廣總督羅綉錦劾士良猶豫寡斷。請別調用。得旨。潘士良既才不勝任。不必又請調用。尋赦士良解任回籍。時鄖陽總兵王光恩以罪解京。弟光泰倡亂殺署總兵楊文富。及道府各官。陷鄖陽。事聞諭曰。鄖陽被陷害。潘士良雖稱解任。未經交代。何所辭罪。著革職。尋死于家。

李猶龍列傳

李猶龍。陝西洵陽人。明末由貢生官兵部主事。福王時監左夢庚軍。尋遷太僕寺少卿。本朝順治二年。猶龍隨夢庚降。英親王檄猶龍巡撫江南安慶。時江北之六安州。英山。瞿山。舒城。潛山。太湖。河南之固始。湖廣之羅田等縣。及洋山。橫山。張山。飛旂。女兒等寨。俱受明唐王劄付。招叛兵爲應。猶龍檄各路兵勦撫。飛旂。橫山各寨相繼至。三年正月。疏言潛山。太湖二縣。被兵十餘年。民逃地荒。雖蒙恩蠲賦稅之半。其半亦斷難及額。請再行酌免。從之。四年。改授天津巡撫。五年三月。巡按熊國士劾猶龍不能堵勦土寇。致

慶雲縣失陷。請議疎防罪。得旨。李猶龍着住俸。戴罪督勦。是時西淀賊首楊四海。僞稱明熹宗太子。糾衆倡亂。有三河縣民婦張氏者。自稱熹宗后。與其黨王禮。張天保等。造旂印及詔。謀爲應。五月。猶龍同總兵蘇屏翰密遣弁擒之于西淀。事聞。下部鞫實。伏誅。七月。餘黨任萬金。伺郡城空虛。聚衆靜海縣之赤隆河。通營兵以爲內應。約期攻城。猶龍偵知。飭將弁晝夜進剿。斬萬金首級。並張相楊天瑞等。八月。土寇常元輔謀犯東津。猶龍檄屏翰勦擒之。時積寇尙多。猶龍以招撫爲名。赴賊營會飲。事覺。革職。十年。巡視中城御史王秉乾疏劾猶龍。旣經廢斥。潛寓京邸。不回原籍。恐致滋事。得旨。李猶龍着速回籍。再延究罪。未幾。猶龍死。

王之綱列傳

王之綱。順天宛平人。明總兵。福王時。大學士史可法奏。以之綱鎮河南開封府。本朝順治二年。豫親王多鐸兵下河南。之綱走江甯。大兵渡河。隨忻誠伯趙之龍降。委署徐州。

總兵。時土賊散踞山險劫掠。之綱同總兵蘇見樂擊斬賊任應乾。殲其衆。隨收勦龍駒嘴。天門寺。黃藏峪。各山賊。焚斃白土洞賊衆五百餘。追擒賊王清宇。徐庫。趙世科。孟宗玉等。斬之。徐州平。入京陛見。授福建雲霄總兵。六年。加都督僉事。鎮汀州。七年正月。遣副將黃承國等。擒斬揚坊寨賊首揚昌期。及僞官楊奇。六月。遣副將高守貴復石城縣。降各寨賊。又破衝天寨。及紅石巖賊巢。七月。江西賊洪國玉。張自盛。李安民等衆數萬。犯邵武。總督陳錦檄之綱援剿。十一月至。泰甯縣。與巡撫張學聖合兵。賊走江西。據新城縣之老山嶺。進擊。大敗之。獲國玉。安民。及其黨數十。下部議敘。八月。移師勦土賊葛登標于甯化縣之巫家湖。斬獲無算。九年。冬。自盛復犯延平。邵武。十年五月。之綱剿擒之。十二年。敗延平積寇楊日焯。楊成洪于大埠溪壩。成洪中礮死。日焯就擒。敘功加都督同知。十三年。汀屬左龍坊妖婦謀不軌。之綱斬之。十五年三月。以結交內監吳良弼。納賄營私。奉旨逮問。革職擬斬。改流尙陽堡。未至。道死。

任珍列傳

任珍。河南宜陽人。明副將。守河州。本朝順治二年。英親王阿濟格追勦流賊李自成于陝西。珍自河州殲賊黨。收文武僞勅來降。以副將銜隸總督孟喬芳標下。三年。漢中叛。鎮賀珍。糾賊黨胡向宸等犯西安。喬芳令珍守城西門。鏖戰八晝夜。乃卻賊。追敗之。灤泗河。尋與中軍陳德功勦蒲城。擒王交張留。復同副將王平攻克興安城。賊渠孫守法竄湖廣。是年。敍功。賜冠服鞍馬金幣。令赴部擢用。喬芳請留署固原總兵事。四年。授興安總兵。時楚蜀未平。興安爲羣盜出人之路。北山南山土賊復肆逞。喬芳奏增步騎四千。屬珍鎮守。胡向宸踞盤屋縣之黑水峪。珍搗其巢。遣王平追擊潰衆。斬向宸。降將武大定自鳳翔叛。掠紫陽縣。珍督兵擊走之。賀珍寇漢中。爲肅親王豪格軍擊敗。竄鄖襄。連結石梁山賊穆文相來國軫。李世英。李應全。王國賢等窺興安。珍以兵迎擊于白土關。賊敗遁仿谿。倚山立寨。進圍之。斬國軫。世英。師還。擊北山賊李奎于鎮安。魔王坪。殲

其衆。五年。穆文相等寇竹山。珍遣兵擊走。獲其腦。賀珍復西掠漕船。珍分遣遊擊王承光。張室設伏黃泥港。自率精騎誘賊迎戰。伏發。賊敗。擒應全。進征石梁山。陣斬王國賢。盡平賊壘。賀珍遁入蜀。文相竄匿山谷。食盡。其黨俞尙智斬首以獻。六年。蜀賊寇掠西鄉。平利。韓城諸邑。珍分兵赴援。自扼要隘。截擊。陣斬僞副將唐仲亨。總兵焦賢。監軍鄧林眷等。械赴西安伏誅。七年。督勦南山賊。斬級無算。抵皆峪。射賊渠王大漢。墮崖。生擒之。先是珍兩敍軍功。晉左都督。至是復加太子太保。遇恩詔。授三等子爵。九年。以疾解任。還京。隸漢軍正黃旗。十年二月。追論珍在興安時自治其家屬淫亂。擅殺多人。行賄兵刑二部。降世職爲一等輕車都尉。四月。珍爲其婢詰告。被謫怨望。言動狂悖。諸罪狀。下三法司鞫訊。論斬決籍沒。兩奉諭覆勘。仍前議得旨。任珍曾立軍功。從寬免死。徙置遼陽。其子仍襲職。用昭法外之恩。尋以其長子宏祖襲一等輕車都尉。

唐通列傳

唐通。陝西涇陽人。明崇禎七年。以榆林守備從總督陳奇瑜征流賊于隕陽。尋遷遊擊。守漢中。復遷宜府副將。官至密雲總兵。十四年。我太宗文皇帝遣兵圍錦州久。薊遼總督洪承疇。令通及馬科。王樸。吳三桂。李輔明。曹變蛟。白廣恩。王廷臣。入總兵合兵十三萬。援錦州。次松山。通與曹變蛟屢迎戰。輒敗。太宗文皇帝親統大兵圍之。度明兵必遁。密授論將機宜。設伏邀擊。明兵乘夜奔竄。自杏山迤南沿海。東至塔山。傷斃及溺海死者甚衆。通與樸。三桂。科。廣恩等皆脫走。十五年。松山破。洪承疇就擒。明法司論諸逃將罪。斬王樸。餘皆以賄免。通貶秩。仍鎮密雲。是冬。太宗文皇帝遣兵自黃崖口入薊州。越京師。趨山東。凡克城八十有八。通始守牆子嶺。繼乃尾後。聲言赴援。不敢一戰。及大軍凱旋。通與廣恩等合兵。邀拒于螺山。潰還密雲。十六年五月。大學士吳姓將赴武昌討流賊。尙書張國維請以通與馬科兵及京營兵一萬隨姓征討。大學士陳演又以關口不可無備。奏留唐通。裁密雲總兵。改通薊鎮中協總兵。九月。我世祖章皇帝遣兵征甯遠。通率兵赴援。至則李輔明已戰死。中後所前屯衛中前所三城俱破。以甯遠城得全。

還報。明帝移通守薊鎮西協。召見。稱卿而不名。賜蟒服玉帶。十七年三月。以流賊李自成陷大同。封通定西伯。與總兵吳三桂左良玉黃得功並徵入衛。三桂等遠不能至。通逾宿卽抵京。陞見。賜銀幣。慰勞再三。發內幣銀四千兩犒其軍。命偕太監杜之秩守居庸。通至。聞賊已抵柳溝。遂與秩並從賊。賊入關。遣僞兵。政府侍郎左懋泰偕通守山海關。通遺三桂書。盛誇自成禮賢。啖以父子封候。三桂甫領兵入衛。兵至永平。聞其妾陳元被虜。還兵擊。通敗。僅以八騎走。其標下兵八千。盡潰降三桂。自成聞之。令降將廣恩援通。兵亦潰。自成別以兵二萬守關。遣通齎銀四萬兩犒三桂軍。欲因以招之。三桂佯受。復以書乞本朝兵入關。睿親王多爾袞統師由甯遠進。通率數百人迎戰于一片石。敗卻。自成率賊三十餘萬。自北山橫亘至海。列陣以待。睿親王令兵向海。麟次布列。三桂分列右翼木。各對陣奮擊。大敗賊衆。通隨自成西遁。至府谷。見賊勢敗。還駐保德州。本朝順治元年九月。山西總兵高勳。以通願歸順。乞兵共剿賊。入奏。十一月。英親王阿濟格統師至甯武關。通隨勳迎謁。王令往保德州河岸。造筏濟大軍。通尋遣裨將赴京。

齋繳定西伯銀印。命隸正黃旂漢軍。晉封定西候。詔以總兵官鎮守保德州。殺賊自効。二年正月。雙山土賊高一功陷榆林。通與巡撫趙兆麟逐之。賊遁。七月。同陝西巡撫雷璵剿敗張果老崖土賊王張飛等。疏言土寇侵擾淳化耀州三原富平。久爲民害。王張飛等拒剿負險。恃衆抗拒。官兵二旬四戰。參將杜言遊擊史萬宰等。殺賊五千餘。墮崖死者以數萬計。獲大旂十。鐵甲十三。盔七。馬十六。羸二。驢七十四。請分別賞卹有功及陣亡諸弁兵。以示獎勵。得旨。疏內旣稱殺賊四五千人。跌死數萬。何以盔馬旂甲等物。止有如許。此係明季惡習。以後不得沿陋入報。下部嚴飭行。九月。疏言三秦已定。臣應回京供職。請以保德仍歸甯武鎮管轄。所有兵馬。當留陝西爲城守之需。得旨准回京。陛見。其兵馬留陝西。督撫察明留用。五年四月。奏繳定西候印。乞改賜世襲爵職。下部議予一等子襲十四次。康熙三年二月。以年老乞休。詔原品致仕。遇朝賀隨班行禮。四月死。賜祭葬如例。其一等子爵子翰輔縣之汾相繼襲。之汾任鑲紅旂副都統。五十一年卒。所司以其子祝應襲請。諭曰。唐通原係前明總兵官。不能出力。反降順流賊。後雖

投誠本朝。未著功績。其世職不必承襲。

董學禮列傳

董學禮。陝西廣武人。明花馬池副將。流賊李自成陷陝西。學禮從賊授僞總兵。駐劄懷慶。本朝順治元年。豫親王多鐸兵下河南。學禮降。並以書招降甯夏僞節度使陳之龍。賊將牛成虎獲其書。盡殺學禮家屬。會賊犯孟縣。學禮渡河來援。殺賊千餘。二年。隨英親王阿濟格平陝西。署鳳翔總兵。部議以鳳翔例不設鎮。令學禮來京另用。尋入京隸漢軍正黃旗。五年。敕投誠功。授一等子爵。十六年。海寇犯溫州。加左都督銜。充隨征浙江總兵官。駐溫州。十八年。擢湖廣提督。時桂王將李來亨等踞湖廣西山。康熙二年二月。學禮同總兵穆生輝于大海高守貴由間道襲剿。敗之于李店。擒其將宋段。俘獲無算。來亨退據譚家寨。我兵四面圍之。別遣將恢復歸州巴東巫山等處。直達夔州。撫輯西山洞寨百餘處。得旨嘉獎。七月。來亨乘大霧來犯我寨。學禮督兵夾擊。斬首七百餘。

三年。來亨以內訌。舉家自焚。學禮以書招降其黨王光興。蔣尙膺等。五年。死。子永蕃。襲職。

明末漢奸列傳卷十一

陳名夏列傳

陳名夏。江南漂陽人。明崇禎十六年進士。官翰林修撰。兼戶兵二科都給事中。福王時。以名夏曾降附流賊李自成。定入從賊案。本朝順治二年七月。名夏抵大名投誠。以保定巡撫王文本疏薦。復原官。旋擢吏部左侍郎兼翰林院侍讀學士。時大兵定江南。九卿科道議南京設官。因革裁併事不決。名夏以國家定鼎神京。居北制南。不當如前朝稱都會。宜去宗之名。存設官之實。疏入。稱旨。三年。丁父憂。命在官任事。私居成服。並敕部議贈卹。復陳情請終制。賜銀五百兩。暫假歸葬。仍給俸贍在京家屬。明年還朝。五年。初設六部尙書各一。卽授名夏吏部尙書。定例。各省道府州縣等官陞遷。俱俟三年考滿。名夏以地方需人。必待考滿。勢難驟久。奏改歷俸三年。撫按荐舉。酌量推補。尋加太

子太保。八年。授宏文院大學士。晉少保。兼太子太保。九年。以黨附吏部尙書公譚泰議罪。解院任。縮俸如故。發正黃旂下。與閒散人隨朝。初睿親王多爾袞專擅威福。尙書公譚泰剛愎攬權。名夏旣掌銓衡。徇私植黨。揣摩執政意指。越格濫用匪人。以迎合固寵。及多爾袞事敗。御史張煊劾奏名夏結黨行私。銓選不公。諸劣蹟。下諸王部臣鞠議。會上方巡狩。譚泰獨袒名夏。定議諸款皆赦。前事且多不實。煊坐誣論死。至是譚泰以罪伏誅。命親王大臣復按張煊所劾名夏罪狀。名夏厲聲強辨。及詰問詞窮。涕淚交頤。自訴投誠有功。冀貸死。諭曰。此輒轉矯詐之小人也。罪實難逭。但朕有前旨。凡譚泰干連。概赦免。若復執名夏而罪之。是不信前旨也。因宥之。且諭令潔己奉公。勿以貪黷相尙。冀其自新。以副倚任。十年。移補祕書院大學士。時史部尙書員缺。左侍郎孫承澤請令名夏兼攝。上以侍郎推舉大學士。有乖大體。責令回奏。復諭名夏曰。爾可無疑懼。越翌日。仍命署吏部尙書。上嘗幸內院。閱會典及經史奏疏。必與諸臣講求治理。兼訓諸臣。以滿漢一體。六部大臣不宜互結黨與。誠諭名夏。益諄切焉。會有旨令集議刑部論任。

珍家居怨望。指奸謀陷諸罪。應死狀。名夏及大學士陳之遴。尙書金之俊等二十八人。與刑部九卿科道等兩議。得旨責問。名夏復巧飾欺蒙。論死。復詔從寬典。改削官銜二級。罰俸一年。仍供原職。十一年。大學士甯完我列款劾奏名夏曰。名夏屢蒙皇上赦宥。擢用。宜洗心易行。効忠於我朝。不意其蠱惑紳士。包藏禍心。以倡亂。嘗謂臣曰。要天下太平。只依我兩事。臣問何事。名夏推帽摩其首云。留髮復衣冠。則天下卽太平。臣思爲治之要。惟在法度嚴明。則民必悅服。名夏必欲寬衣博帶。其情叵測。臣與逐事辯論。不止千萬言。灼見隱微。名夏禮臣雖恭。惡臣甚深。此同官所共見聞者也。今將結黨奸宄。事蹟言之。名夏子掖臣。居鄉暴惡。士民怨恨。欲移居避之。江甯有人官園宅。在城各官。集貲三千兩。代爲納價。遂家焉。掖臣橫行城中。說人情。納賄賂。各官敢怒不敢言。人又懼其威勢。名夏明知故縱。科道官豈無一人聞之。不以一疏入告。其黨衆可見矣。名夏署吏部尙書時。因趙延先係其契交。驟加陞擢。科臣郭一鶚疏言。吏部陞官。遲速不一。指延先爲誣多開資俸兩月。名夏欲罪之。劉正宗不平。事乃已。臣思趙延先不當陞而

陞。名夏反欲罪言官。其攬權可見矣。浙江道員史儒綱。係名夏姻親。爲浙撫蕭起元所劾。革職提問。名夏許其復官。屢囑起元。起元難之。遲延三四年不結。臣聞之已久。一日見名夏票蕭起元疏。苛加指駁。批從重議處。額色黑圖海以爲非臣言。此疏祇宜批該部議奏。名夏乃允。其欲爲史儒綱報復可見矣。翰林張天植告假回南。名夏助路費銀百兩。天植于其家還銀。名夏不知。曾言天植得罪于我。所以外轉。後知銀已還。見天植又曰。還爾翰林可也。臣思甄別翰林。出自聖裁。而名夏直任去留由已。欺詐實甚。乃昨見馮銓等薦舉十二人疏內。列有天植。則名夏之營私巧計。更莫測矣。名夏與山西牛射斗結姻。吏科魏象樞係其姻戚。象樞劾司官錢受祺擅委事。將巡捕誤作中軍。後自檢舉。下部核議。象樞應降級調用。名夏輒票敵俸六個月。其護黨市恩顯然矣。臣等職掌票擬。一字輕重。關係公私。臣慮字有錯誤。公立一簿注姓以妨推諉。行之已久。一日。名夏不俟臣等到齊。自將公簿注姓塗抹一百一十四字。爲同言所阻方止。竊思公簿何得私抹。不知作弊又在何件本稿。二月上命內大臣傳出科道官結黨諭旨。臣書稿

底。交付內直。及票紅發下。名夏抹去擠異排孤一語。改去明季埋沒局中。因而受禍。今方馳觀域外。豈容成奸。四句。作兩句法語。其糾黨奸宄之情形。恐皇上看破。故欲以隻手障天也。請勅下大臣確審具奏。法斷施行。則奸黨除而治安可致矣。遂下廷臣會勘。名夏辯諸款皆虛。惟留髮復衣冠所言屬實。完我復與大學士劉正宗共證名夏攬權市恩欺罔罪。讞成。論斬。上以名夏久任近密。改處絞。子掖臣逮治。杖戍。

白廣恩列傳

白廣恩。陝西人。明崇禎初。流賊四起。廣恩從盜魁混天猴攻陷宜君。酈州。襲靖邊。爲副將。張應昌所敗。中矢遁。嗣總督洪承疇破賊于平涼。廣恩降。授都司。隨總兵曹文詔敗賊金川嶺。積功至薊州總兵。我太宗文皇帝征明錦州。承疇合諸鎮兵來援。以廣恩代左光先爲援勦總兵。與總兵曹變蛟馬科。王樸。吳三桂。唐通。王廷臣。楊國柱等合兵十三萬。援松山。國柱戰死。俄聞我太宗文皇帝親臨督陣。諸將大懼。出戰連敗。餉道絕。樸

先遁。廣恩等相繼走。遇我軍邀擊。大敗。松山破。承疇就擒。并擒廣恩。子良弼留養之。明法司論諸逃將罪。廣恩貶秩。尋代馬科鎮山海關。良弼遺之書。不報。是年冬。我軍由黃崖口入薊州。廣恩自馬蘭峪同總兵白騰蛟來援而敗。以兵入衛京師。莊烈帝喜。賚銀帛羊酒。俄戰龍山口。稍有斬獲。以捷聞。莊烈帝始惡廣恩觀望。降旨切責。而冀其後效。持命敍功。明年。我軍由山東北旋。廣恩合唐通等入鎮兵邀拒于密雲之螺山。悉潰敗。總督趙光祈請召廣恩入爲武經略。廣恩抗不赴召。大學士吳甡將督師撫流賊。請佯逮廣恩治罪。而已力救。因率以討賊。莊烈帝從之。廣恩感甡甚。受約束。無何。莊烈帝遣中官齎金二萬犒其軍。且諭以溫旨。廣恩遂驕。不爲甡用。大掠臨清關。徑歸陝西。莊烈帝不得已命總督孫傳庭辦賊。廣恩桀驁不可使。傳庭惜其驍勇。用以統火車營。後傳庭自汝州蹙賊于寶豐。李自成來援。廣恩與總兵高傑夾擊。敗賊。轉戰至邠縣。軍飢。因還軍迎糧。自成帥精騎還戰。傳庭問計于諸將。高傑請戰。廣恩不可。傳庭以爲怯。廣恩不懌。及戰。賊陣五重。官軍破其三。賊驍騎殊死鬪。廣恩軍將火車者呼曰。師敗矣。脫輓

輅而奔。衆軍大潰。高傑陷伏中。廣恩走汝州不救。傅庭渡河入潼關。加廣恩盪寇將車。俾綠道收潰卒保潼關。賊隨至攻關。廣恩力戰敗。傑以前怨亦擁衆不救。關遂破。傅庭戰歿。廣恩西奔固原。賊追擊之。卽開門降。自成大喜。握手共飲。僞封桃源伯。本朝順治二年。英親王阿濟格勦賊陝西。廣恩具疏投誠。自陳罪狀。得旨。白廣恩自矢奮勇殺賊。具見苦心。不必自陳前罪。尋入京。隸漢軍鑲黃旂。五年八月。追敘投誠功。授騎都尉世職。未幾死。以兄子良柱襲。

南一魁列傳

南一魁。陝西膚施人。明副將。崇禎末。流賊李自成陷陝西。一魁降賊。爲授參將。尋棄之。投鄂爾多斯部。本朝順治二年。英親王阿濟格逐自成至山西。一魁來降。王令前驅。西渡河。同明降將康鎮邦招撫延綏東路。自黃甫川至安定邊十七堡。俱効順。殺僞官劉九德。隨大軍收西安。以功授寧夏總兵。時賊黨盤踞香山。奸回聚河東。一魁招散之。并

撫定兩河八路城堡。陝西平。敕來京另用。隸漢軍鑲紅旗。四年。流賊張獻忠餘黨孫可望踞四川。平西王吳三桂都統李國翰由陝西進勦。一魁統右路總兵。加都督同知。五年七月。平河州叛回。總督孟喬芳令協勦文縣賊趙榮貴。復其城。八月。敕功授三等輕車都尉。六年十月。賊首劉登樓任一貴謝汝德等陷延綏營堡。三桂檄一魁往勦。次武威。遣參將王國英等敗之。楊方坪斬僞將王虎。復鎮靖堡。一貴奔定邊。同汝德拒守。進圍之。賊將齊進才殺汝德降。擒僞官戴治民等。花馬池賊黨周四聞風遁。連復榆林東西路十八營堡。得一貴于城。斬之。登樓亦爲總兵劉芳名擒斬。一魁進勦四川。九年四月。三桂檄同總兵馬化豹復敘州府。時兵馬不習水土。多死亡。一魁憂成疾。八月。可望率水陸數萬陷敘州府。執一魁送貴州。十年二月。可望犯寶慶府。我兵敗之岔路口。一魁率把總袁功等兵四十。由新化奔何常德。總督祖澤遠奏報得旨。南一魁抱病遇難。自拔還歸。情殊可念。俟平西王路利爾部再行覆奏。閏六月。大學士洪承疇經略湖廣。廣東廣西雲南貴州五省。以一魁善戰知賊情。請爲部將。上命一魁以左都督赴軍前。

補給世襲敕書。賜銀千兩。及甲冑馬械。尋以所蓄慣戰家丁散在陝西各堡寨。調聚軍前。可成一旅。請親赴陝招訪整頓。允之。十一年。集兵千二百。馬羸千餘。同弟參將一才等抵長沙。充經略前標總兵。十二年三月。明桂王將李定國自新會敗走南甯。詔命靖南王耿繼茂率湖南廣西兵進攻。承疇遣一魁同左路總兵張國柱協勦。十三年。定國奔安隆。明桂王往依之。遂奔雲南。承疇留國柱鎮廣西。以一魁隨征貴州。平之。十二月。隨大兵入雲南。桂王奔緬甸。一魁回駐衡州。十一年九月。加太子少保。十八年四月。兵部以一魁原隨經略取雲南。今雲貴已平。衡州係腹裏。既有城守副將。總兵官應裁。得旨允行。一魁回京候補。十二月。詔以原職隨旅上朝。康熙五年。一魁以曾蒙世祖章皇帝特授總兵。內大臣鰲拜大學士范文程皆知之。至今未授。呈請兵部代題。遂私到鰲拜家。及傳旨問鰲拜文程。皆云不知。部議以一魁身爲大臣。所陳詐妄。又擅往輔政大臣家。應革去職銜及世職佐領。送刑部。得旨南一魁著削去佐領。罰俸一年。十一月。五月。以年老免上朝。十三年八月。死。賜祭葬如例。子鵬襲職。

孫可望列傳

孫可望。陝西延長人。流賊張獻忠養子也。獻忠據四川。以所望爲僞平東將軍。本朝順治三年。肅親王豪格奉敕統兵征四川。獻忠敗死。可望與其黨李定國、劉文秀、艾能奇、白文選等。率殘衆竄入川南。襲重慶。殺明守將會英等。陷綦江及遵義。復由遵義入踞貴陽。值阿迷土司沙定洲作亂雲南。明黔國公沐天波奔永昌。可望乃率衆趨滇。與沙定洲戰于蛇花口。定洲敗遁阿迷。可望留定國、文秀于重慶。而自引兵還貴陽。會艾能奇死。遂并其部衆。僭稱平東王。以干支紀年。鑄錢文曰興朝通寶。定國在雲南迎天波。任職如故。與交善。聞明桂王據廣東。遙附之。蔑視可望。不爲下。可望誘定國攻之。便武廠以威衆。定國益忿。尋以兵剿擒沙定洲。兵力日甚。可望不能制。乃通使降附。由柳乞封爲秦王。時由柳據廣西。我平南王尙可喜定廣東。定南王孔有德定湖南。將夾攻廣西。由柳欲藉可望爲援。許而結之。于是可望與定國合謀抗拒大兵。俄而大兵攻桂林。

文秀出斜州。文選出重慶。以圖成都。可望乃由平溪掠朝陽堡。陷靖州。定國由武岡趨全州。犯桂林。有德督戰失利。城陷。死之。可望同定國縱掠湖南郡邑。上命敬謹親王尼堪爲定遠大將軍。偕貝革屯齊進討。援衡州。定國不戰反走。敬謹親王率輕騎躡其後。遇伏。歿于陣。屯齊代之。屢挫其鋒。定國走廣西。可望還貴州。遣文選自銅仁窺辰州。以書招我總兵徐勇。勇執而誅之。迎戰荔溪。文選數敗卻。可望益驅衆助之。遂陷辰州。勇督兵巷戰。手刃數十賊人。中創墮馬。遂遇害。定南將軍阿爾津援辰州。文選遁。定國復率衆四萬。由廣西犯湖南。大兵敗之於永州。定國由龍虎關逸去。掠廣東。連陷郡邑。可望亦率衆四萬出武岡。大兵自永州還寶慶。遇之於岔路口。分兵逆擊。斬馘無算。獲其輜重。可望遁歸。遣文秀以衆六萬巨艦千餘來犯常德。別遣其將馮雙禮。盧明臣犯武昌。我甯南靖寇大將軍辰泰遣護軍統領蘇克薩哈伏兵邀擊。明臣赴水死。雙禮被創遁。文秀走貴州。時廣東大兵擊敗定國。進薄南甯。可望乘間遷由榔居安隆。擅殺其從官。數加斥辱。復議移之貴陽。先是定國戰敗永州。可望欲以罪殺之。使人約赴沅州議。

事。定國不至。自此可望與定國遂絕。可望自設內閣六部等官。立太廟。定朝儀。改印文爲八疊。盡易其舊。由榔懼甚。密使人封定國晉王。文秀安南王。及可望欲移之貴陽。由榔益懼。陰使約定國以兵迎衛。時文秀在雲南。私迓由榔。暨定國入居雲南。由榔使人慰諭可望。可望不受命。引兵攻由榔。留雙禮守貴州。令文選統諸軍前行。至三岔河。與定國文秀夾水而陣。文選陰附定國。單騎奔其軍。可望遣其將馬寶等由潯甸聞道襲雲南。而自率衆拒定國。戰方合。兵潰。走貴州。定國遣文秀文選及將軍楊武等窮追。雙禮爲可望殿後。截其子女玉帛。降于文秀。可望倉皇走河南。遣其將程萬里赴經略洪承疇軍前納款。而楊武追至沙子嶺。劫掠殆盡。承疇遣兵馳援。可望乃得脫。携妻子至長沙乞降。承疇以聞。時順治十四年十月也。上以可望革心向化。宥其既往。授爵爲義王。詔曰。卿阻在南服十餘年。未識朝廷寬仁大度。今一旦翻然。便爲識時俊傑。朕深嘉子。可望奏言。臣當明季喪亡之際。收士卒。繕甲兵。此心久嚮慕天朝。欲以滇黔盡隸版圖。今適滇黔內附。臣得宣布天朝威德。率所部歸誠。而李定國白文選等。尙假借名號。

橫逆如故。請速張撻伐。以遂生民去逆效順之忱。上優詔答之。遣大學士麻勒吉等齎敕印封可望。十五年。可望隨麻吉至京。命簡親王濟度等郊迎。翌日入覲。宴於中和殿。賚白銀萬兩。其部下陳傑劉天瑞等百餘人。俱授職有差。可望奏言。大兵征滇。正臣報効之日。滇南形勢。臣所熟悉。或偕諸將進討。或隨大臣招撫諸境。庶少効奉國初心。疏下。王大臣議。以大兵分三路趨雲南。指日奏功。無事可望再往。寢其奏。是年。大兵直抵永昌。由榔偕沐天波等竄緬甸。定國文選分竄孟養木邦。十七年六月。可望疏辭封爵。上特諭曰。王子身來歸。孤踪疑畏。抗辭冊印。理亦宜然。但封爵出自朕裁。卿其祇受。十一月。可望病死。諡恪順。子徵淇襲。未幾卒。弟徵灝請襲。御史孟飛熊疏言。可望爲張獻忠餘黨。擁衆入踞滇黔。負固不服。而擾亂邊陲。及被舊黨李定國所敗。衆散勢孤。窮蹙乞降。以後未嘗効力軍前。前有重罪。後無微勞。濫膺非分之榮。身後亦復承襲二次。亟宜停止。或酌量以次降等予襲。無俾世玷榮班。疏下部議。降爲慕義公。以徵灝襲。徵灝卒。子宏相降襲一等輕車都尉。乾隆三十六年。奉旨。孫可望子孫世職。自後不必承襲。

白文選列傳

白文選。陝西吳堡人。明末從張獻忠爲盜。本朝順治三年。肅親王豪格征四川。獻忠伏誅。文選與其黨孫可望。李定國。劉文秀。潰走川南。尋並附於明桂王朱由榔。七年。文選攻遵義。八年。文秀自四川還雲南。留文選守嘉定。是年。大兵南征。文選等敗走。大兵入嘉定。九年五月。文選由遵義出重慶。會于嘉定。圖成都。戰敗。七月。攻陷辰州。我總兵徐勇戰歿。十三年。可望圖自立。憚定國未敢發。使文選促由榔移貴州。文選雖爲可望用。然心不直其所爲。以情由告榔。姑遲行以候定國。定國至安隆。文選歸之。奉由榔定雲南。由榔封文選鞏國公。令還貴州慰諭可望。可望銜其貳於定國也。悉奪所部兵。羈之軍中。十四年九月。可望舉兵叛。由榔從部將馬惟忠言。復用文選。令統諸軍前行。定國文秀率師禦之。至三岔河。與可望夾水而軍。文選輕騎奔定國。擊敗可望。由榔封文選爲鞏昌王。十六年。大兵取雲南。定國屢戰敗。文選自霑益追及定國。定國留之。斷後。至

玉龍關。大兵追擊。文選戰敗。由右甸遁走木邦。由榔遁入緬甸。十七年九月。文選由木邦至錫箔。所至縱掠。進攻阿瓦。索還由榔。阿瓦有新舊二城。新城緬甸所居。文選急擊之。城垂破。爲緬人所給。退兵十里。城中設備。反爲所敗。乃率兵赴孟良會。李定國復赴阿瓦。先是由榔至緬。久居赭磴。文選密遣人告由榔云。不敢速進者。恐有他變。必得緬人送出爲上策。由榔亦以書答之。文選乃除造浮橋。迎由榔。爲緬人所覺。事不果。十八年。會兵阿瓦。復遣人求出由榔。緬人不許。以象兵與定國戰。文選引兵橫擊之。緬人大敗。退保新城。復議以舟師攻之。遣人于上流造船。爲緬人所焚。遂與定國移兵洞烏。未幾。潰走錫箔。定國亦引還。十一月。平西大將軍吳三桂定重傳軍公。受里阿會五木邦。定四先奔景線。文選據錫箔。憑江爲險。大兵白木邦敗里。反行三百餘里。臨江造筏。將渡。文選奔茶山。總兵馬字等率偏師追之。及猛養。文選降。十二月。軍臨緬城。緬人懼。執由榔獻軍前。定國走死猛獵。子嗣興降。授都統銜。滇南平。詔封文選承恩公。隸漢軍正白旗。康熙元年十一月。詔給三等公俸。七年。加太子少師。十四年死。賜祭葬如例。

黨崇雅列傳

黨崇雅。陝西寶雞人。明天啓五年進士。官至戶部侍郎。福王時。以崇雅曾降附流賊李自成。定入從賊案。本朝順治元年七月。以總督駱養性薦。徵授原官。崇雅以老病請罷。不允。九月。調刑部左侍郎。疏言。臣按舊制。凡刑獄重犯。自大逆大盜。決不待時外。餘俱監候處決。在京有熱審朝審之例。每歲霜降後。方請旨處決。在外直省。亦有三司秋審之例。未嘗一罹死刑。輒棄於市。皆委曲爲恤刑計也。皇上好生之德。同揆先聖。凡罪人之決。不待時與秋後處決者。望照例區別。以昭欽恤。臣更有請者。在外官吏。乘茲新制未定。不無逞臆舞文之弊。并乞暫用明律。候頒行新例。再畫一遵守。二年二月。復疏言。流寇暴虐。三秦被禍尤烈。今勦滅殆盡。恐寇黨株連。下民未獲甯止。請速頒恩赦。以固人心。至督撫爲綱紀之宗。司道乃旬宣之寄。而府州縣各官。撫字凋殘。所繫尤重。簡用務在得人。庶可廣皇仁而布實政。並得旨允行。六月。百戶安啓懋許奏。原任天津總督

駱養性貪婪通賊。辭連崇雅。下法司訊。啓懋坐誣削職。八月給事中莊憲祖劾崇雅讞獄含糊。遇事少明決。卽律令之損益。屢荷明旨。而至今未定。其衰庸可知。請予罷黜。奉諭以所指無實免議。崇雅因上疏備述衰老情狀。並言科臣所指事款。聖明既有洞鑒。無庸置辯。但謂臣形骸雖具。神理已離。卽臣自言。不及科臣所言之真切。乞鑒臣庸衰。立行罷黜。溫旨慰留之。五年。遷刑部尙書。六年。加太子太保。八年閏二月。調戶部尙書。八月。加少保兼太子太保。十年四月。引疾告歸。上以崇雅服官操潔。命在籍歲支原俸。督撫按臣時加慰問。十一月。特召還朝。崇雅疏辭。奉旨覽奏。以親病不忍遠離。具言衰老步履艱難。情詞懇切。但朕求賢圖治。倦念老臣。卿年已七十。猶堪任事。宜勉遵前諭。十一年。授國史院大學士。十三年。復引年乞休。詔加太保兼太子太傅。予告馳馱還籍。崇雅奏謝。上見其衰顏。憐之。賜官服。諭曰。卿今還籍。不能復見朕矣。抵里後。服朕賜衣。卽如見朕。崇雅叩首泣謝。頻行。復召見。賜茶。頒諭語勞。命大學士車克送之。十三年。賜之敕曰。太保太學士黨崇雅。樹品端方。視躬清慎。久典邦禁。明允蜚聲。洊歷司院。廉勤

益著。名參密勿。作朕股肱。翼翼小心。夙夜匪懈。正期益殫猷略。佐理昇平。乃以齒屬懸車。抗疏解綬。高風恬致。足表儀型。今間闊年餘。深繫朕念。特遣副理事官程可進。御前近侍孫尙德。全齋敕存問。錫羊酒。卿其頤養天和。茂膺壽福。劭乃德。康乃身。副朕至意。倘時有闕。勿吝嘉謨入告。卿尙敬念之哉。康熙五年。賜祭葬如例。

梁清標列傳

梁清標。直隸正定人。明崇禎十六年進士。官庶吉士。福王時。以清標曾降附流賊李自成。定入從賊案。今朝順治元年投誠。仍原官。尋授編修。累遷侍講學士。十年五月。遷詹事。閏六月。遷祕書院學士。十二月。擢禮部侍郎。十一年。敕賑直隸八府災民。清標與侍郎祝世允分賑保定所屬二十州縣。三衛一所。并順天府屬騰驤永清二衛屯丁之在保定者。還奏稱旨。十二年。調吏部右侍郎。奉詔陳政事得失。清標疏言。民生休戚。繫乎牧令。請令督撫重視州縣官。勿使疲于趨承。假以便宜。俾興利除害。無或掣肘。臺臣職

居言路。舊有部郎改授之例。宜令各部堂官擇端方讜直者。與卓荐州縣各官。一體考選。吏部掌人材進退。宜于選功二司。設記功記過二簿。于序俸陞選中。仍分別察核。以昭懲勸。山林隱逸。屢奉詔荐舉。未有應者。請敕九卿公舉數人。禮聘入京。召見咨訪。以收實用。下部議行。是年。轉左侍郎。以本生母喪。歸。十三年四月。遷兵部尚書。八月。同尚書衛周祚等奉敕督賑順天府屬二十七州縣。十六年。海賊鄭成功由鎮江犯江甯。給事中楊雍建疏言。海氛告警。宵旰焦勞。樞臣職掌軍機。於地形之要害。防兵之多寡。勦撫之得失。戰守之緩急。不發一謀。不建一策。僅隨事具覆。依樣葫蘆。不曰今應再行申飭。則曰臣部難以懸擬。既不能盡心經畫。決策于機先。又不能返躬引咎。規效於事後。請天語嚴飭。以儆尸素。詔兵部回奏。時尚書伊圖奉使雲南。清標同侍郎額赫里劉達李棠馥疏辯。自有海警以來。凡調發機宜。隨時斟酌。審勢議覆。未敢依樣葫蘆。因循推諉。得旨。樞臣職司戎務。調度機宜。盡心籌畫。方爲不負委任。此回奏巧言飾辯。殊不合理。著再回奏。於是自引咎。下吏部察議。三侍郎皆降二級。清標降三級。各留任。十七年。

二月。京察自陳。諭曰。梁清標經朕特簡。昇掌中樞。自當殫視心力。以圖報効。乃凡事委卸。不肯擔任勞怨。本當議處。姑從寬免。其痛自警省。竭力振作。五月。上以歲旱。令部院諸臣條奏時務。清標與李棠馥疏言。兵馬往來之地。應用米豆薪藿牛酒羊猪及鍋鏟樁諸物。上官取諸下司。下司取諸民間。賠累無窮。又奸民捏告通賊謀叛。蠹役貪官。借端取貨。生事邀功。致善良受害。應俱嚴行飭禁。得旨。所奏上官取諸下司。下司取諸民間。及借端取貨生事邀功。着確指其人。于是復奏。邇年地方官藉兵馬往來濫派民間。則有丹徒知縣陳經筵。合肥知縣岳呈祥等。爲巡撫張中元總督蔡士英所劾。藉通賊謀叛名。魚肉平民。則有桐城知縣葉桂祖。常熟知縣周敏等。爲給事中汪之洙。巡按何元化所劾。其未經劾奏者。不知凡幾。故請旨飭禁。懲前以毖後。疏下部知之。康熙五年。調禮部尙書。六年。充會試正考官。旋遇京察革職。八年。輔政大臣鰲拜以專擅獲罪拘禁。詔復前此無故黜革諸臣原官。清標預焉。十年。補刑部尙書。十二月。調戶部尙書。充經筵講官。十二年。平南王尙可喜請撤藩歸遼陽。命清標往廣東經理藩屬遷移事。旋

以逆藩吳三桂反。仍敕可喜留鎮。清標還京。十八年。給事中姚締虞請寬科道糾劾不實處分。許以風聞言事。上召詢九卿等。清標奏曰。言官奏事。原不禁其風聞。恐有藉稱風聞挾私報怨者。是以定有審問全虛處分之例。宜如舊。上是其言。二十一年。命九卿等議改強盜不分首從皆斬例。刑部尙書果斯海等議盜犯爲從者免死。清標與左都御史徐元文等謂宜循舊例。別爲一議。上召詢清標。奏曰。法外施仁。原屬至美之事。但強盜皆係兇惡。難分首從。或罪果可治。間行寬減。應出自特恩。若預定一例。則將僥倖于不死。而愈恣爲盜。上曰。朕因每歲盜案。處決甚多。究其所劫之物甚微。豈盡甘于爲盜。或以飢寒所迫。深爲可憫。故與爾等商之。今所言極是。當仍舊例。別思弭盜良法。二十三年。命以戶部尙書管兵部事。二十七年。授保和殿大學士。是年湖北巡撫張沂貪婪事覺。清標曾保舉爲布政使。部議革職。得旨。降三級留任。三十年。死。遺疏入。得旨。梁清標簡任機務。宣力有年。勤慎素著。忽聞溘逝。朕心深爲軫惻。下部議。賜祭葬如例。所著有蕉林文集。

衛周祚列傳

衛周祚。山西曲沃人。明崇禎十年進士。官戶部郎中。福王時。以周祚曾降附流賊李自成。定入從賊案。本朝順治元年。起授吏部郎中。三年。丁父憂。吏部侍郎金之俊啓心郎甯古里等。以周祚掌銓務。清慎勤練。議給假治喪一月。卽出任事。周祚具疏乞終制。上如所請。服闋。補原官。九年。遷太僕寺少卿。十年。以大學士洪承疇荐。授刑部左侍郎。疏言。各省逮捕土賊。坐輒數十人。恐累無辜。請自今。令所在有司。必鞫訊得實。始具獄詞。解部。而釋其誣者。京師五方雜處。奸民逞詐。訐訟者衆。請嚴反坐罪。以遏之。又贖刑所。以示矜恤。功臣犯法。苟非大惡。原不宜與平民同論。請令所司。復收贖之令。定議。功之典。以協平允。得旨。所奏有裨。明刑。下部詳議。行。十一年。調吏部侍郎。十二年正月。疏言。六部司屬。五年始一京察。故循資選轉者多。賢否無所區別。宜於歲終。令各堂官特科舉一二人。而黜陟之。又言。知府承流宣化。責任綦重。請敕督撫。計覈所屬。斥其老病者。

前此疆圉新闢。招民百名。卽授知縣。暫委各官。卽予本職。乃一時權宜之計。今宜試以文義。其不嫻者。招民改補。武職暫委。止授佐雜。並下部議行。五月。擢工部尙書。十三年八月。同尙書梁清標等分賑畿輔。尋以重修乾清宮成。加太子太保。復以奉先殿成。加少保。十五年。調吏部尙書。旋授文淵閣大學士兼管刑部尙書。十六年。詔獎奉職勤勞。晉少傅太子太傅。充會試副主考官。十七年四月。同大學士巴哈納等校定律例。十一月。考滿。晉少師兼太子太師。廕一子入監。十八年。復內三院。周祚改國史院大學士。復充會試副考官。會吏部尙書孫廷銓假歸。奉命暫攝部事。康熙二年。乞假葬其兄周允。明年還朝。充武會試正考官。六年。充纂修世祖實錄總裁官。八年三月。以疾引退。命乘駟歸。子俸如故。九月。周祚疏辭俸。諭曰。卿著有勞績。特給祿以資頤養。勿辭。十一年四月。諭吏部曰。原任大學士衛周祚。品行端方。清慎素著。曩以引疾請告。回籍調治。今閣務殷繁。贊理需人。卽令乘駟來京。入閣辦事。六月。授保和殿大學士兼管戶部尙書。先是。令各省皆鑄錢。嗣有以銅貴請停者。下部議。遂盡罷各省採鑄。至是周祚言。銅鉛產

自山澤取之下民。開採之省。卽以鼓鑄俾泉布流通。民用益裕。于是復著爲令。時上肇舉經筵日講。周祚請令講官于尙書大學衍義貞觀政要諸書。擇其最切治道者。抽繹闡明。以廣聖德。資政理。又言。各省通志尙多闕略。宜敕儒臣修纂。舉天下地理形勢戶口田賦風俗人才。燦然具列。彙爲一統志。以備御覽。上並嘉納之。十二月。周祚疾。遣侍衛太醫問視。周祚再疏乞罷。詔原官致仕。仍乘駟回籍。予俸。十四年死。賜祭葬如例。後大學士馮溥告歸。上以周祚居鄉謹厚。若未嘗任顯秩者。特舉以諭溥云。四十二年。上西巡。駐曲沃。遣內大臣酬酒于墓。並諭有司存撫其孫。四十五年。入祀鄉賢祠。

戴明說列傳

戴明說。直隸滄州人。明崇禎七年進士。由戶部主事累遷兵科都給事中。流賊李自成陷京師。明說從賊遁。明說逃歸原籍。本朝順治元年六月。以招撫天津錦衣衛百戶危列宿荐起原官。九月。疏言。并陘太原盜賊尙多。勦除宜速。其各路兵馬經制既定者。按

時撥輸各處錢糧。恩詔蠲緩者。令撫按實力奉行。十月。又言。天下初定。人情尙懷疑貳。請嚴縱容盜賊之罪。優盤獲奸細之賞。二年二月。疏言。流賊李自成兵敗氣奪。應急發兵勦擒。秦中士民。或曾爲賊。用當湔雪。以安反側。遣督撫督率官吏。專心撫字。俱下所司知之。五月。遷太常寺少卿。九月。調大理寺少卿。四年。遷太常寺卿。五年。擢戶部右侍郎。六年。加右都御史銜。七年。給事中杜篤祐劾戶部不奏銷錢糧及徇私註差等事。尙書謝啓光降二級。明說罰俸。八年。甄別部院大臣。諭曰。戴明說在戶部。于同官貪婪。不能秉公力爭。反唯唯聽命。歷來銷算事屬同官者。必據爲已有。明係希望有司求已銷算。其操守不潔可知。姑念年力尙壯。降三級調外用。十年。補河南汝南道。十一年四月。遷廣西布政使。七月。諭吏部戴明說年力富強。才識明敏。向經降調懲誡。必洗滌自新。遇京堂缺補用。十二年正月。授刑部右侍郎。二月。轉左。三月。擢戶部尙書。十三年二月。因河南稅務朱世德虧缺額稅。明說議援赦免罪。上責其瞻補。降四級調用。六月。調太常寺少卿。十四年。遷右通政。十五年。遷太僕寺卿。丁母憂歸。十七年。左都御史魏裔介

劾明說居憂浮躁。前在戶部時家有慶賀事。必徧告司官。希圖餽送。丁憂回籍後。私入京師。有乖禮制。疏下部議。革職。尋死。

劉昌列傳

劉昌。河南祥符人。明天啓五年進士。官至戶科給事中。以駁尙書張鳳翼敘廢將陳壯猷功被斥。崇禎十五年。御史張肯堂請召還建言被遣諸臣。復昌原官職。福王時。以昌曾降附流賊李自成。定入從賊案。本朝順治元年。睿親王定京師。昌投誠。仍授原官。六月。疏陳定經賦。立官制。領俸祿。重守令。明等威。立規模。審廟算。推誠心。集羣策。施實惠。十事。詔從所請。旋擢太常寺少卿。奏設金太祖宗陵寢奉祀官。二年。授太僕寺卿。四年。擢工部右侍郎。尋轉左。六年八月。兩遇恩詔。晉太子太保。九年。奉命致祭闕里。以命歸原籍。論奪俸。十年正月。遷工部尙書。四月。以會議革職。總兵任珍罪。狗黨失實。下九卿議擬流徙。奉旨寬免。鐫秩一級。供職如故。會雨澤愆期。應詔求言。疏陳時事。其略曰。西

山之民。惟藉採煤爲生。且產煤之山。已供正賦。今復責之輸煤。轉運已多勞費。重徵亦擾追呼。非所以廣皇仁而定賦式也。請特恩蠲除。又易州額貢紅螺炭。例遣工部主事往州監造。官役供億日繁。漸啓需索之弊。請敕令撫按止委佐貳一員。駐州督辦。均得旨允行。著爲令。十一年。河道總督楊方輿奏報河水浸溢。給事中許作梅請復九河故道。詔廷臣集議。昌隨衆議。以故道久湮。事難懸擬。請飭督撫會同詳勘。給事中林起龍劾方輿不塞決口。致河北被淪。并劾昌任工部尙書。借會議主詳勘故道之說。以掩方輿不塞決口之罪。應逮問。時昌分賑直隸飢民。敕還對質。不實。起龍以誣奏坐罪。十二年正月。給事中饒宇式復劾其察勘河工。因循玩忽。製造鐵斛。推諉遷延。請敕部勘訊。上令昌回奏。昌以河工屢有咨催。鐵斛火候難強奏辯。遂免議。二月。回刑部尙書。十二月。以巡按御史顧仁納賄事覺。昌坐濫舉。奪俸。十三年三月。考滿。加少傅兼太子太傅。四月。上以昌自任刑部後。獄訟未清。深負委任。命削加銜。降三級留任。七月。詔復原銜。諭以洗心滌慮。改過自新。九月。奉命往正定諸將審錄罪囚。十四年。以葬親假歸。十五

年還朝。補工部尙書。十六年。值會推江甯巡撫。誤以降級外用之。沈文奎列名陪推。部議奪俸。十七年。以老病乞休。奉旨。卿謹慎練達。歷著勤勞。念年齒已邁。著以原官致仕。并敕馳駟回籍。廕一子入監。康熙九年死。賜祭葬如例。諡勤儉。

柳寅東列傳

柳寅東。四川梓潼人。明崇禎四年進士。官御史。巡按順天。流賊李自成陷京師。寅東從賊。授僞值指使。本朝順治元年投誠。授原官。疏言。頃見吏部除官。凡前朝犯贓削職。及受流賊僞職諸臣。概予錄用。恐賢否混淆。或爲民害。請罷斥禁錮。以清銓政。又言。方今景運方新。民志未定。犯罪者僅以鞭笞從事。不足威衆。宜速定律令。頒示中外。得旨。歸順官民。旣經擢用。不必苛求。罪人鞭責。本覺過寬。自今問刑。暫準明律。副朝廷刑期無刑之意。又疏言。戡亂大計。惟流賊最急。當調蒙古入三邊。而大兵直趨秦晉。使賊腹背受敵。別遣兵扼蜀漢衝要。以防竄逸。上嘉納之。時畿輔初定。賦役尙沿明制。州縣額丁。

遭亂逃亡。有司虛立丁口。以符原額。里甲私編餘丁。責銀包納。謂之包丁。其逃亡荒廢之地。里甲如派土著末戶代輸地糧。及屯田已報陞科而實未墾者。坐令營路納糧。謂之荒糧。並爲民累。寅東奏請豁免。尋復疏請裁冗員。並得旨允行。二年擢太僕寺少卿。三年奉命巡撫順天。雄縣褫衿許平侯者。窩巨盜劉文禹等百餘人行劫。謀攻霸州容城。爲其黨侯尙志所首。寅東督兵捕許平侯及盜首二十餘人。餘黨解散。尋大興土賊李振宇就撫。寅東請貸其死。官給廩食。凡海子紅門諸土賊。咸責令偵捕自效。從之。初寅東與侍郎李元鼎善。其出爲巡撫也。元鼎荐其門下倪先任。才堪使令。寅東遂給以參將牌劄。四年。部議先任以曾爲盜黨。寅東濫給牌劄。請逮訊。鞫實。與元鼎並罷職歸。八年。上親政。詔寅東仍以巡撫起用。十三年。湖廣巡撫員缺。吏部擬列寅東名進。給事中姚延啓劾其年老才庸。請勒令休致。下部議。寅東精力已衰。應以巡撫銜致仕。從之。未幾死。

明末漢奸列傳 卷十一

明末漢奸列傳卷十一

陳之龍列傳

陳之龍。江西宜春人。明舉人。歷官三邊監軍道。流賊李自成陷陝西。之龍降賊。授僞甯夏節度使職。本朝順治元年。大兵定京師。之龍舊將董學禮自懷慶降。以書招之。及英親王阿濟格追賊陝西。之龍詣軍門降。委署三邊總督。移駐固原。二年三月。進京。陛見。十一月。授都察院右僉都御史。巡撫鳳陽。三年三月。疏言。臣自徐入境。見小口河決。沛縣首受其害。舊黃河水橫衝廬舍。邳州宿遷。半皆湮沒。當議蠲賑。淮揚地方文武。貪殘冒濫者不少。分別應參革更換。各屬皆有投順暫駐之兵。統馭無人。糜餉甚多。宜早定經制。上嘉納之。十一月。土寇劉和尚等由湖北蘄州突犯英山縣。之龍檄調廬陽六安兩營兵擊走之。又招降海賊徐見吾盧瑞宇等。四年正月。如皋縣土賊趙雲李七僞稱

都督。指稱明廢官李之椿爲謀主。謀攻通泰等處。之龍發兵。斬賊千餘。搜獲之椿。鞫訊之椿未與謀。因未繳出前明關防。遣戍。十月。協同漕運總督楊聲遠。剿鹽城壩灣賊。遣標將王永昌等。剿廬江賊。俱平之。五年。奏擒奸人黃毓祺于通州法寶寺。獲僞印及悖逆詩詞。原任禮部侍郎錢謙益。曾留毓祺宿。且許助資招兵。詔總督馬國柱。嚴鞫毓祺。死于獄。謙益辨明得釋。時江西鎮將金聲桓叛。攻陷無爲州。巢縣等處。巡按潘朝逸。劾之龍不能禦寇。縱兵淫掠。得旨降二級調用。又以審理周龍隱。匿明逃藩。遂平王眷屬一案。遲延朦混。下部議革職。之龍尋死。

駱養性列傳

駱養性。湖廣嘉魚人。明崇禎時。官錦衣衛都指揮使。洊遷左都督。加太子太傅。當周延儒與吳牲同秉政。吹引用養性。牲持不可。且因召對。言廠衛弊害。延儒附和之。養性怨牲。並怨延儒。行人司副熊開元。養性鄉人也。劾延儒罪。莊烈帝怒其讒譖輔臣。令錦衣

衛逮至嚴訊。時給事中姜琛。以邈玩詔旨。亦下錦衣衛。養性告同官以奉密旨。令斃兩人於獄。同官舉天啓時掌衛事。鍛鍊殘酷。崇禎初。伏誅之。田爾耕許顯純爲戒。養性懼。漏語于同鄉給事中廖國遴。國遴以語同官曹良直。良直疏劾養性。歸過于君而自以示恩。若無此旨。不宜誣謗。卽有之。不宜洩。請誅養性。疏入。留中。會吳甡以出征襄陽。延緩罷任。養性搆陷之。謫戍金齒。延儒督師通州。飲酒娛樂。而日騰章奏捷。養性陰刺其軍中事以聞。延儒罷歸。養性復與中宮結。騰蜚語。莊烈帝乃盡削延儒職。遣緹騎逮至京。令自盡。開元琛並出獄。遣戍養性任職如故。流賊李自成陷京師。養性從賊。至本朝。順治元年。睿親王多爾袞定京師。養性與御監太監張澤民迎降于城外。旋與錦衣衛都指揮同知王鵬冲等率旂尉陳設儀仗。導引入武英殿。王令養性仍原官。六月。令總督天津軍務。七月。疏言。鹽課一節。誠今日兵餉急需。然鹽課出自南戶部。一時路阻。難以膠柱。應權刻鹽票。以當正引。卽令商人赴戶部。按引納課。發鹽運使掣鹽。至徵課。舊例。每引徵銀六錢五分七厘有零。加徵遼東等餉。在各商苦于上納。食鹽之民。又苦價

高病商病民。莫此爲甚。現在津兵待餉。請卽以長蘆鹽課抵兵餉。庶爲商民兩便。從之。又疏請徵納錢糧照舊例。每兩加火耗三分。其餘停免。得旨。錢糧徵納每兩火耗三分。正是貪婪積弊。何云舊例。况今正賦尙宜酌蠲。額外豈容多取。着嚴行禁革。先後疏荐明尙書張忻。侍郎黨崇雅。李化熙。副都御史房可壯。通政使王可弼。並得旨徵用。十月。以擅迎明福王朱由崧。所遣使臣左懋第等。部議革職爲民。上念養性有迎降功。革總督任。仍加太子太傅左都督銜。十二月。賜鞍馬。二年正月。奏言漕糧爲國計所關。明舊額四百餘萬。皆取於江南。北京大兵業已渡河。當以總漕大臣前往。相度料理。隨收隨解。庶京庫有儲。又兩淮鹽務。國計所賴。招商裕課。亦宜及時圖度。並下部知之。五月。敕迎順功。加太子太師。六月。百戶安啓懋。許養性貪婪通賊事。下法司訊。不實。褫啓懋職。十月。疏言。守候期年。未蒙委任。今陞太子太師。何敢坐糜廩祿。而不思報效。伏懇勅諭吏部。得旨。靜候簡用。五年八月。吏部以養性原係武職出身。前已緣事。不應再補文職。請勅兵部降用。六年二月。授浙江掌印都司。尋死。

張若麒列傳

張若麒。出東爨州人。明崇禎四年進士。任清苑縣知縣。十一年。行取考選。得用給事中。檢討楊士聰劾吏部尙書田維嘉考選行私。莊烈帝因親策諸臣。若麒僅得刑部主事。大失望。謀改兵部。會少詹事黃道周劾大學士楊嗣昌奪情起復。嗣昌亟購人劾道周。若麒鄉試。爲職方司郎中王陞所取中。至是陞以密結嗣昌新擢太僕少卿。示意若麒。若麒遂疏詆道周曰。頃者大布王言。諄諄然以正人心息邪說爲治天下之大本。舉黨同伐異之隱情。招權納賄之狡術。無不見其肺腑。數日以來。羣黨藉藉。或擲抄傳之邸報而怒視。或引王論之遠事而訴譏。有謂召對之日。黃道周犯顏批鱗。古今未有。而上爲之理屈者。又謂堅求一死。而上左顧言他。始終無如道周何者。要使古今未有之好語。盡出自道周口。而凡可以歸過君父者。無所不至。其飾六藝以文姦言。務在假託道學以把持朝廷。而顯行其呼朋引類之計。舉國如狂。莫之敢指。臣何敢長其兇鋒而不

言。疏人。貶道周六秩。調外。嗣昌以若麒知兵。調爲兵部職方司主事。尋遷郎中。十四年。我太宗方皇帝圍錦州。總督洪承疇集諸鎮兵來援。未敢決戰。兵部尙書陳新甲遣若麒往商於承疇。欲分四路夾攻。承疇慮兵分力弱。議主持重。若麒以圍可立解入告。新甲益趣承疇進兵。若麒屢報捷。洊加光祿寺卿。旣而諸軍自松山出戰。我師擊敗之。傷殫各半。若麒自海道遁還。新甲庇之。復令出關監軍。十五年二月。松山城破。若麒復自甯遠遁還。時大學士謝陞與新甲庇若麒。並爲廷臣交章糾劾。御史米壽圖劾若麒本不諳軍旅。諂附楊嗣昌。遂由刑曹調職方。督臣洪承疇孤軍遠出。若麒任意指揮。視封疆如兒戲。虛報大捷。躡光祿卿。冒功罔上。恃鄉人謝陞爲內援。當駢斬以慰九廟之靈。於是若麒論死。繫獄。及流賊李自成陷京師。縱出之。受僞職。爲山海防禦使。本朝順治元年。睿親王多爾袞定京師。若麒迎降。授順天府丞。暫管府尹事。七月。若麒啓請撥付兵馬往勦其鄉賊寇。以濟南袁州東昌聽招撫侍郎王鰲永經理。而已分任登萊青三府。睿親王以府尹不便領兵。進征諭止之。先是吳三桂爲明總兵。若麒素相識。及我朝

封三桂爲平西王。若麒數通餽問。睿親王諭責之曰。大小臣工。只應辦本等職業。不宜諂上瀆下。今察知順天府差人取魚向各王府投送。恐各官效尤。諂瀆成風。自後不得勞民獻諛。有乖政體。若麒啓辯。各王府從未輕謁。惟平西王係舊知。曾往弔其父喪。又值生辰。一往拜壽。亦無取魚投送之事。此有人設謀諂害。故造爲謗言也。睿親王諭以事豈無因。姑不究既往。九月。若麒父熙家居。被土賊葛欽焚宅。刦財傷亡。疏請丁憂回籍。得旨。解任。在京守制。二年四月。乞假葬父。允之。又爲父請卹。下部議。准予祭奠。五年九月。起補順天府丞。七年。遷大理寺少卿。旋遷太常寺卿。管太僕寺卿事。九年四月。擢通政使。八月。乞假歸省母病。十年三月。以母病愈。已亦患病。乞在籍調理。十三年。遇京察。以久病休致。死于家。

方大猷列傳

方大猷。浙江烏程人。明崇禎十年進士。官直隸井陘道。福王時。以大猷曾降附流賊李

自成。定入從賊案。本朝順治元年五月。投誠。受鹽庫道。隨侍郎王鰲永招撫山東。七月。擢山東巡撫。疏請頒詔崇祀孔子。定闕里儀章典制。得旨。先師爲萬世道統之宗。禮當崇祀。昭朝廷重道尊師至意。下部詳議舉行。大猷復請以無業荒地。分給流民及守兵。屯種三年。起科。開礦長清諸處。鑄錢充餉。行保甲以弭盜。減鹽課以卹商。皆議行。又疏荐明庶吉士張端主事李森先等。得錄用。時兗沂間土賊嘯聚。大猷遣兵勦撫。屢奏績。二年二月。給事中韓源劾奏山東吏治弊壞。拾獲盜。輒賄脫。大猷擅逐長山知縣張廷鈺。不入告。輒以州判梁起禎代。縱其貪婪。詔大猷回奏。大猷言。土賊就撫。法得寬宥。非關賄脫。梁起禎貪婪無據。張廷鈺由巡撫朱郎鑠議罷。不入告。咎在郎鑠。于是韓源復劾其欺飾。郎鑠亦劾大猷擅逐廷鈺。有牒可據。所奏誣罔。事下登萊巡撫陳錦巡按李之奇查核。大猷坐謬罔。部議革職。得旨。從寬降調。六月。授密雲兵備道。先是長清土賊李明尹三清就撫。旣而二人械鬥訟縣。大猷時爲巡撫。令斬之。以旣降復叛入奏。上覽奏。未有叛據。且不應先斬後奏。命陳錦覆勘。得實。大猷已之道任。奉諭嚴責回奏。大諭

謂李明等不殺終叛。急誅之以除後患。其時尙未定重辟奏請上裁之例。故據行撿斬。乞賜原宥。上大獄既經降調。免議。九月。以總漕楊方興荐調河南管河道。時汴梁決口未塞。小宋口曹家寨流通集諸處。先後衝決。大獄初仕明。曾爲管河道。方興謂其練習河務。故荐之。七年八月。河決荆龍口。大獄議以來春鳩工。于上流築長堤。緩遏其勢。乃築小長堤於決口。請帑十萬兩有奇。期以半年蒞事。八年二月。部推江南按察使。方興奏留之。命以按察使銜。仍管河務。尋荆龍決口逾期未塞。削銜留任。十年。河決大王廟。給事中周體觀林起龍等交章劾大獄耗帑誤工狀。方興爲剖辯。得免議。十三年。總督李蔭祖疏劾大獄曰。決河以殃民者。河伯也。治河以奠民者。河道也。今百姓不怨。河伯而怨河道。由大獄奇貪極狡。峻削之術。旣工。錙銖之利必盡。慾壑雖填。民膏已竭。因臚列其科斂婪取數十款。得旨。鞫治。詔革職。下撫按逮訊。得實。計贓論絞。越四年。死於獄。

高爾儼列傳

高爾儼。直隸靜海人。明崇禎十二年進士。授編修。福王時。以爾儼曾降附流賊李自成。定入從賊案。本朝順治二年四月。以庶子李若琳荐。授祕書院侍講學士。七月。遷禮部右侍郎。五年。調吏部右侍郎。六年。詔加右都御史。八年三月。轉吏部左侍郎。八月。擢補本部尙書。加太子太保。九年。侍宴中和殿。賜貂鑲朝衣二襲。十年正月。御史吳達劾爾儼任匪人濫筭。漫無銓別。且以部事批決於家。不宜任冢宰。下部察奏。以所劾無據。免議。二月。引疾乞休。上允之。尋諭吏部曰。爾儼存心醇謹。行事和平。近告病謝事。其病朕已悉知。內院事務殷繁。高爾儼仍以太子太保補宏文院大學士。其力疾入院辦事。毋以疾辭。十一年。以病解任。尋死。諭曰。大學士高爾儼。和平潛謹。歷任勤勞。雖謝事養病。恆望痊可。以竟謨猷。忽聞溘逝。朕深憫惻。應給恩卹。著從優淹例具奏。十二年。特贈少保。賜祭葬。諡文端。廕一子爲中書舍人。

張忻列傳

字張端附

張忻。山東掖縣人。明天啓五年進士。初任河南夏邑知縣。行取授吏部主事。累遷太常寺卿。崇禎時。官刑部尙書。給事中姜琛先以言事下獄。會歲疫。出諸囚。琛亦出。卽謁謝賓客。莊烈帝聞之。以詰忻。忻懼。復繫之獄。流賊李自成陷京師。忻從賊。至本朝。順治二年四月。以天津總督駱養性荐。授兵部左侍郎兼右副都御史。巡撫天津。閏六月。疏言。津門防海護漕。宜充實營伍。糧餉無缺。今計兵餉。欠支半年。請勅部給發。三年十月。疏言。滄州當衝要。凡奉差船。動索繹夫百餘。復需馬趕夫名爲繹馬。係明季相沿陋習。借名色以便折價。豈有步行人夫用馬追趕者。貽累地方。莫此爲甚。應革。十二月。疏言。靜海興濟二縣。衝疲已極。更疊遇災。地土荒蕪。仍徵糧征賦。民力難支。請恩旨蠲免。疏人。俱議行。四年。靜海唐官屯士寇作亂。戕副將周天命等。忻坐飭防不密。喪師掩飾。降二級調用。尋以病致任。十五年。死。子端。崇禎十六年進士。改庶吉士。亦從賊。本朝順治二年。山東巡撫方大猷薦其才。召至京。同明庶吉士成克鞏高珩考試。大學士馮銓等擬端列中等。例授科道部屬。因編纂乏人。奏授宏文院檢討。充明史纂修官。三年。充江

南鄉試正考官。五年遷祕書院侍講學士。六年正月轉國史院侍讀學士。九月遷學士。九年正月恭修太宗文皇帝實錄充副總裁。五月遷禮部左侍郎。十年擢國史院大學士。十一年死。贈太子太保。賜祭葬。諡文安。廕一子中書舍人。

張縉彥列傳

張縉彥。河南新鄉人。明崇禎四年進士。歷清澗三原知縣。十年行取入京候考選。逾年未得命。莊烈帝聞諸臣營競及濫徇狀。責問吏部尙書田維嘉。維嘉請先推部曹二十。二。縉彥預焉。遷戶部主事。十一年給事中吳麟徵等劾維嘉賍私。乃召候考諸人。及已推部員。集中和門試策。親定十人爲翰林。縉彥改授編修。先是縉彥任主事時。以前官陝西悉賊勢。疏言賊長技在分。窮技在合。請分番兩軍。一道一駐。則官兵不受牽制。而賊可盡滅。至是給事中沈迅荐其知兵。改兵科都給事中。縉彥疑尙書楊嗣昌嫉迅使之去翰林。上疏劾嗣昌。十六年兵部尙書馮元飈見賊勢張。稱病去。荐李邦華史可法

自代。莊烈帝不從。超擢縉彥爲兵部尙書。十七年二月。流賊李自成逼畿輔。副都御史施邦曜語縉彥。急厲士卒固守。檄天下勤王兵入援。縉彥不爲意。莊烈帝召廷臣問兵餉。皆不能對。因憤惋斥縉彥負國無狀。縉彥頓首乞罷。二月。李自成陷京師。縉彥與大學士魏藻德率百官表賀。素服坐殿前。羣賊爭戲侮之。太監王德化叱其誤國。四月。我朝兵入山海關。李自成敗走。縉彥竄歸鄉里。聞福王朱由崧處據江寧。馳疏自言。集義勇。揜僞官。收復列城。卽授原官。予總督河北山西河南軍務印。聽便宜行事。時方治從賊案。刑部尙書解學龍旣分六等擬罪。以縉彥已奉錄用列其名上。大學士馬士英方秉政。凡大僚降賊。賄入。輒不問。御史沈宸荃疏劾縉彥由部曹拔置詞垣。不數年擢典中樞。乃率先從賊。宜卽加極刑。不當屈法錄用。給事中李維樾亦糾之曰。縉彥闇習失機。寸斬莫贖。逆賊入宮。青衣候點。及賊西走。乃鼠竄狼奔。伏草求活。逃散餘魂。安能收復河北。總督重任。奈何遽畀賊臣。疏入。皆不報。縉彥旣受命。士英復用其姻婭。越其傑。爲河南巡撫。貪冒不知兵。結寨自守。莫爲用。縉彥奏令總兵許定國王之綱。劉洪起等。

畫疆分守。然亦不能馭也。本朝順治元年九月。都統葉臣等征山西。師過河北。縉彥詣軍門納款。巡撫羅縉錦趣其赴京。縉彥佯稱足疾稍愈。卽由長垣入朝。旋由陳橋渡河而南。縉錦聞其已受明福王三省總督之職。籍其所留新鄉家產以聞。及豫親王多鐸統師定河南江南。縉彥乃遁匿六安州商麻山中。三年二月。招撫江南大學士洪承疇檄總兵黃鼎入山招之。縉彥赴江寧納款。齎繳總督印。及解散各寨士民冊。承疇疏荐之。五月。縉彥赴京師。議以投誠在江南大定後不用。九年。河南巡撫吳景道巡按王亮教交章荐。下吏部考核酌用。給事中魏裔介疏言。縉彥在明朝身任中樞。一籌莫展。有盧杞賈似道之奸。而庸劣過之。當流賊李自成逼北京。匿不以報。於賊爲功首。於明爲罪魁。故都城破日。爲司禮內監王德化發憤毆擊。衆所共覩。其喪心無恥。雖閹宦羞與爲類。幸逢恩赦。得飲啄於光天化日之下。已爲厚幸。若授以帷幄之寄。廁諸顧問之班。彼既不忠於昔日。豈能效用於朝。乞勅部擯棄。以協具論。勿使魑魅魍魎。白日公行。疏入。其鄉人給事中蘇文樞奏。縉彥屢經荐舉。不當追論前朝舊事。疏並下吏部議。以右

布政使用。十年二月。授山東右布政使。甫任事。以緝獲私鑄報部。戶部陳書陳之。遴暨大學士管吏部事陳名夏等奏。予從優議敘。爲御史王秉乾所劾。上以名夏之遴植黨徇私。諭責之。十一年。遷浙江左布政使。十五年。擢工部右侍郎。十七年二月。上甄三品以上大臣。諭曰。張縉彥自擢任侍郎。不能實心任事。且耽情詩酒。好結納交遊。沽名取悅。殊失人臣靖共之義。著降四級調外用。尋補江南徽寧道。是年六月。左都御史魏裔介劾大學士劉正宗罪惡。言縉彥與爲莫逆友。序其詩。稱以將相之才。詞詭譎而心叵測。均革職逮訊。御史蕭震復疏劾縉彥曰。明之亡也。始於士大夫之朋黨。終於奸臣之賣國。縉彥任明爲尙書。在籍時卽交通闖賊。至京開門納款。猶曰事在前朝。已邀上恩赦宥。乃自歸誠後。仍不知洗心滌慮。官浙江時。編刊無聲戲二集。自稱不死英雄。有弔死在朝房。爲隔壁人救活云云。冀以假死塗飾其獻城之罪。又以不死神奇其未死之身。臣未聞有身爲大臣。擁戴逆賊。盜鬻宗社之英雄。且當日抗賊殉難者有人。闔門俱死者有人。豈以未有隔壁人救活。遂彼英雄。雖病狂喪心。亦不敢出此語。縉彥乃筆之。

於書。欲使亂臣賊子相慕效乎。是其在明季則傾覆天下以利身家。在本朝則煽惑人心爲害風俗。假令已死。尙當鞭戮其屍。示戒將來。豈容生存漏網。請勅明正典刑。以肅綱常於萬世。疏並下王大臣察議。以縉彥詭詞惑衆。及責訊時。又巧辯欺飾。擬斬決上貸。縉彥死。褫其職。追奪誥命。籍沒家產。流徙甯古塔。尋死。

劉餘祐列傳

劉餘祐。順天宛平人。明萬歷四十四年進士。歷知嘉興登封河內三縣。行取遷刑部郎中。出知平陽府。累遷河南布政使。應天府兼工部侍郎。福王時。以餘祐曾降附流賊李自成。定入從賊案。本朝順治元年。睿親王定京師。餘祐投誠。授原官。時京東土寇竊發。疏請移順天巡撫駐密雲。薊州道駐遵化。從之。又荐故明尙書仇維禎侍郎任濬副都御史賈毓祥御史張煊霍達傳景星莊憲祖舉人孫奇逢梁維本等九人。下部知之。六年。加太子太保。七年初。設六部漢尙書。擢餘祐兵部尙書。八年閏二月。調刑部。八月。晉

少保九年四月。疏陳律例六款。一。斬絞雖同一死。畢竟有別。概論斬則過重。應照例分別處決。一流徒律各有等。流則地分遠近。徒則限分年月。凡流罪惟隱匿逃人。應解部彙發。今則流罪俱解部。徒者鞭責外竟放不充。輕重多失。竊思流者以罪不至死。故量定三等。且里數亦就本犯之地論。如一概解部而後徒。則遠省跋涉。多至數千里。不死於道路者寡矣。律原不言解部。應改正徒罪亦照律簽發。限滿釋放。一。誤傷致死。律應絞。自五年奉旨。改折資四十板。賠一人。夫以賠人作抵命。是開斃法之端。死冤不雪。應仍照律定擬。一。強盜論斬。律文不云籍沒。且自甘爲盜。安有厚家。籍沒之物甚微。而稽查有無。騷擾鄉里。起送押運。大費腳價。至妻子則罪人不拏。豈容增累。今除強盜正法外。其妻子家產應免籍沒。一。隱匿逃人。窩主免死。流徙關外。須提取妻子盤費。不得不監候。有妻產已到。而戶部以人數零星。必積至數。起始押發一次。時或病死獄中。今應勅部陸續押發。卽隱匿之家。亦有至情可憐。如父母之於子。與子之於父母。離亂重逢。天性難割。與常人有。心隱匿者不同。乞量與分別。一。投旂漢人。生事害民。前已勅部曉

示。凡投充犯法。與民屬一體究治。今復奉旨。不許稽禁旂人。則凡自稱旂人者。地方官莫辨真假。何以措手。今除真正旂下舊人犯事。卽送部審。不許監禁外。如投充人借勢生事。請仍遵前旨。一體究治。又疏言。向例原止許貧民投各旂爲役。嗣後有身家地土者。一概投充。遂有積奸無賴。或因圈地而甯以地投。或本無地而潛以他人地投。甚且帶投之地有限。恃強羈佔。百弊叢生。地方有司不敢究治。請將投充之人。總發州縣。查明佔地。各還原主。俱下部議行。十月調戶部。先是餘祐任刑部時。興安鎮總兵任珍。以疑擅殺妻妾。懼罪行賄。已而事覺。十年二月。法司勘問得實。餘祐革職杖徒。永不敘用。尋死。

龔鼎孳列傳

龔鼎孳。江南合肥人。明崇禎七年進士。援兵科給事中。十六年。大學士周儒延罷歸。舊輔王應熊赴召。將至。鼎孳疏劾。應熊結納延儒。營求再召。政本重地。私相援引。延儒再

出。應熊復來。天下事豈堪再誤。疏入。留中。未下。會延儒被逮。在道。不卽赴。冀應熊先入。爲之解。莊烈帝知之。命應熊歸。賜延儒死。時兵部尙書陳新甲獲罪棄市。鼎孳又疏。詆呂大器爲陳新甲私人。不宜令總督保定山東河北。忤旨。鐫秩。及流賊李自成陷京師。鼎孳從賊。受僞直指使職。巡視北城。本朝順治元年五月。睿親王多爾袞定京師。鼎孳迎降。授吏科右給事中。尋改禮科。二年九月。遷太常寺少卿。三年六月。丁父憂。請賜卹典。給事中孫埴齡疏言。鼎孳明朝罪人。流賊御史。蒙朝廷拔置諫垣。優轉清卿。曾不聞夙夜在公。以答高厚。惟飲酒醉歌。俳優角逐。前在江南。用千金置妓名顧眉生。戀戀難割。多爲奇寶異珍。以悅其心。淫縱之狀。哄笑長安。已置其父母妻孥于度外。及聞父訃。而歌飲留連。依然如故。虧行滅倫。猶冀邀非分之典。誇耀鄉里。欲大肆其武斷把持之燄。請勅部察核停格。疏下部議。降二級調用。尋遇恩詔免。九月。補原官。十年。擢刑部右侍郎。奏定本部事宜一。諸司問擬大小獄情。宜悉依律文確議。不得棄律科罪一。折獄務得其情。虛者卽爲申雪。實者推詳定案。毋持兩可。一。獄訟宜令滿漢司官會訊。錄詞

呈堂復審。或擬罪。或釋放。加以勸語。付司存案。一處決重囚。宜令科臣將應決人犯詳註姓名。其有情罪允當者。許即時執奏。一遣戍罪人。宜就原籍遠近。定地發遣。一畿輔州縣旂民交訟。惟命盜案情。仍赴部質審。鬥爭細事。請卽令各州縣審擬。申報督撫結案。一老幼篤病。律有收贖之條。請再爲申明。凡重犯連坐之家屬。卽與依律科斷。下所司議行。明年二月轉戶部左侍郎。五月遷都察院左都御史。十一月疏請招納流民。先擇寺院聚處編列保甲。互爲稽查。仍仿京城賑粥例。有司親爲經理。其往他處者。卽令所在道廳招集。量給資本留屯。毋令失所。十二年八月。詔停刑部秋決。鼎孳疏請令內外概行停決。以彰一視之仁。又奏。每年六月審定立決重犯。俟七月具題正法。並下部議行。先是給事中許作梅。莊憲祖等交章劾大學士馮銓。睿親王集科道各官質問。鼎孳斥馮銓。背負大啓。黨附魏忠賢作惡之人。銓曰。流賊李自成陷害明帝。竊取神器。鼎孳反順逆賊。竟爲北城御史。鼎孳曰。豈止鼎孳一人。何人不曾歸順。魏徵亦曾歸順太宗。王笑曰。人果自立忠禎。然後可以責人。鼎孳自比魏徵。而以李賊比唐太宗。可謂無

恥。似此等人只宜縮頸靜坐。何得侈口論人。遂罷不問。嗣以陝西地震。鼎孳疏論任輔弼。敘秩考課諸事。上知其意必有所指。令指實回奏。又語涉馮銓。上以馮銓果有罪。卽宜糾劾。何得責令回奏。始引銓抵塞。諭責之。至是上以鼎孳自擢任左都御史。每於法司章奏。倡生議論。事涉滿漢。意爲輕重。飭令回奏。鼎孳具疏引罪。詞復支飾。下部議。應革職。詔改降八級調用。尋以在法司時讞盜事。後先異議。又曾荐舉納賄伏法之巡按顧仁。再降二級。十三年四月。補上林苑蕃育署署丞。閏五月。大學士成克鞏論鼎孳黨護左通政使吳達。隱其弟吳遠通賊事。請勘訊。下部察問。鼎孳以不知遠爲達弟申辯。罷俸一年。十七年。詔甄別京員。以鼎孳素行不孚衆論。復降三級調用。罷署丞。康熙元年。諭部以侍郎補用。明年起都察院左都御史。奏免康熙元年以前催徵未完錢糧。三年。遷刑部尙書。疏言法司審擬事件。若非徇私枉法。雖或議罪稍輕。引律未協。旣行改正。應免處分。從之。五年。轉兵部。八年。轉禮部。九年。充會試正考官。十二年。再充會試正考官。八月。疾。致仕。九月。死。賜祭葬如例。謚端毅。

孫承澤列傳

孫承澤。順天大興人。明崇禎四年進士。官至刑科都給事中。福王時。以承澤曾降附流賊李自成。定入從賊案。本朝順治元年五月起。授吏科都給事中。七月。疏荐羈州道劉芳久。才堪辦賊。請加銜久任。詔以羈州土寇未絕。芳久無功。所舉爲徇私。切責之。十一月。遷太常寺少卿。提督四譯館事。二年四月。遷左通政。八月。遷太常寺卿。四年六月。遷大理寺卿。五月。擢兵部右侍郎。八年。調吏部。九年四月。都察院疏糾承澤兩耳失聰。請勅部革退。因解侍郎任。五月。上以承澤無罪。不應革退。命如舊供職。八月。轉左侍郎。兩遇恩詔。加太子太保。都察院左都御史銜。十年二月。吏部尙書高爾儼以疾乞罷。承澤奏言。吏部尙書權衡所寄得人爲難。伏見大學士陳名夏在吏部時。頗能持正。請以名夏分理部事。必能仰副澄清之治。上覽奏。謂閣臣曰。朕見承澤此疏。洞其隱微。代爲含愧。彼意允其所請。而用名夏。則於彼有利。否則又將使朕猜疑名夏也。因以侍郎推舉。

閣臣有乖大體。責令回奏。承澤戰慄引罪。自陳愚昧。乞宥。諭侍臣曰。凡人自知有過。宜卽行引罪。若強自置辯。則獲罪滋大。乃釋之。尋上幸內院。覽諸奏章。及明萬歷時史書。言及承澤所奏。諭大學士洪承疇等曰。六部大臣。互相結黨。殊不合理。祇宜爲君爲國。秉忠持義。善善惡惡。爲是。皆叩頭謝。先是正月。承澤引疾乞休。上以其年尙未衰。不許。三月再請。乃許。承澤旣歸。御史楊義劾承澤素附陳名夏。表裏爲奸。積年罪狀可據。承澤上書自訟。十一年。部議應休致。遂不復用。康熙十五年。死。賜祭葬如例。所著有五經翼。春明夢餘錄。庚子銷夏記。

薛所蘊列傳

薛所蘊。河南孟縣人。崇禎元年進士。任山西襄陵縣知縣。卓異。授翰林院檢討。尋遷國子監司業。福王時。以所蘊曾降附流賊李自成。定入從賊案。本朝順治元年五月。睿親王多爾袞定京師。所蘊迎降。六月。授原官。二年二月。疏言。河南受賊荼毒。村社盡墟。當

專設勸農墾荒官。資以牛種。俟三年成熟。陸續補還。奏入。報聞。四月。遷祭酒。五月。奏稱滿洲學生。皆沈毅聰俊。志趨向上。國學僻處東北隅。遠者十五六里。近亦有數里。奔馳道路。辰巳間始到監。申刻回家就食。功課止午未二刻。有名無實。惟晝夜在監讀書。庶有實益。而號舍供結未定。宜勅部院酌議。得旨。滿洲子弟就學。請分四處。每處用伴學十名。勤加教習。十日一次起監考課。五日一次。就本處演射務。令文武兼資。以儲實用。八月。疏言前監臣李若琳請漢一品至七品官子孫入監讀書。清漢書未詳。內外文武現任原任之互異。及入監數目多寡。乞定文京官四品以上。外三品以上。武官二品以上。俱准送一子入監讀書。年老致任。病歸。及降革者。現任所送。仍准留監。革任後不准從之。四年正月。因誤收學臣咨送貢監濫額。降一級調用。尋補太僕寺寺丞。五年。轉通政司右參議。七年。遷順天府府丞。八年。晉太僕寺卿。九年六月。改詹事府詹事。八月。疏言。署後舊建經庫。又設司經局官。兵燹後。散佚無存。請勅部直省學臣量動學租及缺官。缺廩銀購遺書。解藏經庫。至國子監。現存十三經。二十一史。並乞頒發。以司經局官

典守。得旨允行。九月。教習庶吉士。十年。轉宏文院學士。十一年十月。擢禮部左侍郎。十二年。轉左。十四年。御史高爾儼劾所蘊年老。每會議。渺無職見。宜引退。所蘊亦乞休致。康熙六年。死。賜祭葬如例。

傅景星列傳

傅景星。河南登封人。明崇禎十年進士。授山西平陽府推官。尋遷山東道監察御史。巡按陝西。未行。流賊李自成陷京師。景星從賊。授僞兵政府侍郎。掌職方司。本朝順治元年。錄明舊臣。授原官。二年正月。巡按順天。二月。疏言。民房應給旗下者。當寬限。俟移後。令管業。又州縣清查絕產。既已入官。老稚無依。衛地入官。屯軍亦無棲止。請量給閒房。仍編入戶口。嚴禁逃亡。八月。疏言。田地被圈之民。俱兌撥鹹薄屯地。請照原額起徵。倘支解不敷。再於支解額中量省。九月。疏言。完縣地瘠賦重。原額止五分零。後加至七分有奇。較各州縣三四分不等。請照原額徵收。均下部議行。先是商民出海運糴有禁。十

一月。景星以天津所居者衆。民食取給山左。本年歲本歉收。賴商販接濟。請弛禁。聽民自便。詔如所請。三年正月。疏言。皇上初以東兵未有恆產。令圈種無主田地。又以滿漢雜處未便。令擇處一方。去年已有定區。續撥將蔓延無制。且莊房必近圈地方。以便耕鑿。乞勅部發示所撥地畝。察其與去年之圈地相隣者。不必復及他方。其莊房亦上于原地內所有者。不必圈及他地。更除大路鎮店免撥。以便行旅。三月。疏言。奸徒謀充莊頭。於續撥之田。任意圈種。請究治示懲。又請蠲靜海興濟青縣三縣荒地錢糧。俟成熟照例起科。俱得旨允行。四年。遷太僕寺少卿。六年。轉左通政。八年。遷通政使。九年。遷左副都御史。十年。遷工部右侍郎。十二年二月。給事中韓庭芑劾景星久居風憲。羅列無恥。繼轉工部。值河決。一籌莫展。且年老臃腫。請賜罷斥。得旨。傅景星自行回奏。五月。以病乞假歸。尋死。

李元鼎列傳

李元鼎。江西吉水人。明天啓二年進士。官至光祿寺少卿。流賊李自成陷京師。元鼎從賊。授僞光祿寺少卿。本朝順治元年。睿親王定京師。元鼎投誠。授太僕寺少卿。二年二月。裁太僕寺缺。命爲原官。四月。遷本寺卿。尋轉太常寺卿。七月。擢兵部右侍郎。八月。疏言臣鄉襟江帶湖。據金陵上游。控閩粵而連浙楚。舊有江西巡撫控制全省。又有南贛巡撫分理。承平無事。且不可一日缺人。况又地方多事。非得人料理。恐殘兵餘寇。再肆蹂躪。懇恩速簡重臣二員。速往受事。下所司知之。三年。疏言吉安一郡。祇臣一人。受職盛朝。負固之兵。視臣家爲仇讎。倡亂之衆。以臣家爲魚肉。致臣弟逼死。臣母驚病。家口流離。盡皆散失。今吉安已復。懇恩給假歸省。疏下吏部。以樞務正繁。未許因私請假。得旨。著照舊辦事。四月。因元鼎曾荐私人倪先任于順天巡撫柳寅東。聽用後。獲刦盜劉傑等。稱先任是其同黨。鞫實。先任正法。部議。元鼎職係樞臣。輒送匪人聽用。雖稱不知爲盜。未可遽信。應擬斬。寅東不查來歷。收用先任。後雖斥退。亦擬杖徒。特恩免。元鼎寅東罪。姑革職。八年閏二月。吏部尙書譚泰。陳名夏等。遵旨荐舉人材。稱元鼎歷任清勤。

前緣事褫革。非賊私可比。請錄用以備驅使。詔起送來京。八月復原官。十年以總兵任珍前任興安擅殺妻妾。懼罪遣人至京行賄。至是事敗。兵刑二部株連得罪者十餘人。元鼎議罪尤重。應絞。恩詔仍免死杖徒折贖。未幾死。子振裕累官禮部尙書。

熊文舉列傳

熊文舉。江西新建人。明崇禎四年進士官吏部郎中。福王時以文舉曾降附流賊李自成。定入從賊案。本朝順治元年投誠仍原官。二年授右通政遷吏部右侍郎。會大兵平江南。明福王朱由崧就擒。文舉疏陳四事。一江浙閩粵等處。明季加派賦額。宜悉蠲免。一福王所授官。多市井冒濫。雖已投誠。不可委用。一山林隱逸。有清望素著。潛修博學者。請下郡縣報舉。一國家初定。凡率先効順。歷著勤勞者。請特加優異。得旨允行。旋以疾去官。八年閏二月吏部列荐。詔起用。八月補吏部左侍郎。時江西自叛。鎮金聲桓蹂躪之後。逋賦積壅。詔悉蠲。順治五年以前積逋。文舉請廣皇恩。斷自大正以前。又以有

司丈量荒地。奉行無實。或借端苛索。請勸撫按清釐嚴剔。又言大臣不知進退大節。無以表率下僚。請勸勵羣臣。毋貪持祿位。頽病者致仕。親老者終養。務敦名節。以肅官常。九年。請諭各省大吏。約束守令。禁幕客家人招搖。及縱蠹役爲民累。又江右甫經兵燹。無貢生應考學官之人。武生雜流。俱夤緣委署。請命撫按學臣。察擇舉人之文行兼優者充之。諸疏並下所司議行。初。文舉投誠時。其父洪在籍。明福王逮下獄。文舉子鼎華請以身代。得釋。而鼎華病死。江南平。有司上其事。詔旌鼎華。至是洪卒。文舉聞訃歸。康熙元年。起爲兵部左侍郎。二年。以病乞假歸。八年死。賜祭葬如例。

葉初春列傳

葉初春。江南湖口人。明崇禎元年進士。初爲常州府知府。曾櫻屬吏。以行取擢御史。後東廠譖櫻行賄。莊烈帝命械赴京。初春知其廉。於他事微白之。詔問詰。因言櫻賢。不知賄所從至。巡撫沈猶龍。巡按張肯堂。俱力白櫻寃。乃釋罪。初春轉給事中時。宣府總兵

李如松以父子兄弟並居重鎮。勢驕橫。屢被言官論劾。俱不報。初春請更調之。乃命如松與山西李承恩更鎮。遷初春太僕寺卿。尋擢工部左侍郎。福王時。以初春曾降附流賊李自成。定入從賊案。本朝順治元年。大兵定京師。初春赴闕投誠。仍原官。十二月。賜鞍馬。二年正月。丁母憂。時江西寇氛未靖。道途阻梗。詔令初春在京守制。八月。江西平。疏請回籍葬親。許之。初春隨具疏爲其父母及妻請祭葬。禮部議以初春投誠首附。簡在司空恭值大工鼎建。任事拮据。念茲經始。勞臣。恩卹宜及所生。應照例與其父母祭一壇。減半造葬。至伊妻止。有附葬之例。未便預爲題覆。上如議行。初春遂歸葬其親。尋死於家。

明末叛臣傳

(原名逆臣傳)

卷一

吳三桂

馬寶 汪屏藩附

李本深

卷二

張國柱 楊遇明等附

曹申吉 羅森等附

王輔臣

譚洪 子譚天祕鄭蛟麟附

祖澤清

耿精忠

曾養性 劉秉政附

卷三

劉進忠

尙之信

嚴自明

孫延齡

馬雄 子承廕郭義附

線國安

卷四

姜瓖

李建泰

金聲桓

章于天

李成棟

鄭芝龍

劉澤清

馬逢知

明末叛臣傳卷一

吳三桂列傳

吳三桂遼東人。父襄。明崇禎初。官錦州總兵。三桂由武舉隨征陣。累敘秩。後襄坐失機下獄。擢三桂總兵。以守甯遠有功。欲倚以禦流賊。封平西伯。並起襄提督京營。令薊遼總兵王永吉徙甯遠兵五十萬入衛。三桂留精銳殿後。甫至山海關。聞流賊李自成陷京師。入衛兵已潰。不敢前。自成脅襄以書招之。乃進攻灤州。先是三桂嘗就嘉定伯周奎飲。悅歌女陳沅。以千金購之。聞邊警。遣行。奎送沅于襄所。至是爲賊將劉宗敏掠去。三桂聞之。作書絕父。馳歸山海關。遣副將楊坤遊擊郭雲龍來歸。我朝借師。時順治元年四月。睿親王多爾袞奉世祖章皇帝命統師至甯遠。三桂上書曰。流賊逆天犯闕。僭稱號。罪惡已極。天下共憤。三桂受國厚恩。欲興師問罪。奈力弗敵。爰泣血求助。乞王速

整旅入關。與三桂合兵。直抵都城。掃除虛餓。昭示大義。此千載一時也。睿親王得書。許即進兵。且曰。伯誠率衆來歸。當裂土封王。三桂聞自成執襄置軍。糾衆三十萬東。益發使趣大兵。距山海關十里。三桂以賊分趨關外來告。睿親王遣兵擊賊于一片石。賊敗遁。明日三桂率衆迎。睿親王命三桂兵肩繫白布爲識。遂統師入關。自成營北山。橫亘至海。大兵對賊布陣。三桂居右翼。悉出精銳搏戰。至大風揚沙。戰良久未決。大兵呼聲再振。風止。從三桂陣右。衝賊中堅。騰躍合擊。大破賊。追奔四十里。是日睿親王令關內軍民皆薙髮。稱三桂爲平西王。分隸步騎三萬。先驅討賊。自成遂殺襄于永平。返京師。盡屠襄家屬。載輜重遁。三桂與英親王阿濟格。追至望都。屢戰皆捷。賊走山西。乃班師。世祖御皇極門。授平西王冊印。設宴。賜銀萬兩。尋以英親王爲靖遠大將軍。三桂從由邊外趨綏德。二年。克延安。鄜州。勦自成于襄陽武昌。東下九江。召還京宴勞。命赴鎮錦州。三桂以所給田多磽薄。請益。復爲所屬將校何進忠。楊坤。郭雲龍。吳國貴。高得捷等百二十餘人請世職。屬吏童達行。陳全圖。許榮昌。錢法裕等請優擢。又以父襄。母祖氏。

弟三輔俱爲旨成所害。請贈卹。並得旨俞允。三年入覲。賜銀貳萬兩。五年命移鎮漢中。六年與都統李國翰敗賊于階州。勦宦君同官滿城。川安寨。清澗。定邊。榆林。府谷。賊次第平。八年八月入覲。賜金冊金印。敕偕國翰征四川流賊。張獻忠之滅也。餘黨孫可望。李定國。白文選等遁川南。因明桂王朱由榔稱帝于粵。降附之。並竊王號。擁驍健。擾川北。九年三桂分兵復成都。嘉定。敘州。重慶。就食綿竹。駐師未幾。可望糾獠羅衆五萬圍保甯。巡按御史郝洛告急。三桂移兵擊走之。奉詔頒賚將士。私以冠服與洛。洛不受。疏劾三桂擁兵觀望狀。三桂摘疏中親冒矢石語。劾洛欺罔冒功。洛坐謫徙。三桂敘功。歲增俸千兩。子應熊尙主。爲和碩額駙。授爵三等子。尋加少保兼太子太保。十四年定國隨由榔入雲南。可望與定國隙。戰敗赴長沙。大軍降。敕三桂爲平西大將軍。國翰爲定西將軍。進征貴州。十五年發漢中。過保甯順慶。至合州。盡獲沿江戰艦。定國等據石壺關拒險。三桂令騎行山麓。步陟巔。以礮發其伏。悉驚潰。遂下遵義。克開州。國翰卒。三桂還駐遵義。時經略大學士洪承疇。甯遠大將軍宗室洛託。由湖南進貴陽。征南將軍卓

布泰由廣西進都勻。安遠大將軍信郡王多尼統禁旅至。三桂馳會于平越府之揚老堡。議三路出師。三桂自遵義赴天生橋關。聞文選據七星關。遂繞出烏撒土司境。進霑益川。信郡王進曲靖府。敗文選。卓布泰進羅平州。敗定國。十六年正月。合攻雲南城。由榔奔永昌。二月。三桂同貝勒尙書卓布泰進征南州。破文選于玉龍關。渡瀾滄江。下永昌。由榔先遁。我兵渡潞江。偵定國。設伏磨盤山。分八隊迎擊。斬殺過半。乘勝取騰越州。追至南寧。乃振旅由永昌大理姚安還。由榔部將馬寶、李如碧、高起隆、劉之復、塔新策、王會、劉僂、馬惟興、楊武、楊威、高應鳳、狄三品等。及景東、蒙化、麗江、東江、東川、鎮雄、諸土司。先後歸順。詔三桂鎮雲南信郡王。與卓布泰等班師。留都統伊爾德、卓羅等分軍駐守。並諭吏兵二部。凡雲南省文武官舉黜。及兵民一切事。命三桂暫行總管。俟數年後。補授仍照舊例。時由榔奔緬甸。文選奔木邦。定國欲迎還。由榔緬人不許。定國脅以兵。緬人益固拒。乃屯孟艮。復謀入滇。以由榔印劄。誘元江土司那嵩內應。那嵩遂與降將高應鳳倡叛。十月。三桂由石屏進圍其城。掘壕困之。逾月乃破。斬應鳳。那嵩自焚死。以

其地爲元江府。十七年。部臣奏計雲南省俸餉歲九百餘萬。議檄滿洲兵還京。裁綠旗兵五萬之二。三桂謂邊疆未甯。兵力難減。宜如舊時。三桂陰懷異志。其藩下副都統楊申說以先除由榔。絕人觀望。三桂乃疏請發兵入緬。殄滅由榔。其略曰。前者密陳進兵緬甸事。奉諭曰。若勢有不可。慎勿強。又諭曰。務詳審。斟酌而行。臣今籌畫再三。竊謂渠魁不殄。有三患。二難。李定國。白文選等。以擁戴爲名。引潰衆肆擾。其患在門戶。土司反覆。惟利是趨。一被煽惑。地方蜂起。其患在肘腋。投誠將士。豈無繫念故土者。邊關有驚。攜貳乘機。其患在腠理。且滇中米糧騰踊。輸輓絡繹。耕作荒而逃亡衆。養兵難。安民亦難。惟及時進勦。淨根株。乃一勞永逸計。疏下廷臣議行。並遣學士麻勒吉。待郎石圖。赴滇密籌機宜。奏至。命內大臣公愛星阿爲定西將軍。率禁旅同三桂進征。三桂既請頒敕印于南甸。隴川。千崖。蓋達車里。諸投誠土司。示鼓勵。復傳檄緬甸。懸賞格。令擒由榔獻。緬人久苦定國攻擾。請大兵擊走定國。願獻由榔。十八年正月。三桂遣土官至緬示師期。令于猛卯迎我師。以副都統何進忠。總兵沈應時。馬甯等。率師由騰越出。過隴川。

宣撫司。三月朔。至猛卯。緬人與定國戰。道阻。越二旬。緬使乃至。以緬人望大兵。勦除定國。告會瘴發。進忠等撤兵入邊。三桂奏侯霜降後。瘴息再進。四月。遣總兵馬寶高起隆。遊擊趙良棟等。勦馬乃土司龍吉兆。攻七十餘日。破賊巢。斬吉兆。以其地爲普安縣。九月。三桂同愛星阿。及前鋒統領白爾赫圖。都統果爾欽遜塔等。督兵攻大理。秣馬逾月。出騰越。取道南甸。隴川。猛卯。別遣總兵馬甯王輔臣分二萬。取道姚關。鎮康。孟定。又慮蠻驀猛密二土司爲定國煽惑。擋我後。留總兵張國柱。以兵三千屯南甸。十一月。會師木邦。文選毀錫箔江橋。走茶山。我兵行三百餘里。瀕江結筏以濟。三桂令馬甯等率偏師追文選。而自與愛星阿趨緬。時定國走景線。緬甸屢得三桂檄。恐由榔自戕。密使人防守。盡殺其從官。十二月。我兵攻舊挽坡。離緬城六十里。緬使詣大營。請遣兵百。進蘭鳩江濱扞衛。遂執由榔。及其親屬獻軍前。文選爲馬甯等追及于猛卯。率衆數千降。三桂振旅還。康熙元年。奏捷。聖祖仁皇帝賜敕嘉獎。晉親王。並命貴州省亦屬管轄。愛星阿班師。是年四月。由榔死于雲南。三桂以爲定國在景線。恐其由車里入寇。令提督張

勇領兵萬餘。分布普洱沅江防勦。未幾定國死。三桂遣招遺衆。定國子嗣興偕黨千餘人降。二年。遣總兵王會等剿隴納山蠻。搗其巢。擒斬賊渠。三年。遣總兵劉之復。李世耀。由大方烏蒙分剿水西土司安坤。烏撒土司安重聖。竝斬之。以其地設府治。改隴納爲平遠。大方爲大定。水西爲黔西。烏撒爲威寧。四年。奏裁雲南省綠旗兵五千有奇。五年。勦土司祿昌賢於隴箐。取寨數十。迤東土賊俱下。設開化府。永定州。六年。三桂疏辭總管任。初三桂逐由榔入緬。經略洪承疇以巖疆難靖。援明黔國公沐英世鎮例。請移藩久鎮。三桂遂奉詔鎮滇。其藩屬五丁出一甲。甲二百設一佐領。積數十佐領。轄以左右都統。設前後左右。援勦四鎮總兵副將皆自擇。分降兵萬有二千爲十營。以馬寶等十人爲總兵。凡文武職官。竝擅除擢。復請勅雲南督撫受節制。移駐提督于大理。總督于貴陽。踞由榔所居五華山故宮爲藩府。增華崇麗。藉沐天波莊田爲藩莊。假濬渠築城爲名。廣徵關市權稅。鹽井金礦銅山之利。厚自封殖。御史楊素蘊嘗劾其專擅。三桂摘疏中防微杜漸語。請旨詰問。素蘊以防微杜漸。古今通義覆奏。事遂寢。至是三桂因目

疾辭總管任。下部議如各省例。歸總督提督巡撫管理。雲貴總督卞三元。雲貴提督張國柱。貴州提督李本深。交章侈三桂勞績。謂苗蠻叵測。非任三桂。恐邊釁日滋。請勅仍摠管。得旨。王以精力日減。奉辭。故允所請。若令復理事務。恐其過勞。如邊疆遇有軍機。王自應經理。尋晉應熊爲少傅。兼太子太傅。命赴滇視疾。卽還京。三桂益欲攬事權。搆覺苗蠻。藉端用兵不休。私割舊隸麗江府之中甸與番衆。屯牧通商互市。迨卞三元歸養。甘文焜爲摠督。三桂惡其不附已。詐稱邊寇。檄赴勦。比至。復稱寇遁。檄還。藩屬將弁糜俸餉百餘萬。近省輸輓不給。徵諸江南。歲二千餘萬。偶絀。則連章入告。旣羸。不復請稽核。當是時。平南王尙可喜。靖南王耿精忠。與三桂分鎮邊疆。專兵柄。稱三藩。天下賦半爲所耗。而三桂驕恣尤甚。會可喜引疾。以子之信代理軍事。願移藩遼東。詔從所請。十二年七月。三桂亦疏詭請移藩。且言所部繁衆。昔自漢中入滇。漸次分移。閱三歲始竣。今生齒彌增。乞賜土地。較世祖時所給錦州寧遠諸區倍廣。俾安輯得所。疏入。下戶兵二部議。時廷臣有言。三桂鎮服苗蠻不可移者。戶部尙書米思翰。兵部尙書明珠等。

以苗蠻既平。三桂不宜仍鎮雲南。議應如所請。徙藩山海關外。上命議政王貝勒大臣會核。復有言雲南撒藩必多撥禁旅駐守。紛擾民駟。且致京城兵力減。宜仍令三桂留鎮。與米思翰明珠等異議。奏入。上念藩鎮久握重兵。恐滋蔓生變。非治安長計。特允三桂撒歸錦州。遣侍郎哲爾肯學士傳達禮。齎詔諭三桂曰。王鎮守巖疆。厥功懋焉。但年齒高。久駐遐荒。朕眷懷良切。故允王所請。王其率屬北來。永保無疆之休。已命所司。飭庇周詳。王至。卽有寧宇。無以爲念。九月。哲爾肯傳達禮至滇。三桂期以十一月二十四日行。陰與左都統吳應麟。右都統吳國柱。副都統高得捷。增夏國相胡國柱謀亂。部署腹心。扼關隘。入者聽。出者有禁。先三日。邀巡撫朱治國脅之叛。弗從。榜殺之。集四鎮十營總兵。馬寶。高起隆。劉之法。張足法。王會王。屏藩等聽調遣。自稱天下都招討兵馬大元帥。蓄髮易衣冠。哲爾肯傳達禮被留。按察使李興元。知府高顯辰同知劉崑。抗賊不屈。具楚毒。置之瘴地。顯辰仰藥死。提督張國柱。永北總兵杜輝。鶴慶總兵柯鐸。布政使崔之瑛。提學道國昌等。竝從逆。受僞職。三桂遂致逆書于平南靖南二藩。及黔蜀楚秦。

官吏舊相識者。要約黨附發兵反。幟色白。步騎皆以白氊爲帽。馬寶先驅至貴陽。提督李本深應之。總督甘文焜聞變。馳書荊州告川湖總督蔡毓榮。復趣經理移藩之郎中黨務禮。員外郎薩穆哈。主事辛珠。筆帖式薩爾圖。詣闕告變。自率數騎趨鎮遠。辛珠薩爾圖爲賊追殺。鎮遠副將江義。得逆書。以兵圍文焜。文焜自刎于吉祥寺。貴州巡撫曹申吉。黔西總兵王永清。沅州總兵崔世祿降賊。賊進陷沅州。辰州。十二月。黨務禮薩穆哈馳至京奏聞。上召議政王大臣諭曰。吳三桂已反。荊州乃咽喉要地。關係最重。遣前鋒統領碩岱。率每佐領前鋒各一。疾馳赴荊州守禦。以遏賊勢。命都統尼雅韓。赫業都。滿都統席布根。特穆占等。率師分馳武昌。西安。漢中。安慶。兗州。諸要地。供調遣。諭吏兵二部曰。吳三桂藩下人。且直隸各省出仕者。雖有父子兄弟在雲南。槩不株連治罪。各宜安心守職。無懷疑慮。其通行曉諭之。議政王大臣等。以應熊及其從官不可宥。請逮治。得旨暫行拘禁。事平。分別請旨尋命。順承郡王勒爾錦。爲甯南靖寇大將軍。統師至荊州。詔削三桂爵。宣詔中外曰。逆賊吳三桂。當明季闖賊入京時。窮蹙來歸。我世祖章

皇帝念其輸款投誠授之軍旅錫封王爵開闔滇南迨及朕躬特晉親王重託心膂本年七月自請移歸故土朕憫其久在邊疆年已衰邁欲令其父子祖孫得以完聚遂允其請爲之區畫居處資給行糧又特遣大臣往滇已諭朕懷可謂禮隆情至蔑以加矣詎意吳三桂性類窮奇中懷狙詐寵極生驕徑行反叛背養之恩逞鴟張之勢橫行兇逆塗炭生靈理法難容神人共憤今削其爵遣將統禁旅撲滅刻期蕩平但念陷賊官員兵民或心存忠義不能自拔大兵一至玉石莫分朕心甚爲不忍爰頒勅通行曉諭各宜安分自保無聽脅誘卽或誤從賊黨但能悔罪歸誠悉赦已往不復究治其有能擒斬吳三桂投獻軍前者卽以爵之有能誅縛賊渠及以兵馬城池歸命自効者論功從優敘錄朕不食言十三年正月三桂僭稱周王元年遣僞總兵楊寶蔭陷常德僞將軍夏國相陷澧州張國柱陷衡州吳應麟陷岳州長沙副將黃正卿參將陳武衛以城獻賊襄陽總兵楊來嘉副將洪福叛據穀城鄖陽山寨並爲三桂僞將軍三桂自雲南至常德具疏付哲爾肯傅達禮還奏上諭部臣曰覽吳三桂奏章乖戾詞語妄行乞

請諸王大臣咸以吳三桂怙惡不悛。其子孫卽宜凌遲處死。義難寬緩。朕思亂臣賊子。孽由自作。刑章具在。衆論僉同。朕亦不得曲貸之。但以吳應熊久在近侍。朕心不忍。將吳應熊及其子吳世霖下絞。其餘幼子俱免死入宮。六月命貝勒尙善爲安遠靖寇大將軍。與順承郡王分兵進討。尙善移書三桂曰。王以亡國餘生。乞師殄寇。蒙恩眷顧。列爵分藩。迄今三十年。富貴寵榮之盛。近代人臣罕比。而末路晚節。頓效童昏。自取顛覆。僕竊爲王不解也。何者。王藉言興復明室。則曩者大兵入關。奚不聞王請立明裔。且天下大定。猶爲我計除後患。翦滅明宗。安在其爲故主效忠哉。將爲子孫謀創大業。則公主額駙。曾借至演。其時何不遽萌反側。至遣子入侍。乃復背叛以陷子于刑戮。可謂慈乎。王之投誠也。祖考皆應封錫。今則墳塋毀棄。骸骨委于道路。可謂孝乎。爲人臣僕。迭事兩國。而未嘗全忠于一主。可謂義乎。不忠不孝不義不慈之罪。躬自蹈之。而欲逞志角力。收服人心。猶磨薪于火而云安。結巢于幕而云固也。何乃至是。殆由所屬將弁煽激生變耳。如卽輸誠悔罪。聖朝寬大。應許自新。毋蹈公孫述彭寵故轍。亦族湛身。爲世

大僂。三桂得書不報。是時雲南貴州湖南爲三桂所據。通番市。以茶易馬。結猓獠助戰。伐山木造層樓巨艦。散滇鑄錢。僞文曰利用。自謂蓄積素盈。兼掠庫金倉粟。輝耀富饒。以餌黨羽。勢日猖獗。大兵固守荊州武昌襄陽宜昌諸郡。禦擊僞將軍劉之復陶維智王會等。未及渡江進勦。逆書所至煽動。福建則耿精忠。廣西則將軍孫延齡。提督馬雄。四川則提督鄭蛟龍。總兵吳之茂譚洪。陝西則提督王輔臣。竝附三桂據地叛。輔臣以三桂逆書。誘甘肅提督張勇。斬其使。三桂遣人與達賴喇嘛通好。達賴喇嘛爲上書乞赦罪。上弗許。分遣康親王傑書等率師討之。諭趣貝勒尙善進征岳州。三桂使僞將軍吳應麟。廖進忠。馬寶。張國桂。柯鐸。高起隆等抗天兵。又分道窺江西。一由大江達南康境。陷都昌。一由長沙入袁州境。陷萍鄉安福。上命安親王岳樂爲定遠平寇大將軍。統師至江西。復以簡親王喇布爲揚威大將軍。統師鎮江南。十四年正月。諭岳樂曰。湖南一隅。四方羣寇所觀望。必速滅吳三桂。底定湖南。則各地小醜。聞風自散。今荊州兵未能渡江。而岳州兵又難驟進。宜由袁州直取長沙。一以斷賊饜道。一以分

賊兵勢。一以扼廣西咽喉。一以固江西門戶。烏合之衆。自當瓦解。荊州大兵。即可乘機直追。况甯羌告變。川賊必通。楊洪二賊。窺我鄖襄。擾我南鄧。侵我荊州後路。揆其大勢。進兵斷不容緩。且延至夏月。大雨連綿。大兵坐守日久。不但戰馬多斃。糧餉亦恐不繼。是進兵湖南。不待再決計矣。王于江西要地。速行整理。稍有就緒。卽進取湖南。勿悞機會。是時安親王遣兵復都昌。上高。新昌。安福。賊堅守萍鄉。于醴陵築木城。以扞長沙。于岳州城外。掘壕三重。環竹木爲坑。穿于洞庭湖峽口。攢立枿椿。阻舟艦。凡列營陸地。悉設鹿角挨排。以阻騎兵。三桂自當德至松滋。布賊船于虎渡上游。截荊岳大兵。使不相應。楊言將攻荊州。決堤灌城。潛分岳州賊衆。踞宜昌。東北之荊州鎮。糾王會。楊來。嘉洪。福。掠穀城。鄖陽。均州。南漳。順承郡王命貝勒察尼。都統宜理布等。擊敗之。賊勢稍沮。十五年。三桂糾僞將軍七人。犯廣東。以從逆大理府知府馮魁。爲僞廣東巡撫。授尙之信。僞招討大將軍。時可喜。病篤。之信遂降三桂。簡親王奉詔移師南昌。安親王勦萍鄉。走夏國相。下醴陵。瀏陽。進攻長沙。三桂遣僞將吳國柱。益兵守長沙。馬寶高起。隆由岳州。

赴援別遣僞將軍韓大任高得捷等陷吉安。踞之。拒大兵于螺子山。分犯新淦屯泰和。復陷醴陵。窺萍鄉。斷安親王軍後。三桂自松滋移屯嶽麓山。是歲撫遠大將軍圖海征陝西。招降王輔臣。僞將軍吳之茂。屢爲靖逆將軍張勇所敗。遁還四川。康親王征福建。招降耿精忠。尙之信。馮甦。並通款于簡親王。孫延齡之妻四真。定南王孔有德女也。與延齡謀歸順。三桂使孫世琮襲桂林。誘延齡殺之。肆掠柳州。橫州。平樂。南甯。十六年。貝勒尙善營馬三千。佐安親王軍。三桂邀奪于七里台。時簡親王攻吉安既久。三桂頻遣賊赴援。相持弗能下。上命征南將軍穆占。由岳州進。與安親王夾攻長沙。賊不能復顧。吉安悉潛遁。吉安賊困蹙。韓大任等棄城走竄。三桂自嶽麓徙衡州。驅賊衆分犯江西。南安。廣東。招州。並助世琮掠廣西。十七年。安親王復平江。湘陰。僞將軍林興珠降。穆占攻永興。拔之。茶陵。攸縣。鄆縣。安仁。興甯。郴州。宜章。臨武。藍面。嘉禾。桂陽。桂東。十二城俱復。簡親王與江西總督董衛國。進勦韓大任于寧都。大任由萬安走福建降。簡親王移駐茶陵。三桂糾犯永興。都統宜理布。護軍統領哈東山戰歿。賊踞河外營。又犯郴州。前

鋒統領硯岱等戰失利。還永興。是歲三桂年六十有七。僭稱帝。僞號昭武。旣行慶賀禮。有犬登其案而坐。三桂惡其不祥。遂病噎。八月病劇。口噤。取其孫世璠于雲南。未至。三桂死。閉城四月。調賊圍永興者入城。賊黨擁立世璠于貴陽。改僞號曰洪化。任僞大學士方光琛。僞國公郭壯圖爲腹心。時貝勒尙善。屢敗賊洞庭湖。薄岳州城。尙善疾卒。命貝勒察尼代爲大將軍。調諸路水師協勤。斷賊糧道。諭諸路將軍。以三桂旣死。賊黨必潰。宜進兵速勦。復命內外臣工。曾隸三桂屬下者。齎勅招撫。陷害官民。諭曰。自逆賊煽亂。所在官民。多被誘惑。陷身賊中。莫能自拔。朕已洞悉情形。屢頒勅諭。廣示招徠。開其自新之路。今逆首已伏天誅。念在彼脅從文武官員。皆朕赤子。兵民素受國恩。豈養非必甘心從賊。或志存忠義。遲徊待時。或勢被迫驅。無由歸化。朕甚憫焉。爾等往布德音。相機勸諭。令翻然悔悟。爭先來歸。有密謀內應。擒斬賊渠。及率領兵民。獻城納款者。俱赦其罪。論功敘錄。爾等殫心籌畫。以副朕意。十一月。僞總督吳應麟。糾僞將軍江義巴。卷元杜輝。駕巨艦二百餘。乘風犯柳林嘴。貝勒察尼。令水師棹輕舟。飛越賊機。發礮擊。

之。毀過半。賊溺死無算。應麟復糾衆五千。犯陸石口。爲討逆將軍鄂訥前鋒。統領杭奇擊走。杜輝有子。在軍通使謀歸順。事泄。應麟殺輝。十八年。賊黨日構隙。貲且匱。饟運不繼。岳州城乏食。僞總兵陳華李超王度冲等。率人衆舟艦降。應麟收殘卒。挾輜重走長沙。賊衆震恐。亦棄城遁。華容安鄉湘潭衡山各歸順。順承郡王自荊州渡江。賊之在虎渡上游。鎮荆山者。皆潰走。僞將軍洪福分勦松滋松江宜都石門。慈利澧州。進取常德。賊縱火焚廬舍舟艦遁。僞巡撫李益陽。僞按察陳寶鑰。僞總兵黃志功降。簡親王克衡州。入城駐守。降僞官百餘。取祁陽耒陽及寶慶府。時吳國貴踞武岡。吳應麟踞辰州。胡國柱踞辰龍關。將軍穆占復永明江華東安道州永州。僞將軍柯鐸降。安親王自衡州克常寧。復武岡國貴以二萬衆。據楓木嶺迎戰。大敗。中礮死。世琮亦敗于廣西。負重傷竄死。僞將軍郭義。偕僞官數十人降。十九年正月。勇略將軍趙良棟破賊成都。奮威將軍王進寶破賊保寧。僞將軍王屏藩陳君極自殺。吳之茂就擒。建威將軍吳丹克重慶。楊來嘉降。三月。貝勒察尼復辰龍關。克辰州。沅州楊寶蔭吳世祿降。吳應麟胡國柱走。

貴陽。世璠令國柱偕王會高起隆夏國相掠四川。陷瀘州敘州。及永寧縣。上命吳丹趙良棟。于黔蜀要路。增兵禦賊。相機進取。簡親王定廣西。安親王順承郡王。貝勒察尼還京。以貝子彰泰代爲定遠平寇大將軍。蔡毓榮爲綏遠將軍。授方略。同將軍穆占。總督董衛國。由沅州進征。十月。克鎮遠府。僞將軍張足法等敗走。遂下平越。趨貴陽。世璠吳應麟奔雲南。僞侍郎郭昌同文武僞官二百人降。十一月。大兵復遵義。安順。石阡。都勻。思南等府。敗賊于永甯州。追勦至雞公背鐵索橋。賊焚橋遁。土司龍天祐沙起龍禮廷試。各率屬助戰。築盤江浮橋以濟師。僞將軍李本深降。二十年正月。僞總兵高起隆夏國相王會王永清。擁衆二萬餘。屯平遠西南山。僞將軍線緘巴養元鄭旺李繼業。擁衆萬餘。據盤江西坡。大兵分道進。土司安勝祖等。相助協勦。賊敗潰。王會降。斬僞巡撫張維堅。普安。平遠。黔四大定。諸府州竝復。征南大將軍賚塔。奉詔自廣西進雲南。連敗僞將軍張足法何繼祖詹養王有功王石門坎新城所黃草壩諸隘。遂抵曲靖府。二月。會彰泰蔡毓榮軍于嵩門州。分隊進。世璠勒步騎萬餘。列象陣。雖城三十里拒戰。自卯至

酉。大兵五合五勝。進薄城陣。斬僞將軍胡國柄。劉圮龍。及僞總兵九人。賊衆自相蹂躪。死者枕藉。降臨安永順姚安諸路僞總兵。及平遠敗竄之高起隆等。僞東平公張國柱。自大理來降。世璠以圍急。趣馬寶吳國柱夏國相。自蜀赴援。將軍趙良棟。與都統希福。提督桑義等。分路邀擊。寶由尋甸攜妻子至楚雄。聚賊屯烏木山潰敗。同養元鄭旺李繼業赴姚安降。胡國柱由麗江鶴慶入雲龍州窮蹙。自縊死。國相敗走。廣西總兵李國樑。土司儂明。合圍于西板橋。國相度不能脫。與王永清江義等乞降。十月。彰泰賚塔蔡毓榮趙良棟。合攻雲南城。圍之數重。僞將軍何進忠林天擎線緘黃明。謀擒世璠。及壯圖以獻。世璠壯圖皆自殺。進忠等率屬迎降。穆占與都統馬齊先入城。籍賊黨屬。擒光琛及其子學潛。從子學範。磔軍門。戮世璠屍。函首馳獻闕下。雲貴州四川湖廣諸省悉平。十二月。恩赦天下。詔曰。朕蚤夜孜孜。勤求化理。期于兵革寢息。海宇奠安。不意逆賊吳三桂。負國深恩。倡爲變亂。陰結奸黨。同惡相擾。滇黔閩浙楚蜀關隴兩粵豫章之間。所在繹騷。肆騁痛毒。吳三桂僭稱僞號。逆焰彌滋。負罪尤甚。朕躬行天討。分命六師。勤

撫竝施。德威互濟。或繫殞于闕下。或駢戮于師中。擒勦誅鋤。以次收伏。乃吳三桂旣膺神殛。逆孫吳世璠猶復鴟張。踞六詔之一隅。延殘喘以拒命。朕惟賊患一日不除。民生一日不靖。策勵將士。屢趣師期。于是虎旅協心。進迫城下。賊衆計窮勢蹙。通款軍門。兇渠授首。師克之日。市肆不擾。邊境晏如。捷書旣至。上慰郊廟社稷之靈。下抒中外臣民之憤。神人胥悅。遐邇騰歡。念自變亂以來。軍民荼苦。如在水火。披堅執銳。卒歲靡甯。行齋居送。千里相望。被兵之地。旣羅于鋒刃。供億之衆。復困于徵輸。朕憫恤民艱。不忍加賦。間施權宜之令。用濟征膳之需。意在除殘。事非獲已。而身處宮寢之內。外塵閭閻之依。終夜夙興。肝食不暇。怒焉思治。八載于茲。今羣逆削平。疆宇底定。悉剪歷年之蠹賊。永消異日之隱憂。用是蕩滌煩苛。維新庶政。大沛寬和之澤。冀臻熙皞之風。誕告天下。咸使聞知。諭議政王大臣曰。曩者平南王尙可喜。奏請回籍。朕與閣臣面議。圖海言斷。不可遷移。莫洛米思翰蘇拜明珠塞克德等。言應遷移。其餘並未言遷移。吳三桂必致反叛也。議事之人。至今尙多。試問當日曾有言吳三桂必反者否。及一聞反亂。多有退

而非毀議遷移所致。若彼時朕諉過于議政者。盡行誅戮。則含冤泉壤矣。朕自少時。以三藩勢焰日熾。不可不撤。只因三桂反叛。遂諉過于人耶。今逆賊雖已削平。而瘡痍尙未全復。宜恤兵養民。宣化以致太平也。又諭曰。陷賊之人。有曾爲大吏。覩顏從逆。受僞職者。名節棄滅。大玷人臣之誼。惟歸順後。功可抵罪。量予留任。餘悉罷黜之。法司以雲南城繫逆屬。按律議辟入奏。詔如議。凡助逆肆惡。勢迫始降之高起隆。張國柱。巴養元。鄭旺。李繼業等。棄市。妻女財產。籍入官。馬寶。夏國相。李本深。王永清。江義皆磔死。親屬坐斬。懸世璠首于市。析三桂骸骨。傳示天下。乾隆四十五年。館臣進唐桂二王本末。未載三桂擒由榔事。諭曰。通鑑輯覽附錄之載。唐王桂王。所以匹于宋之帝昺。帝昺。以示萬世之實錄也。館臣以吳三桂爲叛臣。不書其擒桂王由榔事。而以屬之愛星阿。夫愛星阿固爲定西將軍領兵。而三桂彼時實爲平西大將軍。且必應殄滅由榔。三患二難之議。發自三桂。卽後之進兵。檄緬甸驅李定國。降白文選。皆出自三桂之籌畫。其功固不可泯也。然其籌畫。豈實爲我國家哉。彼時已具欲據滇黔而有之之心。由榔定國白

文選在。伊豈能據之哉。且自古權奸。無時無之。亦無地無之。三桂之必欲滅由榔。實猶近日之阿睦爾撒納之必欲滅達瓦齊。達瓦齊而在。阿睦爾撒納必不能據準噶爾。則彼之爲我宣力。皆所以自爲也。今昔相形。三桂之奸計畢露。又何不可功則功之。而罪則罪之乎。其依國史三館傳。盡載其入緬事。莫刪。昔許子將之相曹操。兩言撮其要。而操亦喜。適所舉二人。頗甚類之。亦在用之而已矣。又在先覺之俾毋出我範圍而已矣。

馬寶列傳

王屏藩附

馬寶陝西人。初爲流賊。降于明桂王朱由榔。封安定伯。本朝順治七年二月。平南王尙可喜攻廣州不下。圍之。五月。由榔使寶襲清遠。以救廣州。可喜遣將擊敗之。八年十月。由榔自南寧遁安隆。寶竄伏廣西山谷間。九年五月。由榔使定國窺兩廣。連陷桂林。柳州。寶嘯聚。與李定國相應。後見孫可望勢強。卽以兵附可望。十月。攻陷連州。十年四月。攻肇慶。兵敗。隨可望走貴州。十三年。定國奉由榔入雲南。十四年。可望據貴州叛。由榔

使定國討之。可望令寶問道襲雲南。欲掩執由榔。可望部下多不直。可望莫爲用。寶值沐天波守雲南。已設備。頓兵不進。定國擊破。可望遂救雲南。寶以兵附定國。由榔封寶淮國公。十六年。由榔自騰越奔南甸。定國兵屢敗。寶棄由榔。赴吳三桂軍前降。三桂見寶擴猛。厚結之。十七年。三桂奏請以降兵爲十營。營千二百人。以投誠官分統之。併擬寶及王屏藩等爲總兵官。部議如所請。寶以右都督充中營總兵官。屏藩以左都督充左營總兵官。屏藩奉天人。亦三桂所倚任者也。十八年。三桂率屏藩等趣緬甸。遣寶勦馬乃土司龍兆吉斬之。康熙五年。寶調曲尋武營總兵官。十二年十一月。三桂反。寶屏藩率先從逆。僞封寶國公。以屏藩爲僞將軍。三桂黨謀令寶由貴州窺湖廣。屏藩由四川窺陝甘。寶卽率賊先驅。貴州陷。進逼湖南。十三年。分兵犯江西。屏藩亦連陷四川州縣。進犯秦州。十四年正月。上命安親王岳樂。進取長沙。寶據岳州。出沒湖湘間。道路爲梗。十五年三月。大兵攻長沙。寶令彝陵南漳諸賊。分擾諸營。十一月。大兵圍長沙。寶據岳州。馳擾長沙圍解。十六年九月。寶率賊萬餘。犯韶州。渡河。至蓮花山。薄羅江。大兵營。

統領額楚等禦之。將軍莽依圖等自城中夾擊。破其四營。寶大敗。奔帽峯山。十二月。寶率賊赴衡州。十七年正月。又由宜章入廣西。二月。復至衡州營江東岸爲聲援。八月。二桂死。寶與賊黨擁立其逆孫世璠。十八年。命諸路將軍招撫賊黨。五月。簡親王喇布。給益陽知縣徐攬參議道銜。齎詔招撫。寶殺之。十月上降勅諭寶曰。爾等本係吳三桂藩下人。三桂反叛。爾等率黨抗拒大兵。或非本懷。爾若悔罪歸誠。前罪悉赦。仍論功敘錄。標下將士。概從寬宥。酌量加恩。爾其盡釋疑衷。効圖後效。寶抗拒如故。大兵復湖南廣西。寶遁貴州。據遵義。提督周卜世破之。寶棄城走。先是屏藩自秦州戰敗。退四川。據保寧爲死守計。十九年正月。大兵克保寧。屏藩窮蹙自殺。三月。寶復犯四川。糾賊黨陷瀘州。敘州。二十年二月。貝子彰泰圍吳世璠于雲南省城。世璠危迫。趣寶自四川來援。寶棄敘州。攜妻子奔楚雄。六月。彰泰使都督希福等擊之。寶佯北以誘我兵。希福等追至烏木山。寶據險待。希福等奮擊。大破之。寶越山遁。僅以身免。七月。寶逃姚安。敗潰。卒不及百人。乃赴希福軍前降。諭曰。逆賊馬寶所在抗拒大兵。今無地可逃。力窮勢蹙。始來

投誠。情罪重大。斷不可宥。其執來京。九月磔于市。梟其首。

李本深列傳

李本深甘肅西寧人。明總兵高傑甥。初爲明總督洪承疇部將。累官至遊擊。福王時大學士史可法薦爲總兵。隸傑麾下。同胡茂禎爲前鋒。傑爲許定國所殺。以本深爲提督。本朝順治二年。豫親王多鐸南征。本深率部兵十三萬以原官降。隨大軍渡江。平桃紅。朱門諸砦。招撫鎮江府。江南平。入京隸漢軍正黃旗。五年八月。敍投誠功。授三等子爵。十年。大學士洪承疇奉命經略五省。奏請同行。稽查隨征諸將。并招沿途舊兵。十二年三月。加右都督。充左標提督總兵官。五月。大軍進勦湖廣。時明桂王朱由榔之將李定國據南寧。劉之秀孫可望等據辰州。突犯常德。本深同總兵楊遇明胡茂禎張鵬程擊却之。文秀退保陬溪。六月復犯常德。本深設伏城外。俟寇過半。夾擊。大敗之。文秀遁貴州。敍功加都督。太子少保。十三年三月。疏言湖廣土荒物貴。軍心易搖。或逃至常德荆

州。猶易查解。若往山陝河南地方。卽難越境緝問。兼將領喜其歸降。反給糧收伍。逃兵安懼。乞皇上嚴飭鎮將查拿。遇逃兵卽行查本營。將本人回家口解赴。若將領隱匿。督撫查參。又官兵家住鄉井者。奉旨准移入城。家給一合米。委屬不足。請量增。俱下部議行。十一月。隨大將軍阿爾津復辰州。十四年。可望降。隨承疇進取貴州。十六年。承疇授貴州提督。特旨加太子太保。土寇馮天裕等。倡亂黔蜀間。同總兵胡茂禎等平之。貴州水西多兇苗。本深擊斬二千八百有奇。駐六廣河苗謀劫營。本深設伏大敗之。諸寨降。康熙六年。平西王吳三桂辭總管任。本深陳三桂功績。請勿聽辭。語在三桂傳。十二年。三桂反。本深叛應之。授僞將軍職。十九年。貝子彰泰同將軍蔡毓榮穆占等。敗賊于鐵索橋。進復貴陽。本深降。械至京磔死。

明末叛臣傳卷二

張國柱列傳

張國柱奉天鐵嶺人。明副將。本朝順治二年。自海道率兵來降。五年三月。授都督僉事。充湖廣隨征左路總兵官。六年二月。予三等輕車都尉世職。八年閏二月。續順公沈永忠遣國柱同護軍統領馬進功勦湖南賊。有功。旋從平南王尙可喜復廣東郡縣。瓊州十寇竊發據城。國柱渡海復其城。海寇鄭成功遣黃梧犯瓊州。擊破之。十二月。偕總兵南一魁。敗李定國於南甯。定國走安隆。經略洪承疇令國柱留鎮廣西。七年十月。授雲南永順總兵官。時吳三桂勦李定國于木邦。慮蠻暮猛密二十土司爲定國煽惑。令國柱以兵三千屯南甸。未幾定國死。康熙二年十二月。擢雲南提督。三年六月。加太子少保。四年四月。迤東土酋王耀祖反。衆至數萬。國柱發兵討之。六月。三桂疏言。土酋王耀

祖窺臣遠征水西。竊據新興。僭號大慶。謀犯省城。分遣賊黨。陷易門甯州。嶧峨。攻昆陽。江川通海。宜良。彌勒。石屏。及臨安府城。提督張國柱等。調兵分路勦捕。所向克捷。五年五月。三桂復疏言。雲南諸土酋。祿昌賢等。作亂。臣同國柱等。分兵進勦。平賊寨數十。擒昌賢及其黨王翔。張長壽。李成林。李世璠。李曰森。沈應麟。龍元慶。農得功等。悉誅之。遠近蠻獠。聞風懼伏。滇南大定。得旨嘉獎。六年。三桂疏言。目疾。乞解總管任。國柱素黨三桂。疏留之。十二年十一月。三桂反。國柱首從逆。受僞職。爲定遠大將軍。東平公。自後提督楊遇明。總兵楊富。蔡祿。楊來嘉。王永清。悉從賊。十三年。國柱陷衡州。進據長沙。復與吳應麟。抗大兵于岳州。分掠郡縣。十六年。征南將軍穆占。進勦長沙。國柱于城外築壕。布木蒺藜。列象陣。以死守。穆占連擊敗之。國柱走衡州。十九年。大兵復雲南。貴州。國柱遁入雲南。二十年二月。貝子彰泰。圍吳世璠于雲南省城。遣使招撫諸路。國柱自大理府。率所部僞官。繳印劄。詣軍門降。二十二年二月。伏誅。遇明。錦州人。以守備來降。授山東萊州遊擊。勦土寇有功。累遷至副將。順治十二年。授湖廣常德鎮總兵官。孫可望來

犯。擊走之。康熙元年。移廣東新安鎮。旋擢廣東提督。九年五月。以老乞休。家于常德。子寶蔭。先爲三桂藩下總兵。從三桂反。率賊至常德。遇明爲內應。城遂陷。遇明尋死。十九年三月。大兵復沅州。寶蔭降。二十一年。流徙寧古。楊富福建漳州人。初爲鄭錦僞都督。康熙二年來降。授左都督。三年六月。授四川北鎮總兵官。五年十一月。調浙江水師左路總兵。十一年四月。移江西南瑞鎮總兵。十三年七月。三桂兵犯江西。富潛謀內應。巡撫董衛國擒斬之。祿海澄人。自海道來降。順治十八年九月。授左都督。予三等男世爵。康熙三年十一月。授河南河北鎮總兵官。十三年三月。三桂犯湖南。祿潛結來嘉謀。應三桂。陽稱捕魚。令一軍盡甲。增製兵械。購羸馬。民一夕數徙。侍衛觀保馳奏。上命內大臣阿密達。率兵至懷慶察之。阿密達至。祿不出迎。入城施礮拒敵。阿密達擊擒之。并斬其子。來嘉福州人。初爲海寇。鄭錦僞左都督。康熙元年來降。三年十一月。授湖廣襄陽鎮總兵官。十三年三月。與副將洪福據穀城叛。並受三桂僞將軍職。五月。復犯均州。九月來嘉犯南漳。十一月。陷中峯寨。十四年三月。總兵劉成龍敗之于良坪。燬其巢。五

月來嘉復犯南漳。七月大兵擊敗之。十一月來嘉分道入寇。十五年正月。副將四什六破賊于黃寶山。五月以來嘉犯鄖陽。乘間竊發。設鄖陽撫治。九月福復犯均州。十八年大兵自荊州渡江。福降。來嘉遁。十九年正月。湖廣總督徐治都擊破來嘉。追至巫山。來嘉拒戰。復破之。二月克夔州。來嘉走重慶。三月重慶破。來嘉降。逮至京。王永清遼東人。康熙八年。授貴州黔西鎮總兵官。二十年十一月從逆。二十年九月降。廿一年二月傑死。諭曰。王永清身膺重任。甘心從賊。及大兵抵滇。圍困省城。爲日甚久。猶不歸順。乃與夏國相隨在奔竄。迨計無復之。始來投誠。其併捕禁其子籍其家。

曹申吉列傳

羅森吳之茂陳洪明
崔之英附

曹申吉山東安邱人。順治十二年進士。改庶吉士。十四年授翰林院。國史院編修。充日講官。十五年以才堪外用。選湖廣荆南道。十六年遷河南分巡。睢陳兵備道。十七年五月。內擢通政使左通政。十月遷大理寺卿。康熙六年二月。擢禮部左侍郎。九年十一月。

遷兵部左侍郎。時吳三桂分藩雲南。徵調絡繹。黔蜀爲往來孔道。廷議責重巡撫。十年。授申吉貴州巡撫。而擢陝西布政使。羅森四川巡撫。森直隸太興人。順治四年進士。累官陝西督糧道。浙江按察使司。遷布政使。以久外任。故用之。十二年二月。申吉疏言。設官分職。上下相維。獨黔省知府知縣各有專轄之地。分徵錢糧。並無經徵督徵之異。非所以定經制而專責成也。請將貴陽。安順。平越。都勻。鎮遠。思南。銅仁。七府知府。經管地糧。各歸附郭之新貴。普定。平越。都勻。鎮遠。安化。銅仁。七縣知縣。管理。其知府止司督徵。庶規制畫一部。議從之。五月。森以招民開墾。議加工部右侍郎銜。十一月。吳三桂反。十二月。犯貴州。申吉從賊。十三年正月。賊犯四川。森與總兵吳之茂並降。申吉喜爲詩。招致遊士。邀名譽。森亦有能吏聲。相繼從逆。聞者切齒。三桂性忌。降者多以事見殺。及三桂死。賊黨復自相屠戮。申吉森後俱不知所終。吳茂錦州人。降賊爲三桂任用。率僞總兵五人。犯秦州。後屢敗。竄入松潘。所至焚掠。大兵克保寧。擒吳茂于陣。械至京。伏誅。封疆大吏從逆者。又有廣西巡撫陳洪明。雲南布政使崔之瑛。洪明遼東人。隸漢軍。廂藍。

旗以筆帖式。授戶部主事。累遷至郎中。康熙十二年二月。擢奉天府尹。十一月授大理寺卿。十三年二月。擢戶部右侍郎。六月。授廣西巡撫。八月。洪明偕總兵金光祖疏言吳三桂遣賊攻陷梧州。現督水陸官兵進討。逆賊遁走。梧州已復。得旨嘉獎。十一月。疏言土寇竊發。如李三官七乘機倡亂。已分遣將弁蕩平。尙有潛伏山陬海濱者。應亟除。梧州宜設重兵資勦禦。諭曰。梧州兩粵接壤要地。今粵西有事之秋。李三官七賊寇滅後。尙可喜卽徵兵速赴梧州。十四年正月。洪明遣遊擊陳汝得勦僞總兵李梅友于蒼梧。敗之。燬其寨。十五年二月。尙之信叛降三桂。洪明從逆。十八年復來降。二十一年議政大臣等議。洪明應革職立絞。諭曰。陳洪明前赴任時。朕召至乾清門。奏稱臣一介草茅。蒙皇上知遇。務期勉竭愚誠。以報知遇。及粵東被陷。朕意此人未肯從賊。且彼並無父母妻子牽制之情。隻身何難自拔。而乃深負國恩。受賊僞職。又具啓吳三桂。情殊可惡。理應正法。姑從寬免死。著流徙寧古塔。籍其家。崔瑛霸州人。順治十三年。授陝西漢羌道。康熙二年擢雲南布政使。十二年從逆。二十年。雲南平。定瑛論死。

王輔臣列傳

王輔臣山西大同人。明末爲盜。號馬鴿子。本朝順治五年。大同總兵姜瓖叛。王輔臣從之爲僞副將。六年。英親王阿濟格圍大同。輔臣降。隸止白旗漢軍。授侍衛。十年。隨經略大學士洪承疇。征明桂王朱由榔。擢湖廣總兵。隨定貴州。十六年。雲南既定。吳三桂留鎮。奏授輔臣援勦右鎮總兵。十八年。隨大軍至緬甸。取朱由榔。康熙三年。敍功加銜左都督。四年。迤東土酋王耀祖據新安叛。輔臣討之。破木城九。擒僞國公趙印。選九年。擢陝西提督。駐平涼。十二年。三桂反。使約輔臣從逆。十三年二月。輔臣遣子繼貞首三桂逆書。得旨褒獎。予三等子世襲。授繼貞大理寺少卿。時湖南四川皆陷賊。上命順承郡王勒爾錦征湖南。調輔臣隨征。旋命尙書莫洛經略陝西四川。莫洛奏留輔臣仍駐平涼。隨大軍進征四川。輔臣疏請入覲。密陳韜略。上以邊疆正資彈壓。諭俟賊平。後來京。輔臣復疏言。昔年隨經略洪承疇出師湖南。于土俗民情。頗悉其概。及任雲南總兵。凡

地形險要。苗裸種類。知之最詳。願往湖南隨征立功。諭以進征四川。亦可立功。尋莫洛統陝西諸將征四川。檄輔臣隨征。輔臣懷叛志。以乏馬辭。莫洛給馬二千。輔臣欲搖衆心。謂經略盡調我良馬他往。以疲瘠者與我。欲置我于死地。十二月行次甯羌。兩營距二里許。潛布梟健截諸隘。糾衆逼莫洛營。曠以馬羸餉缺。莫洛遣從者撫慰。輔臣突前。礮矢齊發。莫洛自出督戰。中鳥鎗歿。輔臣脅經略標兵。及運糧兵二千餘。自隨還踞略陽。通款三桂軍。留莫洛軍營之郎中祝表正。時定西大將軍貝勒洞鄂奉詔統師。繼莫洛後。至沔縣聞變。退保漢中。入奏。上遣輔臣子繼貞齎勅諭輔臣曰。昔世祖章皇帝。知爾才勇兼優。拔于儕伍之中。置之侍衛之列。繼命隨經略洪承疇。進取滇黔。爾殫心抒忠。茂建功績。遂進秩總戎。迨及朕躬。以爾勳舊重臣。巖疆攸賴。特擢秦省提督。來京陛見。面加詢問。知忠貞天稟。猷略出羣。特賜密諭。想爾猶記憶也。去冬吳逆叛變。人懷觀望。爾獨首倡忠義。舉發逆札。遣子馳奏。益悉爾之忠誠純篤。不負朕知及經略莫洛奏請。率爾入蜀。朕以爾與莫洛毫無猜嫌。故令同往建功。茲兵變之後。召詢爾子。始知莫

洛與爾頗有隙。則朕之知人未明。俾爾變遭意外。忠藎莫伸。咎在朕躬。于爾何罪。朕之于爾。任寄心膂。恩重河山。以朕之惓惓于爾。知爾必不負朕也。爾所屬官兵。行役艱辛。變起倉卒。朕維加矜恤。竝勿致遣。已令陝西督撫招徠安插。特再頒專敕。爾果不忘累朝恩眷。不負平日忠悃。歛戢所屬官兵。各歸隊伍。卽令仍還平涼原任。已往之事。概不追論。勿心存畏疑。有負朕篤念舊勳之意。十四年正月。輔臣得繼貞所齎勅。具疏附祝表正還奏。而留繼貞弗遣。輔臣之在洛陽也。誘蔡州副將陳善以城叛。遂移據秦州。其在甯羌脅從之二千衆。莫肯爲用。各乘間脫走。自平涼隨至之卒伍。日夜思故鄉。散去者亦數百人。輔臣乃毀鳳縣之偏橋。使叛黨王好文等。以兵阻棧道。大軍在漢中餉不繼。退歸西安。于是漢中興安。相繼爲三桂賊將所踞。輔臣留其黨踞秦州。而自攜舊兵歸平涼。三桂賂以白銀二十萬兩。與僞印曰平遠大將軍。陝西東路總管。輔臣爲布逆書。要約黨附。固原道陳彭受僞巡撫劄定邊。副將朱龍受僞招撫總兵劄。各叛踞城邑。合謀誘脅。遊擊袁成樑以鞏昌叛。副將江有倉。參將潘璃。以偕文洮岷叛。守備曾文耀

以臨洮叛。蘭州遊擊董正已潛結撫標弁卒作亂。舉城從逆。同州遊擊李師膺據神道嶺以叛。殺韓城知縣翟世琪。陷洛川。宜川。鄜州。陝西郡邑騷動。延綏鎮屬之。嚮水魚河。波羅各營。葭州及吳堡清澗米脂等縣。先後附賊。初。輔臣之附。疏祝表正還奏也。謂莫洛激其兵變。已弗能禁。乞先遣中使撫輯。兵衆得所。當卽束身歸罪。上鑒其狡詐。詔在陝諸將。中嚴防禦。毋縱蔓延。而仍命祝表正齋諭慰撫如初。輔臣復留表正弗報。表正屢切責之。旋遇害。諭趣統師貝勒大臣分路進討。于是貝勒洞鄂克秦州。僞總兵陳萬策降。安西將軍稽古靖逆將軍張勇克鞏昌。僞總兵陳科降。西甯總兵王進保克蘭州。僞總兵趙士昇降。甘肅總兵孫思克復靜甯。平遠將軍畢力克圖復綏定延安。陝西提督陳福克定邊城。擒朱龍。及僞副將倪先德斬之。輔臣見大軍所向克捷。逆黨漸散。乃爲緩兵計。以書致貝勒洞鄂。乞奏請再頒赦詔。遣威望大臣受降。洞鄂以聞。上諭之曰。前屢降旨。王輔臣果悔罪來降。當宥其前罪。領秦州諸處官兵來降。悉與寬貰。輔臣安有不知。彼乞降詐也。特緩我師。爲苟延日月計耳。且前遣祝表正尙未歸。豈宜復遣人

臣爾等宜以王輔臣既邀恩赦。猶不悔過。布告官吏軍民。俾知舉兵誅亂之故。急合兵攻取平涼。是時吳三桂由湖南寇江西。勢倡獗。輔臣因是觀望。其叛黨吳之茂譚洪等。由興化犯商州。復引四川賊犯秦州。屯踞北山。截我臨鞏援師路。輔臣使僞總兵李國良以衆八千。由甯朔入寇。別使賊犯靈州。大軍分道進勦。乃遁。十五年二月。上命大學士圖海爲撫遠大將軍討輔臣。四月張勇勦賊于通渭。復其城。五月圖海大破賊于平涼城北之虎山。輔臣窮蹙乞降。上宥其前罪。頒詔撫慰。輔臣使子繼貞僞總兵蔡元。繳所受吳三桂僞劄印。詣軍門降。詔復輔臣官爵。加太子太保。授靖寇將軍。隨圖海駐漢中。繼貞亦復原官。尋擢太僕寺卿。輔臣懷疑懼。與其妻妾四人自縊死。獨輔臣甦。二十年雲南平。輔臣奉詔隨圖海入覲。至西安疾死。上從部臣請。停其世襲。罷繼貞任。家屬歸旗。

譚洪列傳

子天祕鄭蛟麟附

譚洪四川萬縣人。初爲明總兵官。本朝順治三年。明桂王朱由榔。大學士呂大器。督西南諸軍。洪與其弟詣及譚文等。皆受約束。時張獻忠遣黨孫可望等竄川南。洪等亦分據川東。又與李自成黨李來亨等聯絡聲援。五年。犯保甯。四川巡撫李國英敗之。七年。可望以川南降于桂王。陽奉之。陰圖自據。桂王大學士文安之。念川中諸將兵尙強。欲結之以抗可望。乃自請督師。加諸鎮封爵。桂王進洪新津侯。李來亨及譚詣譚文等。公侯爵有差。令安之齎勅印往。可望慮安之圖已。邀止安之。奪洪等勅印。可望將圖蜀。發兵由川南入。而別遣將渡金沙河。出黎州。陷嘉定。洪與詣文竝附于可望。十四年。可望自貴州降于大軍。洪等復歸桂王。十五年二月。洪進據忠州萬縣。七月。攻重慶。總兵官陳廷俊敗之。十六年。洪與來亨等。由水道襲重慶。會洪詣以私忿殺譚文。諸將不服。安之欲討洪詣。洪詣懼。率所部來降。隨授洪川北總兵官。加慕義侯。康熙十二年。吳三桂叛。十三年。洪與四川提督鄭蛟麟合謀。殺賊。受僞總管將軍。蛟麟明都司。自松山來降者也。三桂使蛟麟犯漢中。爲大軍所破。蛟麟復降。十五年九月。洪欲犯湖廣鄖陽。先遣

賊衆泊船于琵琶灘阻運道招撫楊茂勳偕副都統李林隆提督佟國瑤等敗之十月。洪率賊三十餘船順流下圍鄖陽城將軍噶爾漢等敗之陡嶺更以水陸兵夾擊洪復遁。十八年上以湖南廣西底定賊殄滅可期念洪抗拒有日或由迫脅所致特加專勅令其姪前副將譚天敍齎往撫。十九年二月湖廣提督徐治都復夔州洪遣子僞右將軍天祕齎辯明脅從疏竝繳僞晉國公勅僞廣威將軍印及文武官印親率子姪僞總兵官譚昇譚地晉等詣軍門降未幾三桂陷瀘州永甯敍州洪復叛諭曰譚洪變起倉猝雖盤踞萬縣實屬疥癬但破出犯之賊則洪無路可歸自必授首乃趣將軍吳丹鄂克濟哈趙良棟總督楊茂勳巡撫杭愛提督王之鼎等分道進擊十月洪與彭時亨等攻涪州十二月復犯夔州上命噶爾漢及川陝總督哈占速進二十年正月洪死時噶爾漢擊敗雲陽賊洪子天祕震恐走萬縣天成城寨賊巢以遁于是大兵進取萬縣旣而開縣建始忠州梁山悉平六月徐治都檄參將余鎧諭降哈占復遣官招之天祕猶豫未決大兵圍雲南天祕窮蹙始降二十一年五月磔于市。

祖澤清列傳

祖澤清大壽第四子。康熙六年由參領授廣東高雷廉總兵。十四年七月。據高州叛。降于三桂。命平南王尙可喜將軍尼雅翰前鋒統領舒恕總督金光祖會勦。十六年尙之信以從逆反正。襲平南親王傳檄兩廣。澤清亦投誠。事聞。諭曰。祖澤清先雖被脅從逆。仍感我國恩。密謀斬倡亂逆弁陳加正。捨僞將軍謝厥扶等。薙髮歸順。其加都督同知。仍管總兵事。八月澤清執厥扶。及僞總兵鄧震奇同知謝濟。遊擊韓建。守備韓元隆。韓國勳。鄧駿。送之信所。詔誅之。十月。命澤清同光祖進取南寧柳州。十七年三月。澤清復叛。諭曰。祖澤清先經反叛。及投誠後。隨加寬宥。仍授總兵。旋擢鑾儀衛使。今復背恩反叛。凶惡已極。宜行誅滅。平南王尙之信。將軍莽依圖。額楚。巡撫傅宏烈。總督金光祖。可會同商酌。速行勦滅。未幾。澤清勾山酋諸寇。分犯電白。勅之信。額楚等速攻勦。四月。之信同副都統額赫納等。統滿漢兵抵電白。澤清設五營據守。之信等分擊。連破之。斬僞

總兵江瓊。及賊衆四千餘。追二十餘里。城中賊衆堅守。圍之。十七日夜。原任都司王得功等踰城降。之信等馳百八十里抵高州。澤清挈家遁入山。十八年四月。諭兵部曰。逆賊吳三桂煽亂以來。各處大小文武官員。勢窮力竭。迫而從賊。朕久已洞悉。而悔罪來歸者。概行寬宥。惟澤清父子兄弟。向受國恩甚厚。前叛時。意其必被迫脅。不得已而從賊。及既降復叛。則甘心附賊。可知情罪重大。國法難容。不許招撫。亦不許其投誠。爾部卽密諭各路大將軍。將軍督撫。提鎮等遵行。八月。官兵搜山獲澤清。及其父良棟。送京師。十九年二月。澤清良棟俱磔死。諸子家口籍沒。

耿精忠列傳

耿精忠。漢軍正黃旗人。靖南王繼茂長子。幼隨父鎮所。順治十一年。繼茂遣入侍。世祖章皇帝念繼茂南征有功。授精忠一等子爵。尙肅親王豪格女。封和碩額駙。康熙二年。繼茂請令精忠赴閩學軍事。聖祖仁皇帝允之。十年。繼茂疾。奏以精忠代理藩事。尋卒。

詔精忠襲父爵。十二年七月。精忠聞平南王尙可喜將撤藩歸遼東。亦具疏請撤。得旨允行。十一月。吳三桂反。命精忠仍留鎮。三桂以書誘之。精忠與藩下左翼總兵曾養性。右翼總兵江元勳。參領白顯忠。徐文耀。王世瑜。王振邦。蔣得鉉等。潛定逆謀。十三年三月。踞福州反。以兵脅總督范承謨。不屈。遂幽之。及其家屬五十餘人。自稱總統兵馬大將軍。效三桂蓄髮易衣冠。私鑄裕民通寶錢。以曾養性白顯忠江元勳爲僞將軍。分陷延平邵武福甯建甯汀州。藩下佐領黃國瑞林芳孫廖廷雲李似桂。護衛夏季旺呂應斗。長史陳儀陳斌。及凡從逆者。各加僞職。分播逆書。約三桂分寇江西江南。約潮州總兵劉進忠擾廣東。通海賊鄭錦于台灣。賂以沿海郡邑。倚爲聲援。浙江總督李之芳聞變。先遣副將王廷梅等擊賊。自率兵駐衢州守禦。賊衆突越仙霞嶺寇浙江。陷江山縣。以衢州有備。分陷溫州處州。又別趨江西。寇廣信建昌。上命平南將軍賚塔帥師之浙江。定南將軍希爾根之江西。竝勅杭州鎮江水師分防海疆。詔削精忠爵。收禁其在京兄弟。宣諭中外曰。逆賊耿精忠庸懦無能。痴愚寡識。賴祖父之餘勳。襲封王爵。宜感恩

圖報不意其包藏禍心。徑行反叛。今削其爵。遣發大兵進勦。凡被賊迫脅之官員兵民。有能捨耿精忠投獻軍前者。優加爵賞。或以兵馬城池納款者。論功收錄。或力有不逮。自拔來歸者。亦免罪收用。其藩下人在置隸各省出仕者。概從寬宥。雖有父子兄弟在福建者。亦不株連。勿得心懷畏懼。自羅法網。負朕好生之意。尋諭部曰。曩者耿精忠之祖父耿仲明。當太宗文皇帝時。航海歸誠。優錫王爵。效力行間。勞績茂著。及其身故。睿親王不令承襲。世祖章皇帝追念舊勳。以其子繼茂襲爵。俾鎮巖疆。爰及朕躬。惓懷勳裔。恩寵有加。後覽繼茂遺疏。有民兵凋敝。海賊未滅。死不瞑目之語。忠藎堪念。且因精忠自幼曾爲近侍。予寵王爵。仍鎮閩省。望其紹祖父遺訓。殫竭忠猷。不意爲逆賊吳三桂煽惑。一旦叛亂。大兵進勦。殲滅在卽。但念其無知被誘。墮人狡計。非素蓄逆謀。首倡叛亂者比。况自祖父以來。受恩四十餘年。至精忠之身。遽至宗祀斬絕。朕心深爲不忍。其傳諭精忠。果能革心悔禍。投誠自歸。勦除海賊。以贖前罪。卽視之如初。朕以至誠待天下。必不食言。特遣工部郎中周襄緒。偕精忠護衛陳嘉猷。齎敕赴閩。精忠留之。養性

誘溫州總兵祖宏勳。平陽遊擊周定猷。並以城叛。偕僞總海都督林冲。僞中軍都督徐尙朝。僞總兵閻標。宋書聘馮公輔。沙有祥。曾璽。陳理。連雲登。僞副將吳榮。先陳鵬等。陷瑞安。樂清。及仙居。太平。黃巖。窺寧波。紹興。陷嵗縣。連陷處州郡邑。進犯金華。精忠偕僞左軍都督周列。僞總兵王飛石。桑明。李雲龍。僞副將江明等。陷廣信。建昌。饒州。復糾合玉山。永豐土賊。東犯常山。陷開化。壽昌。淳安。遂安。別犯徽州。婺源。祁門。勢日猖獗。上以康親王傑書爲奉命大將軍。貝子傅喇哈爲寧海將軍。率禁旅。並調駐守江南之喀喇沁土默特兵。征浙江。復命安親王莫洛。統師駐南昌。簡親王喇布駐江甯。諭康親王曰。精忠雖背恩反叛。念其祖父投誠效力。累世舊勳。朕豈肯以耿精忠之罪。及其先人。大兵平定閩省之日。其祖骸骨。仍許收葬。是時將軍賚塔駐衢城。賊由江山縣入犯。賚塔同之芳。率副都統喇哈瑚圖。副將王廷梅等。擊卻之。副將牟大寅。斬僞參將張宏于常山。副將洪起元。敗賊于紹興。復嵗縣。副將鮑虎。敗賊于淳安。之圍屏鎮。擒王飛石。江明。復壽昌。遂安。副都統沃申。瑪哈達。石調聲。總兵李榮。陳世凱。參將陳夢賜。屢摧賊衆于

金華斬閭標宋書聘吳榮先。會康親王至金華。與貝子傳喇哈。率副都統穆赫林等勦賊。復金華附近諸邑。敗曾璽陳理于台州之黃瑞山。斬陳鵬。復黃巖太平樂清。瑪哈達擊敗徐尙朝沙有祥馮公輔等。復處州穆赫林擊敗林冲于白水洋。復仙居。簡親王以兵助江寧將軍額楚。擊走徽州婺源祁門賊衆。將軍希爾根。復建昌饒州。安親王至南昌。移書精忠約降。精忠答書。語多狂悖。十四年七月。上諭吏部兵部曰。逆賊耿精忠負恩附逆。煽亂閩疆。荼毒生靈。罪惡重大。凡兄弟族人。律應不赦。但念其弟耿昭忠耿聚忠。及族人等道途遠隔。實未同謀。竟爾株連。朕心不忍。其概從寬釋。官職悉令如故。並命聚忠齋赦諭精忠曰。爾祖父宣力累朝。勲猷著爰。俾世襲王爵。格外加恩。逮爾父病歿。令爾襲封鎮岡。方謂爾克紹前猷。殫忠報國。不意爾反爲吳逆狡謀所惑。蹂躪土地。戕害生民。朕猶念爾祖父前功。終不忍絕。凡爾在京諸昆弟。及屬下人。概行寬宥。給還官職。恩禮如常。今大軍雲集。時勢昭然。爾自知之。朕復念爾變亂必由逼迫所致。故復下赦書。遣弟耿聚忠齋至軍前。明諭朕意。爾若卽悔罪率衆歸誠。當復爾王爵。如舊。

鎮守。倘能勦除海寇。共奏膚功。仍優敘。加以爵賞。前使臣周襄緒等。不遣之歸。或別有故。朕不介意。爾勿聽煽惑之言。終懷疑懼。負朕始終保全之意。聚忠至衢州。精忠不納。使其黨江元勳。徐文耀。黃國瑞等。扼關隘。肆逆如故。初精忠將反。其母周氏哭阻之。藩下都統馬九玉。亦以吳三桂不可效爲言。精忠勿聽。周氏憤死。九玉旋從逆。爲僞驍騎將軍。與僞前鋒都督朱懷德。僞總兵馬勝等。距江山縣。精忠屢迫之。犯衢州。戰輒敗。劉進忠之以潮州叛也。受精忠僞職。爲寧粵將軍。平南王尙可喜。奉詔發兵討精忠。爲求援于鄭錦。遂引海賊入潮州。據惠州。三桂亦驅廣西叛賊逼肇慶。可喜慮分禦力竭。請勅廣西大兵援廣東。精忠益驅僞將軍邵連登。劉如桂。黃朝用。僞總兵馬鵬等。犯建昌。撫州。贛州。連結三桂。賊衆于袁州吉安。阻大兵不得達粵。可喜子之信。遂糾廣州肇慶官屬降三桂。棄惠州不守。錦使其黨劉國軒等踞之。錦尋與精忠構釁。盡奪泉州漳州諸地以自屬。十五年二月。貝子傅喇哈誓師黃巖。進征溫州。連破賊壘。曾養性憑江拒戰。累月未能薄城。上命之芳飭兵固守衢州金華。傅喇哈勦除溫州處州賊衆。諭趣康

親王。自金華移師衢州。進征福建。八月。康親王同將軍賚塔督兵。敗賊于大溪灘。下山。九玉潛遁。招降僞參將金應虎。遂克仙霞關。攻拔浦縣城。是時錦侵擾興化及福州。精忠與其黨武灝。沈偉。郭景汾。羅萬里等。搜掠福甯。建甯。邵武。延平。財利。以餌衆將。不繼。又屢爲大兵挫衄。勢益窮蹙。以范承謨久羈不屈。使人害之。並戕其幕客稽永仁。及家屬之被繫者。康親王進征建陽。移書精忠曰。爾蒙累朝厚恩。世授王爵。正當遇時立功。以承先緒。乃溺于奸計。自取誅夷。聖上念爾祖父之功。凡爾在京諸弟。俱留原職。如舊豢養。復遣爾弟聚忠招撫。不得前進還京。今大兵屯仙霞嶺。長驅直入。攻拔浦城。浦城乃閩省財賦要地。咽喉旣塞。糧運不通。建甯延平。旦夕可下。與其繫頸受戮。不如率衆歸誠。仍授王爵。保全百萬生靈。况鄭錦與爾有仇。爾當助大兵進勦立功。何久事仇人爲叛逆。精忠得書。猶豫未決。答書言。自願歸誠。恐部衆不從。致滋變患。望賜明詔。許赦罪立功。以慰衆心。乃可率屬降。康親王復建甯府。次延平。精忠震懼無措。遣其子顯祥。同前齋勅。被留之。周襄緒。陳嘉猷。迎大軍。十月朔。康親王遣官齋勅。宣示精忠。精忠

出城降。請隨大軍勦海賊立功贖罪。康親王以聞。下王貝勒大臣議奏。復精忠靖南王爵。屬下官職如舊。令精忠率之征勦。上乃以耿昭忠爲鎮平將軍。赴福州駐守。命精忠隨大軍勦海南賊。旋收復興化。泉州。漳州。遂錦入台灣。進征潮州。會之信以廣州歸順。進忠亦降。精忠駐守潮州。十六年四月。奏遣子顯祚入侍。命列散秩大臣。康親王令將軍賚塔偕精忠所屬都統馬九玉率將士守潮州。撤精忠還福州。詔止之。諭戒康親王及參贊大臣曰。今當招攜撫順之時。不宜遽撤耿精忠。以疑衆心。王大臣等不預請旨。卽撤之。殊爲失計。嗣今凡事當熟籌。毋得徑行。十一月。藩下參領徐鴻弼佐領劉延慶護衛呂應賜典儀陳良謨護軍蘇雲會等。具狀遣人赴部。首精忠歸順後。尙蓄逆謀。凡五款。一違康親王令。不悉舉遣出奸黨。一潛結海賊通音問。一與劉進忠執手耳語。謂乞降非所願。一密令腹心藏錯藥。俟異日取用。一散遣舊兵歸農。令分攜兵器。勿留供大軍。部臣以狀聞。昭忠在福州。同參贊大臣介山吳弩春亦以鴻弼首詞。具疏入告。上留疏于中。十七年春。海賊陷海澄。長泰。平和。漳平。同安。惠安。永春等城。詔精忠還福州。

昭忠攜其祖父骸骨還京。是年秋。三桂死。賊之在江西湖南者半竄遁。海賊亦敗潰。退踞海澄。上密諭康親王曰。自數年用兵以來。所費不貲。民力疲困。今大破湖南賊寇。餘孽遁入雲貴。且夕殲滅。惟福建海賊竊踞海澄。倚廈門金門爲營窟。大兵進勦。並藉水師。應撤將兵之半。以甦民力。但精忠在閩省。慮變生意外。故暫停撤。如降旨令精忠來京。或滋疑懼。王當令其奏請。陛見。尋康親王疏劾精忠罪。請逮繫正法。諭曰。今廣西湖南漢中興安俱已底定。逆賊餘黨。引領以冀歸正者。不止百千。耿精忠若卽正法。餘黨或致寒心。如能自請來京。庶事皆甯帖。王尙當加意開導之。十九年三月。精忠疏請入覲。得旨。以九玉爲福州總兵。轄藩下兵。八月。昭忠聚忠並疏劾精忠。詳見昭忠傳。精忠至。上允王大臣所請。以前此留中諸疏。下法司勘問。精忠辨歸順後。絕無叛志。法司以鴻弼等首詞可按。且有昭忠聚忠劾奏精忠。應革王爵。與其子顯祚。及曾養性白顯忠等俱磔死。籍沒。上命繫精忠。俟鴻弼等俱至京。再核議以奏。尋遣聚忠赴福州。以罪不株連。曉諭藩屬。並遷精忠家屬歸旂。是年之信爲藩屬首悖逆除爵。明年十月。大兵平

雲南。三桂孫世璠及其黨俱殄滅。詔撤舊隸精忠藩官職之在浙閩者還京。九玉亦解任歸旂。給事中姚祖瑣御史孫必振交章言三桂宜戮屍。精忠及逆黨罪應按律議磔。上詢廷臣。欲予寬減。大學士明珠奏言精忠罪較之信尤爲重大。之信不過縱酒行凶。口出妄言。精忠負恩謀反。且與安親王書多狂悖語。情無可貸。當勅法司明正典刑。于是精忠與曾養性白顯忠江元勳劉進忠徐文耀王世瑜王振拜蔣得鉉並磔于市。懸首示衆。顯祚及祖宏勳司定猷黃國瑞林芳孫廖廷雲李似桂夏季旺呂應斗陳儀陳斌武灝沈偉郭景汾羅萬里等咸伏誅。籍其家。

曾養性列傳

劉秉政附

曾養性奉天人。初從耿繼茂征廣東。隸靖南王藩下。累官副都統。繼茂移藩福建。養性從破海賊于廈門。康熙十一年。授藩下左翼總兵官。十三年三月。耿精忠反。巡撫劉秉政從逆。精忠以養性爲僞都督。連陷福寧諸州縣。養性率賊萬餘犯浙江之平陽。遊擊

司定猷。縛總兵蔡朝佐迎降。遂據平陽。五月。潛師渡飛雲江。攻瑞安不下。轉踰桐嶺。遊擊魏萬侯迎戰。敗死。養性進屯溫州城外西山。六月。溫州鎮總兵祖宏勳通賊。巡道陳衷赤。永嘉縣知縣馬玠遇害。養性入據城。僞加宏勳安遠將軍。聚衆十萬。趨台州。過樂清。攻破之。長驅下天台。仙居。及紹興之嵊縣。布僞劄寧海、象山、新昌、餘姚。土寇蜂起。養性僞授魯朝全爲總兵。褚楚白都督。使踞木嵐山。擾紹興、寧波。養性分遣賊犯金華。自犯黃巖。九月。黃巖陷。總兵阿爾泰從賊。十月。養性僞都督周列等。率賊二萬餘。自常山犯衢州。將軍賚塔。總督李之芳。分路奮擊。大破之。十一月。復犯衢州。仍敗之。十二月。養性僞總兵徐尙朝等。率馬步賊三萬。土寇二萬。攻金華。副都統瑪哈達。總兵陳世凱迎戰于積道山。破其木城。殺賊二萬餘。養性退據天台。十四年三月。養性率僞總兵八人。騎六十。步卒數萬。南至長石嶺。北至三江。延袤數十里。連屯二十五營。復遣賊將朱飛熊。率水師萬餘舟。三百餘艘。泊小梁山下。四月。將軍傅喇哈進擊之。斬飛熊。養性退據茂平嶺。扼險抗拒。五月。巡道許宏勳。紹協都司王得福。勦木嵐山賊。招降楚白。斬

朝金。養性失援。八月。傳喇哈自土本嶺間道出師茂平嶺背。賊驚潰。乘勝趨黃巖。養性棄營。據城拒守。傳喇哈進圍其城。養性夜突圍走溫州。餘賊以城降。乘勝復樂清。從柵溪沿山至青田。渡江向溫州。養性遣賊迎戰于上塘。轉戰至線漳。遇伏。橫擊之。賊首尾不相顧。潰走。養性乃濬溫州城河。析民居。增戰具。固守不下。傳喇哈圍之。十五年二月。夜犯大營。傳喇哈先營山上。令諸軍謹守。及曙。分兵下山奮擊。陣斬僞都督孫可得。總兵李節等。賊大敗。追至將軍橋。及灰橋。扼其歸路。賊盡墮水中。斬首二萬餘。養性墮馬。浮水逃入城。困守。不能復出。九月。養性聞大兵入福建。勢迫無所歸。十月朔。率衆以城降。十二月。自溫州率兵至福州。仍爲藩下總兵官。耿聚忠疏劾精忠。並劾養性。旋隨精忠還京。二十一年正月。養性磔死。宏勳定猷並伏誅。秉政漢軍正紅旂人。初爲直隸雞澤知縣。順治九年。行取授雲南道監察御史。十六年。遷大僕寺少卿。十六年。轉左通政。尋擢寧夏巡撫。康熙四年。裁缺。五年。補福建巡撫。附精忠同謀逆。後從精忠出降。赴京道病死。籍其家。

明末叛臣傳卷三

劉進忠列傳

劉進忠遼東遼陽人。初爲明總兵馬得功部校。本朝順治二年。隨馬得功在蕪湖迎降。旋從剿福建海賊。擢靖南王下右路鎮標副將。康熙三年。遷隨征福建中路總兵官。六年。改廣東水師左路。尋調廣西左江。八年。復調廣東潮州。十二年四月。進忠潛通耿精忠擁兵叛。先是進忠聞滇閩有變。遂萌異志。遣其心腹楊希震赴福州納款。獻潮州地。並請假將軍印以號召。時續順公沈瑞駐潮。知其謀。遊擊李成功。張善繼。亦密約共圖進忠。至是沈瑞起兵巷戰。兵敗。成功等被殺。精忠使漳浦鎮總兵官劉炎。統兵至。勢益張。進忠授甯粵將軍僞職。並執瑞及副督師鄧光明官兵家屬驅入福建。拘于漳浦七月。逆黨陳奠據程鄉。八月。劉斌據普甯。先後爲都統尙之孝等所敗。復其城。方之孝兵

抵潮。進忠窺其移營。輒鼓衆出犯。之孝敗之於新亨。分兵克東津筆架山洗馬橋諸隘。巡撫劉秉權。總兵王國棟亦攻毀潮州城南鳳凰州木城。斬僞都督金漢臣。合圍潮州。十四年。海逆鄭錦寇漳泉。拔之。與精忠有隙。閩粵路梗。進忠因再用希震策。納款于錦。錦遣僞總兵劉國軒引賊肆掠。僞授進忠伯爵。之孝與戰不利。退守惠州。十五年。精忠降。進忠仍擁衆觀望。十六年三月。福建既定。康親王傑書奏以將軍瑪哈達都統賚塔。統兵同精忠進取潮州。進忠窮迫歸順。上命宥進忠罪。仍爲潮州鎮總兵官。隨大兵進剿。尋授征忠將軍。六月。疏言。臣以遼東武夫。歷擢潮鎮。曷敢一旦背叛。自取滅門。實由續順公下都統鄧光明等。見臣訓練。頓生誹謗。仍約遊擊李成功張善繼率兩路兵馬。抄臣前後。亂矢如雨。臣倉卒應變。亦站隊堵禦。死亡之際。不暇擇人。走險求救。苟延歲月。及聞康親王奉命到閩。私幸得瞻天日。故差員遠輸誠款。雖屢經鄭逆調遣。臣皆按兵不動。抑且漳泉之衆。兵食全資惠潮。臣隨嚴禁接運。所以漳泉之衆。不戰自餒。今幸邀聖明赦愆復職。又加臣爲征逆將軍。仍帶伯衛。可謂榮出非分。自今以往。臣之性命。

身家均爲皇上再造。若不據實陳情。是臣旣誤於前。復又隱諱于後。殆必歸誠之心未堅。報效之志未切。臣雖萬死。不足贖矣。疏入。報聞。六月。進忠以康親王傑書招撫文檄。潛通吳三桂召兵自效。爲尙之信偵獲。上聞諭曰。進忠中懷詭譎。非實意歸誠。可檄康親王密爲之備。尋又命調其標兵剿賊。移進忠福州。十七年。命來京。率其標員兵赴廣西效用。十九年。精忠爲部人徐鴻弼發罪狀。事涉進忠。有與精忠密談。結爲心腹語。下廷議。逮問。得實。詔與精忠同磔於市。

尙之信列傳

尙之信。漢軍鑲藍旗人。平南王可喜長子。幼隨父鎮所。年十九。可喜遣入侍。世祖章皇帝念可喜功名。授之信秩。與公爵同。康熙十年。聖祖仁皇帝允可喜請。令之信赴廣東佐理軍事。之信別新宅以居。十二年。可喜欲歸老遼東。請以之信襲封留鎮。部議藩臣無乞休子襲之例。令撤藩偕歸。會逆藩吳三桂反。可喜奉詔留鎮。遣次子之孝討叛賊。

劉進忠於潮州。奏請以之孝襲封。詔可喜如舊理事。俟賊平。以之孝襲。旋晉可喜平南親王。之孝平南大將軍。命之信以討寇將軍銜。協謀征剿。未幾。高州總兵祖澤清應三桂據城叛。引廣西叛賊馬雄郭義及三桂所遣僞將軍董重民李廷棟王洪勳等。遂陷廣東郡邑。海賊鄭錦遣賊萬餘。助進忠入寇。之孝戰失利。退駐惠州。十五年春。可喜臥疾。之信代理事。三桂誘藩屬從逆。水師副將趙天元。總兵孫楷宗。相繼叛。之信遂降三桂。遣心腹環守可喜藩府。戒毋得聞白諸事。殺金光以殉。金光者。浙江義烏人。隨可喜幕下。贊畫謀最久。可喜奏其以計擒佛山鎮奸民江鵬翥。得旨敘功。授鴻爐寺卿銜。常以之信凌虐藩屬。不可襲封。告可喜者。而之信遂受僞職。招討大將軍輔德公。與海賊議奪之孝兵柄。使閒居廣州。三桂屢脅之信出庾嶺抗大軍。之信賂以庫金三十萬兩。乃已。可喜卒。三桂以輔德親王僞印與之信。之信旋遣使赴江西。通款大軍。密疏願立功贖罪。諭曰。爾父航海歸誠。功猷茂著。自吳逆叛亂以來。益矢忠藎。故特封之。以爲親王。授爾爲討寇將軍。正期克奮勇略。掃除逆賊。不圖粵省變亂。道路梗阻。今覽爾密奏。

爾父子世受國恩。斷不敢懷異念。願立功贖罪。來迎大師。知爾父子。不忘報國。念篤忠貞。因倉猝變亂。朕心深爲憫惻。已往之罪。概行赦免。果能相機剿賊。立功自效。仍加恩優敘。十六年。之信請敕大軍速進粵。是時三桂以董重民爲僞總督。踞肇慶。初。蛋戶謝厥扶當趙天元未叛時。先以繪船數百附馬雄。誘天元從賊。至是三桂令厥扶統轄水師。加僞職定海將軍。與重民合拒大軍。之信密約重民所部兵。令以缺饟諜。乘間捨重民。邀厥扶大敗之。厥扶遁入海。之信遣副都統尙之琰率兵迎大軍駐韶州。疏陳闔屬歸正。並言藩下總兵。僞授翼勇將軍王國棟。藩下長史。僞授總兵李天植等。贊襄有功。並得旨嘉獎。下部議敘。之信襲封平南親王。王國棟等各復舊職。諸路賊平。再議。諭之信曰。今據時勢。剿賊吳三桂。甚爲緊要。亟宜率兵並進。前此賊兵屯聚長沙。掘濠立椿。僅可支持旦夕。誠使諸路進兵。彼安能隨處備設。椿濠以相抗。其滅亡可翹足而待矣。尋之信遣使入貢。諭曰。昔爾先人在時。貢獻方物。靡不竭誠。二年以來。粵東事變。信使弗通。每念及爾先人素日忠貞不二。爲國忘家。罔不憫傷。今王克承先志。恢復粵東。使

人遠來貢獻。良屬可嘉。但用兵之秋。非無事時比。况見此物。不勝思念爾先人。王其安戢粵東。恢復粵西。湖南。以繼爾先人未盡之志。朕心深爲期望。此等細務。勞人費事。其暫止。是年秋。三桂從孫世琮踞桂林。之信遣總兵尙從志。以兵三千。隨巡撫傅宏烈進征。宏烈擊敗僞將軍趙天元。復梧州潯州。規取平樂桂林。詔之信。由韶州進取宜漳柳州永州。之信疏言。粵東土賊尙多。潮惠人心未定。臣宜留鎮省城。得旨令將軍喇哈達賚塔統兵全進潮州。劉進忠等知皆已歸順。海寇敗遁。王又以土寇爲辭。不離省城。倘逆賊各路來犯。不惟廣西難復。楚賊難滅。卽廣東亦難保。其速統兵赴韶州。剿賊時鎮南將軍莽依圖擊敗僞將軍胡國桂馬寶等于韶州。詔移師梧州。因之信未具舟艦師行濡滯。總督金光祖由潯州進征世琮。不勝。諭責之信曰。金光祖不守梧州。輕進失利。猶幸梧州無虞。萬一梧州失利。則近取三桂大兵。後路亦阻。前調將軍莽依圖等速赴梧州。王不亟發船。致悞軍行。不可謂非王失機也。梧州乃兩廣接壤要地。其卽遣精兵戍守。十七年正月。之信疏言。臣奉命進取宜漳柳永。行至清遠。以總督金光祖及高州

諸處報警。遂還省城。今海賊又突犯潮陽。臣未能統兵遠征。得旨潮州惠州。既有將軍賚塔等守剿海寇。不爲不足。今將軍莽依圖深入廣西。事機所係甚重。且廣西早定。則湖南之寇。不能自存。王其親往廣西策應。毋悞軍事。之信復疏言。高雷廉三郡初定。恐爲逆賊煽惑。再四熟籌。不得不留鎮省城。詔精選藩兵。遣發。暫停親往。之信與國棟。率兵赴宜漳。九月疏言。前者永興危急。臣恐國棟不能剿賊。擬親往策應。頃聞吳三桂已死。永興賊迫湖南。勢危瓦解。臣當進定廣西。詔以之信爲奮武大將軍。合永州大兵。並進。十八年大兵自湖南進廣西。趙天元降。之信疏言。前此粵東之變。起自江門。江門水師之叛。倡於趙天元。請明正其罪。詔卽誅之。時世琮寇擾南寧。之信旣次橫州。俄復退還廣州。自陳患痔日劇。有事醫療。詔移隨征部衆。與莽依圖統攝。之信令藩下總兵時應運率之往。莽依圖已擊敗世琮。將進征桂林。留應運駐守南甯。賊黨范齊韓黃明等。竄踞武宣。之信疏陳海寇宜防。未能西剿。上復諭趣之。十九年三月。之信乃率兵西勦。之信旣襲。以之孝舊握兵爲嫌。不欲其居廣州。奏請召赴京師。之孝旋自請募兵三千。

效力得旨赴江西勦賊。藩屬苦之信殘暴。念之孝弗置。之信益猜忌。素嗜酒。輒怒執佩刀擊刺。又好以鳴鏑射人。叛將孫楷宗之歸順也。上宥其罪。之信杖斃之。護衛張永祥爲之信齎疏至京。召對。承優旨。以總兵擢用。之信故阻抑。復屢辱以鞭箠。怒護衛張士選語忤。射之。殘其足。諸護衛皆不平。國棟時爲藩下都統。與副都統尙之璋。總兵寧天祚。每與語。憤形於色。巡撫金雋密具疏請。諭趣之信西勦。留國棟之璋。天祚守廣州。至是之信赴武宣。永祥士選詣闕。首之信跋扈怨望。弗願勦賊。糜兵餉。擅殺人。諸罪狀。上命刑部侍郎宜昌阿以巡視海疆。赴潮州傳諭將軍賚塔移師。並詔旨令總督金光祖提督哲爾肯。副都統金榜選。總兵班際盛。協揜之信。金雋上疏曰。自滇黔叛亂以來。兵民殞於鋒鏑。財賦竭于軍需。皇上夙夜焦勞。于今七載。吳三桂固爲亂首。而尙之信實爲亂源。何則。之信兇殘暴虐。賦性豺狼。其父可喜深慮其包藏禍心。戕害諸弟。因有移歸遼東之請。三桂卽藉撤藩倡亂。耿精忠效之。羣逆蜂起。皆之信啓其端也。可喜復慮其擁兵速禍。故請以次子改襲。使之信稍有人心。當必悔罪效忠。顧乃倚賊糾變。梟斬

鴻臚寺卿金光投順三桂。冀爲僞王。逞其驕志。及三桂與以輔德公僞勅冊印。又遣馬雄屯三水。索助餉銀十萬兩。始頽然氣沮。復謀歸正。天恩待以不死。傳襲父爵。宜撫心知愧。奮志圖功。乃不赴韶州征勦。不救永興危急。抗違詔令。養賊鄰封。且以奉命宥罪之孫楷宗擅予杖斃。目中尙有三尺法乎。臣猶憶十七年九月。公讞之信語督臣金光祖云。上欲我出兵。乃不與我一黃頂帶。翌日復議。怒責鹽駟道僉事李毓棟云。爾甫來此。事事與我違拗。我一刀砍爾。上亦無奈我何。昨歲七月讞罷。私語臣曰。非我歸正。爾安得至廣東。凡事當順從我。不獨吳二桂能殺巡撫朱國治也。臣正色叱之。乃以酒醉自解。其狂悖無忌憚如此。昔可喜將終。曰必葬海城。之信置若罔聞。惟營造藩府。終歲不輟。其意實欲久踞廣東。不忠不孝。人皆詈之。耿精忠歸正後。卽遣子入侍。之信三子皆年長有室。臣謂入侍不容緩。之信曰。天下未定。豈宜令孩童遠行。是則異志猶存。叛心未已。如見其肺肝矣。至於兵無實額。餉多虛冒。致海賊肆擾。又其貽悞封疆也。臣蒞粵兩載。具知其父積有功勞。諸弟亦小心奉法。惟之信悖逆亂常。滅絕天理。察其近習。

左右俱義憤不平。因密約都統王國棟等共酌機宜。之信旦夕就擒。乞勅議正法。以戒天下爲臣而懷二心者。國棟亦上疏自述其與金僑尙之璋寧天祚同心密謀狀。復代之信母舒氏胡氏上疏曰。逆子尙之信。怙惡不悛。酗酒肆暴。殺害善良。凌虐官吏。甚至奉命出兵。頓兵不進。私回東省。遲悞軍機。不臣之心。久萌謀逆之變。可慮。恐禍延宗祀。不禁飲泣寒心。密令都統王國棟等選員撿之。請旨正法。並收禁其妻耿氏子崇溢。乞聖慈垂念先臣忠藎。改令一子襲爵。是時光祖榜達際盛。因武宣新復。屯兵城外。之信入踞城。光祖等得國棟檄。令兵圍城。以永祥士選首告罪。款有逮問旨。宣示之信。之信就逮。還廣州。上疏辨謂永祥士選以責懲私怨。捏款誣陷。諸疏並下廷議。議削之信爵。逮至京。鞫訊時。藩兵八千在廣西。有訛言進征雲南。卽分寘城守者。多惶懼逃歸。命宜昌阿與賚塔慰遣西征。並宣諭曰。前尙之信爲屬員。張永祥等首告諸不法事。朕欲明其虛實。故令來京。非以所言皆實。必欲治以法也。平南王藩下官兵。本朝豢養四十餘年。世受國恩。最爲深厚。初無欲行解散之心。宜釋嫌疑。各保身家妻子。以副朕恩養。保

全之意。七月。宜昌阿將逮之信起行。藩下長史李天植以發難由國棟。白於之信母。及其弟副都統之節之橫之瑛。誘國棟議事。伏兵殺之。將軍賚塔率禁旅收捕。鞫同謀者。自副都統參領佐領至校卒。得百餘人。天植自服造謀。之信辯不知。護衛田世雄證之。信欲殺國棟。使告天植讞成。馳奏。法司核議。之信與之節之橫之瑛。天植。凡同謀者。依律擬斬。籍沒之。信母舒氏胡氏。怨國棟代訴之信謀逆。應坐同謀。之孝之璋及諸幼弟。雖不同謀。應革職。枷責得旨。平南王尙可喜。航海歸誠。效力行間。久鎮粵東。著有勞績。及吳逆叛反。堅守臣節。不肯從逆。爲逆子尙之信所迫。憤恨殞命。朕每念及。深爲憫惻。其妻舒氏胡氏。從寬免死。並免籍沒。尙之孝尙之璋等。免革職。架責。皆令赴京。尙之信不忠不孝。罪大惡極。本當如議處斬。念其曾授親王。姑從寬賜死。尙之節尙之橫尙之瑛。副都統與李天植等。俱卽處斬。應籍資財。留充廣東兵餉。是年九月。之信賜死廣州。永祥士選優敘擢用。世雄以不先舉發。坐杖流。上復傳諭宜昌阿曰。尙之信雖經犯法。其妻子不可凌辱。應遣人護送還京。向聞廣東有大市小市之利。經藩下人霸佔。可會

同巡撫詳察。仍歸民間。其藩下所收私稅。每歲不下數百萬。當盡充國賦。以佐軍需。又各省商販欲倚藩下投入者甚多。應察出各復其舊。尋命改隸藩下十五佐領於漢軍。駐廣東別設將軍副都統轄之。之信親屬俱歸旂。

嚴自明列傳

嚴自明陝西鳳翔人。明參將。本朝順治元年。大兵至陝西。自明降。三年三月。防守漢中。招降張獄忠僞將李旺張顛等。九月生擒僞將張黑子。斬首四百餘。陝西總督孟喬芳令率兵收川。敗僞先鋒張定邦。都督劉孝。招降官二十餘員。時西充李巽德稱明唐王隆武年號。自明敗之。復擊斬賀珍餘賊於陽平。三年肅親王豪格。進取四川。以自明爲副將。駐防川北保寧。四年招撫權演等於廣元。敗趙榮貴於劍川梓潼。五年二月。明桂王總兵譚洪攻保寧。自明斬獲甚衆。四月。授保甯總兵。加都督僉事。七年。蓬州白蓮教李希先楊允等倡亂。自明勦擒之。八年勦撫犯山寨賊趙大光。平之。加署都督同知。十

一年改守永寧總兵。十六年九月。招降桂王將軍楊國明。總兵武國用。十月。擢江西提督。敘功加左都督。康熙七年。裁缺。九月。補廣東提督。十二年七月。潮州總兵劉進忠叛。逆黨陳奠等。分據程鄉縣。自明分兵擊敗之。降偽守備張奉寰。得旨嘉獎。九月。逆藩吳三桂以偽劄遺之。自明舉首。下部議敘。十月。授三等輕車都尉世職。以其子武進士梅署守備。十五年二月。尙之信叛。應三桂。自明從逆。十一月。糾衆逼南康。巡撫佟國禎將軍舒恕等敗之。破其營。十七。自明退據南安。十六年四月。致書總督董衛國乞降。得旨。嚴自明若悔過歸正。來迎王師。當赦其罪。仍前錄用。五月。自明降。後之信亦降。疏言自明係吳逆舊屬。不知軍旅。今粵東初復。兵心甫定。若復令自明統轄。恐兵心不安。上命自明以將軍赴廣州閒住。尋疏請回京。從之。十二月。授鑾儀使。未幾病死。

孫延齡列傳

孫延齡。遼東人。父龍隨。孔有德來歸。隸漢軍。正紅旂。受二等男爵。世祖章皇帝時。封有

德定南王。鎮廣西。龍爲部將。有德以女四貞字延齡。及有德殉節桂林。龍亦歿於陣。予卹典。以延齡襲二等男。復加一等雲騎尉。時四貞尙幼。特賜白金萬兩。歲俸視郡主。旣長。通延齡。康熙五年五月。聖祖仁皇帝命延齡爲鎮守廣西將軍。統轄有德所遺部衆。駐桂林。八月。禮部議給四貞儀從。得旨。定南王爲國捐軀。又復絕嗣。世祖章皇帝命其女視郡主食俸。今請給儀從如議行。後不爲例。時吳三桂以平西王爵。留鎮雲南。凡滇黔官吏。悉擅除授。延齡效之。漸驕縱。無忌憚。十一年九月。御史馬大士疏劾延齡擅銓武職。爲部臣駁奏。延齡復徇私瀆請。乞賜嚴勅。以爲恣肆不臣者戒。疏下部察議申禁之。十二年七月。部下都統王永年副都統孟一茂參領胡同春李一第等。列延齡贓款。及縱屬殃民。城門晝閉。鄉民不敢入城狀。移牒總督金光祖。光祖以聞。上遣侍郎勒德洪。赴粵審理。御史鞠訊。疏言。延齡職位本微。祇因配定南王女。是以命之掌管藩兵。終屬外姓。無承襲勳爵之例。乃駐粵以來。凌辱職官。擅補營員。近復委其兄孫延基總管部兵。軍心未能貼服。訐告紛紛。乞敕延齡還京。其部兵或歸隸入旂。或仍令駐防。別遣

將軍統轄。疏下部確議。以延齡既爲永年奏劾。特遣大臣往勘。應俟讞成再議。旣而勒德洪鞫訊。永年所劾屬實。請治延齡罪。得旨寬免。十二月吳三桂反。上以廣西境隣貴州。授延齡爲撫蠻將軍。命與都統線國安。固守疆圉。會同廣西巡撫馬雄鎮。提督馬雄。禦勦賊寇。三桂以逆書誘之。十三年二月。延齡遂據桂林叛。殺王永年。孟一茂。胡同春。李一第等。以兵圍巡撫廨署。執雄鎮。及其家屬幽寘之事聞。詔削延齡職。宣諭中外曰。逆賊孫延齡。素無寸功能績。祇緣定南王孔有德航海歸誠。出師盡節。世祖章皇帝憫其遺孤。不忍分離。仍以所屬官員統之。養贍加恩。概從優厚。迨朕御極。念孫延齡旣配王女。應量加寵榮。故授爲將軍使之管理。定南王所遺官兵。鎮守粵西。在孫延齡叨冒崇階。自應恪恭職掌。殫忠報効。乃歷任以來。屢有過犯。經王永年等劾奏。贓罪。部議從重處分。朕猶以定南王之功。曲加貸宥。仍令管兵如故。近復賜以撫蠻將軍印。委任有加。恩寵罔替。不意其包藏禍心。背恩忘義。連結逆賊吳三桂。徑行反叛。國法難容。宜加顯戮。今削其將軍職銜。大兵指日進勦。立正典刑。但念兩營官兵。係定南王舊人。受恩

累朝忠義素著。必不甘心從逆。墮棄前勳。其有能斬孫延齡投獻軍前者。優加爵賞。或兵馬城池納款者。論功敍錄。或力有不逮。自拔來歸者。亦免罪收用。至父兄弟。現在京城直隸各省者。概不株連。毋得心懷疑畏。自罹法網。負朕好生之意。四月延齡疏言。滇黔告變。臣兩疏具報。因桂林重地。臣奉詔官兵守禦。屢移咨提督臣金光祖居中調度。提臣馬雄赴省。面商機宜。不料督提二臣。誘臣部下都統王永年等。謀害殺臣。幸一朝敗露。本旗官兵。遂將王永年等剪除。督臣金光祖以奸計未遂。誘臣作叛。詐疏上聞。前蒙賜臣撫蠻將軍敕印。賚至肇慶。督臣執留不發。臣未克祇受。今衡永之間。滇兵數萬。與粵爲隣。臣固不惜頂踵。勉圖報效。乃提督二臣。視臣如讎。是棄臣於陷穽之中也。此臣不得不伸之苦衷。惟希睿鑒。疏入。上諭平南王尙可喜及金光祖馬雄曰。孫延齡奏提督二臣誘其都統王永年謀害之。故不得已剪除王永年。此潛通吳逆。飾詞誣奏耳。然孫延齡雖叛。其所部兵。曾隨定南王效力國家。叅養有年。恐大兵至日。概行誅戮。朕心有所不忍。前有旨如孫延齡改過來降。亦從寬宥。爾等不可以此遂緩進剿。必孫

延齡果悔罪歸誠。乃受降具奏。又諭可喜光祖等曰。孫延齡有可勦之勢。卽議進勦。若未可速進。則俟大兵來粵。協力勦滅。是時逆藩耿精忠自福建寇掠江西。三桂踞湖南諸郡。糾賊犯袁州吉安。大兵與賊相持。未能達粵。延齡遂自稱安遠大將軍。移牒平樂梧州諸郡。煽誘從逆。未幾馬雄亦叛附三桂。線國安病死。粵西守土文武官。或望大兵赴援。或被羣賊脅從。不復與延齡爲敵。三桂徧給僞冊印。以叛黨傅奇棟爲僞巡撫。李迎春爲僞布政使。程可則爲僞按察使。延齡招致萬羊山賊衆。參以舊軍。分設五鎮。每鎮兵二千。縱之寇擾郡邑。旌僞稱安遠王。有傅宏烈者。舊爲慶陽知府。當三桂未反時。舉發三桂不軌事。坐誣謫戍蒼梧。延齡旣叛。宏烈欲假事權。集兵圖恢復。受三桂僞職。爲信勝將軍。與延齡友善。數以大義陳說。延齡猶豫未決。妻四貞約宏烈往迎大兵。至卽反正。十六年宏烈迎大兵於江西。先致書將軍舒恕。言四貞欲延齡歸順。曾告宏烈。謂無刻不以隆恩豢養爲念。若賜赦赦延齡罪。封四貞爲郡主。則粵西可定。舒恕以情入奏。詔督捕理事官麻勒吉相機招撫。授傅宏烈廣西巡撫。合大兵進征。先是三桂屢

脅延齡助寇河南。延齡以部衆不從報謝。至是將歸順。爲三桂偵知。使從孫世琮糾賊逼桂林。誘執延齡殺之。四貞善騎射。能殺賊。賊相戒無犯。留僞將軍李延棟於桂林。通聲援。凡延齡部衆聽其舊將統之。世琮別掠平樂。潯州。橫州。南甯。爲大兵所敗。中傷死。宏烈至平樂。延齡舊將劉彥明。徐洪。鎮徐上遠等。擒斬李延棟。逐走賊衆。偕線國安子成仁。率桂林官吏兵民歸順。四貞還京師。

馬雄列傳

子承蔭郭義附

馬雄。陝西固原人。廣西提督馬蛟麟之族子。蛟麟撫爲子。順治八年。襲一等輕車都尉世職。九年。充定南王標下左翼總兵官。十年。敍隨征湖南。廣西軍功。加都督同知。十一年九月。授二等男。鎮守廣西。時明桂王朱由榔據安隆。遣其將李定國。擾南寧。十二年。定國令其黨李先芳。廖鳳等。據藤縣。雄擊破之。擒其所授知府江炎。十三年二月。靖南王耿繼茂兵抵南寧。定國奔南安。雄追擒其陽春伯李先芳。斬其參將杜紀。俘獲無算。

四月加右都督十五年。定國遣其黨閩維龍趙延生等陷橫州。防守都司趙連城退屯貴縣。雄率兵馳援。維龍等棄城遁。遂復橫州。十六年。四雲騎尉世職。十七年廣東巡按御史張問政劾雄庇商課。抗欠鹽餉。部議降二級。照舊管事。十八年。授廣西提督。康熙十三年二月。孫延齡叛。應吳三桂。廣西震動。雄邀執三桂僞官。左江鎮總兵官郭義並舉首三桂逆書。得旨加獎。義福建海澄人。先由海道來降。以湖廣鄖陽鎮總兵。移鎮左江。至是偕雄同守柳州。上諭馬雄等曰。保固粵西。實爾等是賴。今大兵已抵武昌。倘賊兵犯武昌。寶慶爾等率所部官兵進剿。其後。大兵迎擊於前。自可尅期撲滅。尙其謀定後舉。以副朕倚任至意。六月。雄疏言。延齡賊衆不下萬五六千人。臣雖堅守柳州。衆寡不敵。乞發兵應援。上命平南王尙可喜。總督金光祖。酌發廣東兵赴援。九月。雄及郭義俱叛。降三桂。於是廣西全陷。十五年二月。雄因高雷兵變。率賊犯廣東。連陷州縣。未幾尙之信叛。廣東全陷。十一月。義偕廣東從逆提督嚴自明。進逼南康。連兵十七營。江西巡撫佟國禎。將軍舒恕等擊敗之。義等退據南安。十六年五月。將軍莽依圖進攻南安。

自明以城降。義走廣西。先是撫遠大將軍圖海。疏言馬雄陷賊。其母及族人俱在固原。今雄母欲令其孫承先。特書赴廣西招降。詔給承先遊擊銜。遣赴廣西。旋命督捕理事官麻勒吉。齎敕赴簡親王喇布軍前。諭雄曰。爾世並特受國恩。鎮守西粵。勞績素著。自吳三桂孫廷齡相繼背叛。整兵防禦。力保孤城。邀執僞差。矢心報國之忠貞。朕久洞悉。後緣賊氛逼近。援絕勢單。當力難持守之時。爲暫爾自全之計。茲各路大兵。剿撫並用。每念粵西變叛。各官陷賊。自援無由。以爾摠忠有素。追溯前勞。尤深軫惻。今特頒專敕。宣諭爾等。果翻然悔悟。棄逆效順。將爾已往之罪。並屬官吏。悉行赦免。若能剿寇立功。仍加恩優敘。爾其無懷疑懼。以負朕篤念舊勳至意。十七年正月。將軍莽依圖。疏言雄病死維容。諭麻勒吉等曰。馬雄雖死。其餘黨尙踞粵西。着仍隨簡親王偕行。以昭朕赦罪論功之意。十八年六月。之信奏雄子馬承蔭。率僞將軍郭義。及僞文武官繳敕印來降。八月承蔭請效力自贖。諭曰。原仕廣西提督馬雄之子馬承蔭。不忘國恩。歸誠可嘉。應授承蔭伯爵。給與將軍刺印。隨大兵剿賊。其回來歸附。文武官弁。酌量給劄。以示鼓

勵。旋給義總兵銜。協守南甯。僞將軍吳世琮犯南寧。築長圍守之。城中食且盡。義嚴守備。乘間出戰。賊屢却而復合。會將軍舒恕來援。義出城策應。大破賊兵。世琮負重傷遁。將軍莽依圖。疏言義固守南寧。非他人歸誠者比。請仍授左江總兵官。從之。十九年正月。承蔭標兵以缺餉。簡親王喇布戡之。承蔭言於簡親王。以舊設五營兵少。請增援。剿二營。營各千人。喇布以聞。諭曰。將軍標下無設七營例。馬承蔭仍立五營。兵五千。參將守備各官。聽其選擇。會剿雲貴。二月。承蔭復反。傅宏烈登舟遣兵。襲破其營。簡親王喇布還保桂林。上命湖廣綠旗兵二千。速赴簡親王軍前協剿。五月。總督金光祖擊承蔭於武官。敗之。將軍莽依圖又敗之於隆安。六月。簡親王喇布至維容。進取柳州。承蔭率僞文武官弁。詣軍門降。諭曰。初馬承蔭及所部兵背叛。蹂躪江上。擾掠生民。罪惡已極。後見湖南平定。廣西恢復。窮迫請降。朕欲生民早獲甯息。悉寬前罪。封以伯爵。授爲將軍。仍令官兵標員亦分營補用。及大兵窺取雲貴。無故背恩復叛。致誤征討大事。今因兵敗勢蹙。窘急歸降。其押解來京。承蔭逮至京。論死。御史孫必正論郭義應連坐。諭

曰、近日言官參奏郭義。朕念從賊者。前既有旨寬宥。又加誅戮。於前旨未符。朕於大惡。決不輕恕。其餘若盡論死。不太甚乎。凡隨從失節者。令革職放回原籍。以示寬典。義還籍尋死。

線國安列傳

線國安遼東人。隨定南王孔有德來歸。隸漢軍正紅旗。崇德元年。授二等男爵。隨征海外各島及朝鮮。順治元年。從大軍入山海關。擊走流賊李自成。二年。隨有德破自成於潼關。授定南王前鋒統領。移師下揚州。渡江克江陰縣。三年。自成死。餘黨李錦郝搖旗等。分據湖廣。國安隨有德至岳州。督兵征長沙。衡州。永州。寶慶。所向克捷。時明桂王朱由榔。與其將吳一桂等。由武岡竄桂林。其貴溪王朱常澆。恢武伯向登位。章平伯周金湯。萬安伯張士舉。樂平伯蓋遇時。興平伯牛萬才。軍門王順祖。向文明。總兵林國瑞等。猶擁衆據湖南。有德奉命專征。國安從。五年二月。克沅州。擒常澆。登位。進攻辰州。及石阡。思南。清溪。皆下之。擢定南王左翼總兵。加都督同知。七年正月。克新田縣。斬金湯。二

月克新甯縣。擒順祖。國瑞文明降。四月。克桂陽。降士舉。遇時。八月。克萬陽山。斬萬才。進攻桂林。克之。由榔遁。八年二月。連克柳州。梧州。潯州。平樂。南甯。太平。思恩等府。廣西平。有德鎮桂林。命國安分駐南甯。九年。擢廣西提督。會李定國糾衆陷桂林。有德死之。國安家屬遇害。平樂。梧州。潯州。繼陷。國安率兵復梧州。又偕左翼總兵馬雄。右翼總兵全節復潯州。遣遊擊戴成功等復平樂。留雄守。十年正月。偕全節復桂林。四月。吳一青糾衆數萬來犯。國安拒之。斬級三千。生擒二百五十餘。賊收集逃難家口二千一百九十餘。給衣食。安置投誠弁兵。敍功加左都督。七月。定國犯桂林。諸郡縣多騷動。國安悉力守戰。獲其賊衆火藥。定國敗遁。上嘉其功。加太子太保。十一年九月。封三等伯。授衆官總領。駐鎮桂林。十二月。由象武追定國至界化土司。復賓州。橫州。潯州。南甯。思恩。太平等府。十二年四月。給征蠻將軍印。統攝猺獞。五月。回桂林。九月。賜鞍馬弓矢。十五年正月。命同征南將軍卓布泰取貴州。四月。由慶遠復柳州之融縣。懷遠羅城。慶遠之天河。荔波河池南丹。六月。抵貴州獨山州。進趨都勻。降定國衆數萬。十一月。由羅城河追至。

羅田。斬獲無算。越日大敗定國於涼水井。又敗之木寨山口。定國遁。復安隆新城。十六年正月。同三路大兵取雲南。二月。追剿定國至永昌。趨戰磨盤山。大破之。定國遁入南甸。遂駐沙木河。督造浮橋。三月。旋雲南省城。七月。奉旨班師回粵。十二月。靖南王耿繼茂移鎮廣西。諭國安率所部來京。十七年二月。命爲廣東都統。四月。諭兵部。廣西巖疆當厚集兵力。鎮守。都統線國安免赴廣東。統領定藩下官兵。駐廣西事宜。應行速議具奏。尋議國安應以太子太保三等伯鎮守廣西。加征蠻將軍總管。定藩下官兵。再撥與綠旗兵三千駐桂林。得旨。線國安授廣西等處鎮守征蠻將軍。康熙五年。以老乞休。從之。十二月。逆藩吳三桂反。廣西鄰貴州。上以國安素得軍心。授都統。與將軍孫延齡。提督馬雄。固守禦剿。十三年二月。延齡據桂林叛。國安與雄相繼從賊。十五年。奉旨馬雄屢請援師。因不卽至。勢迫從賊。線國安爲延齡逼叛。伊等皆受國厚恩。大將軍簡親王酌議遣人招撫。尋遣督捕理事官麻勅吉賞敕招之。未抵桂林。國安病死。子成仁。同延齡僞將劉彥明等歸順。

明末叛臣傳卷四

姜瓖列傳

姜瓖陝西榆林人。明宣化鎮總兵。流賊李自成至居庸關。瓖迎降。本朝順治元年五月。睿親王多爾袞定京師。瓖乘機入大同。殺流賊僞總兵張天林何天相等。據寧武代州沿邊諸邑。奉表投誠。睿親王令受總兵。瓖請以明棗強王裔朱鼎冊嗣藩大同。奉明宗社。睿親王切責之。八月。命佩征西前將軍印鎮大同。十二月。隨英親王阿濟格征陝西。保甯武界。斷流賊糧道。榆林東西各堡。聞風投順。英親王以瓖統攝宣化大同諸鎮兵馬。招撫屬邑。二年正月。僞總兵高一功自延安出犯保德甯武。瓖率所部並調蒙古迎擊。斬獲無算。一功遁去。六月入覲。尋還鎮。五年十一月。喀爾喀部衆入邊。上遣英親王同端重親王博洛等統兵駐防大同。總督耿焯率司道各官出城儲待芻糧。瓖聞大兵

至。疑襲已。遂據城叛。焯奔陽高。瓌殺其家屬殆盡。十二月。僞稱大將軍。易冠服。遣其黨姚安入朔州。明廢弁萬練乘變。襲踞偏關。瓌卽以練爲偏關道。甯武。岢嵐。保德。相繼失守。劉遷者亦明廢弁也。糾亡命受僞左大將軍職。掠雁門關。及代州繁峙五台等邑。太原告警。巡撫祝世昌連疏請兵。上遣都統巴顏副都統鄂洛索臣。率禁旅赴英親王軍。合圍大同。先齋敕諭瓌曰。前因有事蒙古。故命王一等來大同。如果爾等有罪當誅。安用此詭計。此必有奸人煽惑離間。如能悔罪歸誠。仍當宥過恩養。瓌負固如故。復遣其黨姚舉等四出劫掠。明參將王永強據榆林。與瓌通謀。自稱招撫大將軍。殺延綏巡撫王永志。及靖邊道夏時芳等。窺西安。六年正月。上遣敬謹親王尼堪。鎮國公喀爾楚渾。輔國公穆爾祜。率禁旅赴太原。都統庫魯克阿賚。分兵敗賊於石嶺關。賊退據忻州。復進克之。追剿賊衆。屢捷。斬僞巡撫姜輝。三月。睿親王統兵出居庸關。拔渾源州。進薄大同城。遣諭瓌降。許自新。瓌乃託言軍民脅之起事。欲以自解請免罪。王怒其傲慢。益治攻具。會豫親王多鐸。睿親王還京。賊援兵五千餘。由大同北山立兩營逼我軍。瓌亦

率千餘騎出城待戰。端重親王督護軍統領鰲拜及諸將分兵擊破之。瓌敗入城。是時都統李國翰等已擊破王永強於同官。延綏諸逆漸平。惟廢官李建泰等尙與瓌遙應。四月大軍克左衛。上遣貝子務達海等至軍中更代。英親王入京。五月萬練劉遷復由清源徐溝分道犯太原。署副都統洛碩卦喇等率駐防兵與祝世昌合擊。八月遷敗。走黃香寨。大兵圍破之。遷伏誅。偏關岢嵐相繼復。練自焚死。餘賊爲大軍所殺。及自拔來歸者甚衆。瓌勢日蹙。上仍命英親王往圍大同。城中食盡。死傷枕藉。僞總兵楊振威及僞官裴季中等謀斬瓌。竝其兄琳弟有光首出降。遂復大同。明年建泰等亦伏誅。

李建泰列傳

李建泰。山西曲沃人。明天啓五年進士。官至大學士。崇禎末。自督師西剿流寇。及京師陷。建泰率殘卒數百。輦餉銀入保定城。賊攻城甚厲。建泰倡言曰。勢不支矣。姑與議降。書牒。迫署知府邵宗元用印。宗元不從。建泰中軍副將郭宋杰等內應賊。城陷。建泰出

降。順治二年三月。詔錄崇禎舊臣。五月起授鴻文院大學士。尋充纂修明史總裁官。賜玲瓏鞍馬。越日賜黃金二十兩。白金千兩。八月賜品服貂蟒各一襲。十二月。祁州知州孫率禮。欲揭其前任張宏發虧帑事。建泰納宏發賄。致書率禮囑止之。率禮直揭通政司。發建泰書爲左證。建泰謀之通政使李天經。寢其事。率禮候逾月。不得旨。再控於刑部。逮問得實。天經降二級。建泰罷歸。四年三月。有參將李天生者。訐奏建泰。鷓伏曲沃。招納亡命。謀不軌。部鞫無據。褫責天生。建泰免議。六年八月。山西土賊聚寇曲沃。建泰通謀。以書給翼城令何斯美爲援。斯美縛使者首於知府徐來麟。及曲沃賊敗。建泰遁去。巡撫祝世昌以聞。得旨逆賊李建泰負恩倡亂。深可痛恨。著地方官嚴行緝拿。後姜壤據大同。建泰復會賊將李大猷。房箕尾等。馬步賊兵千餘。據太平遙應之。會謙郡王瓦克達等。討平潞安平陽澤州諸路。建泰猶負固不下。十一月。大軍圍太平。勢迫乃降。七年五月。伏誅。親屬逆黨。竝論如律。籍其家。

金聲桓列傳

金聲桓遼東人。初爲明總兵黃龍裨將。與大兵戰於旅順。龍敗死。聲桓遁去。後復隸甯南候左良玉部下。爲後營總兵。本朝順治二年五月。英親王阿濟格追剿流賊李自成。至九江。聲桓隨良玉子夢庚投誠。王奉詔班師。聲桓請取江西郡邑以自效。王令以提督撫剿總兵銜掛討逆將軍印。聲桓遂自九江傳檄。下南康南昌。移兵駐南昌。十月授鎮守江西總兵。時明唐王朱聿鍵據福建。自號隆武。江西郡邑多附之。復有益王朱由本據建昌。永甯王朱慈炎據撫州。聲桓遣副將王體忠擊走由本。擒斬其監軍道王養正。布政使夏萬亨。知府王城。推官王允浩。史夏隆等。復遣副將王得仁圍撫州。慈炎棄城遁。得仁追殺之。建昌、撫州、袁州相繼歸順。三年。敘投誠功。賜冠服玉帶鞍馬。先是聲桓自旅順敗遁。其妻子兄弟並爲大軍所獲。太宗文皇帝命贍養之。至是聲桓疏請取其孥。得旨允行。又疏言。臣前攝提督撫剿。今更爲鎮守。體統迥異。請如原銜。賜勅印節。

制文武官。便宜行事。部議江西寇氛尙熾。宜予敕印。河鎮守爲提督。剿撫事宜。會同撫按。聽招撫大學士洪承疇裁決。我朝無鎮臣節制文官及便宜行事之例。聲桓特請冒昧。申飭。詔如議。會侍郎孫之獬。以兵部尙書銜招撫江西。於聲桓所置官屬多更易。聲桓疏劾其劄委專擅。之獬坐褫職。是年聲桓遣兵克贛州。四年。克安吉廣信。屢剿滅明宗室。及故官之踞城匿山寨者。江西郡邑底定。聲桓自以功高。未酬封爵。懷叛志。王得仁者。舊爲自成裨將。所稱王雜毛者也。助聲桓攻戰久。亦自負其功。以敘錄弗及。心怏怏。五年正月。聲桓與合謀糾衆。據南昌叛。圍巡按董成學廨。成學遇害。邀巡撫章于天於江中。拘繫之。聲桓僞稱豫國公。稱得仁爲建武侯。詭云明唐王未死。分牒授職。書隆武四年。遣人四出。約期舉兵。廣東提督李成棟叛應之。得仁僭僞將白之裔。潘永禧吳高等。分陷南康。饒州。九江。聲桓謀趨南安。與成棟通援。先集衆圍犯贛州。三月。巡撫劉武元總兵胡有陞嬰城固守。屢出兵敗之。勢稍沮。上命征南大將軍譚泰。都統和洛輝進討。復九江。南康。饒州。進剿南昌。聲桓引衆還救。爲武元有陞追擊。斬燹過半。南昌僞

守將宋奎光郭天才。僞先鋒劉一鵬以迎戰。大兵屢勝報聲。桓喜。趣得仁速進。大敗於七里街。乃盡撤屯兵入城。大兵鑿濠築壘。久圍之。六年正月。攻城北門。潛分兵城南。樹雲梯破城。斬得仁。聲桓中矢投水死。磔其尸。奎光天才一鵬。及諸叛黨皆伏誅。

章于天列傳

章于天遼東人。崇德六年舉人。任禮部啓心郎。順治元年七月。授山東兗東道。駐沂州。河道總督楊方輿令同河道朱國柱率兵剿滿家洞賊。屢戰皆捷。會肅親王豪格統師至。以于天爲向道。攻毀賊巢。斬獲無算。大兵徇曹州。明鎮將劉澤清家在焉。城中居民旣歸順。訛言澤清將引兵殺掠。復謀遷避。于天輕騎入城。綏緝之。民以無怨。復籍澤清家財充軍餉。方輿奏其能。請改充西道。駐曹州。二年七月。部推湖廣荆南道。方輿復以其練習河務。奏留之。三年十月。擢江西巡撫。江西爲明藩封地。明亡。其宗室逃匿者。諸廢紳每挾以號召人衆踞城邑。抗拒大兵。總兵金聲桓偕副將王得仁等攻剿踰年。頗

有功。于天旣之任。復檄副將徐文燦湯執中劉一鵬等。分剿瀘溪東鄉。吉水。龍泉。浮梁。諸寨。獲明瑞昌王朱統鑒等。復擒斬其總兵王來捌。盛明世。兵部郭應衡。郭應銓等。于天以諸將功次悉由已論定。日驕縱索賄。因與聲桓隙。且嫚罵。得仁聲桓。久懷叛志。得仁復憊患之時。郡邑頻罹水旱。于天假平糶名。搜括諸富室。或誣以隱匿廢藩。非刑拷索。饜欲乃已。五年正月。于天以巡覈莊田。率數騎赴瑞州。得仁向聲桓曰。此非獨索賄也。其將徑往贛州。合鎮兵圍我乎。聲桓遂與偕叛。據南昌。糾黨襲于天於江中。挾之歸。餌以多金。使董造礮車。于天遂從賊。逾數月。大兵圍南昌。得仁拒戰。大敗。聲桓懼于天泄其謀。乃殺之。

李成棟列傳

李成棟。遼陽人。初爲明總兵。守徐州。本朝順治二年四月。豫親王多鐸統師南征。成棟率所部降。王令從大軍下揚州。江甯。復隨貝勒博洛征浙江。分克太倉。嘉定。南匯。上海。

皆有功。十一月授鎮守吳淞總兵官。明故官荆本徹據崇明。成棟率兵攻之。僞監軍道王臣縉以城納款。本徹竄入海。三年二月。敍投誠功。賜冠服玉帶鞍馬。尋詔貝勒博洛爲征南大將軍。剿滅浙東餘賊。進取福建。成棟應調。率兵馬隨大軍定邵武汀州漳州。十月。貝勒承制以總兵佟養甲署兩廣總督。成棟署兩廣提督。合軍征廣東。是時明唐王朱聿鍵弟聿鏗據廣東。明桂王朱由榔據肇慶。成棟先下惠州潮州。獲惠潮道印。卽用其印給牒廣州報無警。使不設備。潛師爲賈人裝。襲破廣州城。擒明宗室王世子十人。聿鏗與其大學士蘇觀生皆自殺。餘衆或竄或降。四年。由榔走廣西。其大學士陳子壯尙書陳嘉玉等。猶擁衆據肇慶三水新甯東莞新安等城邑。成棟與養甲分兵攻剿。次第就平。復攻克梧州。招撫潯州平樂。明總兵李承志李明忠皆以城降。遂驅桂林軍其北門。會甘竹灘賊渠余龍。連結陳子壯張家王。寇掠肇慶廣州。養甲自廣州告急。成棟收軍赴援。俱擊走之。是年六月。授提督廣東總兵官。加左都督銜。先是成棟與養甲兵定廣東。以部衆爭功。漸生隙。至是因養甲奉詔總督兩廣。而已僅得提督虛銜。疑

養甲有意抑之。懷叛志。明年正月。江西叛鎮金聲桓遺書成棟。約期舉兵。成棟遂據南雄叛。納款由榔。迎之駐肇慶。受僞爵爲惠國公。使其黨賊害養甲。及巡按劉顯名。潮州總兵車任重等。於是廣東郡邑皆從之叛。九月。成棟糾衆十餘萬。分路出信豐。南安。合犯贛州。南贛巡撫劉武元。總兵胡有陞。督將士分四門出戰。連破賊營。殲殪過半。成棟退踞信豐。六年正月。大兵破南昌。燬聲桓。乘勝進圍信豐。副都統覺善先登破城。賊潰遁。我兵追躡之。成棟馬蹶。墜水死。九年。平南王尙可喜靖南王耿繼茂等。復廣東。進定廣西。成棟長子元允。時爲由榔中軍都督。僞爵南陽侯。次子建捷爲僞威武將軍。前軍都督。並爲大軍所敗。就擒伏誅。

鄭芝龍列傳

鄭芝龍福建南安人。明末入海寇。顏思齊黨爲盜。後受撫。累官總兵。本朝順治二年。大軍定江南。芝龍弟鴻逵爲明福王朱由崧總兵。守瓜州。兵敗南還。與明閣部黃道周。擁

立唐王朱聿鍵於福建。封芝龍爲南安伯。晉平國公。芝龍嘗亡命日本。娶倭婦。生子森。以厚幣迎歸。引謁聿鍵。賜姓朱。改名成功。封忠孝伯。而芝龍以聿鍵立非己意。日與文臣忤。又以我招撫大學士洪承疇。御史黃熙允與同里。通音問。密謀歸款。三年。貝勒博洛師至福建。斬聿鍵。以書招芝龍降。芝龍喜。率所部降軍門。時成功年二十三。阻之。不從。遁入海。四年。博洛班師。以芝龍歸。詔隸漢軍。正黃旂。芝龍子六。長卽成功。先爲南安生員。後冒稱明裔。次世忠、世恩、世廕、世襲、世默。芝龍入京。惟世忠從。成功糾衆得數千人。據南澳。遙奉明桂王朱由榔年號。自稱招討大將軍。鴻逵據白沙。族人鄭彩據廈門。鄭聯據梧州。互犄角。劫掠沿海郡縣。五年。敍芝龍投誠功。授三等子爵。是年成功陷同安。進犯泉州。總督陳錦等以兵援。成功遁。六年。由榔遣使封成功延平公。七年。成功寇廣東潮州。爲總兵王邦俊擊敗。還自揭陽。襲奪彩軍。聯度不敵。亦避去。成功始據廈門。五年。康親王傑書奉命定福建。精忠降。錦遣僞總統許耀以賊二萬犯福州。連營烏龍江。康親王遣都統喇哈達等。渡江奮擊。克賊營。追奔四十里。進兵規復興泉汀漳四郡。

十六年。副都統穆赫林等克泰寧、建寧、寧化、長汀、清流、歸化、連城、上杭、武平、永定、十縣。喇哈達等克泉州。斬許耀。錦還漳州遁。十七年春。康親王遣知府張仲舉招諭錦。不納。其黨復由海澄據玉州等寨。分犯石碼、江東橋。漳泉復告警。僞總督林英犯泉州。提督段應舉擊敗之於湖口。生擒僞總兵林耀等。叛賊吳淑復由石碼登岸。海澄公黃芳世同都統孟安擊敗之金門。八年。巡撫張學聖偵成功復寇潮州。遣總兵馬得功襲廈門。攬其貲。成功還。復連陷同安、漳浦。詔安、南靖、平和、海澄、長泰、進圍漳州。九年三月。錦赴援。戰於江東橋。不利。退屯灌口。爲家奴李忠刺死。十日都統金礪援至。成功敗遁。海澄先是芝龍請留弟芝豹。及子世恩。守其祖栖庭。父士表墓。母妻妾及諸子隨入京。並請改隸。廂紅旗漢軍。詔允所請。仍官世忠爲二等侍衛。至是上命芝龍書諭成功。及鴻逵降。許赦罪授官。並聽駐原地。力防剿浙閩廣東海寇。往來洋船令管理。十年。詔封芝龍同安伯。成功海澄伯。鴻逵奉化伯。授芝豹左都督。使至閩。芝豹隨母入京。成功不受封。掠如故。十一年寇漳州。千總劉國軒叛獻城。芝龍請令世忠偕使往撫。成功益驕。要地

及餉。不薙髮。書詞悖慢。命世子濟度爲定遠大將軍。赴閩防剿。是時成功分所部爲七十二鎮。僞設六官理事。假由榔號便宜封拜。十二年正月。左都御史龔鼎孳疏劾芝龍蒙養榮者十年。彌桀驁。家僕往來海上信頻通。子弄兵海壖。父高枕都下。釀禍之根。請早除。而巡撫佟國器亦獲芝龍與成功私書上之。詔革芝龍爵。下獄。八月。成功陷浙江舟山。聞大軍南來。遁。十二月。芝龍僕尹大器首其父子交通狀。勅芝龍自獄中以手書招成功。不降。卽夷其族。十三年。嚴禁沿海奸民與賊販米接濟。初成功令僞將蘇茂寇揭陽。敗歸。惡而殺之。至是謀仍北犯。留其黨黃梧守海陽。梧以茂見殺。懼及。斬僞總兵華棟以城降。詔卽封梧爲海澄公。駐漳州。梧乃悉發鄭氏墓。斬成功所置五官商之爲漳民害者。是冬濟度班師。成功陷閩安鎮。犯福州。轉掠浙江溫台等郡。十四年二月。梧薦降將施琅同辦剿賊。琅晉江人。初爲成功部將。後投誠。父及弟姪均被殺。梧知琅智勇。故薦之。於是擢琅副將。三月。梧具揭兵部。請速翦芝龍。以絕盜根。詔流芝龍及其家屬於甯古塔。梧等謂不殺芝龍。成功之心不死。海上諸僞將投誠之意不決。總督李率

泰以聞。上嘉納之。是年鴻逵病死。成功陷台州。十五年陷溫州。由榔遣使封成功延平王。十六年五月。成功連艘北犯。踰崇明。陷鎮江。順流犯江甯。八月。舟至觀音門。值貴州凱旋大軍浮江下。敗其前鋒。成功率水賊數萬圍江甯。列巨艦。阻江南北要路。江蘇巡撫蔣國柱。總兵梁化鳳赴援。夾攻。賊大敗。陣斬僞總統余新生。擒僞提督甘輝等。俘斬甚衆。餘孽退犯崇明。遊擊劉國玉等復擊敗之。成功南遁。十月。命將軍達索。總督李率泰分軍。一出漳州。一出同安。搗廈門。尋以戰艦未修。引還。十七年。命靖南王耿繼茂。由廣東移鎮福建。都統宗室羅扎。爲安南將軍督剿。十八年。諭遷瀕海民入內界。增兵守邊。成功既自江南敗歸。又接濟路絕。由榔已走緬。少聲援。勢日蹙。乃覬取臺灣以自保。臺灣舊爲荷蘭國紅毛番所有。芝龍與顏思齊等爲盜時屯於此。後仍歸荷蘭。至是成功舟抵鹿耳門。阻風濤。不得入。潮驟漲丈餘。遂登岸。荷蘭人拒之。成功給曰。此地我先人故物。珍寶聽爾載歸。地仍還我。荷蘭引去。成功入據之。其留守銅山僞都督萬儀萬祿等。赴梧軍降。是冬芝龍及子世恩世竊世默等俱伏誅。康熙元年。潮州總兵許龍擒

成功從弟成賜於廈門。成功之人臺灣也。長子錦留廈門。與乳媪通。生子。成功怒。遣僞刑都事洪卯禮都事黃副殺錦及錦母董氏。且遣僞總兵周全斌。盡殺諸僞將留者。於是諸僞將擁立錦爲平國公。以兵拒殺卯副。囚全斌。成功聞之。恚甚。發狂。嚙指死。臺灣諸僞將亦以成功弟世襲爲招討大將軍。尋爲錦所逼。奔泉州降。授左都督。繼茂率泰以成功旣死。諭錦降。不從。會錦殺其從伯父鄭泰於金門。泰弟僞同安伯鳴駿及泰子賡僞永城伯纘緒。均赴泉州降。鳴駿授遵義侯。纘緒慕思伯。賡左都督。諭來歸者各授爵。二年六月。詔檄荷蘭夾板船。全剿廈門金門兩島。於是繼茂率泰。簡投誠軍。及荷蘭船出泉州。提督馬得功出同安。梧及提督施琅出漳州。十月。大軍克廈門。賊潰。琅以水師同荷蘭衆進擊。斬十餘級。乘勝克金門及嵵嶼。錦與僞忠明伯周全斌宵遁。尋犯雲宵鎮。總兵王進功遂擊破之。三年正月。僞都督杜輝獻南澳。授左都督。全斌亦降。授承恩伯。錦與僞永安侯黃廷等。擁衆保銅山。三月。繼茂率泰進攻。梧琅先後以兵出入金門。黃廷及僞將軍蔣求多等。率衆三萬降。遂拔銅山焚之。獲戰艦無算。錦載其孥渡海。

入臺灣。海上南島悉平。七月上。以琅諳海疆軍務。特授靖海將軍。以承恩伯周全斌。及降將左都督揚富爲副將。進剿臺灣。荷蘭以夾板船約期攻澎湖。會阻風不得進。四年。廷議徹兵。琅乃還。率泰遣知府慕天顏齎詔至臺灣諭降。錦請稱臣入貢。如朝鮮例。上弗許。嗣錦陰遣人往來島上。與沿海民互市。頗接濟爲姦利。琅密奏。若恣錦生聚。是養癰也。宜速剿。六年。召琅來京。又奏臺灣可取狀。下部議。以風濤險。剿勝難。必寢其議。十二年。耿精忠叛。應吳三桂。據福建。結錦爲援。錦復自稱由榔年號。糾衆渡海而西。陷泉州。事聞。上諭總督卽廷佐。以耿逆宜剿。海寇宜撫。會潮州總兵劉進忠叛降於錦。錦遂入潮州。執續順公沈瑞。及其孥。進忠復結錦圍漳州。梧病卒。子芳度嬰城守。以計佯與錦和。拒進忠。命平南王尙可喜發兵援之。十四年。芳度計泄。進忠圍興化。總兵吳淑等叛獻城。芳度督家丁巷戰。力盡赴水死。全家遇害。下沉其船。副將汪國祥亦敗。錦子克塽於廟嶺上。以海寇盤踞廈門諸處。勾山賊煽惑地方。由瀕海民爲之接濟。詔如順治十八年例。遷界守邊。四月。穆赫林黃芳世會師灣腰樹禦賊。帥劉國軒失利。賊遂陷平

和漳平及海澄。段應舉、穆赫林與總兵黃藍皆死之。國軒尋圍泉州。命趣諸道軍會剿。於是將軍喇哈達、賴塔總督姚啓聖由安溪出同安。巡撫吳興祚由仙遊出永春。提督楊捷由興化下惠安。總兵林賢、黃鎬、林子威以舟師由閩出定海。八月。大軍復平。和漳平。惠安。泉州圍解。啓聖同賴塔等追國軒至長泰。大破之於蜈蚣山。斬四千餘級。九月。復同安。斬僞副將林欽。十月。賴塔敗賊於萬松關。啓聖告捷。及副都統吉勒塔布等敗國軒於江東橋。又敗之潮溝。副都統瑚圖敗吳淑於石街。盡焚沉其船。賊黨遁據廈門。金門命厚集舟師取二島。十八年四月。以萬正色爲水師提督。國軒之遁也。啓聖遣人入島招之。弗從。啓聖因疏言鄭錦以臺灣爲穴。必不降。招撫無益。其僞武平侯劉國軒爲賊渠魁。請赦罪。許授公爵。並赦僞將軍吳淑罪。許授侯爵。若二人解體投誠。則錦勢孤。海寇可立滅。報聞。十月。副都統沃南敗賊於東石。斬林英。擒僞總兵陳深。十九年正月。正色請以水師攻海壇。而令興祚赴同安。與啓聖提督陸路兵。規取廈門。正色尋分前鋒兵爲六隊。逼海壇。親統巨艦繼之。又以輕舟繞出左右。並力攻以巨礮。擊破賊船。

十六。溺死三千餘。賊悉潰。僞將朱天貴遁。據南日湄州等澳。二月。正色追擊至平海澳。與興祚師會。天貴糾僞將軍林陞據崇武澳。正色乘風自平海南下。賊迎拒掩擊破之。斬僞總兵吳內。僞副將林勳。湄州、南日、平海、崇武、諸澳悉下。天貴降。沃申擊賊將張志於大定小定。連敗之。我兵水陸進趨玉洲。國軒走廈門。僞總兵蘇堪以海澄降。啓聖亦分遣總兵趙得壽、黃大來隨賴塔擊陳洲、馬州、灣腰山、觀音山、展旂、諸寨。興祚復同賴塔達等。由同安追剿至潯尾。遂克廈門、金門。餘寇遁還臺灣。八月。命於廈門、金門留兵鎮守。康親王還京。二十年正月。啓聖與祚疏請展界。俾沿海民復業。從之。是月錦病死。僞侍衛馮錫範等。以錦次子克塽襲爲延平王。其長子克壑被縊死。五月。上以臺灣賊衆內亂。仍命琅爲水師提督。同啓聖尅期進剿。時續順公沈瑞被繫在臺灣。與僞行人傅爲霖謀內應。事泄遇害。是冬啓聖與琅議師期。啓聖欲用北風由圍頭進。琅欲用南風由銅山進。議不協。二十一年。琅請簡水師二萬。戰艦三百。獨住討賊。又言不破澎湖。臺灣斷無取理。臣請先取澎湖。督臣留廈門濟餉。允之。二十二年春。國軒貽書啓聖。請

如琉球諸國例。稱臣入貢。啓聖以聞。上弗許。趣琅進兵。時國軒擁衆二萬餘。據守澎湖甚堅。六月琅軍發銅山。入八單。時乘南潮攻澎湖。斬僞將軍沈誠等七十餘。復以大烏船五十六分八隊奮擊。沉其船二百。斬僞官三百餘。兵萬餘。國軒乘小舟。由北門竄去。餘衆悉降。七月克塽。遣僞官鄭平英等乞降。琅請頒赦招撫。上敕諭鄭克塽劉國軒馮錫範等曰。帝王撫禦寰區。仁覆無外。卽海隅日出之邦。無不欲其咸登衽席。共樂昇平。爾祖父自明季以來。出沒海洋。盤踞島嶼。本朝定閩。爾祖鄭成功竊據海隅。甘外王化。以及爾父鄭錦。勾引奸徒。窺伺內地。屢經剿撫。頑梗怙終。爾方童穉。妄思效爾前人。竄伏臺灣。將爲窟穴。倚險負固。飄突靡常。以至沿海居民。時遭兵燹。朕念中外兵民。皆吾赤子。何忍聽其久罹水火。故特命提督施琅。選將練兵。出洋進剿。旋奏報澎湖已克。臺灣指日蕩平。總督姚啓聖。以爾等降疏奏聞。又據來使呈乞恩赦。朕體上天好生之心。特頒勅旨。前往開諭。爾等果能悔罪投誠。率所屬僞官軍民人等。悉行登岸。將前罪盡行赦免。仍加恩安插。務令得所。爾等其審圖順逆。善計保全。以副朕宥罪施行至意。克

壞既奉勅。遣僞官馮錫珪劉國昌齎送降表。琅令侍衛吳啓爵持榜示入臺灣諭軍民。薙髮。八月。琅率大軍入鹿耳門至臺灣。克塽及僞武平侯劉國軒僞忠誠伯馮錫範率僞文武官迎降。收僞延平王金印一。招討大將軍金印一。公侯伯將軍銀印五。其地設府一。曰臺灣。縣三。曰臺灣。鳳山。諸羅。自鄭氏據臺灣二十餘載。至是始入版圖焉。是年克塽至京。授公爵。隸漢軍正紅旗。克塽死。爵除。

劉澤清列傳

劉澤清山東曹縣人。明遼東寧前侍衛守備。遷山東都司簽書。加參將。本朝天聰四年。大兵攻明鐵廠。澤清來援。距鐵廠十五里。遇我軍轉戰至遵化。入城守。敍功。遷副總兵。五年。以侵軍糧被勦。令立功自贖。尋與昌平總兵陳洪範。副將方登化。參將祖寬等復登州。遷總兵。加右都督。統兵防漕。十年。我兵入明昌平。澤清入衛。駐新城。移守通州。加左都督。太子太師。時山東飢民聚盜。曹濮尤甚。澤清會總兵楊御蕃剿捕。尋鎮山東防

海流賊李自成圍開封久。澤清以五千人赴援。渡河立營。與賊持三日。拔營歸。軍士爭舟。多溺死。每妄報大捷。又詭墜馬被傷。得邀賞。令赴保定剿賊。不從。由臨清大掠而南。給事韓如愈嘗劾澤清。後奉使過東昌。澤清遣人殺之。李自成陷燕京。明福王朱由崧。潞王朱常澆。俱避賊至淮安。南京兵部尙書史可法。議立潞王。鳳陽總督馬士英。密結澤清及高傑等。迎福王立之。時議設淮揚廬鳳爲四鎮。以澤清鎮淮北。經理山東。封東平侯。恃擁立功。干預朝政。請以五月改元。又請宥故輔周延儒。禁巡按不得訪拏賊罪。又嚴緝故總督侯恂。及其子方域。福王皆從之。兵部侍郎呂大器劾馬士英。澤清阿士英指。力詆大器。陰懷異圖。大器乞休去。左都御史劉宗周。崇禎時以言事罷歸。福王起爲原官。宗周疏稱時政。語侵澤清。澤清遂詆其陰撓。恢復激變士心。並誣宗周與姜曰廣。吳牲等謀危君父。又私繕疏。連署高傑。劉良佐。黃得功名。上之。得功疏辯不與聞。傑良佐亦云不知。澤清氣沮。本朝順治二年四月。豫親王多鐸圍揚州。都統準塔分兵由徐州趨淮安。澤清率總兵馬化豹等五十餘人。兵二千。船三十。迎降。九月至京。賜居

宅衣服。授三等子爵。五年五月。曹縣賊首李化鯨。李名讓。張學允等。擁立明裔朱鳳鳴。養子李洪基爲僞王。陷曹縣。定陶。武城。東明等處。上命英親王阿濟格往勸。擒名讓。學允等解京。得澤清密通化鯨書。許爲內應。奏聞。得旨。劉澤清係世襲一品官。破格恩養。或出誣陷。亦未可定。自後不可私遣人往曹州等處。如曹州等處人來。亦卽送出。以防誣陷。八月。澤清遣人往東明。與從子之幹之繪書。事覺。命內院會同兵部鞫實。請治澤清罪。得旨。劉澤清荷恩至厚。待曹縣事平。自見明白。可任其同妻子居住。止將劉之幹等拿解來京。九月。械之幹。及化鯨。洪基。至。鞠化鯨等。爲之幹煽誘。澤清潛主謀。寄書有不可露我姓名語。奏入。命內院會同六部研訊確議。遂磔于市。親屬流徙。

馬逢知列傳

馬逢知原名進寶。山西隰州人。明安慶副將都督同知。本朝順治二年。進寶聞王師南下。首先具啓。遣使至九江迎降。英親王阿濟格。隨命招撫安廬池泰。巡撫張亮。總兵楊

振宗。副將李自春等。文武各官。及所統兵萬餘人。加總兵銜。入京陛見。賜一品服色。併莊田宅地鞍馬有差。旋隸廂白旗漢軍。改正藍旗。三年。從端重親王博洛南征。克金華。卽令鎮守。六年。命加都督僉事。授金華總兵。管轄金衢嚴處四府。七年九月。奏言臣家口九十餘人。從征時卽領家丁三十名。星赴浙東。此外俱在旗下。距金華四千餘里。關山迢遞。不無內顧之憂。懇准搬取下部知之。十一月。土賊何兆隆。嘯聚山林。外聯海賊。爲進寶擒獲。於賊營得僞疏稿。謂進寶與兆隆通往來。疏請明魯王。頒給敕印。又得僞示。稱進寶已從魯王。進寶以遭謗無因。白之督臣陳錦。以明心跡。錦疏奏聞。得旨。設詐離間。狡賊常情。馬進寶安心供職。不必驚懼。八年五月。予騎都尉世職。九月。總統台溫水陸官兵。攻魯王部將阮進。張名振於舟山。大敗之。九年四月。加都督同知。九月。率浙兵協剿海賊鄭成功。十一年二月。閩寇魏福賢犯衢州處州。進寶剿平之。十二月。加左都督。隨征福建左路。十三年。遷蘇松常鎮提督。十四年九月。詔改名逢知。十月。以江南總督郎廷佐奏。命逢知專管陸兵。使與水師提督梁化鳳。各無統攝。遇有警息。兩相犄

角。共圖戰守。十六年。海寇鄭成功犯江寧。連陷州縣。梁化鳳擊退之。九月。部臣劾逢知失陷城池。當鎮江失守。擁兵不援。賊遁又不追剿。應革世職。並現在官。徹取回旂。得旨。馬逢知免革職。着解任。先是戶科給事中孫光祀密糾逢知。當海賊犯江甯時。竟不赴援。及賊復攻崇明。爲官兵所敗。反代其請降。巧行緩兵之計。鎮海大將軍劉之源。江南總督郎廷佐。蘇松巡按馬騰陞。先後疏報。僞兵部黃徵明。乃數年會緝未獲之海逆。今經緝獲解京。其姪黃安自海中遣諜陳疎。謹夤緣行賄。計脫徵明。並貽書逢知。傳遞關節。禮科給事中成肇毅。亦疏陳逢知通海情形昭著。今雖奉命撤回。而蘇松兩郡之民。受其魚肉侵凌。傾家絕命者。指不勝屈。請卽逮治。並令撫按嚴究黨羽。十七年六月。命廷臣會鞫。以逢知交通海賊。擬並誅其子。八月。上以未得逢知叛逆實事。命刑部侍郎尼滿。往江南同之源廷佐確審。尋合疏陳奏。逢知於我軍在沙浦港獲海賊柳卯卽聲言卽係投誠。賞銀給食。託令往招撫。縱之使還。又海逆鄭成功曾遣僞官劉澄說逢知改衣冠。領兵往降。逢知雖聲言欲殺劉澄。反餽以銀兩。又遣人以書通成功。並示以投

誠之本。又私留奉旨發回之蔡正。不卽斥逐。並將蔡正之髮薙短。以便潛往。且遣人護送出境。是逢知當日從賊情事。雖未顯著。然當賊犯江南時。託言招撫。而陰相庇附。不誅賊黨。而交通書信。兼以潛謀往來。已爲確據。疏入。仍命議政王貝勒大臣核議。尋論罪如律。逢知伏誅。

明末叛臣傳 卷四

勸 訛 表

卷數	頁數	行數	字數	訛
卷一	三	七	四	陳棟
同	五	九	六	宣冒
同	六	七	二	紅江
卷一	二	二	三三	厥歷
同	三	三	十九	後復
同	一	一	三三	弟第
同	一	一	三三	貝侖
同	四	四	三〇	人才
同	四	七	一	禦衛
卷二	二	五	二	其具
同	二	十二	十一	與荆州
同	二	十二	十九至二一	荆州與
同	二〇	五	十三	良辰
同	一九	十一	一及二	戰創
同	一七	二	二一	創戰
同	一四	十	三〇	王攻
同	一一	一	十三	奏奏
同	三	三	十九	糾糾
卷一	二	二	三三	昭昭
同	六	七	二	湖清
同	五	九	六	寶寶
目錄	三	七	四	雄正

卷數	頁數	行數	字數	訛
同	一三	二	十二	同
同	一四	八	二三	同
同	一五	二	十	同
同	同	四	二二	同
同	同	十一	六	同
同	一六	二	五六六	同
同	同	三	一八	同
同	同	七	二二	同
同	一七	三	十一	同
同	同	七	六	同
同	十八	五	九	同
同	十九	七	一	同
同	同	九	六	同
同	同	十二	六及十	同
同	二〇	一	三	同
同	同	六	十	同
同	二一	二	十六	同
同	同	三	二四	同
同	一	五	四	同
卷三	三	十二	十九	同
同	六	三	一	同

禁 貴 廷 暑 木 年 除 橋及等 兵 澆 韶 界 省 造 受 黨糾 公 懷 設 寺 同 正
 焚 桂 延 署 水 平 陳 梁及黨 其 鮮 韶 男 皆 剿 兵 糾黨 分 部 攝 都 同 正

表姑託移贈圖書

上海图书馆藏书



A541 212 0022 9465B

